

近代中國史料叢刊續編第四十輯  
沈雲龍主編

止菴詩存·外集

周學熙著

文海出版社

有限公司  
印行

山  
卷  
詩  
存

尹默題



中華民國三十  
七年七月初吉  
至德周氏藏版

## 止菴詩存序


今人言詩者有新舊之別何謂舊恪守前人法度選詞貴雅運事必審聲調氣韻或崇魏晉或摹唐宋隱然各有其疆域非習之數十年不能達其堂室者是爲舊詩何謂新出口成文純任自然句之短長殊無定式多不用韻等於常談其體仿自西洋是爲新詩二者之間嚴守畛域互爲詆斥幾有不能並立之勢余竊非之夫詩以言志言志者所以抒寫其性情而非用以彰文字之美若必逞妍鬪巧則是桎梏其心思而何有於言志然必如新詩之盡廢格律毫無可以吟詠之趣則竟寫散文可已而又何有於詩余不能詩而獨喜讀白氏長慶集展卷吟詠深有感於吾心謂是爲詩人之詩不圖今又於周君止菴得之止菴之詩冲和雅澹置之長慶集中殆無少遜其鳧莩詠枵腹吟及憫世慨世勸世諸作則白氏之諷喻詩也其趣圍吟山居雜詠知足歌七十述懷病中自廣及告諸子寫入生壙諸作則白氏之閒適詩也其憫華僑歎災民哀族難悔過吟諸作則白氏之感傷詩也止菴先官直隸有政聲民國既建長財政多所擘畫尤以振興實業爲務其宦跡與白氏若相類若不相類而從政不得行其志潔身引退暮年多病栖心釋梵則全與白氏合其所作詩大都成於退居之後自言以香山放翁詩爲養心藥餌故濡染於白氏者尤深史稱樂天詩詞書於觀寺郵候牆壁之上道於妾婦

牛童馬走之口繼寫模勒銜賣於市井村校兒童競習歌詠斯集既成流播之廣殆將如是則止菴之詩其必可於新舊二者間各據一席且可爲之溝通也乎民國紀元三十七年十月世姻愚弟海鹽張元濟拜序

止菴詩存自序

余本不能詩弱冠從事舉業專習試帖中年風塵奔走學殖荒落迨暮年多病百事謝絕乃喜讀香山放翁詩聊當養心藥餌亦無意于吟詠偶有所觸率成俚句隨手棄去不復收拾今兒輩從故紙堆中搜得若干首錄而藏之又自丙寅歲起吾宗子弟聯師古堂月課每拈題擬賦以爲之倡有若干首并附于後竊維詩以言志折楊皇華皆足寄興不必計其詞之工拙且觀古人有積數十年心力而不得一紙之流傳者又或本非詩人而其單詞隻句反膾炙人口者此殆有幸有不幸歟然則詩之工者未必傳傳者未必工當其時不過如歐陽公所謂鳥獸好音之過耳而已何所容心哉吾詩雖拙亦可見吾之所志故姑存之聊示雪泥鴻爪云爾不足供大雅一粲也乙亥九月止菴

手記



止菴詩存 上卷

至德 周學熙 緝之著

養疴北海晚飯後散步 乙卯嘉平

歷朝臨幸地 所居在北海之東岸小山巔三楹曰崇樞又山半 容我短簾掩池小橋添

曲 山北有小橋不盈故 廊迥路失坡 山上下無登陟之苦 晴皋殘雪少 今春極少 高樹

夕陽多 山居太放逸多 何處清笳起 蒼茫發浩歌 近因川旗有事操練極勤

見心齋 此數楹在丙辰儲居養病基春方見杏花

樓臺彷彿畫圖中 六百年間事已空 卻問天心何處見 一枝紅杏笑春風

丙辰正月二十一日感懷 去年是日被命再長財政

誤染縑塵又一年 江湖回首倍依然 女媧煉石天何補 精衛銜山海豈填落落孤雲聞

唳鶴茫茫遠水墮 飛鳶尊鱸那及桃花顰剩欲乘春放釣船

南游雜詠 五首

雨中登常熟方塔遠眺

亭臺隱約見 辛峰點染湖山翠幾重恰似范寬圖畫裏更饒西寺一聲鐘

雨中遊西湖

二十年前此舊遊 今朝攜子弄扁舟六橋堤上蕭蕭雨萬柳塘邊瑟瑟秋城郭已非憐

止菴詩存



去鶴江山猶是問浮鷗清時美景閒難得到處臨歸爲小留

冒雨遊湖西諸山

笠屐乘幽興名山獨往回雲依巖黛轉雨挾瀑花來

庚句

晚晴登五雲山

新晴山色好來陟五雲巔圖畫羅千里旃檀邈百年峰迴疑礙日江迥欲吞天搔首風塵外乾坤意渺然

登廬山牯嶺望雲海

飛棧方驚蜀道難白雲堆絮忽漫漫廬山真面今誰識且作滄溟萬里看

丁巳仲春遊鄧尉先宿玄墓寺次晨冒雨觀梅匆匆而歸

二首

柱天勳業等雲烟喜得名山姓氏傳十里香花千載伴幾生修到郁公緣

郁泰女也

基在常州刺史

笠屐匆匆破曉烟萬株香雪不虛傳花枝有盡情無盡留與名山結後緣

趣園偶題

戊午

聯峰之麓臨滄海新築園林擬輜師槐下有風清午簟荷邊過雨漲秋池偶看西子凌波戲閑赴東鄰把釣期粟里商山今不遠會心深處鮮人知

花陽小築落成

二首

回首平生馬少游人間萬事付悠悠小齋臨水軒窗淨曲徑環山草木幽閉戶光陰如太古寄懷風月亦千秋殷勤一片江南興疏柳門前繫釣舟

滄桑幾度賦歸來萬事從今笑口開性定空山忘歲迴神完大地見春回招呼風月鋤三尺收拾乾坤酒一杯綠野堂前舒愛日漁歌樵唱頌臺萊

喜七弟過訪北戴河趣園見賦二律奉和原韻庚申

紛紛朝市輒紅塵誰訪桃源古渡津茅屋新茨堪下榻石舟垂釣可怡神千重翠嶂詩中畫幾緬青芒物外人領略山林閑經濟羞稱廊廟有絲綸近奉旨辦棉業之命辭不獲已先設籌備處以通民

退舍休牽上瀨船千秋泉石為誰妍山川俯仰成陳迹風月婆娑有宿緣涉世久拚菱作艾會心同悟火栽蓮海天浩渺情無限願祝人間好夢圓弟昔有水閣之議近雖得戴河東沿地四十餘畝此願未知何日遂也

趣園吟并序 甲子六月

憂居三載久廢吟詠今夏重來海濱讀中峰禪師廣錄于靜中觀物妙動處悟真源覺人生得失榮辱皆屬幻緣苦樂悲歡本無自性返觀內照煩惱即是菩提世人徒自縛耳因長言以詠之

昔營小築東海上倏忽寒暑已十更數椽茅屋雖云陋千樹槐柳午陰清問余胡為甘

寂寞自來幽趣無人爭放眼不觸塵埃障側耳不接市井聲檻外凌波滄溟小杯中倒影星辰傾君不見桃花源裏猶人耳山川信美疑仙城淨土極樂對咫尺唐虞未邈在平明松爲妻兮鵲爲子風吟雨噪皆天成吁嗟乎莊生齊物乃牘語韓子非達仍善鳴世間萬事空如洗一室盎然太古情我正逍遙忘歲月始知土苴亦長生

趣園卽事

小園數畝剪榛荆閉戶偏多物外情脫著簪衣旋冷暖淺深花影判陰晴低承墮露蛛絲重高趁斜陽燕腹明更有中宵會心處前村天籟起驢鳴

白玉簪

由來色相盡虛花自有幽芳對晚霞閱世風塵泥未浣前身冰雪玉無瑕清陰乞護依林下白石尋盟傍水涯千古美人在空谷一般秋思落誰家

雨後見月

一樣團圓月今宵覺倍妍山空新雨後海闊近秋邊光豈殊清濁形寧論缺圓從教塵宇淨萬里鏡孤懸

乳燕

御泥燕子爲誰忙幾日飛雛各四方應會天心無私覆人間得失渾相忘

海濱觀月

雨洗天方淨，秋高月更親。  
蟲聲聞唧唧，樹影見鱗鱗。  
玉宇彌空際，金波絕點塵。  
渾忘今世界，却悟本來身。

秋田喜雨

隱隱輕雷送雨聲，山田霑足喜秋成。  
農民一飽關誰事，且卜天心見太平。  
海上小舟

碧水茫茫遠接天，扁舟一葉任風牽。  
休言萬里乘槎客，若個人登彼岸邊。  
趣園下山作七月二十七日

年年遊屐太匆匆，幾度幽芳寂寞紅。  
今日倚裝與花約，好凌霜雪待春風。  
聞宣統遜帝前日步遊香山有感

隆準人稱萬乘尊，即今徒步訪山園。  
崖前尚有遼時柏，休唱庭花欲斷魂。  
奉和姚慎思李公祠頤園納涼二首

門外原無市園中，別有天虛堂風自遠。  
近水月能先蓮動，魚兒戲林深燕子穿。  
炎涼隨地易襟抱，故超然

相業垂千古，遊人憶勝朝。  
寄懷瞻古柏，乘輿渡平橋。  
流水鳴琴杳，空亭待鶴招。  
夜來明月上，把酒欲相邀

八月六日到香山松雲別墅甲子

四圍山色翠濤傾快似蛟龍縱壑情不用丹經研秘訣臨風洗耳聽松聲  
香山雨中作

白絮漫漫作浪堆新秋一雨淨塵埃參差樓閣依稀見恰似仙山海上來

山居卽事二首

山居幽趣與誰論數卷經書掩門三徑草深風習習一窗松老雨昏昏泉鳴細竇聞  
嗚咽雲度層崖看吐吞耳目都緣天宇淨欲評色相已忘言

紛紛寵辱且休論百丈紅塵不到門村舍絃歌忘歲月寺樓鐘鼓送朝昏清風入牖情  
如舊急雨摧山勢欲吞因悟世間憎愛盡天心消息本無言

清暉閣

小閣崢嶸倚翠微凌烟無夢到荆扉人間晚景須珍重日日憑欄送夕暉

聽濤軒

滿壑松風靜不譁濤聲偏喜到山家夜來好寄平生快皓月長空萬里槎  
仰止堂

石橋西畔小茅堂窄窄柴門短短牆山色溪聲關不住動人詩思到江鄉

習靜齋

萬松深處卜幽居靜對青山展道書一炷爐香清晝永不知身已到黃初

甲子八月至德縣壽石山房落成喜賦

何代摩崖壽宇開，草堂今始起山隈。  
相期月夜敲詩鉢，待風晨把酒杯。  
幾片白雲浮檻出，四圍青嶂撲窗來。  
故鄉勝蹟垂千古，快事平生第一回。

甲子六十初度二首

六十年來爲底忙，于今悟得自心王。  
世情蒼狗雲千態，身事黃梁夢一場。  
本不應來無足快，便從此逝又何傷。  
花開週甲重新數，記取池蓮絕妙香。

堪笑人間畢世狂，聊將粥飯答年光。  
明朝未必今朝是，來日何如去日長。  
般若一經無盡藏，彌陀六字自資糧。  
相期得證無生忍，攜取醍醐共舉觴。

乙丑元日試筆二首

六十一年金玉身，于今幸作太平民。  
天心若致唐虞盛，自有皋夔濟世人。  
鞀鼓聲中舊歲除，及今四海共車書。  
屠蘇飲罷人稱壽，斗室網緼似泰初。

遊普陀雜詠七首

閏四月十五日到普陀步姚慎思原韻

扁舟來佛國，島嶼勢迴旋。  
塵外原無世，山中別有天。  
金波浮日月，紺宇入雲烟。  
不學長生術，逍遙已是仙。

宿寺樓烈風竟夕

止菴詩存

四

帶海橫吹一夜風，夢魂搖曳樹聲雄。朝來試起推窗看，多少危舟駭浪中。  
磐陀菴僧出示萬歷玉帶

煌煌帝業等雲烟，玉帶於今四百年。莫道天家遺璽在，何如佛國有燈傳。  
登佛頂山遊慧濟寺

攜筇直上一峰孤，俯瞰滄溟地欲無。古寺雲開新雨後，虛堂烟定放參餘。帆懸白水飛明鏡，簾捲青山入畫圖。放眼塵寰成極樂，百年端合寄僧廬。

仙人井外觀潮

雷奔雪湧海天荒，欲問瀛洲意渺茫。駭浪堪驚人世險，放心地是慈航。  
寧波天童寺淨心上人屬題觀音洞水月亭

攜筇直上石崖巔，俯瞰塵寰意渺然。洞裏乾坤人不識，心空隨地有金仙。  
松風未足比清華，語下明心是到家。悟得楊枝空色相，莊嚴還仗古烟霞。  
定海道中

島嶼迴環四面通，舟行竟日畫圖中。浮天點點青如滴，道似江南實不同。  
庭中楸樹今始着花喜賦

一樹高楸十載栽，今年始得報花開。庭前喜氣盈千尺，從此春風歲歲來。  
冒雨遊旅順舊臺感懷 二首

光緒初先公任津海關道兼沿海營務處頻年渡海與先岳劉鄉林公經營旅順海防予時率內子歸寧砲臺船塢皆先岳督修苦心毅力駐旅十年後履烟台登萊青道任甲午旅大威海淪陷而烟台獨全豈非人謀勝天心耶至今烟民祠祀之

冊載先公攬轡臨于今遺壘尙崢嶸山川不盡興亡恨日日潮頭有怒聲  
欲訪羊公墮淚碑天寒霧雨正霏微愴懷幾度滄桑後猶是當年老令威  
觀旅順戰圖

海天莽莽漲烟塵彈雨橫飛殺氣昏今見畫圖魂欲斷可知當日荷戈人  
大連老虎灘卽景

數椽聊借虎灘頭門掩松陰曲徑幽野市徧懸沽酒旆村童慣習弄潮舟天連水遠浮  
仙島雨散雲開見蜃樓寄語縹緲名利客何如物外得清遊

參觀傅笠漁青年會學校

安定遺規世鮮宗何期今日見高風百年塵劫歸遼鶴萬里煙雲付冥鴻周室菁峨開  
治譜漢家草澤崛英雄佇看海宇澄清業盡在先生杖履中

石本別莊題壁

昔年每在北戴河道暑今夏避地至大連僦居老虎灘日本人石本鐔太郎別



莊傍山臨海頗得幽致

海外重尋近水村人間難覓舊巢痕連山虎踞藏深壘曲徑蛇蟠上嘯園舍後有樓萬里金波天際曉幾家燈火雨中昏殘年住世原為客省事經旬不出門

奉題李君道衡大連勸業博覽會出品圖說

海徼風雲迭長雄廿年生聚闢鴻濛豈圖鸚鵡來珍異已卜車書見大同月旦品題超象外經綸成算本胸中他年萬國衣裳會佇奏量才玉尺功

約道衡為嚮導未值遂獨尋金州北山響水寺滿山皆松泉從殿旁洞出流過階

除瀟澗作三疊如小瀑布聲甚幽韻因賦一絕凡月

乘興驅車上翠微一菴獨叩白雲扉平生願識廬山面三疊泉聲似或非廬山有三疊泉最為名勝

十月十六暮雪

紛紛白雪糝空庭滿目雲山失故青最好樓臺明遠岫兩三燈火似疏星

暮雪獨坐寒甚感賦

倚杖風迎袖憑欄雪滿衣忘情詩淡泊久客夢依稀山近寒光集天低暮色圍茫茫塵宇淨萬里雁孤飛

雪霽怯寒閉戶

積雪仍封徑高齋獨掩扉寺遙鐘韻短地僻市聲稀落日淡無色孤雲寒不歸爐香伴

清坐息盡萬緣非

六十一初度感賦

六十一年同幻夢三千里外寄閑身  
烟雲變滅青山在蓬梗飄零白髮新  
塵世蟻多浩劫故園桃李幾芳春  
浮生不是無歸處指上分明月滿輪

二月二十六日到香山松雲別墅桃花正開喜賦

丙寅

一樹桃花撲面紅春光也自到山中  
放教萬壑青松裏看是繁華卻不同

香山登清暉閣遠眺

千村桃柳豔無邊渺渺平原錦繡川  
更上最高峰頂看星羅棋布到胸前

香山觀雪

白雪春風亦快哉光搖銀海淨無埃  
漫山松翠驚如失萬樹梨花一霎開

香山小住偶題

世外原無劫園中別有春樹幕風氣  
勢花借雨精神屋小爐香久山深鳥  
迹馴羲皇猶在眼莫問避秦人

香山晨起小雨又聞礮聲

三月初五日

隱隱輕雷細雨飛烽烟忽起四山圍  
枝樓尚有飄搖感堪歎哀鴻何處歸

盛暑得雨有秋意

二首

炎午能令金石流蕭然暮雨倏成秋人生容易驚霜鬢大造何心判葛裘  
衰年火宅苦炎熇一雨欣然百慮消喚起江南烟水興扁舟載酒過湖橋

重遊勞山柳樹台二首

依稀舊隱傍巖前一別蕭條十二年滿目青山尙如昨笑人雙鬢已皤然  
誰把山林作戰場十年三度閱興亡崖間危石依然在堪笑人生爲底忙

七月中夜泛海二首

朗月孤圓碧海深金波萬點夜沈沈輕舫獨放蒼茫裏快寄平生落落心  
皓月當空萬里秋扁舟恰似鏡中遊寄聲朝市縑塵客可有今宵此樂不

大連月夜泛海二首

滄溟放棹欲何之正是風來月到時一樣清光三萬里天心原不判華夷  
天高玉宇淨無塵大地山河日日新今夜月明滄海遠浮沈誰識鏡中身

丙寅大連中秋對月三首

十年孤劍伴征鞍遼右居然老幼安今夜月明秋萬里不知身在旅中看  
放懷高詠獨憑欄月色偏宜海上看百丈紅塵飛不到興來忘卻五更寒  
浩然風露海山間吹盡浮雲月自閒住世已如千歲鶴夢魂猶繞漢時關

喜晤李薑隱同年贈詩奉和原韻

聯臂簪花日驚心已卅年清風懷海上舊雨聚樽前高臥雲封屋營生菓代田商山今再見未讓采芝賢

邵君慎亭邀閣君紉韜李君道衡黃君越川同遊響水寺張道士殷勤具鷄黍薄暮始歸

萬松迷衆壑一徑入仙居賓主情如故杯觴樂有餘清泉喧亂石落日伴歸車好記雲深處他年共結廬

題王岷源字幅爲慎亭

一日班荆成永訣數行珠玉見平生他年化鶴歸來日華表山頭看海清

題孫君夢錫海上琴緣圖

披圖海上共移情千載孤桐寄意行借問崖前隱君子太公何似伯夷清

風雪中傅君笠漁見訪

門掩空山野徑斜寒風栗烈雪飛花數聲淒斷穿雲雁一片依稀點樹鴉白髮無情侵歲晚青燈有夢到天涯袁安深愧高人訪卻憶山陰好事家

遊湯崗子卻憶江浦溫泉

丙寅十月二十六日

隆冬日暖似春初沂水高風樂有餘莫恨江南歸未得天心原自慣乘除

營口回大連道中遇雪

止菴詩存

七

平生百事仰天公，幾日清遊興未窮。  
正恐歸途偏寂寞，故教瓊玉戲空中。  
輓大連雙貞女

大患從來爲有身，雙雙白璧竟成塵。  
可憐北里嬌癡女，猶似紅羊劫裏人。

斗室

菴居歲月捷飛騰，門外滄桑幾廢興。  
托足儘同棲樹雀，安心遂比閉關僧。  
一尊繡佛清齋鉢，數卷青緇小炷燈。  
堪笑莊生觀未達，逍遙何必羨鯤鵬。

丁卯人日賦寄緯齋青田

金戈匝地動春雷，何怪昆明有劫灰。  
逆旅光陰欺弱柳，故鄉消息問寒梅。  
天津橋畔鶻聲遠，冥海濤頭蝶夢回。  
閑坐小窗生意益，山茶初試一枝開。

沾上修襖分韻虹字

永和陳迹太匆匆，俯仰無心任化工。  
三月鶯花頻入夢，千年詠事已成空。  
幼安異地雲留鶴，逸少斯文氣吐虹。  
滿眼金戈天自朗，一觴羨不負春風。

庭花盛開病起感懷

三首

料峭春寒病骨摧，空庭寂寞報花開。  
吟箋欲展情無那，獨把遺山誦百回。  
幾樹新花閉院門，厭厭扶病怯芳尊。  
少陵無限東州恨，欲詠兵車已斷魂。  
綽約花枝颭晚風，病回春滿四山中。  
焚香細讀桃源記，欲訪清溪放釣筒。

安奉道中丁卯八月

重巒從古障迴川車轍于今掣電穿山洞每洞前後阻溪關皆架橋而迴天限華夷人語別中韓蘆隔一鴨綠江舟車地聯海陸市情便中日韓三國百貨漫山紅紫楓榛樹

夾道青黃稻菽田沿路多高麗人來開水田父老未忘先德事星霜飛輓說當年甲午中日之役先

皆任前敵營務處兼辦糧台時無火車冰天雪地馳驅于風塵城連山開關千里運籌艱難萬狀

九月中由大連至旅順沿途滿山紅柘青松炫爛可愛

海澨延秋逸興酣林巒秀色撲征驂此中合着詩人未紅樹青山憶劍南

感懷

殘生已似再眠蠶俯仰乾坤入夢酣風捲落花紅片片雨催新柳碧毵毵蔬齋一鉢忘兼味茅屋三間勝住菴何日得尋雲水去芒屨竹杖遍江南

七弟見懷青島消夏一首卽步原韻

利名刊盡一身閑滌蕩襟懷祇有山月下收罾魚極樂雲邊帶箭鶴孤還健攜芳榼青峰頂狂弄扁舟碧水灣海外烟霞期共老勸君莫惜鬢毛斑

海濱六十有三初度七弟寄賀率步原韻以博一笑

相期同作武陵人海嶠歡生斗室春持偈好捐身外事還丹常養谷中神消磨歲月雙芒屨俯仰乾坤一幅巾已種蟠桃堪共老不愁雀噪對空囷

止菴詩存

戊辰二月十七日微雪初晴登香山過玉華山莊栖月崖雨香館循玉乳泉而歸  
得句

破曉杖策獨方羊輕寒料峭雪似霜披徑綴衣草露白入林霑屐松花香畫棟雀穿知  
人闐印泥鴻迹笑我忙貪看春雲遲出岫山中一日如年長

戊辰新秋青島消夏

天青雲白十分晴幾樹槐陰午更清誦罷黃庭無一事北窗高臥領蟬聲

七弟見示詠懷率和

戊辰七月青島病愈

白頭歲月苦駸駸萬事烟雲忌有心悔不讀書無那老憂從識字直于今打包剩禮三  
龕佛買宅寧期十載陰擊碎乾坤高着眼頓忘塵劫罷呻吟

金志安評示青島下河地格和以答意

存吾順事歿由天何處青山不可扞方寸久知無礪魄彼蒼要自有銜璣茅檐孫子期  
千禩草澤英雄得幾年願束芒屨隨杖履北平遊約踐言

題楊味雲三月城南觀桃園

井序

今春暮入燕京味雲約隨樊山諸公遊零壇山桃盛開一時吟興頗酣散後匆  
匆東渡回首有滄桑之感八月令蕪攜此圖過連灣屬題率賦二絕以志雪泥  
繽紛紅雨落杯中雋語深情妙化工留得畫圖千載後風流當與永和同

秋風容易到天涯幾日春城爛熳花無那桃源漁父恨重來始覺是仙家

題無錫貫華閣圖二首

清平佳士重憐才此閣風情亦壯哉一代人文關氣運豈徒名勝足低徊  
滄桑萬事付雲烟高閣欣成劫後緣天地有情終不老好留圖畫到千年

六十有四初度辱荷武青田吳伯生詩祝感懷答謝

天留老眼看桑田且幸膠東有數椽四海鴻嗷空袖手一生鶩鈍負華顛幼安遲暮終  
歸里永叔艱難尙表阡但使河清人可俟多君美意頌延年

移家青島適值賤辰承伯生詩賀率賦答意

漫道桃源好避秦已觀東海幾揚塵百年幸有青編在兩曜偏催白髮新天下蒼生思  
衽席人間景福待經綸感君妙轉扶輪手黍谷能回歲暮春

戊辰冬舉室離津感賦二首用迴環韻寄呈七九弟兼訓諸子二首

沾上萍蹤六十年綵衣錦紱倏華顛敢誇世澤門興駟堪歎心期水墮鶩事業幾隨征  
戰盡姓名翻畏道塗傳千秋先德空回首青草祠堂日暮煙

巢空一瞥付雲烟獨抱遺經待子傳紙上是非多鹿馬塵中飛躍任魚鳶得人可挽滄  
桑劫閱世須登泰華巔寄語雁行同努力希夷合有墜驢年

盆蘭並蒂二首  
己巳人日



幽芳兩雨喜同心開向尊前寄意深鄭重山林涵養日也曾飽受雪霜侵  
孤芳自賞苦無鄰並蒂花開卻有因世外桃源何處覓一菴長養十分春

焯恩二子游美易言己巳七月初三日行

莫負四方志真成萬里行天空異域近海闊暑風清習向觀民隱盈虛辨國情胸中塵  
俗淨所得自分明

己巳九月重遊潭柘寺

偶尋方外入山遊回首雲烟二十秋宣統庚戌九疊奇峰真鬱勃千年梵宇尚深幽拂  
簷修竹參差出繞砌清泉曲折流莫道燕京名勝少江南寺寺有斯不

己巳重九日同立弟宿戒壇寺

鞍山寺裏又重陽綠樹迎霜已半黃千歲虬松枝偃仆五朝螭碣字微茫粥嫌數米知  
年歉衣待裝棉怯晚涼話久卻忘清夜徂起看斜月過西岡

己巳六十五初度二首

多難餘生真若浮又開六十六春秋家如旅舍誰賓主身似輕雲任去留殘齒天教蠲  
肉食病腰人羨耐園遊新傳半偈長生訣一炷爐香歲月悠

欲待河清奈老何偏憐斗室得春多蘭芽競茁愚兼魯棟鄂聯芳嘯且歌市虎已教拚  
墮瓦冥鴻原不憶張羅卽今便悟空王理萬變雲烟一笑過

庚午六月六日遊青島市外九水登窰各村

逶迤海澨自成村石疊梯田水繞門終歲勤劬甘半飽也勝戎馬徧中原

有感

突鬢蓬頭短後衣夷風漸靡古風微百年禮樂難求野一室芝蘭欲掩扉東里西施誰  
竟是壽陵餘子若爲譏癡頑莫笑深村叟老死山林未必非

觀遠海漁舟

天低浪闊碧沈沈帆靜還如不動心歷徧風濤三十載卻從漁父覓知音

閉戶

坐旁斷簡隨時讀庭下幽花次第開往事全拋空規外卻疑身似夢中來

庚午八月偕立弟入香山痔發未能登陟喜沉叔見訪

西山最愛晚秋天無定陰晴態更妍紅葉漸添花錦繡白雲飛起玉蜿蜒四郊村落如  
圖畫百里峰巒列几筵微疾未能追杖履好風吹袂亦欣然

庚午八月巨溟同年偕遊香山一宿而別惜未盡興

卅年馨桂氣相求把袂名山契更幽松影罨窗多暇日泉聲繞砌盡清流天連遼冀乾  
坤大地屬金章歲月道正喜崖前紅樹晚停車好爲夕陽留

巨溟同年六十壽

庚午八月二十四日

四十餘年踏輦塵於今欣作葛天民千秋著述懷鉛槧一代坊型仰席珍飽德未妨甘  
食淡多文那復計家貧名山事業無疆壽奚羨莊生說大椿

大隱本無朝市爭門欽通德有清名豔傳棣鄂登科事喜讀萱幃正雅聲籬下晚花陶  
靖節帷前生草鄭康成優游歲月唐虞世好誦南山進兕觥

庚午重陽雨後繼以大雪展讀樂天放翁詩二首

黃花時節雪漫天紅樹青松分外妍山徑寂寥人迹罕好迎白陸到窗前  
虛簷聽雨興方賒十日山林便是家造物念人甘冷淡故教白雪映黃花

詠諸葛

功名自古怨天慳盡瘁終輸高臥閑六出未回三鼎祚空留遺憾在人間

六十六初度二首

世難生如寄年衰感獨多舊交詩裏見佳日病中過不雨雲歸壑奔林鳥脫羅安心今  
有法歲月敢蹉跎

一身如掣電萬事等浮煙但使貧能濟遑憂子象賢室溫梅耐久窗冷月增妍不學餐  
芝術虛懷儘足仙

辛未元旦

忍疾扶衰又見春荆妻相慰白頭親世尊萱莢初開日家重屠蘇後飲人堂構竟分千

里遠梧槽猶薦百年新延齡何必昌陽復一盃藜羹飯味真

辛未正月過津舊寓登樓見辛卯揚州所得舊琴匣破塵封琴囊有僧小航畫山水感賦

廢巢燕去偶登樓琴匣塵封斷未修四十一年驚昨夢尋僧論畫到揚州

辛未養疴西苑一甫來遊數日即歸

漫言容易又新秋總角論交盡白頭爲愛清泉尋廢殿空邀皓月弄扁舟心摧遼海千年感興繼斜川五日遊鄭重與君期晚節菊花香裏入山不

養雲軒古木

老樹扶疏日影長托根猶及見君王奇材自古嗟盤錯大廈於今想棟樑青杏纍纍曾玉食蒼松鬱鬱尙天香百年雨露消磨盡輪與遊人一夏涼

西園養疴

秉燭光陰百慮除日長人倦午拋書靜聽小雨喧還寂閑看輕雲卷復舒巖壑欲登身轉怯杯盤雖具意先疎不因椎髻來相問全似山僧退院居

湖上雜詠四首

一雨全消暑氣空新荷偏趁夕陽紅緩拖籐杖闌干角飽領清香陣陣風  
天教白髮遂閑情獨步空廊聽鳥鳴松際清光深夜月驚心偏是子規聲

水態通明春似海山容靜穆日如年相看不厭人來往數盡鷗邊隻隻船  
雨過雲開見遠山忽看倒影入波間天光上下皆虛幻晤得空明處處閑

病中口占二首

將心何處倩人安白髮青燈強自寬但得胸中無一事也勝百服少還丹  
飢渴從來禹稷年不聞陋巷有憂煎風雲變態吾何與剩欲騎驢太華巔

六十七初度二首

天涯霜露不勝情邱壠心傷缺醴牲萬里關河驚斷夢百年鄉社負歸耕養身鏡裏鬢  
毛白抗志樽前髀肉生幸有遺經付孫子夜窗相伴短燈檠

迂儒何計答年光占盡癡頑老未妨性定驚濤還坦蕩身閑寒日亦舒長重編舊學書  
無佚別卜新阡骨有藏從此逍遙殘歲月扁舟隨處武陵鄉

壬申元旦口占

六十八翁新歲月一家四處喜同春止園半畝風光好幸作唐虞擊壤民

自勸二首

歲月侵人日夜馳清遊火急莫須遲山高水遠多幽處會有登臨不得時  
盈虛消長總由天酒美從無不散筵往事漫嗟飛鳥迹譬如六十八年前

壬申正月作

讀金剛經感言

煩惱俱生幻識中光明本自與天通須知般若純真際不獨魔空佛亦空

師鄭同年以鄉薦四十年爲杯酒之約適養疴西山賦詩寄謝

彈指蟾宮四十秋清輝無恙不勝愁論交文字皆青眼話舊風塵盡白頭尊酒愧君虛  
左席山林容我作孤遊他年重宴承平日同詠霓裳聽鹿呦

答巨溟琴石論詩

千古詩人里巷間兔爰鴻雁不須刪故宮禾黍多哀思白雪皇荑總一般  
有感

貧乃士之常病則老所同君胡不自適鬱鬱於胸中淵明有道者茅屋遭祝融樂天信  
達士六十身被風而其心磊落真可摩蒼穹人生真寄耳所守在寸衷形骸爲外物金  
紫盡樊籠於斯生厭喜無乃鳥迹印天空

南海日知閣題壁

壬申五月十八日

歷盡風波萬里船天留老眼看雲烟鑑湖一曲今誰賜容我逍遙過十年  
飄泊身如不繫船望中樓閣若浮烟問君日日知何事一覺因循五百年  
屋小纔如一葉船林間巖壑渡頭烟留連風景忘身世猶是桃源放棹年  
閣小如乘天上船宮花寂寞柳含煙曲江風物今何似堪憶唐人及第年

山居

數椽茅竹傍松居，戶滿青山案滿書。一點無塵人境絕，直疑身世到華胥。

山居雜詠四首

雨後散步

攜得枯藤伴寂寥，前山雨過曉煙消。興來不覺尋幽遠，一路溪聲到石橋。

朝霧

喜從峰頂露朝陽，又見濃陰布下方。白霧漫漫輝似海，依稀塔影似帆檣。

雨晴

朝雨霏微懶出行，小軒趺坐愜幽情。眼昏不辨楞伽字，閒對爐香看晚晴。

閒身

贏得閒身盡日遊，祇應林下與溪頭。喬松影短晝初永，啼鳥聲長山更幽。

松雲別墅題壁

此身雖老志彌堅，常若春冰虎尾邊。萬事低摧消厄運，一心磊落敵災年。洛陽風月思康節，履道園林羨樂天。住世漫云當去客，書生習氣在陳編。

山居日課禪經

受養心珠不染塵，胸中留得四時春。雲容變去明生滅，溪響喧來悟果因。大地是杼人是弈，青山爲主我爲賓。滄桑歷劫尋常事，鄭重爐香定裏身。

天太山道中書所見

籃筍尋幽景最奇風光觸目耐人思一村無水居偏聚千仞迴峰路轉夷墟未豔時先

敗葉桑從焚後出新枝此間消長類如此天地何心物自為過街塔村長五里全然無

山居即事

愛山忘地僻避世覺身輕雲起峰巒換風來戶牖清改詩消午倦拜石驗平生莫謂成

孤寂黃鸝不斷聲

題習靜齋壁  
已悟吾生真若浮林泉送老百無憂雲容石態朝殊暮野草幽花春到秋偶爾會心成

獨笑有時信脚作孤遊城中車馬紅塵客也得山翁此樂不聞雁

家山望斷幾烟嵐雲水歸來好住菴老厭風塵悲去雁年年秋思滿江南  
放言

已無咄咄手書空別是人間老鈍翁粥去飯來殊草草花開木落總忽忽晨興愛就東  
蒼日夜靜知防北牖風天地陰陽歸變理也能康濟一身中  
秋晚入城

止菴詩存



捲地西風滿眼秋放懷隨處寄悠悠身閑始覺乾坤大時難偏驚歲月道三畝未謀歸  
邑宅一椽難借見山樓殘年無復安排計書肆茶坊得小留

病中取香山語自慰

香山六十八病風于病中

中歲幸逃夭折厄卽今衰朽已爲遲身無官守家無債正好寬閑養病時  
我生周甲已天幸况復餘年近古稀大化爐錘知有主去何所戀住何希  
病起

塵紛消盡意悵悵一宿棲禽喜茂林已駕驪車還小住浮雲變滅本無心

自嘲老態題畫像二首

心唯一不媿事卻百無營宴集慙生客箋題避舊名衣寬肱股活食簡腹胸清老眼昏  
難合猶希見太平

倏忽常嚴百歲身無端誤墨也傳神笑他不失本來面卻作人間強項人

胡季樵同年以所刻叢書見贈賦謝

桂苑香消四十年又暮老眼看桑田山河故國皆殘土身世秋波已逝川舊業未隨征  
戰盡高風猶藉槩鉛傳知君別有探驪訣恰似南華木雁篇

六十有八初度二首

多難餘生厭市喧入山深處卽桃源米分齋鉢蘇隣里字校殘經課子孫調氣敢希衰

體健安心方識外，身存剩儻秉燭清。  
遊願詩滿奚囊酒，滿尊滿頭霜雪百憂經。  
濁酒三杯半醉醒，何日蒼生得蘇息。  
舊時朋輩已凋零，風塵頓洞河山暗。  
滄海橫流草木腥，自怪癡頑殊耐老。  
夜窗高詠一燈青。

癸酉三月重過揚州口占二首贈贊卿姪壻二首

春寒不減舊京華，三月揚州未見花。  
二十四橋風景在，獨憐月夜起清笳。  
遼天野鶴縹雲煙，一別揚州已卅年。  
莫訝壻今頭易白，兒孫又見滿堂前。

肩輿遊勞山北五水戲作

癸酉四月十一日

輿人相戒脚根牢，怪石峻嶒水怒號。  
堪笑衰翁頑似鐵，歷經世險等秋毫。  
青寓看花

自言花晚怯春寒，幾日芳菲倏已殘。  
分付園丁勤護惜，明年扶杖引孫看。

自述

早隨射策六徵車，晚避司農兩焚魚。  
得失久拋空劫外，功名從負此心初。  
喜分方外齋廚供，還讀兒時胄監書。  
風疾未嬰無技遣，香山雖樂比何如。

山居

效李東坡集體

年老身當逸心清，境亦遷林泉惟屬我。  
風月豈論錢無是，無非地不寒不熱天。  
問今何歲月如在結繩前。

匯泉公園晚步

獨往山林趣不同，炎曦忽已換清風。池心初月斜鈞白，樹杪殘陽一抹紅。鳥語蟲聲來聒聒，衣香人影去忽忽。眼前生滅無窮境，都在先生一笑中。

海濱雨霽

閒出柴門望新泥，路欲迷波搖孤嶼。活雲截亂峰齊草，茂蛙聲壯林深鳥韻低。老人無定處，隨意過橋西。

香山秋居二首

老來髀肉怯車舟，且喜西山得近遊。峰勢頻迴便深秀，泉聲入細轉清幽。風生萬木涼如洗，雨過千巖翠欲流。最是一年孤賞處，動人詩思正新秋。

天遣疏庸遠市紛，一邱常臥養心君。乍晴松影窗中見，方曉鶯聲枕上聞。鎮日高居臨絕壑，有時孤岫送閑雲。名山終老非無事，靜對爐香校典墳。

題譚貞女殉禮圖二首

既倒狂瀾萬事新，閨門泄沓總輕身。誰知南國江沱處，猶有冰霜自矢人。禮教於今盡撤藩，婚姻道苦更何言。斯人一息爭千古，忍讀吟箋幾斷魂。

山禽

滿耳濤聲萬壑松，一菴常是白雲封。林間時有禽來往，誰謂幽人鮮過從。

山花

薄有山花次第開，疏疏紅紫間階苔。一雙蝴蝶翩翩舞，肯爲幽人破寂來。

山月

玩月中景一奇飛，空如見衆峰馳。浩然風露清宵後，卻過松陰故故遲。

山家

山居侵曉靜無譁，松影環窗綠透紗。忽聽雞聲出林表，白雲深處有人家。

山居卽事

平生淡泊是吾師，獨往幽棲與性宜。地靜松聲歸壑遠，日閒花影上階遲。林間鳥隱飛方覺，葉底蓮敷落始知。雅有天機堪入畫，寂無人處好尋詩。

自壽六十九二首

少小聞言羨古稀，如今所得亦幾微。人生體本同天地，不悟無生念念非。人人券內有期頤，畢竟期頤又幾時。松老槿榮原一致，樂天安命是吾師。

自喜

菴居事簡意偏長，自喜林泉草木香。四面雲山來几席，一庭風月入杯觴。每從野叟尋孤寺，偶遇詩僧說盛唐。俯仰幾忘身世處，齋心直比到羲皇。

自况

老病秋來日日增扶衰猶賴故溪藤  
豈無鄉國思南越每爲風塵困北溟  
落落殘經短景寥寥交舊等晨星  
放懷不覺掀髯笑自况居然退院僧

白露後下山倚裝作

恬退由來與老便襟懷無日不翛然  
腥羶屏盡消前業疾恙微留鎮厄年  
心遠地偏原具足時和身泰敢求全  
一年容易君休歎贏得秋風亦美緣

癸酉九月回籍省墓二首

霜葉丹黃滿眼秋殘年百感戀松楸  
衰宗扶植無長策樂歲艱難有隱憂  
方信王侯等螻蟻總知華屋變荒邱  
青山似特憐游子出岫孤雲故故留

重到江南老眼明最難佳日是秋晴  
四山綠樹間紅樹一路泉聲送鳥聲  
溪父分潭攜子釣村翁倚戶看孫耕  
故鄉風景猶如畫誰挽天河洗甲兵

六十九初度寄七九弟暨諸姪二首

歎息棠華兩墜紅得年誰料屬羸童  
大二兩兄皆未周甲余幼多病艱危身世三肱折  
飄泊鄉心五處同彭澤且遺多子憾  
香山還有半身風浮生變滅須臾事  
始悟瞿曇說苦空

豈信金丹有大還平生耐事儘癡頑  
一無所病惟除老百不如人祇是閑  
樂矚前徽全廟享鵲鶴新兆得峰環  
六世祖中丞公康士公先考憲慎公三弟家祠今年落成仲兄味西改葬得佳城何時遂作青春伴  
白髮清尊話故山

甲戌二月遊金陵無錫遇雪而歸

乘興江南好，覓詩杏花春雨正。當時具區萬頃波，真壯鍾阜千峰雪。亦奇無限風光輪，繡口不多故舊盡銀髭。老身尙及中興日，一度遊來一度思。

奉和範之先生癸酉除夕之作

年年爆竹歲除中，造化弄人似戲工。芻狗催成千世界，兵戈製就幾英雄。北窗小隱羲皇上，東魯斯文日月同。願祝先生金石壽，放翁故事懶治聾。

松雲別墅雜詠六首

養雲軒

世事難逢笑口開，林泉幽處好徘徊。松如有意循簷長，雲自無心入牖來。

習靜齋

歷盡人間憂患深，老來方解惜光陰。閒持蠹簡聊遮眼，靜對爐香得養心。

聽濤軒

何事言齊物，本虛莊生名。論豈誣歟，聽來萬籟知。誰使夜半松聲忽，起予

仰止堂

攜得琴書遠，市城聊將小隱畢。餘生莫嫌四顧無，鄰舍山半時聞笑語聲。

五宜榭

面面窗開不受塵天然圖畫得傳真四時美景知何限一日閑來是主人

清暉閣

依山小閣樹爲垣祇見清陰不見門莫笑老身孤寂慣青禽來去伴朝昏

雨後晚眺

頓消殘暑覺身閑徙倚柴門未上關萬壑爭流溪驟響千林欲暝鳥初還泥融曲折路  
旁路雲散橫空山外山天與幽人助清興玉鈞斜挂柳梢彎

山中賞雨

變態風雲匪所思向來山色失峨嵋乃知天地多涵蓄煙雨空濛又一奇

山中病足

山居恰似閉關僧涉澗穿林謝不能長日惺惺三尺拂清宵寂寂一孤燈幽花解笑空  
相向頑石無言喚不響獨守湛然方寸地光明常是日東升

憫老步康節林下吟韻

百花代謝已無存蒲柳還希不老春蠹簡親來頭易眩賊風襲去足難伸飽飢細付鎚  
銖飯寒煖時稱絲絮裯垂暮熟觀天下事敢疏調護子遺身

老病自勉三首

雙鑠期頤豈力爲金丹祕訣更多歧鼠肝蟲臂從他化一卷南華是我師

瘦薄于今竟白頭便從此逝亦無憂劉伶荷鍾猶非達薪盡何嘗火不留  
添膏獨惜夜深燈爲善孳孳愧寒登一息尙虞聞道晚未臨易簣且兢兢

聞蟋蟀

嘯傲烟霞歲月深忽然萬事不關心無端驚起清宵夢淒切秋蟲砌下吟

讀擊壤集

堪羨堯夫值令辰年逾七十太平民乾坤浩浩何妨樂草木閑閑總是春堯典邃深聲  
自永義經悟徹筆通神余生恨晚風塵老天挺人豪寤寐親

松雪別墅題壁

山如四壁樹爲樊小屋參差便是村着個飄然白鬚叟那須世外問桃源

夏日山居

一庵門掩得深藏物妙天機靜裏商風起飛鷺先作勢雨淋老柏自生香胸無壘塊乾  
坤大坐有詩書日月長送盡夕陽山更好恍然世界本清涼

園居消夏

寄身廢苑意翛然一點無塵境自仙雲霧半藏山外寺樓臺翻映水中天荷心曉露香  
恆遠松頂斜陽翠更鮮好景每從閑處得未妨粥飯送流年

養生



恃強信弱兩皆非，勤慎治身理庶幾。甘美略嘗防過食，清涼才覺便添衣。晨興調息神常斂，夜住空心夢自稀。更有一言君記取，常存歡喜是天機。

自詒二首

重圍突出利名場，老廢方知少壯忙。足軟妨行高下路，眼昏才讀二三行。萬松過雨秋先到，百鳥吟風晝倍長。莫妙香山安樂法，恍然身世兩相忘。

已墮黃塵七十秋，風霜雨露總悠悠。百年勳業空尋鹿，千古文章祇汗牛。逆旅何常留客過，太虛不礙有雲浮。齋心玄牝功應驗，合是愁時也弗愁。

今歲七十頭眩廢書專持佛號默坐養心作歌述懷

一日少一日，一年老一年。形骸薄似露，世事去如煙。人生無根蒂，飄泊誠堪憐。我少不更事，功業冀騰騫。已飢與已溺，夙夜廣憂煎。熟知竟大謬，忽忽雪盈顛。高飛翼不振，疾走足不前。廢然方自省，聞道恨未先。蘭膏終自苦，樗櫟始能全。狂瀾既已倒，一葦安障川。母乃自貽戚，于人何尤焉。晚始驚夢覺，辦香師昔賢。懷懷芻狗訓，服膺木雁篇。如此積有歲，稍稍名利捐。無奈迫衰羸，病魔相糾纏。展書未終卷，目昏頭亦旋。從茲常默坐，私淑蓮宗禪。冥心依極樂，彷彿見金仙。稱名萬德具，愚頑可立鐫。曠然遺身世，如獲解倒懸。俯仰天地間，一味信前緣。鋒刀常坦坦，毒藥也便便。吾雖垂日暮，誓以補前愆。倘或笑非達，更請問樂天。

有感

世變離奇道始尊，恍然魔佛本同根。空化遇物何忻厭，幻質於人孰怨恩。萬籟松聲風度壑，一簾竹影月當門。閑觀綠野桑麻長，依舊桃源洞裏村。

玩易

堪笑癡頑七十年，晚知糟粕是陳編。得閑舒卷雲歸岫，無礙光明月在淵。滿地落花酣舞蝶，半天高柳聚鳴蟬。卻從一晝前觀易，萬物盈虛總自然。

六月二十六日重到香山

獨有山居興味長，紅塵隔盡暑全忘。千巖滴翠才如洗，萬木無風亦自涼。拄杖不嫌坡磴確，焚香偏愛屋深藏。老人去住原皆幻，清夢還應上沅湘。時有友約遊香山

題齋壁

桃源何處覓仙鄉，小隱山林世可忘。地僻衣貧差近古，民淳穀賤罕言荒。蔬餐漸減知年邁，書課常閑覺日長。莫道河清難久俟，北窗高臥便羲皇。

自哈二首

胸中莫留一點事，眼底常展數行書。冶金代石雖不足，美睡甘餐卻有餘。人寰何處覓仙居，但使塵襟痛掃除。更得深山結茅屋，淡然身世到黃初。

頭眩

剎那遷變不停留知命應無事可憂眩作祇同身泛海人生斯世本來浮

腿痛

微疴留得壓災年足蹇何妨心泰然衣食幸無奔走事山遊况復有行纏

有感題著書圖

萬方多難一身勞弱弩寧能息怒濤垓下幾人憐覆轍隆中何日識英豪飄搖風雨鷄  
音苦寥落河山馬骨高千載興亡天有眼好將詩禮付兒曹

四十年前常遊揚州僧舍至今思之恍如隔世

揚州精舍是僧家雲水相逢自在茶壁上淡描三世佛庭前長養四時花晨堂粥鉢香  
如積夜殿鐘魚靜不譁四十餘年醒一夢于今梵宇起清笳

甲戌過金陵復成倉橋

一別金陵六十秋慈闈空有數椽留多情最是倉橋水猶記兒時舊釣遊

遊金陵舊貢院門前商場

一闌聲中路欲迷入門無復舊威儀喚回五十年前夢萬士肩摩接卷時

甲戌十月過蕪湖省老宅有感

故園南望路迢迢多難生經壯志消正憫哀鴻聞野哭更堪戎馬養天驕百年堂構廬  
將做十載風煙木已凋剩有先疇付兒輩好持世業共漁樵

遊黿渚廣福寺呈量如上人

重作梁溪五日遊，最饒清景是黿頭。  
漁歌起去扁舟遠，梵唄聞來小寺幽。  
幾曲畫橋聯澗壑，千林紅葉映松楸。  
平生願得茅庵隱，請揀湖山佳處留。

甲戌十一月初二日先妣忌辰

痛別慈顏廿八年，恩深願復到華顛。  
兒今七十親當慰，欲獻清尊淚已先。

生日感懷

衰年感慨多對酒，獨高歌身事同看鏡。  
民風等逝波無從修禮樂，誰與息干戈不判今宵醉清暉，奈月何。

七十雙壽寄賀內子

齊眉古稀看清福，自來難庭內原無棘階前。  
卻有蘭長齋心淡泊，緩步體輕安好隱鹿門去，青松共歲寒。

勸遊寄內子

家雖居是客身，卻老如嬰欲學長生術。  
無妨放浪行有蔬餐，易美得杖步能輕。  
孫子何須念，惟留心地耕。

勸遊二首

事業文章老已休，今朝遊得且須遊。  
待將足輓頭旋日錦褥，華堂祇自囚。

人生何事得安排荷鋪劉伶亦自佳玉食錦衣難貸老不如一杖兩芒屨

七十初度述懷示子兼謝詩親友

放翁幸及宣和末我去宣和又幾辰夢裏衣冠如隔世眼中魚鳥亦親人獨遊拄杖寧  
嗟老宴客多蔬豈示貧自矢終年當閉戶春冰虎尾事吾身

滿目瘡痍不忍看自慚迂拙誤儒冠遺經恐墜先人訓先公嘗謂子孫以讀收族常憂  
後嗣單本族自兵燹後生計凋零不備百丁會廟恤之身以白圭為玉律心從玄牝養金丹獨憐南國烽烟久

惆悵鄉閭又揭竿至德縣北連江西五月有匪竄入甚猶數邑人多避難

世上何人不白頭忍看滄海溢橫流眼昏脚蹇便多逸頌成三年飯足蔬安敢過求絕

年已六陰慶萱圖開百秩吳太夫人今年百齡造敝廬藻薦嗣千秋金陵先公故祠絕知道

義無今古愚婦終懷恤緯憂

預鐫墓碣待終藏已刻成自笑閑身底事忙且辦荆釵貽燕翼今秋為長孫紹更謀

衽席起虹梁善建至德縣萬善橋三月告成菊畦新闢軒楹爽濟南新闢止荷苑清遊肺腑涼今夏

倘遂龐公遺子願年年菽水勝稱觴善病書

西遊雜詠十二首

避生會西遊關中過華州寄謝親友

車走塵飛疾似風浮生何啻一驚篷數來秦漢駒光裏望去嶠函蝸角中社櫟不材今

已老蓼莪增痛古應同雲天高誼情無極遙寄華封祝與公

過華陰望太華

用崔駰韻

山奔萬馬赴神京俯瞰中原局早成欲喚希夷醒舊夢喜瞻蓮嶂得新晴雨收巨掌容  
都斂雲截三峰勢轉平我已久忘名利客長生未學學無生

對華山慕希夷先生

抗懷千載慕希夷車走紅塵路不知今日儼然瞻道貌巍巍壁立是鬚眉

題玉泉院希夷石像影本

傳來幻影見真仙枕石翛然正熟眠欲喚先生跨驢背于今一夢又千年

由陝州一日抵西安望咸陽周陵有感

入關先後幾英雄黃土誰尋宿莽中函谷空聞騎犢叟華陰難遇墜驢翁千年都會山  
無恙萬里征車軌已同遙望先陵嗟日暮煙塵撲地眼矇矓

雪中登長安北城望咸陽

巍巍秦漢舊山川俯仰興亡意惘然哀怨餘音聞出塞圖形故蹟渺凌烟何年北海羝  
還乳幾輩東門犬尙牽卻憶灞橋風雪裏古來驢背有人傳

酒樓眺雪

二首

七十衰翁作壯遊西瞻自古帝王州灞橋今日鏡風雪卻爲尋詩上酒樓

高樓百尺不知寒四面雲山雪裏看城郭已非歸鶴杳令人空憶古袁安

登雁塔見元祐慶歷諸公題名

科名梵行兩成塵興廢何堪說往因畢竟聞人名不朽非關塔雁亦津津

回車雪中重瞻太華

岩嶢悵望雪盈顛心與名山結後緣掌擎巨靈原示幻祠空武帝漫求仙百年僕僕塵  
瀾海萬事茫茫杵倚天準備芒屨春暖日峰頭放眼看雲烟

洛陽謁周公廟

定鼎堂空護短垣門前懸臚是周原茅茨雖見民風古禮樂誰知王道尊三代衣冠徒  
想像千年廟貌僅虛存試思營洛當時意體國何曾恃虎賁

遊伊闕懷古

千載名山孰主賓百年興廢每相循周原臚塵依舊砥道平平轍已新寺過兵戎無  
曠宇碑尋牧豎有知津樂天去後辜風月詩酒流連更幾人

乙亥元旦試筆二首

大畫初開喜欲顛元辰氣象勝年年雖驚爆竹聲除歲卻似風光廿載前民國以來歲  
歲求嚴兼用

爆竹今歲  
始聞此聲

屠蘇飲罷意方羊靜對銅爐一炷香堪笑白頭閑不得滿腔心事為人忙早時本藉至德  
早災正藉至德

乙亥二月二十六日偕七弟大覺寺看杏花遇林詒老

喜從荆樹逐繁華邂逅詩人笑語譁  
麥隴縱橫滄露杏林高下豔爭霞  
借炊紅粟留僧舍遙指青帘問酒家  
願祝年年春日健萬株花底話桑麻

乙亥三月同七弟立之遊青島勞山諸勝偶得小詩聊作紀念十首

蔚竹菴道中

山深不見市塵喧始信淳風太古存  
疊石為田才片土依巖結屋自成村  
千尋絕壁疑無路一派清溪直到門  
滿耳松聲滿眼竹雖非世外亦桃源

宿華嚴寺

海角名藍又一奇絕無人處忽開基  
峰巒迴互溪多折樓閣參差路亦危  
萬籟松喧供梵唄百年花發見孫枝  
殘生倘得身長健願借茅菴後日期

重遊太清宮

夢醒黃梁二十年天留老眼看雲烟  
久經滄海猶身健再到名山亦宿緣  
樹抄着花皆古幹竹根繞石遍清泉  
羽師能記前朝事欲訪知音問七弦

有韓道士善鼓琴今其徒劉道士行伍出身曾先公部下猶傳律法往事

擬營對華小築在蓮華山下大勞觀旁



滄桑閱遍厭紛華方幸吾生今有涯矮屋三間方丈席小園半畝四時花百年荏苒原  
爲客一日清閒便似家但得蓮峰風月好亦無心事覓丹砂

遊北九水

九水山輪二水奇溪聲瀾瀾柳絲絲傍崖十里田高下恰似江南春暮時

明霞洞

黃精玉竹蓮山新苗

春曉丹台照綺霞漫山靈藥茁新芽秦皇倘識神仙境何事空勞海外槎  
登德人廢砲台

故壘憑陵萬里風濤聲洶盡幾英雄依稀戰血留殘壁空對桃花寂寞紅  
重過登窰看聚仙庵古耐冬盛開

古寺無人晝掩扉羣山赴海作重圍輕陰留得花常好不似桃源去後非  
海濱公園二首

廿載風雲戰壘空桃花依舊照筵紅閱來千古興亡事都在潮痕漲落中  
身健心閑春暮天看花品茗送流年眼看碧海波千尺帆穩何如早繫船

止園題壁

北平

小園遯迹市城間車馬無聲鎮日閒池引清泉如絕澗牆圍高樹似深山心安始覺乾  
坤大身退方知道路艱抱甕灌蔬吾事了柴門雖設卻常關

過雙清遍設鉄柵云護飲料阻遊人戲作

院靜林深晝掩門闌無人迹破苔痕清泉自愛在山日謀食誰曾問本源

題林斐成鷺峰山莊乙亥八月二十八日

卅載消沈雪上鴻巍峨棟宇忽盤空仙山樓閣居然是會着遊人入畫中

久聞高士得身閑啓宇層崖不畏艱今日登臨天地別始知仙境在人間

秋夜乙亥九月番山作

萬卉爭春百鳥鳴尋芳載酒總關情秋來別有會心處臥聽空階蟋蟀聲

遊覺生寺觀永樂華嚴大鐘

文物莊嚴比鼎彝萬鈞一簾幾回移低徊五百年間事可有鐘聲似舊時鐘高三萬斤文獻堂

內外鑄華嚴金剛等經全部沈度書小楷極精明初置大內後移萬壽寺權又移此

七十有一自壽二首乙亥冬月

百年富貴等浮雲老桂冬榮亦自欣足蹇逢山食緩陟耳聾觀樂喜微聞賞心兄弟傳  
詩草繼志兒孫誦典墳莫道河清難久埃今朝得酒且醺醺

此身愈老愈顛狂落日銜山幸有光慣作清游知稼穡時尋佳釀問坊場門稀車馬諸  
緣淨坐擁圖書萬事忘笑慰荆妻同鶴髮齋盂蔬水勝桃觴

乙亥九月二十五日味雲約仲虎彤士劍秋蔭伯同飲春明樓酒後遊陶然亭遇

散原老人暨伯夔君任若木諸公偕立之七弟同來分韻得老字一首

不上江亭二十秋城南名蹟多荒草天留我輩看滄桑回首風雲如電掃傾心宇內幾  
詩人相逢客裏惟稱好年年風雨妬重陽今歲天清寒不早青山萬古總無情憑高一  
嘯抒懷抱九原可作誰與歸鸚鵡香魂空懊惱衰柳蒹葭帶野水天涯恨別陽關道留  
連古寺日已斜門外車聲塵浩浩人言孟郊可乞靈世間萬事憑蒼昊駐顏不守汞與  
鉛裏腹但豐梨與棗爾來交舊若晨星勸君莫惜金尊倒如此清遊更幾回人生難得  
閒中老

仲虎先生七旬壽辰

南國蜚聲仗劍遊滄桑閱遍雪盈頭平章軍國三千牘嘯傲湖山五十秋務觀老勤鉛  
槩業淵明質不斗升謀共來燕市高歌地擊筑相從大白浮  
相知恨晚惜殘年炳燭光分問字筵話雨每思春韭夜看花常趁早驚天仰瞻甲第清  
芬冊喜誦嚶鳴雅詠箋並世耆英廣洛會二張齒德邁前賢

乙亥初冬遊拈花寺愛其閒靜將營菟裘爲終老計因借其廢廚五楹修葺爲靜  
室旣竣頗軒敞十月二十二日與立弟夔恩二兒暨子貞紹棠養吾希文諸友  
本寺長老全朗量源等十人仿樂天爐峰草堂故事具齋施茶果以落之喜賦  
俚句

相業祁公邈莫攀也希屏迹叩禪關清泉白石胸中有紙帳蘆簾物外閒務觀老懷歸  
繡佛樂天生計入香山具齋施果今猶昔想像爐峰亦解顏花寺在北平城內鼓樓  
西偏二里許地極僻靜始  
於前明嘉靖原各千佛寺清康熙雍正間重加修拓勝今名北平自光緒中業後屢  
經變亂內外說利一切古像法器摧殘殆盡獨茲寺巍然如故無絲毫損失是由全明  
上人道行高潔感召人天歎切佛佑區區寄居都城五十年今莫  
朽維生得結香火因緣誠屬至幸然俯仰興懷不盡河山之感矣

丙子正月三日重過北海濠濮間口占

二十年前此養痾金元老樹幾摩挲雲烟回首消磨盡輸與西風一棹歌  
立之七弟六十壽辰

堪羨萱庭戲綵袍詩書更喜起兒曹燈紅酒綠歡無極白髮蒼顏氣自豪四海風雲同  
轉軸五湖煙水可容篙願期介壽承平日耄耄相從醉濁醪

相對尊前雪滿顛恍如梨棗戲當年早膺薦辟匡時策晚好吟哦壽世篇桑海幾番原  
是幻桃源一室也稱仙算來六十無疆壽猶似方中日在天

丙子人日仲虎招飲同席共壽八百喜賦

相從高會及新春盡美東南共主賓劫後貞元舊朝士尊前長慶老詩人引年衛武思  
康爵飽德溫公喜率真不數義熙閒甲子放歌同作葛天民

丙子正月二十四日立弟六十壽與一甫六十七同生日又值西甫七十壽合之  
予年七十二實弟五十五共三百二十四歲一甫挈同登最高樓攝影賦詩為

紀念

三世論交歲月道歡聯棠棣海添籌神清喜對千秋鏡足健同登百尺樓元白貽謀思  
比屋陶朱送老弄扁舟會當圖像追坡叟笠屐相從放浪遊

丙子正月至津幼梅見訪暢敘離悰贈詩屬和勉效壤歌聊當鼓腹

白頭相對兩衰翁四海瘡痍痛疾癘誰嗣風流來稷下空懷豪傑入關中版圖自古征  
車苦蓬島于今弱水通君有文章能壽世何妨星值竭磨宮

海山風雪憶當年回首滄桑意惘然鵬舉鷗飛同是樂雁烹木壽總堪憐胸羅文繡矜  
書笥腹饜膏梁恃硯田詩酒清狂如昨日羨君今作地行仙

一山先生見示十老詩勉步元韻

乾坤我貸作陳人大患由來貴有身桃裏難尋秦氏邑柳邊尙醉葛天民苔岑落落星  
臨旦萍水茫茫海漲塵且喜乞言遙介壽芝蘭絨得滿腔春

正月冒雪遊北海公園二首

清塵廢苑及新春樓閣仙山畫本真古木寒鴉雖寂寞相逢也有覓詩人  
扶杖衝寒踟躕行天容慘淡靜無聲飢烏獨啄枝頭絮誰念茅檐待粟情

二月二日大雪後登瓊島遠眺

雪霽寒光照眼明憑高身直小蓬瀛北山屏嶂橫千疊化作銀濤萬里平

丙子二月三日 先妣百齡晉二進慶自拈花寺進香回聞第一曾孫女生賦以志喜

欣聞設悅值昌辰，進慶金萱百二春。今日拈花叨福蔭，他年詠絮得傳人。秀鍾襁褓重闈愛，美奐門楣四葉新。堪羨兒曹強過我，含飴及早及黑頭身。

止園題壁二首

且喜鶴鶉占一枝，春花秋月總相宜。性耽泉石閑成癖，坐擁圖書老不知。幸有微疴容避客，苦無傑思諱言詩。浮生歲月皆羈旅，常似扁舟不繫時。

四面濃陰綠滿城，小園半畝愜幽清。源泉修視思遺澤，溫室繁花悟養生。魚戲波平春沼暖，鳥嘯風定曉窗明。人間自有桃源境，豈獨神仙博美名。

三月三日偕七弟約仲虎少楠劍秋稷壇修禊潤之蔚如彤士不期而遇  
冰雪纒消曳杖過，耆英邂逅笑顏酡。天教厄閏芳時晚，人重延年美意多。故社有情憐草木，中原無計止兵戈。佇看大地春風遍，萬里塵清海不波。

三月中北海公園探杏

誰言節候萬方同，廢苑春深雪未融。瓊鳥螺青輪北塞，瀛洲草綠怨東風。鴿翻黑白盤空際，魚戲東西倒影中。造物無情寧有意，杏花偏向日邊紅。上杏林已露紅梢

濟南止園養疴

丙子三月南遊車中屢脚劇痛遂止濟南

老病方知行路難江南花事夢中看小庭風月情無奈聊展吟箋強自寬

濟南家祠春祭畢未得南歸展墓感賦二首

一年一度薦烝嘗未展松楸倍慘傷咫尺音容天際遠白雲深處認吾鄉  
滿眼春暉草色新清明時節倍思親年年先壙虛牲酒不及墻間有祭人

懷金陵故居

絕裾妄謂志承先違侍晨昏五十年今日追思揮淚地空餘風木恨終天自二十歲離

走中間得侍慈闈者幾三數年耳乙巳赴寧省親叩辭時吾母垂淚從此慈顏未得再見

懷蕪湖先第先公晚年所營今為義莊祠宅

先澤留遺已卅年故園喬木長風烟椿萱隱德思無量今日孤寒有義田先公孝友堂

各置田千畝承濟孤貧

讀易理臆言

墜緒茫茫勢已摧閉門絕學就誰裁先公手澤義經在日抱遺編誦百回

說病

四大原來暫假同病由不病在其中吾今覺痛卻非痛悟得無身患有空

濟寓喜見海棠二首

江南薊北百花繁禁足慊慊欲斷魂喜得一枝破岑寂畫闌相對卻無言

綽約芳姿幾度春年年寂寞怨風塵今朝老眼殷勤看贏得花時作主人

金牛山觀杏二首

一道清溪幾曲灣參差紅杏萬松間漁舟四處閒來往全似江南舊隱山  
千樹山顛井水涯風和日暖正飛花兩三茅屋成村落可有青帘賣酒家

青島春暮看花二首

又見梨開雪滿枝今年春比去年遲天公有意憐衰老故遣芳菲特後時  
老人病蹇重遲回桃杏爭春處處開風舉雲車能縮地千村萬樹就身來  
驅車遊李村丹山

村村桃李占春光車走風馳道路長一日徧看花百里放教閒事卻成忙  
下河于村小憩

花紅柳綠麥青青野市山村歷歷經會得堯夫行樂意小車何處不堪停  
魚鱗瀑道中

輕輿直上碧崔嵬細徑盤迂折百回削壁天成雲外立危崖路絕石中開日移樹影知  
峰轉風挾溪聲似雨來最愛小亭觀瀑處野人苦茗勝新醅

知足歌九弟

人生七十風前燭要脫天刑解桎梏掃除胸中悶是非忘卻世上虛榮辱身無痼疾家



無憂寒有粗衣飢有粟時時退步即安然道德五千在知足吁嗟今世事難言第一篇  
塞翁失馬爲忠告霜天正屬雁行飛月黑須防鰲繳觸

雜感 三首

服玉餐芝術不傳浮生變滅等雲烟從今只合空山老飲水茹蔬亦自仙  
養生藥餌總無靈疾恙孱羸實飽經杜漸防微在衣食似飢乍冷費調停  
世途何處不迤邐屋漏真如對帝天師友凋零身亦老心香常蒸影衾前

食戒

年老百憂輕疾病爲至感須臾或不慎飲食成勑敵鴆毒隱肥甘殺業開自喫缶豆與  
盤蔬過飽猶及溺念此獨何心口腹敢求適人生非金石一息如拱壁先師懷明訓朝  
乾更夕惕生熟寧無崖鼠壤有餘瀝我本多難身衆矢集一的淡泊養真元勿負天所  
錫

平生

平生多脆腕垂老百無成劍守刻舟迹瑟求膠柱聲功名忘甑墮文字媿蛙鳴獨幸齋  
居樂還教夢寐清詩書千載契湖海一身輕莫問滔滔者狂歌伴耦耕

道暑 香山作  
二首

何處能逃夏人休爲熱忙心專能忘暑性定自生涼披甲趨前敵流金總道場老年容

易過轉眼是秋光

一入香山境翻然悔昨非騰騰辭火宅寂寂掩雲扉天淨塵如洗峰迴翠作圍晚來防  
快意露坐卻添衣

七十有二初度感懷二首

酸寒病骨久龍鍾左酸痲痛身世安危不繫胸差慰靈馨開四世今年喜得孫女尚虛文史

課三冬研助徐森生立國族微士苦兵兼役徵丁本少徵兵歲熟天蘇劫後農歲匪旱

今年蒿目鄉園無奈老錦衣空惜夜行蹤

殘年惟羨地行仙放浪山巔與水邊蓬艇為家波蕩漾籃輿探險徑盤旋崢嶸五頂雲

中境縹緲雙林海外天北五嶺南普陀皆佛國聖境可避亂何日茅菴遂終老姓名得避世人傳

老態

禮簡交遊絕身慵日月長看書惟引睡得句亦旋忘食少嫌餐薄衣輕負體強中宵不  
成寐枯坐默焚香

山中

山中不覺暑隨事可怡情吟罷花間坐餐餘樹底行看雲胸次豁聽雨夢魂清此是期  
頤券何勞問廣成

憶江南二首

止菴詩存

誰助南遊興天清雁影過稻梁隨地足橋袖渡江多落日依高嶺秋風逐逝波放翁詩  
卷在八十尙烟蓑

暫住家如客支離病起身遊偏於水適老更與山親柳暗三湘雨花明五嶺春中宵勞  
夢想強學少年人

老逸

幸得老時逸方知去日忙心期邈雲漢魂夢繞江鄉獨立乾坤隘孤征道路長顏齡能  
善忘且復近壺觴生平數十年為國計民生及故身

讀易二首

渾沌乾坤萬古來無端鑿竅立三才五千年後兵戈劫盡自庖羲一畫開  
大易原居未畫前湛然誰象帝之先尼山道統仁為首可信淵源在韋編

晨興獨坐

未起荒雞舞頻驚畫角吹風雲蒼狗幻歲月白駒馳身老家如寄時艱夢亦悲茫茫江  
海遠搔首欲何之

香山懷古

山川無改色父老有遺思地萃三朝勝香山古蹟甚多建承安陵金人班萬里師香山  
營平金川殘林棲鳥少故壘夕陽遲零落宮牆在披榛訪斷碑

丙子七月與子貞同居香山喜壽田藻亭遠來適立弟自津至賦詩持贈率步原韻用志嘉會二首

一邱小隱藏身久千里高朋覩面難各有文名垂宇宙共來白髮對青山袖中海外新詩本襟上江南舊酒斑暫得林泉同作主人間晚福是能閑

浮生衰病藥難除差幸閑身得自如萬壑深藏忘歲月一窗高臥有詩書梵修空慕唐三藏酒會猶慚漢二疏且喜明簪聯棣萼清談雅詠到黃初

丙子七夕後四日壽田藻亭一甫子貞同飲西山酒樓立弟即席賦詩屬和因步

原韻兼寄同坐諸公

高會耆英慕古風翠微峰下興無窮催詩欲雨當頭黑拚醉流霞滿頰紅天地有情人不老江山無恙歲仍豐清遊莫厭盤飧薄真率猶堪故事同

丙子七月癸巳同年公宴巨溟賦詩屬和勉步原韻

江山爲主我爲賓備垂老身名孰與親幾度中原看逐鹿何時郊藪見遊麟愴懷挂籍情如夢感念萍蹤語益真願頌期頤還嬰鑠年年同醉玉壺春

贈孫芸生井序

熙自童年受知于濟寧孫文恪翹首師門五十餘年風塵奔走未遂瞻依今夏得晤賢孫芸生世兄雍容儒雅克紹家風以詩書教授國人欣佩無量謹賦俚

句用伸景仰

兩荷生成豈宿因

照十六歲入泮二十九歲領鄉薦昔出師二門

斗山青及不材人風塵有幸江河壯天地無

私草木春

鄉試首藝蒙師特賞評中有長江大河滔滔汨汨之語

喜見箕裘賢繼世媿虛衣鉢老為民山陽夢斷

侯芭痛車笠心期白首新

丙子七夕癸巳同年公宴芸生世兄賦詩屬和勉步原韻

文場早退幸全師身世渾如未算棊迹近香山廢還往心隨務觀學頑癡人間甲第風

塵老

癸巳年矣

天上星橋歲月移

近有依新歷者

今日詠觴推伯獻難忘清白聖

明時

富春舟中作 丙子九月

山如玳瑁水琉璃秋晚江村景益奇柏紫橙黃遮路斷渚清沙白渡舟遲入雲疊嶺重

難數澈底游魚樂可知到此平生不虛讀李營邱畫放翁詩

七里灘謁子陵祠宿桐廬

富春一宿夢魂清不盡江山萬古情窗外波搖沈宿影枕邊風送遠灘聲桐君香火隆

秋賽巖子雲初重祖祊隱德自隨天地永豈須簪組始垂名 嚴初為齊孫世守今七十幾代矣

九月十六日平津車中觀月

如海沈沈夜碧天豁然風露浩無邊平生百感都消盡萬里橫空看月圓

探梅 丙子大雪前二日同人消寒之約賦此寄意

底事探梅日有程冰霜百折餞餘生尋來東閣知心少盼到南枝醉眼明驛使魂消家  
萬里綺窗夢斷月三更衰翁春意胸中滿笑挈奚囊踏雪行

酬筱汀親家見惠壽詩三首

伴影青燈白髮聚故人情重有詩函喚回三十年前夢風雨蓬窗抵掌談  
已拚分作溝中脊何意人知爨下音八表同昏今昔感停雲猶見百年心  
開絨珠玉滿籐箋龍馬精神宛現前愧乏瓊瑤鳴瓦缶心香遙祝大椿年

七十二初度息菴七弟寵以詩章謹步元韻

不作伎求氣自和榮枯夢境付南柯引年未恨昌陽少閱世方知枳棘多炳燭夜遊良  
有以漣巾日飲更無何天教棟蓐春難老剩覓桃源把臂過

丙子除夕薦辛盤

爆竹聲中閱歲華老人一室靜無譁驚回五十年前事御菓猶傳百姓家  
我生初及中興年家慶椿萱福祿綿今日青燈映白髮難忘索裘戀衣牽

丁丑元日試筆

光陰催老苦無情閉戶方知樂趣生  
胠手六書摹絹白棲心二典見牆羹  
几橫松影香盤篆窗透花姿鳥弄聲  
歲月優游人自壽昌黎何事不平鳴

二月十一日大雪中遊西郊三首

誰見荒郊白屋貧梨花萬樹豔無倫  
天公作意拋珠玉妝點人間富貴春  
白雪陽春和久空探梅逸興幾人同  
會心直入莊巖地身在漫天花雨中  
累盡閑身自在行心清大地放光明  
天教老眼瞻仙境海畔銀山擁玉城

自幸

功名遇合命多慳導引長生術不傳  
啜粥茹蔬窮巷裏誰知也過古稀年

止園題壁

學盡癡狀歇盡狂數椽容膝得深藏  
盤蔬有味身彌健車馬無聲晝更長  
掃淨萬緣三尺劍行持半偈一爐香  
老龐非不兒孫念卻笑斤斤八百桑

晚霽獨坐

一編終日掩齋扉雨過泥深客屨稀  
莫笑衰翁耐孤寂人間可愛是斜暉

遊西郊長安寺留題

九衢轂擊厭車塵極目郊原浩蕩春  
山寺無僧花正好天教閑處着閑人

清明日獨遊稷園山桃正開感賦

傾城桃李旋成塵閱盡貞元幾度春  
莫笑衰慵耐幽獨天留冷眼看花人

早起出遊看花

繁華洗盡少年癡，破曉看花亦自奇。  
萬紫千紅春意鬧，怡情偏在獨遊時。

止園花放小坐

一窗寂寞送年華，世事無涯生有涯。  
且喜眼前春意滿，相看不厭故園花。

山中喜雨

辛未久旱四月二十八日夜雨連朝

霏微連夜雨，身喜出塵寰。  
澗曲添懸溜，雲封失遠山。  
尋詩驢滑滑，載酒鳥關關。  
一片江南興，依稀若夢間。

松雲別墅題壁

丁丑六月

且喜閒身與世忘，一邱一壑得徜徉。  
豆棚瓜瓞知時熟，酒碗詩囊伴日長。  
觀化百年餘蝶夢，歷途跬步盡羊腸。  
殘生何幸衰中健，讀罷西窗看夕陽。

仲虎屬題其夫人楷書詩冊遺墨

幾幅蘭箋翰墨香，知君伉儷勝鴻光。  
乾坤清淑歸彤管，家國憂危入錦囊。  
名媛由來多厄運，斯文終不祕幽芳。  
會看笙磬同梨棗，松雪名傳內美彰。

觀書有感

詩書之厄始贏秦，世事如棋局局新。  
備自古已聞天補石，于今又見海揚塵。  
夢回蕉失難尋徑，春去桃空莫問津。  
安得生公重說法，有情都作點頭人。

雜感二首



間把浮生物理推月盈日昃儘相催縱教天地隨人轉誰見江河到海回身外萬緣空  
嚼蘖夢中一境苦依槐英雄千古皆兒戲讀盡彙編笑口開  
脩然白髮寄山村物我無心孰怨恩燕倚春風趨畫棟牛禁暮雨入柴門炎炎火宅騰  
新燄疊疊沙溪賸舊痕掃盡浮雲天地別烏啼花落自朝昏

暑中喜雨

苔色侵階潤簷聲入牖宣嶺頭封舊路樹杪挂新泉頓失炎天苦翻成縮地仙江南煙  
雨意千里落尊前

山居卽事

老人何計得消閒除卻吟哦事事艱目暗松窗慵遠矚足孱薜磴罷躋攀波光掩映塔  
旁塔雲影參差山外山欲寫丹青無妙手戲題齋壁且開顏

自詒丁丑八月風鶴中得第二曾孫女

山河終古在天地本來寬世以平爲福心從問去安蔬餐矜食美文襟慰承歡無限斜  
陽好雲烟過眼看

賀楊味雲親家七十壽二首

三世論交晚倍親雷陳誼復結朱陳甘棠稷下曾留蔭正笏朝端不染塵今喜筭珈同  
壽考久聞蘭桂盡儒珍平生低首推通德剩撫新醪說往因

貫華閣上繼詞仙五嶽歸來擁卷眠紀事竟分班馬席吟秋欲續庾徐篇著書歲月閒  
中老住世滄桑劫外緣入表同昏數知已開懷共慶古稀年

中秋對月三首

茫茫大地突風塵道路誰憐骨肉親今夜月明天萬里清光猶照亂離人  
滿眼烽烟滿眼秋從來邊釁爲封侯無情最是今宵月舉酒難消萬古愁  
烽火連天夜色寒團圞鄉夢得歸難清暉偏照流亡屋獨倚高樓不忍看

避地天津重九與西甫一甫市樓登高二首

殘山賸水夢中身濁酒黃花孰與親我輩異鄉爲客慣眼前多有失家人用王維韻  
萬方多難一身輕苦雨淒風更滿城正復無糕題未得劉郎原不負詩名

七十有三生日感懷二首

目能給視耳能聽福禍原非在杳冥東海已揚塵浩浩中原方見火星星斷機芸衆生  
無計屏藥荆妻禱有靈天相殘年敵憂患常嚴屋漏寸心銘  
知也無涯生有涯宣和尚及己堪誇遠天幾見千年鶴銀漢誰通萬里槎蝸角疆分猶  
愛國桃源路失漫思家河清自古人難俟聊喚芳尊聽暮笳

登市樓觀雪丁丑十二月十六日

郊原蕭瑟阻清遊莫放山陰訪戴舟一片寒光千里目動人詩思最高樓

扶搖直上一身輕欲挽天河洗甲兵大地如銀春有意流民百萬待歸耕  
逐癘驅蝗屬望深蒼生待澤勝甘霖祥雲小試空中戲猶見乾坤愛育心

丁丑歲暮祀祖

千載雲仍歲祀崇雞豚不改舊家風心驚幕火尋棲燕目擊烽烟送斷鴻  
落落義經綿世澤茫茫蝸石補天工時危祖德方知厚竹報平安五處同

甲寅節士福焜兼慰巨溟同年

一朝完大節百世發幽光浩氣文兼武休名弛亦張中原方頌洞巨室盡流亡  
馬革平生志神歸德不傷

天變風雲色人爭日月光一門三世表千載四維張黃口生猶寄丹心死不亡  
英靈山嶽在伯道竟何傷

孟莊書室題壁二首

聊將一室視山邱閉戶寧知歲月道大地龍蛇方競走深林鹿豕可同遊  
琴尊嘯傲空千古書劍縱橫隘九州領取淵明觀大化未應白髮伴閑愁

學業空疏悔已深惟將淡泊惜光陰利名畫斷急揮劍血氣調和時撫琴  
一色青蔬覘地力數聲黃鳥驗天心老年無復箴規友自課神明對影衾

息侯金梁少保同出陳桂生侍郎門下屬題其女孫曉雲女士之弟子名伶趙金

蓉詩集悵望師門不勝今昔之感

莫從荆棘問飛蓬五十年間萬事空  
驚囀皇州曾是夢夢中何處覓春風  
陌上飄塵雨不知桑田滄海更堪悲  
公孫妙舞今何世忍賦芬芳弟子詩

避難津沽聞至德舊宏毅學舍屋燬書焚  
坦亭樹伐季青姪率眷入深山禹夏孫

逃徽州感賦

戊寅七月

亂離時世故鄉思一紙音書百種悲  
大廈竟辜寒士庇遺經奈失遠孫期  
心援骨肉金難寄夢繞松楸木已衰  
堪歎老身耐飄泊琴囊劍匣尙相隨

七月十五對月

紙灰驚起樹棲鴉今夜何心玩月華  
一樣清暉多少淚流民百萬已無家

中元節祭先

盤蔬粗薦獨泫然家國興亡七十年  
追痛先親談往事亂離豈祇在生前

有感

春秋不作痛詩亡浩劫蟲沙劇可傷  
安得桃花山外地子孫世世守耕桑

自詒

萬緣前定有天裁七十殘年念已灰  
除卻焚香並啜粥別無一事上心來

養心

彭殤一致總成塵大患從來爲有身天地委形何足戀要將淡泊養心君

秋思畫備事走候經一年更延全國不勝感唱

方寸成灰鬢已絲船那堪務觀示兒詩烽烟遍地生難料寒暑催人老不知海內英雄  
爭崛起天涯骨肉盡流離千年青史重回首試閱金元代謝時

百年酣夢委塵埃太華騎驢亦壯哉日月不情終不老風雲何去復何來盛時將相原  
無種劫後詩書尙有灰自古興亡雖定數要憑人事挽天回前辨以太談之

止足

松菊從吾好琴書結古歡流年如水逝浮世等雲看蟬腹腥羶絕蝸廬坐起寬餘生知  
止足何物動憂端

對鳧老人重印聖蹟圖徵詩

圖成聖蹟日經天盛事今看步昔賢滄海橫流驚一世尼山教澤亘千年珍藏要似經  
留壁浣讀還如韋絕編近聖人居公最甚故應洙泗有薪傳

借花市小屋爲靜室書此補壁

結廬人境絕紛諱心似山僧已棄家塵拂藜床如是足三椽六尺又何加百年日月輪  
欹枕萬里江山賸斷筵從此清齋無別事讀書纔倦卽看花

重九日雨莊約同西甫子貞震初佩璵小酌觀菊並登新華最高樓因憶南中親

友

城郭當年邈莫尋，遼東歸鶴此登臨。菊因逢閩開偏早，酒爲澆愁酌更深。話舊幾人誇總角，憑高何處寄鄉心。青天莫問空搔首，且聽飛鴻有遠音。

冬至前五日得雪約西甫子貞佩璵同飲市樓遠眺用重九詩韻

山河綿繡恨難尋，被野祥靈喜已臨。萬里途平鴻迹遠，千村澤透麥根深。待看日月銷兵象，先見乾坤育物心。痛飲市樓驚歲晚，天涯白髮幾知音。

先妣忌日泣賦

痛失慈幃已卅年，雞豚空薦涕泫然。松楸淪入兵戈地，腸斷飛鳶跼跼天。開元德誠善亦被燬過年

烈孝友堂故宅

七十四初度二首

秉燭光陰豈久留，況經多難又添籌。百年幻境輸欹枕，萬里烽烟怯倚樓。憂國有心存典籍，思親餘痛墜箕裘。兒孫勉慰尊前意，且祝江南寺寺遊。

殘息才支鬢已凋，放懷且喜解天弢。漫思卷石填滄海，將見強弓息怒濤。一篆清香持小劫，半杯濁酒餞今朝。書生自有千秋業，閉戶寧能與世塵。

癡頑

超然塵網養心君，獨有癡頑二字真。不是將心敵憂患，和心忘卻始全神。

止菴詩存

三十二

達觀

淵明視家如逆旅前途漸窄猶惕惕放翁曠達無與倫來本不應去何感自古汾陽曾有幾至今思之同拂霓掃空泡影見真吾一點靈光毋自汨

生日思親二首

少小羸弱豈永年萱堂顧復百憂煎今朝白首思萊舞難挽音容拜几前  
幼志輕離重顯揚老知菽水勝羔羊絕裾一失悲風木抱恨終天祇自傷

有感二首 庚辰八月

吾家世存忠厚慈祥

先考生平極重教育力培後進

先妣軫恤孤貧推解

不違且常以此訓子孫熙數十年節衣縮食罄施濟所恨時乖事舛迄無長策今經大亂收集餘爐令兒輩聯合慈善同志組織持久善舉常承

先志不

墜家風于焉是賴惟世變方殷後顧茫茫不知能否天假之緣尤惴惴焉

夢境艱危萬苦辛登山無徑渡無津曉雞一唱窗虛白依舊藜床自在身  
平生屋漏矢銘心萬事低摧口欲瘖畢竟乘除天不爽安然粥飯到而今  
幼承慈訓勸推恩施濟常存在耳言一事無成今白首愧將艱鉅付兒孫

讀書有感

勲業文章愧不能臨窗展卷意兢兢未會聞道身先老辜負兒時半夜燈

戊寅除夕二首

光陰彈指雪盈顛志道無聞媿昔賢詩禮已辜庭訓守筋骸奚比石頑堅衰時舊業回  
潮積濁世浮名入暮烟若問此心真面目返觀七十四年前

物態從教日日新閉門聊得樂吾真心遊與世相忘地身是叨天獨厚人萬里風雲雖  
變色百年禮樂尙知津燈前靜對爐香裊幾樹梅花別有春

己卯元旦津寓試筆二首

大地春回氣象昌太平民物慶熙穰蚩尤毒霧能多少自是堯天舜日長  
韶龔隨親抵析津回觀卻似夢中身童心未盡慈顏邈反掌興亡七十春

得鄉書感賦

陋邑衰宗故國情承平版籍子遺丁登樓心怯斜陽處愁聽雲邊斷角聲飛機仍時轟  
炸旋中若幼

全  
被  
微  
調

病中示諸子

勳業不救時文章不傳世負此七尺軀平生多顛蹶豈謂不逢辰獨遭天地閉筋骸如  
芭蕉先秋已凋做寒煖苦節宣飢飽費調劑絮衣勝腋裘蔬食屏雞兔居室才尋丈蹇  
步怯階砌性本愛山林清遊等夢寐陳編希尙友白陸尤深契風日偶晴和出門無所  
詣朋輩如晨星寥寥幾後裔晤語重悲傷多言取罪戾亦或巾柴車獨往無人際心曠



天宇高眼明風月霽徘徊賦小詩俚句詮真諦足已聊自忻悅如舟不繫人生固有涯  
泡影誠危脆富貴如春花誰哉能罔替稽古賢哲士經綸在利濟撫衷自循省視身若  
疣贅殘年百念灰恨渺身後惠戚族衣弗完鄉鄰食弗繼睦嫻與仕卹庭訓志未逮引  
痛切肌膚每思輒橫涕喘息告諸兒慈祥吾祖制餘慶豈汝私幹蠱惟汝勵勤儉而推  
解忠厚而孝悌世界莽風雲屋漏質天帝瓜瓞卜綿綿至性爲根柢世澤倘能延含笑  
從此逝

弔張勳伯撫軍二首

赫赫當年定遠侯玉門生入隱鋤耰天教鼎沸中原日難使英雄得首邱

解法

叱吒曾令萬馬空興亡未決若爲功年荒四野多豺虎錯不藏身人海中

題北洋名公致外舅劉閣學公書札二首

羣賢濟濟中興年警欵芝蘭入錦箋鎖鑰北門傷往事空留紙上幾雲烟

先君橐筆起江南袍澤澤惟公共苦甘今日馨香留異代燕齊相望兩燈龕

先君專祠於天津與  
祠宇相望北洋監司中所  
有也

檢校舊牘有感

五十年間萬事空羞將老眼送歸鴻幾多家國心頭血盡付雲烟變滅中

遊英公園五十年老海棠盛開

薄靄輕陰護豔妝天公有意惜春光憑肩仕女嬌無耐逐隊兒童喜若狂乍轉流鶯知  
驟暖頻招遠蝶似聞香花顏不改承平日夢繞西園欲斷腸願和園海棠昔年景或

喜次孫嘉良授室巳卯五月初八日

種德詒謀百慮寬青廬借地在國民飯店禮堂行禮喜承歡禮嚴著代孫由子瓜衍椒繁倚杖看

新蓮並蒂及時栽喜見孫枝次第開繡祿已乘雙竹馬明年迎得石麟來長孫前年完婚已得兩女

女孫

登樓有感

朝市飄蓬五十年清時無補又烽烟倚闌不覺斜陽晚貪看孤雲伴鳥還

五月二十日佛號滿千萬聲余稱佛號初無定課自丙寅年始每日定二千聲計程十有三年矣二首

不貪世諦不朝真七十年來百苦身今日稱名過千萬可能歸作佛邊人

少年猛志喪吾真憂患如山集一身老慕金仙方徹悟夢中何事得由人

有感

人家最忌事事足此語吾聞于胡公消長陰陽天不爽君看熟極必生風

七月六日洪水突至津垣盡成澤國

須臾平陸變深淵真似黃河水自天風捲濤聲村樹杪日搖波影市樓顛幾多行李成

止菴詩存

三十四

漂杵百萬流民在露田安得賢能如趙抃療飢拯溺獲生全

自遣二首

風塵歷盡雪盈頭勳業文章志已休贏得身心如木石丹經讀罷且清游  
七十年來醒幻夢三千里外寄閒身茹蔬啜粥由天賦底事能憂淡泊人  
遙望水中樓閣有感

煙樹微茫景一奇凌波樓閣鬱參差流民圖已無人繪卻賦東坡海市詩

中秋對月

一年容易又中秋萬里歸心浩莫收情話千端無處訴殷勤惟有月當頭

庭中夾竹桃入秋大開

空庭幾樹竹兼桃次第秋花伴寂寥寒藥不妨招蛺蝶疏枝猶得集鷓鴣雖非金谷繁  
華勝也似雲臺逸興饒方寸清虛天地闊始知鵬鷗等道遙

重陽日九弟招飲市樓

用王維韻  
二首

四海烽烟愴此身白頭兄弟倍相親舉杯更勸茱萸酒翻羨耆年是壯人  
九弟已五十八  
少

菊花十里伴閒身回首揚州孰與親地老天荒今古恨難忘百口渡江人  
九日在揚

州與大兄攜手  
出北門看菊

九月十九日同九弟約西甫一甫雨莊佩璵蔬酌爲展重陽會和佩翁詩原韻  
九日重逢醉眼青舊交零落若晨星涉川安得先三甲通道誰能遣五丁玩世光陰同  
野馬弄人造物是寧馨黃花開晚知無恨十度風霜又飽經

七十有五初度兒輩進重遊泮水圖爲壽感賦二首

青衿繞膝慰高堂六十年前夢一場盛世衣冠隨籍去中天禮樂付詩亡車書翻作乾  
坤厄文字誰聞翰墨香儘有英才徧閭里稱名那復列官牆  
漢官儀已蕩無存釋菜誰知聖道尊萬里櫬槍悲浩劫千年秦火痛餘溫牛刀莫笑弦  
歌地燕翼還思通德門畢竟詩書能繼世區區衣鉢付兒孫

生日述懷二首

老人風燭亦欣然漫說添年是減年口羨香醪看客醉心懸峻嶽藉詩傳光陰難繫花  
間露世事如飛草上煙晨粥一盂宵一枕枝求消盡卽神仙  
文章勳業本無期獨有箕裘願不移遺愛心欽南服日慈祥耳熟北堂時衰殘已戢希  
文志頑健還資務觀詩身後可能流澤遠尙將繼述望諸兒

已卯除夕感懷

守歲兒童喜欲顛老人心緒獨紛然羈危故國三千里瀕洞風塵五十年何日黎元登  
衽席無邊蒼狗幻雲烟高堂菽水嗟難再扶拜龍鍾俎豆前

止菴詩存

三十五

庚辰元旦試筆三首

元日光華氣象新  
陽回斗室又生春  
老人拜舞無多祝  
再覩昇平作幸民  
又見辛盤百果堆  
故鄉風味笑顏開  
筋骸倘似常年健  
准擬江南買棹回  
未敢貪天壽且康  
甘餐美寢答春光  
心危不減華胥夢  
腹儉還贏壘瓮香

自詠

夢境何休短齊觀  
孰等量養成知命學  
修作引年方食少  
同珍餌心虛卽道場  
任教桑海幻身事付蒼蒼

水仙二首

出水花枝照眼新  
一番冰雪一番春  
會來天地無私意  
隨處桃源可問津  
孤潔無言遠世情  
亭亭金玉自天成  
夷齊千載風猶在  
白石清泉共此生

孟莊宅偶題二首

八十開年已半強  
市朝經閱幾滄桑  
從教舊歷更新歷  
卻認他鄉作故鄉  
椿蔭難回驚歲月  
槐陰未茂怯風霜  
龜堂願學隨緣住  
日日街頭看戲場  
萬緣歇盡寸心安  
斗室端居似海寬  
枕藤探源同志少  
荆榛塞路獨行難  
蘭芽競秀知春早  
松蓋辭榮耐歲寒  
風雨漂搖常閉戶  
一篇木雁養金丹

題齋壁

浮沈人海媿虛生  
霜鬢龍鍾老已成  
楹有藏書期世遠  
室無長物覺身輕  
隨緣施藥非言惠  
遣悶尋詩不計名  
安得女媧還煉石  
尙摩病眼看河清

病中作

二首

宴客室寒又傷生冷壯熱三日

聲色侵人病莫興  
老來貪食更堪憎  
美餐入胃如吞石  
甘菓凝胸比飲冰  
下箸危於臨大敵  
選珍難似覓良朋  
膏肓豈是無端至  
氣血摧傷藥不勝

一飯疏虞廢寢興  
百番反側百般憎  
胃寒安得回丹火  
脾溼殊難解澤冰  
減膳禮疏慚對客  
加餐情厚怯邀朋  
老人謬試千鈞弩  
奮臂方知力不勝

養生

隨緣息念安天命  
慎食防微卻病魔  
此事躬行須自策  
養生妙訣本無多

虛靜

進食不多能養氣  
見人時少得安神  
五千道德惟虛靜  
要識精微後此身

隨分

暑寒不忘衣加減  
風雨惟依室徜徉  
康濟自身媿康節  
也知隨分答年光

安禪

一生碌碌爲人勞  
老識安禪可補牢  
臍有晨鐘並夜磬  
戲將聲寂問兒曹

憶昔

名場憶昔少年雄徒步風塵百里中孝秀書生從古重貞元朝士與誰同城民今故輪  
遼鶴家國興亡付雪鴻今日一燈依病榻青編有味勝兒童十五歲時由本邑赴鄂試  
出戶惟手一編對燈影耳

卻病訣二首

跣趺半結倚藤床收視環臍轉火光守得癡頑卻病訣如天大事莫思量  
電光石火有何常日日隨緣作道場無慮無思名極樂半飢半飽是仙方

老妻閒話

庚辰余七十六妻七十五

二人一百五十一頭童齒豁舌猶存滄桑往事從何說尚把艱危告子孫  
世界安危常草草家庭興替亦悠悠休嗟三黨尊行少兒輩于今且白頭  
讀醇王傅相海軍大閱記書後二首

千古河山似弈棋賢王上相亦何爲蒼生浩劫今方始五十年前運已移  
天厄英雄恨不平危機常向盛時生乾坤解紐嗟何及誰使連鷄勢不成  
先外舅劉閣學公百齡追慶三首

憶從親迎謁音容倏痛弓藏馬鬣封今日營齋天地別還思海外覓仙蹤  
俎豆馨香寄海東當年卻敵出奇功威令昔河山感警效如聞百歲翁  
上壽期頤復幾時卽今冥慶重追思乾坤不朽綱常在一世孤忠百世師

追慕慈親

夢裏音容無計覓松楸千里心恆惕老昏偏記在童年乞芋牽衣猶歷歷  
常向母乞制錢一二文市食之

病起偶吟二首

十日春光病裏看牆頭柳潤鵲聲乾晴明頗動青鞋興心怯隄邊未減寒  
百歲原難樂事多好春况復病中過今朝生氣纔絲髮便擬尊前發浩歌

病中謝親友相問

病魔難遣亂時屯故舊還因異地親報語加餐須努力相看都是白頭人

養病

簾櫳聲靜木陰移正是清閒養病時書策目昏無日課睡餘遣悶卻吟詩

白頭

少日心期慕白頭白頭今屆復何求挽車方識騎驢樂得隴翻增望蜀憂  
自苦花間蜂逐為誰謀淵明豈惜前途窄高臥羲皇歲月悠

題畫十首

小病兼旬閉戶無聊坐對屏山率得俚句拉雜書之聊志臥遊情趣云爾  
相同屏山作臥遊此身如在百花洲烟波縹渺鐘聲遠欲往溪邊喚去舟



柳黃草綠早春天最好風光是水邊十里鶯啼聲不斷家家齊放釣魚船  
一派溪山不染塵田園廬舍亦仙人此心若使殊巢許縱有桃源莫問津  
兩岸青山解送迎波平帆飽一舟輕老夫對此生狂思身似江湖萬里行  
十載姑蘇夢裏蹤層層塔影一聲鐘今看圖畫添幽致試劍池邊好着儂  
四面山如碧玉堆白雲深處有仙臺亭中一叟依稀見猶帶筆床茶灶來  
病餘足蹇目猶昏書策塵封更閉門忽見江南舊遊地水村山寺得重溫  
柳陰驅犢水如漿四野催耕處處忙屋角鳴鳩勤喚雨聲聲猶帶杏花香  
桑陰幾處臥閒牛蠶事豐成麥有秋莫笑農家終歲苦一生衣食與天謀  
高文無那病支離獨有雲山興未衰百感衷情難縷訴請看十絕畫中詩

夢遊靈隱

身入名山衆壑深路隨啼鳥亦無心莓苔一徑知何處風送溪聲過竹陰

答友人約遊山

遊山本是覓閑方卻爲遊山特地忙我欲結茅最佳處開門朝夕對山光

老病

馬失非爲禍花開豈有長病知浮世苦老悔少年狂殘息半甌粥清心一篆香老聃原  
學易妙理問羲皇

有感

草草光陰一百年百年曾見幾人全  
天心夢夢逢陽九世界茫茫閱大千  
已歎中原紛逐鹿更看大地墮飛鳶  
會須喚醒希夷叟驢背相期太華巔

自勉二首

術無導引還延算計乏奇贏  
尚厚生百事敢貪天賦子要將為善  
矢雞鳴莫嗟枝葉傷秋落好培根  
蒂待春生知幾一念天臨汝陰德  
由來若耳鳴

無心

莫執無心尚有心好將禪寂老  
光陰中天月到光盈室大地春生  
綠滿林

市隱

一生好入名山遊  
觴垂老翻成市隱謀  
滄海田中新世界紅塵堆裏舊春秋  
數椽且復親鉛槧小圃聊堪荷棘  
稷欲問鄉園歸雁少夕陽明處怕  
登樓未幾居津租界三年矣

喜雨二首  
四月一日

掃淨風霾別有天  
霏微小雨助花妍小初開  
山人生隨遇須如此一點無塵便是仙  
喧日尋芳有幾回  
東風啼鳥十分催  
天教微雨殷勤護  
留待詩人載酒來

遊倪氏林園

依水園林氣象舒  
幾行高柳蔭扶疏  
豐碑大碣將軍墓  
木斲牆圯處士廬  
雨足尚添新

某甲潦收難覓舊芙蓉山邱華屋今無恙贏得平泉世世居洪水後荷盡隨只有大物

有感二首

寥落田園有樂天及今况復義熙年未能樂土營三窟已是浮家歷五遷南渡衣冠等  
塗炭西征道路慘風烟夷齊倘弗辭周粟薇蕨焉能百世傳  
木壽雁烹本自爲病侵虎噬欲何之百年日月雙飛轂萬里河山擲一棋天地無情猶  
憂蒼乾坤有象作著龜平生磨蝎甘憂患老奉丹心是我師

邀友看花

乘健偷閑有幾何春光九十本無多今朝日麗花枝好酒碗詩囊莫負他

戲嘲老態

老來嬌怪勝兒時百事多乖懶護持不耐輕寒偏惡燠甫傷鋪啜又號飢耳聾肆應支  
吾對足蹇孤行寸步移最笑閉門苦岑寂枯腸搜索打油詩

奉和鷓菴自笑原韻

同是閑雲自在身任教東海又揚塵一春美景無多子十日清游有幾人與世不諧難  
避俗得天獨厚尙全真桃源未必非凡境尋得溪山作幸民

棄產感言

萍蹤卅載似浮槎垂老翻驚四面笳洗甲回天甯有日連烽徧地等無家未能松菊留  
三徑已是圖書散五車白傅田園尙寥落吾廬何恨寄天涯買宅燕京已卅年今有事  
不能歸之苦從此飄零  
不知何日得安居矣

養慵

不覺年光速翻嫌人事忙擬遊還怯步得句亦旋忘粥晏晨鐘後書拋午枕旁時時留  
小疾天賦養慵方

自做

浮生百歲少得笑幾回難戒懼逢災道從容遇事安齋心銘屋漏息念鎮波瀾逆順休  
忘道胸中抵海寬

曠觀

窮通倚伏要觀全世事誰將後視前快意每招衰病苦多財還損子孫賢春花秋草無  
私地山月江風自在天二十四年猶一瞬汾陽富貴亦雲烟

孟莊新葺止園消夏四首

小園草草勝居鄉袖手晨昏一炷香莫笑閒坊人事少殘年光景喜深藏  
掃盡紅塵喜不禁閉門還似入山深茅齋低小偏忘暑幸借藤梢半畝陰  
豈慕夷齊北海濱疏慵聊得養天真因時花鳥娛清晝隨分杯盤洽比鄰

炳燭餘光已悔遲誰知閉戶有餘師枕經薛史嗟何及曳杖閒吟白陸詩

自笑

自笑龍鍾百不能蒼居淡泊曲吾肱漫言居易三齋月終歲蔬餐薄過僧

清明道阻不得掃墓

養親負米恨無能寒食鵲聲感不勝望斷家山懸萬里夜來魂夢繞荒陵

喜得皓孫書二首

弱息投荒瘴海邊魚沈雁杳已三年花開花落驚殘序雲卷雲舒任際天定遠心期輸汗馬伏波身世仰飛鳶衰翁幸展平安字贏得甘餐與熟眠

家國興衰不百年艱危歷盡尙身全衣冠卻走蠻荒地衽席翻依瘴癘天橐筆中興思祖武楹書季世望孫賢乾坤消息空搔首撫簡燈前一泫然

壽俞巨溟七十

士林道義久蜚聲奚止文章重鹿鳴卻祿直追陶靖節著書何讓鄭康成千年史鏡扶名教百世儒宗啓太平天地有情終不老祝君矍鑠見河清

先生著作甚多其鏡古鏡  
翁宗軌範二種最有裨世

中秋憶故鄉

佳節仍多難浮生賸得閑野花供老眼濁酒慰愁顏世變朋儕少時危道路艱江南風

月好何日故鄉還

先公秋祭感言

先公天津專祠在河東道阻權在孟莊宅設位舉祀之所  
南院今春新葺三楹名春暉堂將為子孫供奉香火之所

音容宛在拜尊前淒愴秋霜已廿年先公辛酉九月癸亥瀛海難忘完趙璧析津猶記絕

義編先公晚年住孟莊易理匯參極書世亂思繩武豚豆時荒愧掩肩千里松楸空拭目故鄉何日

熄烽烟光緒庚子兩宮蒙塵先公奉旨入都議和與八國聯軍統帥在西苑蘇台聯

拜歲時瞻拜云折衝約成兩宮始得同鑾前年熙華屯緡胡同宅立先公紀念堂俾子孫

重九約諸友登高茶會二首

一年容易又秋高天與清閒貸我曹落帽漫矜當去客題糕猶得幾詩豪長空雁度無  
留影四海鯨吞有怒濤半醉半醒堪玩世且浮杯茗當醇醪

晨星寥落數交游惆悵津門幾度秋避世陶潛甘閉戶憂時王粲怯登樓壯心尚共杯  
傳手殘鬢難禁菊滿頭且喜置身塵壒外乾坤萬事莽悠悠

子貞一甫同訪孫氏園觀菊四首

黃花滿眼帶香歸結伴清遊與世違欲仿義熙人載酒風流文物是耶非  
繁華事散與誰論獨有柴桑逸興存開遍東籬偏寂寞孤芳相對卻無言  
秋容老圃倍精神千種芳名色色新扶杖繞廊忘日暮別花原自屬閑人  
名花幾日尙爭妍容易秋光又一年尊重風霜堅晚節莫將過眼付雲烟

止菴詩存

再至壽豐觀菊賦呈園主人孫俊卿三首

捲地西風百卉殘徘徊三徑意闌珊天公獨展東籬興留得黃花最後看  
金英春植到秋寒十日暄晴兩度看多少辛勤供眼福賞花容易養花難  
秋容雖淡有餘歡要是人間晚景難解笑花迎重至客癡心不厭百回看

河東萬氏園觀菊感賦

一別長安四度春上林辜負幾芳辰欣逢陶令開香徑聊勝湘纍問水濱醉月已忘當  
去客迷花猶是可憐人天涯行遍吾廬好爲愛東籬雨露新

飽觀萬家名菊率成俚句卽呈園主璧丞先生二首

荷枯桂落負佳時老圃秋容又一奇魏紫姚黃難比美環肥燕瘦總生姿芳心不覺風  
霜苦傲骨還憑雨露滋陶令東籬無此景喜開三徑好尋詩  
莫羨柴桑歸去時東園名菊更新奇美人高士無凡品立鶴翔鸞有古姿滿坐芝蘭熏  
酒醉一庭風露覺衣滋未言割愛頭須插且摩籐箋贈小詩

立冬後重訪孫氏觀菊仍用前韻二首

風塵邂逅惜才難三日還應刮目看要信天成真傲骨凌霜不見一枝殘  
緩拖籐杖步珊珊三至東籬興未闌歸去尙攜香滿袖見時容易別時難

看雲

老懷孤寂百無思聞看飛雲任轉移坐久不知天色暮長空偏愛落霞遲

病榻偶吟二首

身世今如退院僧菴居歲月捷飛騰驚回七十年前夢祇有寒窗半夜燈  
鼎沸中原又幾經白頭衰病任伶俜儘餘薄粥支殘息四野哀鴻不忍聽

遊李氏荒園有感

昔日園翁肆盛筵椿庭趨侍意翩翩春花豈得朝朝好秋月難教夜夜圓儘有蒼穹新  
雨露空餘培塿舊山川平泉自古多遺恨獨憶希文思灑然

自歎二首

濟世才庸近寡恩虛生何以立乾坤一身溫飽耽餘蔭鎮日優游妄自尊未使親疏俱  
得所安知禍福總無門邯鄲夢覺須臾耳回首平生事孰存一生平所辦故鄉善舉無所存其可晚歎  
憂懷夙夜懷淵冰道德文章不足稱東國冠裳方在厄西方公據更何憑簡篇莫化青  
衿子鉢飯難周白業僧宏願未償看就木千年應愧漆光燈

七十有六自壽二首

浩劫年光東逝波浮家又見四年過地來岸今已四年籠紗密護風前燭策杖徐行雨後坡堪  
笑迂拘觀本草不妨安樂住行窩白雞倘假金蛇幻星家言我明年已歲當壽終途窄淵明較已多

淵明甫六十  
遠謂前途窄



世界蝸牛角上攻茫茫逐鹿若爲雄清芬幸寄春暉裏慈範還昭淨業中律寓今年休  
宗香火京西極樂寺開淨  
業堂承奉吳太夫人神位身謝坡仙萬事足心懸渭伯九州同樓頭莫恨寒光短萬里霞烘落照紅

### 故都止園題壁

勳業文章志未據固應身世落樵漁四方蓬梗無安土三宿桑根有愛廬學禮諸孫勤  
祐主如愚季子典楹書千年城郭巍然在遼鶴猶當識故居止園在城西屯胡同後  
院立先公配念堂歲時  
舉祀前院聚所藏書籍及師古  
堂家刻書版命明恩典守之

### 娛老

身如槁木髮成絲峰頂餘暉落尙遲玩世不爲明日計息心常若未生時偶尋耆宿嘗  
茶話戲賽兒童鬪草詩野鶴閒雲自今古伯倫荷鍤又何爲

### 先妣忌日祭

一別慈容四十年蓼莪抱恨竟終天難從圖像親言笑祇見雞豚列几筵定省晨昏無  
復事瞻依靈爽亦虛傳春暉未報傷衰草空向秋波哭逝川借

### 自遣

靜對爐香百慮捐清輝夜月豈常圓隨緣樂去身無累諸有空來性坦然藏壑光陰飛  
野馬解殺世事等浮烟殘年自合青天管熟讀南華內外篇

放歌

大聖生時盜始多禮為亂首論非苛祇聞狐鼠依城社不見禽魚脫網羅石未煉來天有漏山能銜去海無波乾坤浩浩羣兒戲千古英雄奈若何

病中自廣二十韻

過去及現在孰為今與昔上古在目前光陰倏過隙賢聖同仙佛精神昭典籍上下千萬年其光長赫赫人生本如寄處處皆火宅壽夭較短長總計不滿百即事生悲欣寒暑成災厄五蘊苦之因八還苦之迹卻病有何方安心是藥石去住一無嗔久暫兩俱憚胸中養浩然所遇忘順逆譬如有冬夏豈能無朝夕幽明通晝夜理故著周易知命乃樂天索隱並探蹟得失平等觀我見頓冰釋鯤鵬縱海天饑蟲安禪席秋菊不爭春朝菌不攀柏認取主人翁誰云當去客東土本無居西方亦非隔神游歸太虛勿謂前途窄

紀十月二十二日事

是日至德城陷居民逃避山谷四

已遭旱魃又兵車痛惜黎民靡子餘千里田園成赤壤萬家廬舍盡焦墟魂飛脫阱奔林鹿胆破沈淵漏網魚尚見孤村宗祏在上蒼應念隱君居

災後寄族人

閩境皆成焦土宗祠幸在至善教故僻族咸

莫歎衰宗族不華乾坤消息寸心知移風端自分朱墨挽劫終思拯溺飢千載清芬延

世德始祖中丞公自百年厚澤述先慈先妣一生慈善天公與善無差忒後嗣英才視

自解

鴉鳴鵲噪動機先要信人生各有緣社鼠城狐原是運池魚幕燕亦關天間中富貴心  
空爾壽外康寧數偶然但得癡頑如鉄石也成一日地行仙

癡頑

人言閒靜似而非惟有癡頑二義微蟠木不爭溝脊斷孤豚豈羨廟犧肥鳶魚飛躍皆  
天性鵬鷗逍遙總化機大冶鑄金寧有意鼠肝蟲臂又何譏

生日思親

風燭餘年風木悲此生難再是兒時每思煨芋承顏樂尙記分梨繞膝嬉蒿蔚豈酬天  
地德松楸徒撫雪霜姿廿年一別鄉千里空憶荒林聽子規

古香齋題壁

世事紛紛了不知閉門白陸是吾師飯餘茶罷拋書後清坐燒香賦小詩

有感

素抱希文憂樂衷百年至計一朝空生當剝復貞元際身魂浮沈天地中赤手未攄三  
黨難白頭猶望九州同鄭公齋竟汾陽勝世世惟勤力穡功

津友贈梅竹二首

隨處桃源好問津故人同作太平人  
分來梅竹清齋供渾似貞元第裏身  
唐花照眼白頭新鞞鼓聲中作幸民  
喚醒揚州冊載夢蠟梅天竹萬家春

觀風雪有悟二首

任教平地忽生風幻滅原歸不動中  
天際飛花千萬斛可能一點礙虛空  
世間生滅境千般冰炭侵難片刻閑  
放眼乾坤真實相掃空六用是無還

小疾

櫛髮頭仍悶寬腰腹未舒一身猶是贅  
萬事莫非虛籠玩新華烏池觀舊放  
魚齋心同止水小疾自能祛

耐病二首

頻經雨打花餘萼幾兆焚如燕窠窩  
何怪暮年能耐病平生憂患本來多  
既以爲人已愈有未能無疾算偏長  
乘除消息由天定且把虛懷抵壽康

病起偶題

拓開心緒一身輕  
砭去頭風兩眼明  
災害每從衰運至  
功名原自得天成  
百年日月無愆晷  
千里關河有定程  
啼鳥候蟲非作意  
昌黎漫說不平鳴

秋夜

衰疾秋無奈，高年夜有情。霜嚴衾似鐵，月淨几如瑩。繁響微蟲語，長空斷雁征。祇愁鄉夢遠，歷歷到天明。

斗室

斗室養殘軀，乾坤一腐儒。仰承三聖學，潛玩六經圖。活水觀魚躍，清風聽鳥呼。荒人事少且，復兀枯株。

傷老

一生桎梏利名場，聞道功疏老始傷。昨日不知今日是，存身豈識外身長。春來塞北蕪仍綠，秋至江南稼亦黃。天地無私同覆載，區區人世說彭殤。

有感

滄海橫流已遍遭，抱殘守闕敢辭勞。百年溝壑鴻毛重，萬里關山馬骨高。會洗金戈河痛挽，自銷鐵戟浪爭淘。焚香夜祝天垂祚，濂洛諸儒媿禹臯。

除夕守歲

庚辰

磊落將如此，老何皤皤白髮得。天多焚餘灰，爐詩筒在殿後。光陰爆竹過霄漢，幾人曾鍊石。虞淵無處更揮戈，深宵那復童年趣。一炷清香禮佛陀。

辛巳元旦試筆

用除夕韻

燭殘餘燄奈風何，重七之年已足多。萬事盡拋雲外去，一生都付夢中過。祥開日月占

豐穀瑞靄河山兆止戈椒酒尙扶衰後健且追白叟誦彌陀

憶昔六十年前辛巳十七歲秀才考優等已補廩生

弱歲青衿方食餼及今回首是昌期百年家國中興日李文忠方在北洋歷一第功名

發軔時後十二年癸巳棟鄂聯輝曾鞞鞞大兄乙酉拔貢大兄同榜進士七弟癸卯經

癸卯舉人椿萱並茂正熙熙先君是年著律海關道歷升直隸四十年滄桑屢易

清芬在庭訓難忘燕翼詞自唐朝始祖及六世祖以孝友文章著稱先

古香齋題壁仍用除夕韻

掃空大患奈身何茅屋三間則已多翠柏有心迎雪立石樓無耳任風過挽瀾徒屹中

流柱垂涕難休同室戈燈燼欲殘看瘦影居然蕭寺老頭陀

休問桃源路幾何放懷斗室得春多彌天壘塊杯中盡閱世微塵枕上過萬里車書聯

几席千年玉帛化干戈澄心似海皆仙境剩欲扁舟訪普陀

上元感賦

堪慰衰翁自在身圖書滿架未為貧一門甲第慚通德半畝荒園負隱淪閱世不知朝

市改撫辰猶見歲華新街頭燈火今猶昔閉戶還留斗室春

達觀

得過一日且一日後事茫茫誰可必無端妖伏雷擊牛未見滂沱月離畢魯使酒薄邯

止菴詩存

四十四

鄆圍陽虎貌惡孔子厄才與不才孰者全雁烹木壽俱逢吉

對食

食飲隨緣要適宜飽諳世味此中思精粗濃淡初何擇甘苦辛酸祇自知茶興每回微  
倦後酒香常在獨醒時人生底似安蔬好晚歲東坡是我師

自題像贊二首

庸庸碌碌本來面目食有青蔬居有白屋風月婆娑光陰迅速不忤于人笑容可掬  
菩薩低眉金剛怒目彼何人斯齒稀髮禿燕居溫溫色容齊齋保此形骸還我素服

衰病卻醫

一杯薄粥氣如絲過歷餘生豈自期足底雲浮常似醉眼前霧隔竟成癡陳篇展轉辭  
難理故友遭逢氏不知逆旅去留天所命何勞折柬更迎醫

思故鄉

人生樂事在鄉關回首思之覺破顏石上輕雲從足起枝頭好鳥伴身閒買花每入市  
中市採藥常尋山外山天幸倘歸遠海鶴可憐腰脚已非頑

小疾旬日不出

車塵門外浩縱橫環堵蕭然百慮清架有藏書消日永室無長物得身輕招呼風月詩  
中景檢校江山夢裏程師友凋零閒過少敢欺衾影負平生

初春得雪二首

滿庭飛雪趁風斜，舞向枝頭似落花。分付兒童漫除掃，好催梅信到山家。  
霏霏繞樹去，還來偶聚階前玉作堆。人事無心祇此似，不妨隨處笑顏開。

津寓午睡

七十年來寄斷蓬，旌麾兩世亦匆匆。一菴高臥餘何羨，常是家山入夢中。今年八歲來津

烽火漫天思歸不得先君曾在天津道長  
蓋運司直隸集司余繼題斯席皆陳迹矣

登樓

憂患如山一笑空，西窗睡起夕陽紅。欲舒老眼無高處，獨自登樓送去鴻。

戲擬閒中富貴

貧賤騎人古有之，天然富貴最堪思。一畦葵長羅旌節，兩部蛙鳴勝鼓吹。管領湖山卿相業，招呼風月帝王師。書城坐擁無窮樂，懶和淵明乞食詩。

俚句自述八章章八句

世人行迹率多溢，美過情之譽予甚。恥之病榻無聊默，溯平生耿耿于懷爰著俚語以當私誅。質之君子無譏厚顏。

時當中興誕生鍾阜鼎，盛家庭椿萱並茂。十六食芹居然孝秀迨及壯年鹿鳴方奏學幼  
京曹筮仕十載邂逅東魯北直先君治舊津道蘆葦廉訪最久愚也不才忝踵三綬賤宦



謬縮度支民生莫厚經營實業心餘力否後樂先憂於己無取志在養民徒呼負負  
倏焉耆齡蟄居甕牖從事鉛槧殘闕抱守鑿納楹書光前裕後追維庭訓睦嫻孝友  
屢顧梓桑教養粗究水旱煩仍兵燹重違哀我父老流離顛仆車薪之火杯水何救  
而我獨安實深內疚饘粥有資數椽可覆雖曰豐亨衣褐飯糗閉戶息影兢兢屋漏  
車馬無聲度此清晝西方彌陀未嘗離口白陸詩篇未嘗去手回瀟平生幸哉天佑  
石火電光何物弗朽消息盈虛知足常有累世搢紳不爲不偶七秩餘生不爲不壽

業實 書刻 舉華 約修 足知

題室人七十六肖相

滿口春風神采淵若早歲辛勤晚年淡泊目昏能視齒落能嚼雖則蹢躅知足常樂

自况二首

過得一日又一日世間萬事海茫茫此身商略無歸處布被蔬餐卽道場  
生值玄黃血戰時一身泛泛欲何之終年謝病因疏客竟日無營卻愛詩

郊遊二首

謝客捐書鎮日閒攜筇原野散腰頑偶經橋畔多時立待得漁舟一一還  
輕陰薄靄露春光天意無私草木芳似有疑無蕪際綠半含乍吐柳梢黃

春暮二首

三月春陰柳絮飛山桃含蕊尙枝稀街頭袒臂羣兒戲竊笑衰翁未減衣

橋邊迎日得春多一水鱗鱗已綠波堪憶江南微雨裏扁舟四處起漁歌

敬止齋題壁四首

壯歲功名志未攄老來作計更迂疏生涯零落從無恨四壁蕭然卻有書  
靈府寧容外物干四方多難卻辛酸放懷獨有圖書樂莫繪流民不忍看  
老學癡頑不慣愁世間萬事付悠悠千戈擾攘春秋際陋巷何曾禹稷憂  
積雪嚴霜一掃空千紅萬紫又春風天心剝復人難測自有英雄草澤中

雜感二首

千年王霸若風馳治亂興亡復幾時天地不仁原曩箬還將芻狗示兒嬉集切雙  
版築魚鹽世有之風雲際會待昌期胼胝八載無家日正是垂裳端拱時思或世

讀史二首

蟲沙浩劫幾時終禍始蚩尤己自雄歷代幅員經亂展况今天使五洲同  
王霸奸雄祇論成從來正統本虛名試開青史從頭數幾日黎民享太平

題故鄉災民冊上年以來故邑屢遭空軍轟炸十室九墟其幸免者幾幾待哺

飛空鋒鏑技爭奇歎息黎民靡孑遺天地好生終不爽須知陰隲有倫彝  
不徒發粟意殷殷要識民生在力勤處處春耕齊荷鍤家家秋稼卜如雲及時安輯田  
園去免見流離道路分寄語鄉鄰諸父老好留功德到榆枌

小園二首

透牖暄風拂面來方知大地已春回  
番番花信從頭數擬伴園丁次第栽  
堪笑衰翁氣力微一冬篝火亂書圍  
今朝忽動青鞋興喜見牆頭蝴蝶飛

道室偶題二首

藐藐一身同墜露悠悠萬事等浮雲  
金經讀罷香初燼獨倚西窗送夕曛  
眼明始見乾坤大心靜方知歲月長  
密訣丹經皆迹象饑餐渴飲是周行

惜花二首

冷煙苦雨方無奈烈日暄風又不支  
人事多乖常似此幾何調燮得中時  
江南臘首先舒柳代北春深待放梅  
天運無私隨地轉好花原不爲人開

踏青二首

秋深花謝到春殘斗室身如坐井觀  
今日出門平野綠始知天地本來寬  
日麗風和絕點埃荒郊且喜又春回  
衰翁偶動尋詩興林下水邊特地來

高臥

義熙人易老高臥傲羲皇藥餌常堆案  
箴銘獨滿牆生涯憑市井歸思繞江鄉  
已是辭家客寧論夢短長

有感

青史若著龜燈前掩卷思風塵燕趙客耕釣帝王師運至臨高閣時遠泣斷碑知音千載遇今古幾鍾期

寄俞壽田親家

十年居久別

七年前同居香山清夏

千里夢相親等是無家客

余隱地入川已三年

都忘有限身

公年八十

驚花懷故闕

故都花時屢欲往觀未遂

風雨渡迷津

公今擬赴申江道阻不知何日得到

何日重杯酒江山共主賓

山共主賓

花時子貞西甫一甫雨莊震初諸人常約公園相遇賦贈

同是天涯客相逢絮語頻不才生計簡多難故人親腸斷江鄉夢心驚海國春年年花下遇重見白頭新

得壽田去臘書云將迂道赴申沿途艱阻無定程俟到再告今已兩月不禁感喟字密心如見情深語益親安危無定所去住不羈身易失蠶叢路難知鯉簡津相期同敬浦尊酒慰歸賓

先公祠宇在河東道阻已數年今春仍在孟莊故居春暉堂設位遙祭感賦

往事鴉音口卒瘞空留祠宇寄津沽廿年孺慕悲楹莫先公辛酉見背百歲清芬仰畫圖四壁懸先公百歲紀念圖詠風雨做廬猶昔在粉榆舊社及今無原精專祠式憑靈爽應含笑飲

胙孫曾滿坐隅

自曠

蝴蝶莊周夢本同大千世界一微蟲日消經帙詩牋裏生寄蔬餐藥餌中得意無時無  
美景放懷是處是春風桑田滄海俱觀盡不待修多說苦空

約雨莊上己日同遊李氏舊園

記取重三日清游恰兩人平泉仍舊主綠野又新春蝶影迎花徑鶯聲送水濱追懷杯  
酒樂往事問漁津

邁老

不作衣冠累寧辭髮髮凋春從菱屐老日向雉盧消眷屬宵棲鳥筋骸雨敗蕉拋書酣  
午枕魂夢也逍遙

自幸

人容藏老拙天許作疏狂彝鼎常堆案圖書獨滿床烏迎風過語花送雨餘香隨遇閒  
成趣脩然與世忘

寄慨

義利幾能辨隆污道不同家私隨手散生世轉頭空身出浮雲外心安陋巷中庖丁篇  
有味妙語善刀終

公園桃開有感二首

天涯忽已遍春風，繞繞公園幾樹紅。  
驚起少年京輦夢，官牆迤邐遷杏花中。  
燕南芳訊太匆匆，獨有山桃歲歲紅。  
狂態欲尋花下醉，故人難復一尊同。

病齒不能咀嚼戲作

憤忍龜腸本自奇，旋停鶴料亦相宜。  
不嫌叱犬還投骨，未問嗷鴻卻食糜。  
樑上獨憐新燕乳，欄間堪笑老牛呵。  
一杯鱸粥原無恨，大嚼屠門竊鄙之。

感歎

天地無情春不留，落花風裏獨登樓。  
亂離夢切還鄉兆，老病詩多爲國憂。  
羌笛數聲關塞月，衣砧一片漢宮秋。  
古今共盡兵車恨，青史偏誇萬戶侯。

喜春二首

久閱風霾可奈何，連朝麗日得清和。  
天心憫我窗中老，陌上尋花忽已多。  
世事無涯生有涯，春風到處是吾家。  
衰翁力少心猶壯，欲伴園丁學種花。

惜春二首

已過百五尙餘寒，寥落公園露處難。  
安得江南花似錦，小軒品茗剩憑闌。  
九十春光強半過，妬花北地苦風多。  
卻看野燒依稀綠，好景原來耐折磨。

無心

熟讀堯夫林下吟，自家康濟亦恁恁。  
看花臥雪平常耳，萬事無心喜不禁。

冶生

禍福無端不可尋，莊生于此費沈吟。  
冶生莫妙鞭其後，虎不能攫病不侵。

修禊吟二首

蘭亭高會著清名，天地無情卻有情。  
俯仰山川千載邈，招呼風月一身輕。  
形骸共盡杯中物，絲竹常留絃外聲。  
誰識右軍胸百感，永和原不是承平。

流觴曲水久知聞，詠事風流屬右軍。  
俯聽清流多寄託，仰觀峻嶺亦遙深。  
高懷直欲前凌古，陳迹猶思後視今。  
千載江山無定主，問誰能起繼斯文。

上己日一甫約偕子貞西甫雨莊震初茶敘賦贈

一杯清茗度芳辰，太液瀛洲說往因。  
地最多情河畔草，天教得意水邊人。  
偷閒隨柳青鞵健，道故班荆白髮親。  
千載蘭亭無恙否，江山爲主孰爲賓。

止足

逸老無如止足觀，一窗高臥有餘歡。  
籐陰滿架全忘暑，篠火圍爐不覺寒。  
風月放將詩句寫，溪山贏得畫圖看。  
但教方寸清如水，丈室猶應抵海寬。

觀化

王侯與螻蟻共盡一塵微，萬里隨鵬去。  
千年任鶴歸，乾坤真旅舍。今古幾漁磯，  
大化原無極。應知躍冶非。

菖蒲詠

拜竹何由隱者名春風被處且催耕杏花柳葉羞爲伍白石清泉過此生利劍新抽和  
露重安車早過覺風輕還思甲洗兵銷日太守鞭傳政有聲

送一甫赴秦皇島避暑

滄桑世事若雲烟何處桃源別有天自古海濱稱大老羨君陸地作行仙雄文正氣思  
驅鱷遠水長空看墮鷲島上逍遙真樂土秦皇名蹟且千年

弔姜女墓

忍枯萬骨築堅城豈料關山盡曳兵孤塚難平千載恨至今朝夕看潮生

墓在海中距  
山海關數里

詠山海關

原來四海一家春天地無私孰主賓獨使孤城傳萬世至今愁殺度關人

公園遣興二首

祇慣癡頑不慣愁偷閒日日作園游桃花開後春光老紅蕊何曾笑白頭  
幽燕三月始知春草綠花紅日日新除卻鶯聲無與語天教閑處作閑人

奉和楚卿見示修襖原韻

同是山林春暮天右軍獨步擅華年多情樂事無今古幾輩詩名有後先修竹虛懷塵  
外客流觴痛飲酒中仙及時好景君須領買斷風光不用錢



題天津三多里故居

何啻深山隱薜蘿，閒居陋巷得三多。牆圍隙地分畦菜，門繞清溪擁釣蓑。學退有書還熟讀，興來無酒亦高歌。先人槐蔭風烟老，詩禮趨庭幾度過。

詠得年

濂溪窗裏風光短，康節窩中日月長。知命有緣隨木雁，樂天無事問彭殤。忘身徇欲原非計，夏葛冬裘豈待商。自愧虛生樗櫟壽，懸疣附贅負蒼蒼。宋周子五十一，大子五十一，孫子五十一。

寄皓孫二首

萬里投荒日似年，伶仃顧影自堪憐。驚心更有難言處，仰視飛鳶瘴海邊。歎爾雙荆一已無，眼穿似續我年徂。玉門若待封侯入，休問含飴墓草枯。

課孫讀書有感二首

世運荆榛痛塞途，風凌替竟屠沽空。齋市遠清如水，獨課童孫誦典謨。風露淒清月影沈，伊誰能會此時心。神遊颺拜賡歌世，獨自挑燈出苦吟。

清明家祭

松楸南望涕縱橫，歲歲鷄豚客裏行。千里魂飛蝴蝶夢，三更愁聽杜鵑聲。心摧邱壠今朝恨，痛切門閭昔日情。等是羈危虛墓祭，何殊子厚謫邊城。

寄傲

靈府寧容外物侵高吟且喜滌塵襟閒如不雨雲歸岫清似無風月滿林與世相忘猶  
落落閉門獨坐亦惜惜琴書可寄南窗傲千載陶公是賞音

遣懷

衰年無地寄心期九十春光百首詩  
搔首枕上沈吟幾斷髭欲和淵明榮木句  
脂車策驥媿先師

閉門

難從世外覓田園老厭風塵欲閉門  
但擁詩書無客至不聞市井有聲喧  
紅殷萬朵花盈檻綠淨千竿竹繞垣  
得似深山人徑絕怡然自樂即仙源

惜花三首

最早山桃幾樹芳塵霾連日逞風狂  
天心欲解名花厄留得輕陰護海棠  
已過清明花未開春光易老妬風霾  
輕寒薄靄還多幸留待衰翁扶杖來  
三月春寒花事遲獨憐風日易離披  
老人憤及晨星起最愛含苞帶露時

落花二首

暖日烘窗柳脚斜杜鵑聲裏客思家  
東風不管春光老故向尊前送落花  
年年春色動鄉思客裏看花不厭遲  
最是落紅來枕上天涯歸夢乍醒時

郊遊有感

桃花無主幾人遊，歲歲芳蹤不可留。祇有春風似相識，石橋依舊水東流。

花時思還舊，都不得。今五歲矣，感懷賦此寄諸老友。

春歸何處迹成陳，歲歲花時又一新。燕去尚留樑上壘，桃開難識洞前津。但師康節藏窩裏，休向長安問水濱。天地無心人事改，江山誰主我為賓。

園中春暮海棠初胎，卻憶舊都稷壇最盛，遊人如織。

嫩蕊絲垂無限嬌，多情紅燭伴春宵。稷壇盛事渾如昨，欲醉花前髮已凋。

憶昔

西禁棠陰出屋高，花時芳氣若醇醪。當年退食公廷晚，繞樹千回亦足豪。百君海棠青

樽于退食  
之樽于退食  
不忍去

孟莊止園種菜二首

五載羈危別故都，不堪舊圃盡榛蕪。寄廬薄有三弓地，自種青蔬佐笱廚。  
多難何心花滿闌，朝開暮落更悲觀。及時小雨添畦菜，贏得齋盃卒歲餐。

自寬

世途易可出艱難，嘗味須經苦辣酸。事去無心何得失，疾來不藥亦輕安。歡聲籠鳥春同享，伏影盆魚海樣觀。與物相忘隨地足，老人歲月本閒寬。

寓意

豪傑原先天下憂，韜光養晦若爲儔。  
直鉤去餌方垂釣，五十年來不解愁。  
月夜聞笛

玉人何處倚闌干，橫笛偏吹行路難。  
寫盡關山無限恨，清暉况是客中看。  
排悶

時危身老欲何之，那復山顛並水涯。  
息盡機心還對弈，苦無傑思強題詩。  
遠追朋輩看花約，近伴兒童鬪草嬉。  
一炷晨香風定後，黃庭兩卷晝陰移。

老景

毫董光陰古更稀，一窗昏曉亂書圍。  
茶甘飯輒支殘息，不管門前俗是非。  
市樓顧曲

千家歌舞作生涯，變調齊摹塞上笳。  
見慣興亡心似鐵，更無人唱後庭花。  
信天二首

人生事事仰天公，垂老彌勤屋漏功。  
一息尙存生理在，此心常與彼蒼通。  
雞鳴爲善日，華萼天付神明勿負之。  
太極本從無極始，真源何慮復何思。

世網

坐受陰陽寇，橫招利欲侵。  
存身同蠹枿，歷境等蹄涔。  
醉去車堪墜，醒來鹿漫尋。  
一朝開

止菴詩存

五十一

世網萬里縱仙禽

負暄

淳風誰及結繩前，憂患原從識字先。  
讀破縹緗千萬卷，何如曝背負茅椽。

有感

順正方知命，伎求豈事天。  
蛾焦因撲燄，蟻鬪爲爭羶。  
花好無千日，樽生有百年。  
誓心若冰雪，魂夢也儵然。

答友人問老態

昔愛名山絕頂登，于今足蹇罷行滕。  
枝梧對客儀常略，抖擻尋花興偶增。  
頰有時紅惟賴酒，髮無可白直如僧。  
溪橋施藥尤堪笑，擊叟相呼兩不甞。

憫世

搔首青天問弗甞，蟲沙浩劫恨填膺。  
百年有限如炊久，萬事無憑若夢徵。  
愛鼠尙留眠後食，憐蛾還護佛前燈。  
此心不泯知誰會，欲學禪床入定僧。

勸酒吟二首

一寸光陰一寸金，勸君莫厭百杯深。  
花前月下時時有，難必身閑酒滿襟。  
人生夢境苦蘆簾，醉後方知樂有餘。  
借問風塵名利客，何如信脚到華胥。

午睡

隨分生涯不願餘身閑且免負蝸廬午窗一枕寬如海齊斗堆金視土苴

好靜

晚年惟好靜高枕看人忙醉裏乾坤大閑中日月長摘花香入袖得句秀充囊自在方  
爲樂千金無此方

新霽

塵霾連日若飛烟天宇今朝忽朗然簇簇新花偏色潤關關小鳥卻聲圓蔬添舊圃堪  
烹甲竹過鄰園未劇鞭綠柳扶疏陶令宅令人追憶義熙年

無生訣

欲問無生訣先從莫造因餐眠常淡泊呼吸要輕勻世入無懷氏身爲鼓腹民不憂真  
極樂卽此是能仁

閒身

當去辭家客遷流避地人枕中一瞬夢襟上十年塵雲閉桃源路烟迷楚國津江山留  
片土風月寄閑身僑居天津英租界已歷五年

四時樂

春花秋月醉顏酡長夏荷風送棹歌更喜冬來書課久樓偏西面夕陽多

掩扉

止菴詩存

五十二

朋本難逢老更稀  
迷花醉月事多違  
春歸無復青鞵興  
把卷簾陰晝掩扉  
戲詠公園所見

傾國爭妍時世妝  
不嫌袒臂髮披猖  
一年好景君須記  
晬面朱鉛趁海棠  
病起偶吟

老病龍鍾百不能  
一庵身寄冷如冰  
簡編有味還遮眼  
蔬水無營且曲肱  
興到舉杯胸壘塊  
睡餘覽鏡髮鬢爐  
香坐對藤陰轉直  
似深山退院僧

夜坐

勞勞盡日果何圖  
夜坐方知勝故吾  
喜見明星小止觀  
拓空大地半跏趺  
三更月上涼如水  
萬籟風清兀似株  
堪笑人辜燈下影  
良宵添得睡功夫

自詠

逝水年光過古稀  
閉門萬念付愁癡  
清遊每恨同儕少  
涉世方嗟見事遲  
偶剪松枝通曲徑  
旋添藤蔓補疏籬  
是間幽趣誰能比  
問着衰翁卻不知

有感二首

百憂交集獨吞聲  
閱盡艱危世念輕  
堪歎癡人偏說夢  
徒聞豎子亦成名  
身如大海一孤舟  
逆順安危不自由  
飽歷風濤羨平地  
何如乘勢早帆收

慨歎

天教師蠶降奇災又見夏田盡雪埋誰嗣昌黎大湖祭鴻飛無澤更堪哀大周至德清明更無並

災民歎二首

何幸先民盛世生已飢已溺最關情越州舊記潮州祭欲誦彙編淚已傾  
人代天工作帝基一夫失所痛連肌堯時洪水湯時旱豈有黎民歎此難

易歎

混沌乾坤本泰然庖犧一晝忽開天陰陽消長無時已遂啓兵戈億萬年

禮歎

唐虞三代遞相推兵禍偏隨制作開天地不仁視芻狗從知亂首禮爲媒

史歎

自從黃帝勝蚩尤千載征誅啓夏周歷代興亡觀大事直稱戰史續春秋

詠歐戰二首

大千世界海茫茫何處希夷問睡鄉欲駕雲車盱隻眼崑崙頂上看興亡  
進化文明豈有終忍將才智逞英雄盛衰倚伏須臾事抑滿方知造化公

自詠二首

人許衰稱壽天容逸養疴地偏來客少園小得春多花信從頭數鶯聲聒耳過一窗風



月好無事且吟哦

古今同逆旅天地一迂儒  
自分閑藏拙還教默守愚  
畦蔬方坼甲籠鳥已將雛  
會得時行樂吾生與物俱

小疾

小疾纔三日潛衰似十年  
春衣仍短褐午飯僅疏鱸  
花影移階緩鶯聲出谷圓  
呼兒屏藥餌一笑百憂蠲

憶昔

生平懷壯志垂老際時艱  
辛爾抽簪早居然抱壁還  
風晨遊海嶠六十歲後百事謝雪  
夜度關山五十歲徵召同趨幼海冒  
往事尊前訴清談尙解顏

讀史有感

乾坤留正氣今古幾儒冠  
濟劇奇才易投艱大節難  
胡天旌節落易水劍鉞寒  
青史論成敗須將冷眼觀

病起追慕慈親二首

自從弱冠到華顛曾幾晨昏依膝前  
天地無情人易老山川有路境難遷  
劬勞罔極孩提日疾恙誰憐  
耄朽年最恨絕裾垂淚別痛心  
何計及黃泉憶昔微音在耳邊  
慈祥愷惻望能傳箕裘未紹辜陰隲  
桑梓堪憐尙沛顛願借馨香供

樂國京西極樂寺念佛思承志事續卑田捐款樂濟會衰遲自分無多日努力仁施報

九泉

記夢

憂患平生老已忘夢中豺虎忽猖狂晨窗驚覺心猶悸恰聽鶯聲繞畫廊

風霾連日不出

已是天公度外人風雲變幻不關身齋居偏覺年光速掃地焚香送暮春

春寒

撲地風塵何所之隔江絲竹盡哀思春寒袖手情無奈滿腹遺山集裏詩

春殘

海國春殘幾日留駢肩士女語鈎斬新花移植更番豔自是遊人不解愁風霾過後公

止足

一春能幾日晴明歷代無多時太平泉石優游堪適性風雲變滅亦怡情看花豔極容

先悴玩月光盈魄始生人事原來須止足補天填海總難成

題齋壁

白髮乘衰日日新一菴常掩寄閑身明窗換紙迎朝日小圃移花及暮春窺戶流鶯如

妬夢入簾乳燕不生人心安自是神仙境何必桃源別問津

連日風霾偶出櫻疾戲作二首

堀堞揚塵天地昏中人勃鬱又煩冤從今熟領雌風味窮巷深居獨閉門  
三日墜蟬氣益衰食眠失度骨支離老夫堅臥消災訣但信天公不信醫

省事

衰老能逃名利場直將省事作良方終年謝客身因嬾三日捐書字旋忘喚夢新鶯驚  
枕早穿花小蝶撲衣香荒園寂寂饒生意門外車聲爲底忙

大庶妣小祥忌日祭告哀思示七九兩弟

回思侍食迨尊前痛失音容倏一年忍見新阡滋宿草空留遺像薦疏筵驚心歲月同  
朝露極目江鄉入暮烟何日山程兼水驛安然扶襯到牛眠

種蔬

留得青錢買綠萇先生讀罷卽高歌新知每歎同心少舊夢仍循熟境多天際有鴻何  
慕弋門前無雀可張羅種蔬幸得三弓地斗室春深養太和

無身

乾坤俯仰幾陳人除卻江山萬事新三五月輪圓缺魄廿番風信去來春空花豈得兼  
求果幻影如何更覓真道德經中唯妙語欲無大患在無身

二然

理數循環孰後先行時生物總由天當然人事原當盡若到成功卻自然

因果

寂然不動感而通易理明明說化工賢哲畏因俗畏果吉凶悔吝問心中

郊行

醉眼偏從郊外醒緩拖藤杖獨行行柳陰西畔多時立爲愛平蕪一片青

憫世運

危微精一審幾先歷聖相承道統傳禮樂凌夷三代邈乾坤解紐萬方顛狂瀾莫底橫  
流柱大海寧回東逝川五百年間名世出癡心猶望日中天

乘興

歷盡艱危萬事輕身閒乘興偶郊行喜聽黃鳥隨喉嚨貪看青疇抵掌平僅有詩囊堪  
作伴亦無酒券得關情歸來尙補童孫課燈火清熒起誦聲

慨世

淵冰取譬懷規箴臨履何時不薄深豈料讀書同博筮還思瓦注勝釣金是非自古無  
公論得失從來忌有心蝶夢莊生觀大化魚游惠子問知音一篇木雁掀髯讀才不才  
閒好細尋

悶極思遠遊

忍將生世付飛蓬垂老能甘牖下終莫歎風塵埋俠骨尙存冰雪守孤衷寒山樹挂殘雲白野寺鐘來夕照紅一笑縱觀天地別此身合寄五湖中

衰病吟

七十七類翁乘衰百病攻一身如野鶴萬事付冥鴻柏老迎霜翠花新帶雨紅祥金羞躍冶脩短任天公

偶健

歲月去崢嶸風塵久困橫一朝稍棄疾百體忽還嬰目爽憑闌眺身輕舍杖行久衰逢偶健天地別生成

老逸歎二首

逸老人稱耄耋年脩然飽食得安眠那堪四海無家日滿目瘡痕忍漠然衣食無營鎮日閑儼然一蠹寄人間手援天下雖非計安得心如鉄石頑

閒趣

新陰繞屋勝花時門掩蒼苔日影遲靜對小窗無俗事祇餘看畫並題詩

夜坐二首

散樸澆淳事事新燈前弔影百年身平生壯志成癡絕海內知心尙幾人少壯雄心醉簡編風流猶及渡江前老來百事渾忘卻惟愛青燈似舊年

藏書歎 二首

勳業文章志已虛，骸土木臥蝸廬。籤題萬軸塵封盡，悔不終身作蠹魚。  
結繩時代樂于于，文字繁興性始渝。門內若能徵五典，一身自是一唐虞。

夏初雨霽

身閒新雨霽，開卷對窗光。藤蔭侵簷密，槐花滿院香。溪深篙影綠，門靜跡苔蒼。長日如  
年永，笳聲送夕陽。

脩短 二首

天地生成孰後先，茫茫大化幾千年。潛消暗換人誰在，暑往寒來歲已遷。冬雪霏時萬  
木淨，春風被處百花妍。彭殤脩短終虛妄，熟讀蘭亭序後篇。

鼠肝蟲臂總無心，何事偏爲躍冶金。頑石不知生老病，浮雲奚問去來今。曠懷自蓄詩  
中畫，閱世常留弦外音。撫几長吟三太息，且將白陸豁胸襟。

自艾 二首

蠶絲自縛一衰翁，不是愁中卽病中。讀破南華無用處，從知書外少真功。  
愁病原來總是空，最憐當境困難通。人生大夢終須覺，何事糾纏幻影中。

煩惱

天時多病魔，人事多憂悒。病從有我生，憂從有我入。無我卽無身，無身卽無執。身我皆

不有煩惱何處集

得失

憂患與生來壯盛隨年去冰炭自交戰甘苦常吐茹事過平等觀當境徒悲遽身本同太虛煩惱奚所據百年前後思得失在何處

春暮一甫約彤皆一山及子茶談一山有作謹步元韻

四人莫逆相逢笑神馬尻輪儘放懷住世不知何歲月寄身且喜在天涯年光如夢春明好山氣留人日夕佳願祝同登無量壽興來隨意置清齋

自慚

李于貞日事導引陳一節日行十里皆七十歲強子一無所能今及耄年筋骸支離矣

伯陽導引奪天功健步希夷若御風豈料飢餐並困臥也曾徼倖百年中渴飲飢餐百不能祇將任運樂騰騰飛鵬斥鷃慚無地猶勝藜床病莫興病起食粥

更把晨窗粥幾盃茫茫大化任遷推落花啼鳥皆生意笑口何妨處處開

土山公園散步

飽歷風塵寸步艱相逢野叟尙開顏自憐觸處低摧憤培塿如看百仞山

暮鴉二首

野處相親有暮鴉也同鵝鴨各知家儻然一夕枝頭伴秋月春風闌歲華

待得歸鴉接翅時柴門半掩夕陽遲老人曳杖行無事閒數疏林占幾枝

病中作

筋骸如木首如風殘息支離嘯傲中莫怪老人能耐病寓形天地本來空

拔齒感言二首

變滅浮雲本自閑身非我有更誰關百年骸骨終塵土何必嗟嗟一齒間前四齒生歲已二年百歲

無效快然拔去

從來柔弱勝剛堅脆脆包含已有年自此世無切齒事祇留唇舌與周旋

雨霽獨坐

小雨初晴一味涼花根土潤自生香悠然百慮清如水始覺幽居日倍長

閱孝友堂家乘有感因故鄉遊建將先公所遺廟族產業移交南方長房接管

蘭水鐘峰秀莫倫祖宗德澤尚如新一身梗泛三千里百口椒繁六十春閱世頓驚朝市改傳家猶賴簡編親梓桑敬止思無斃似續仍期代有人

病起偶作

老來氣血億百體無堅牢譬如住敗屋椽棟亦撓無時不顛覆風雨更屢遭衣食雖兢畏寒暑日夜鑿溘然嬰小疾臥榻百呼號生氣纔絲髮去死爭秋毫岐黃術已渺西士僅皮毛自分非膏肓疾豎行見逃置身大化中縱浪隨驚濤應盡便須盡何必事圭



刀絕食病良已三日復陶陶乃知天壤內何者非徒勞

自感老境二首

門巷清於水襟懷冷似冰目昏愁簡至足蹇怯階登風雨驚搖落杯觴厭逐微廚人羹  
玉糝供此在家僧

家國艱危地乾坤否塞時已無三日計空有百年期舊苑鶯啼早荒江雁到遲飄零朋  
輩盡往事幾人知

小園

不緣侯印學陰行天地無情終有情白傅光陰多暇逸放翁生世半承平百年忽忽誰  
知悔千載寥寥幾善鳴好鳥自啼花自放小園春至也敷榮

閱焯兒及諸孫遊北戴河詩有感

丁巳夏曾侍先公覽太平石賦  
有窗外綠槐門前碧海之句

憶昔椿庭扶杖遊轉頭二十五春秋窗前綠樹陰猶在門外清波去不留痛惜桑田變  
滄海忍看華屋徧山邱兒孫敢望能繩武且喜新詩雅韻流

獨坐

書冊乍拋思慮息杯觴久罷故交稀明窗靜領閒中趣一篆清香送落暉

自慨

衰殘襟抱若爲開殺氣乾坤但可哀萬里家山隨夢去百年身世入心來門楣尙想清

芬繼閭里空思狂簡裁教澤不延天地否誰回厄運育英才久思培植敦敦教育未幾

古香齋題壁

三間茅屋寄閒坊車馬無聲日影長自喜耄荒人事少讀書纔倦卽焚香  
孤豚不羨犧牲貴叢棘何防蘭蕙香歷盡艱危心淡泊悠然身世兩相忘

對客

高會當年抵掌時文章勳業若風馳于今別有同心處相視無言一笑知

歎息

歎息平生志未伸謬思仁壽躋斯民晚將咄咄書空手終作騰騰任運人嫂孺不援原  
有道井從莫救豈徒仁此心自矢軒天地肯爲他緣負本真

無心

憑他電掣一身安萬事無心天地寬舉念卽時皆火宅放懷隨處是烟縷灰深積雪爐  
常暖燄短搖風燭易殘春燕秋鴻自來去癡人何苦動悲歡

坦然

百折經過始坦然誰能遇境燭機先人情苦樂原無定世事升沈各有緣山色遙連雲  
外影湖光近接鏡中天縱觀萬象難名處秋月何心分外妍

讀白陸詩二首

一間陋室藏身穩三尺孤桐寄意深千載同心惟白陸須知弦外有遺音  
白如修竹陸如蘭一樣清芬象外觀寄興山川隨處適放懷天地着身寬

閑逸

愈老愈知行路艱柴門雖設晝常關世間魚鳥從飛躍天際風雲任往還捐盡浮名方  
是逸掃空執相始能閑秋來獨有杼懷處籬下幽花亦解顏

長孫女會孫于歸黃氏喜賦

韶齡百藥最關懷廿載居然詠絮才今日乘龍逢快婿好傳燕譽到妝臺  
宜室宜家德不形悠悠福祿到遐齡百年好合從今始詩禮毋忘絳帳經

春暉堂對菊懷舊友

蓬梗飄零歲月馳秋光又到菊花時尋芳每覺風霜早遇閨翻嫌雨露遲今改落落清  
游稀舊侶疏疏寒蕊弄新姿幸留晚景春常在老圃攜筇祇自怡

萬壁臣家觀菊

去年同一甫往訪主人他出樂觀而歸乃承賜精  
品數盆各謝以詩今日重遊不嫌前此之唐突矣

萬家名菊久心存往歲驅車憶叩門錦繡迎階香自遠瓊琳滿室品俱尊分金高誼驚  
殊豔擊鉢清詩勝晤言今日殷勤溫舊夢稱名應識隱君園

實之九弟今年周甲得曾孫俚句志喜

喜見吾宗福不同先公德澤久栽培桃觴花甲三多慶蓬矢林壬四世開門祚已徵龍

譽起家聲又聽雁行來待看弟齒如兄日五代同堂美備哉

重陽約友登高感賦是日為吾族宋代初節將軍泰星公生日承平時年閏族公祭演劇稱觴甚盛會也

重陽佳節倍思親况值吾宗祖慶辰碧血丹心千載在紅楓黃菊九秋新萬方多難無安土一席清尊有故人憑弔英雄如過鳥登樓王粲已愴神

新買小磁屏彩繪山水絕佳康乾時物也喜題二絕

誰染丹青景物殊令人身欲老江湖依稀似入還鄉夢一路溪山盡畫圖  
半生羈宦走天涯小屋閒坊便是家垂老欲尋高絕地青山缺處白雲遮

題齋壁 十月二十日

莽莽乾坤一腐儒北窗高臥傲唐虞目空天地無今我夢醒滄桑有故吾四野風清聞唳鶴中庭月白見棲鳥蕭然斗室堪吟嘯剩欲提壺趁市沽

累日不出門述所事

紅塵堆裏得身閑門對清溪竟日關課罷黃庭無一事焚香讀畫當游山

雪後書所見 十月二十四日

夜闌瑟瑟隔窗聽曉見祥雲積滿庭飢鼠潛行欺枕席寒鴉迴陣撲郊坰近迷樓宇千重白遙露雲天一抹青坐久東窗清徹骨爐灰旋撥火星星

生日述懷 二首

九萬鵬程醉裏看世間何物動憂端人稱耄齒衰中健天許浮家險處安遍地笳聲欺倦枕終朝藜粥愧加餐會期江上風煙淨還我平生舊釣竿日與英美開家收律租界搜查居民欲虛倚無恙何必星宮問斗牛人間萬事付悠悠百年日月輪欹枕千里江山入倚樓已駕驪車仍小駐將拋鴻案尚淹留殘年自有安心法秋月春花用酒酬星家言愚夫婦今年四月當壽終乃同病數月危而安復

先妣忌日感懷二首

冊載長齋似水清巍巍慈德莫能名馨香俎豆無由報儲得青錢買放生  
慈惠從來不顧身年年推解到孤貧于今福蔭孫曾輩思嗣徽音有幾人

閉戶

閉戶還留天地春逍遙鵬鷗本同倫飯餘宴坐殘書伴夢醒孤吟短燭親意適風雲隨  
聚散興來花鳥助精神陶潛容膝真堪樂何必桃源遠問津

始雪二首

正喜兼旬暖似春瞬看大地白如銀天工祇管豐年兆不惜街頭露臂人  
搔首孤吟慰寂寥空庭飛雪正蕭蕭坐看野外鴻泥遠卻掃門前屐齒消  
雪霽出遊

嫩日清風雪漸消杖藜乘興不辭遙放狂泥酒投村店信步尋梅度野橋數點栖鴉爭

繞樹斷行征雁沒冲霄天空萬里塵氛淨拾得新詩破寂寥

記夢三首

年垂八十尙偷生藥餌藜羹日有程萬事不堪醒眼看溪山入夢尙分明  
萬疊峰巒是故鄉十年歸計枉思量夜來一榻寒燈下行徧家山覺夢長  
繞村喬木尙扶疏彷彿荒園認故居父老逢迎問蹤跡千家寥落盡邱墟

冬夜聞蟋蟀有感二首

紗護風燈到曉明爐溫蟋蟀尙冬鳴周家過歷秦期促大數原來本裏生  
虎食病侵盡可哀雁烹木壽若爲材尙非佛說通三世天理難憑人事推

讀莊子

心淨常明無盡燈身閑且作在家僧任教世上愁千斛讀破南華喜不勝

同諸遺老茶樓分韻得漚字

蟲沙浩劫未應休時難偏驚歲月道不覺爛柯人已老聊從擊筑客同遊山河興廢雲  
千態身世安危海一漚酒綠燈紅非復昔夕陽好處且登樓

晚眺

一尊相屬醉顏酡大似飛禽出網羅檻外長天秋水遠牆頭高樹夕陽多歸牛笛逐墟  
烟起護鴨竿扶野艇過何處青山堪送老御風吾欲上三峨

水仙花二首

仙凡骨相本非同，泉石生成金玉躬。  
靜坐獨聞香細細，與人偏在寂寥中。  
不隨梅影鬪橫斜，獨立亭亭自一家。  
仙子豈爭金帶貴，頭銜仍是玉無瑕。

憫老

鬢髮蕭然歲月馳，平生壯志果何爲。  
安危遍歷狂心歇，寒暑潛移病骨知。  
歸雁穿雲天有際，虛舟逐浪海無涯。  
夕陽空羨西窗好，起讀黃庭已恨遲。

有感

陽消陰長問庖犧，倚伏循環孰主之。  
梵宇尙觀周禮樂，梨園還識漢官儀。  
大千世界微塵渺，五百年間名士期。  
天地不仁視芻狗，英雄何代不兒嬉。

夢遊濟南三首

背郭堂深映碧流，出門隨意弄輕舟。  
風光得似江南否，十里青山眼底收。  
畫舫呼來近岸移，參差樓閣綠楊垂。  
南山千佛羅屏嶂，倒影湖光又一奇。  
代北燕南久倦遊，誰知歷下似杭州。  
最堪詩酒留連處，城市湖山共一樓。

慨世

世間生滅境何物，不能拋富室連千棟。  
貧家覆一茅，蟻忙緣據穴，鳩噪爲爭巢。  
得失須臾事，同歸幻影泡。

七十七自壽二首

孰爲主宰孰疏親七十餘年夢裏身往事依稀如隔世舊交零落盡陳人宅邊柳樹今  
無恙洞口桃花別有春從此閑雲將野鶴耄期幸作葛天民

茅齋息影復何求一領葺氈一布裘身世如鴻依水宿心期似鹿愛山游龐公不作兒  
孫念陶令能寬旦夕憂誰挽天河重洗甲入荒可望上高樓

自遣

榮枯脩短總由天耄齒光陰豈偶然獨放高歌須酒後閑拈秀句到花前江湖不羨魚  
濡沫廊廟應嫌蟻慕羶但得影衾無愧怍晝甘藜粥夜酣眠

勸世

禍有胎兮福有基天庥敬迓視人爲潛消魔力蠲葷血靜息機心屏弈棋春雨花開先  
有信晴雲日出不嫌遲世間無限閑恩怨黃雀螳螂卻問誰

書幸

掩耳不聞笳鼓聲黃塵堆裏且偷生飽經危殆身差免備歷艱難事竟成腹有箴規忘  
世濁胸無冰炭覺心清長齋繡佛殘生活贏得青蔬一鉢羹

閉戶

破巢危幕苟安居閉戶方知樂有餘愛覽溪山頻讀畫厭趨市井久懸車鶯聲近和風



前笛梅影斜揮月下鋤得趣偶然成獨醉不辭世俗笑迂疏  
夜坐

寂寂復惺惺中宵酒半醒倚屏雙几滑掩卷一毡青香燼風生牖燈殘月滿庭功名今  
逝水搔髮感頽齡

歲暮感懷

俯仰乾坤萬事非天涯歲暮願多違抱經志士青燈老射石將軍白髮歸孤渚風淒無  
雁宿空庭月墮有鴉飛冰霜不遏陽和氣猶待春回百卉菲

憫世

世間何處異羊腸局促轅車祇自傷等是逍遙飛斥鷃爲誰辛苦轉蜷頭崑崙頂上山  
河壯蓬島宮中日月長獨立蒼茫天地別任教管眼幾滄桑

檢閱自記年譜有感

少日一心三不朽畢生十事九成空詩書莫繼先人業惠澤難伸慈母衷病聳吟肩詩  
有崇狂疏世態酒無功今看雪上鴻泥迹歷歷崎嶇是夢中

開歲余年七十有八矣立春前夕枯坐

殘生日月捷飛騰兀爾盲聾喚不響蟲臂鼠肝何必較魔宮佛國孰爲憑二千年史輸  
供盡九萬里天枉化鵬今古幾人醒大夢華峰驢背看雲興

冬夜獨坐

景短經旬不出門，夜闌無客對芳尊。  
松肪刻畫瓶花影，籛火綿延布褐溫。  
風急天青稀雁過，月明窗白亂鴉翻。  
關心料理殘生計，佛粥春盤次第論。

戲作

有人謂辛巳年壽當盡，今日立春交壬午矣。

已把金蛇視白鷄，彭殤何物不能齊。  
今朝水馬江頭看，千里東流趨遼西。

深夜吟

昆明劫後有餘灰，休歎斜陽景莫回。  
止觀脫離愁境界，按摩消滅病根荄。  
伊川語妙直須去，務觀詩狂不應來。  
夢醒卻看深夜月，一窗松影伴寒梅。

春雨後郊遊

家在清溪小市西，春郊過雨草萋萋。  
輕飄弱柳翻翻舞，自在嬌鶯特特啼。  
天向空垂青野盡，山從遠出白雲低。  
桃花流水在人世，欲訪漁翁路已迷。

祀竈二首

禮隆三代普編氓，歲暮馨香習送迎。  
五祀獨存今不絕，萬家烟火看昇平。  
千年祀事尚如新，一飯原知合有神。  
會得監民圖上意，家家黔突是深仁。

歲暮祀祖二首

宦遊兩世寄天涯，臘鼓聲中閱歲華。  
七十年間常是客，八歲隨侍到岸前 三千里外已

無家至德兵燹屋全燬尙歌麟趾徵家慶不掩豚肩示國奢  
弈葉清芬思燕翼靜看香篆繞梅花

雞豚不匱歲朝供饘粥猶堪守素封繞膝承歡廣燕譽  
病腰扶拜苦龍鍾心殷志述三遷訓目見祥開五世宗  
南國烽烟徧桑梓且將俎豆寄萍蹤

辛巳除夕

不復雞占命自安生涯隨過本來寬輩尊且近椒花酒腹儉  
仍甘苜蓿盤喜學吟箋娛歲晚驚聞爆竹怯更闌闔餘贏得春  
回早花信還應舊歷看

今日年閏六月十二日十九日

未日

止菴詩存下卷

至德 周學熙 緝之著

壬午元日試筆

水馬重逢六十年昔時青鬢今華顛  
太平景象家家足凱奏歡聲處處傳  
閉戶丹鉛忘歲月拂簷松竹長風煙  
兒童莫笑鄉音改已是孫曾四世延

醉歌余乞丑妻丙寅今值王午乞計百五十五歲

一青牛一赤虎細數流光又當午  
昔爲華胄今俘虜滿眼江山誰是主  
哺可含兮腹可鼓世味不如村酒醺  
前有扶後有輔爛醉且向街衢舞道  
旁觀者環如堵借問翁姥幾春秋二  
人一百五十五從此到終身盡爲閒  
日月不須磨竭重推數吁嗟乎君不  
見古來蓋世幾英雄青史功名皆莽  
鹵鹿門偕隱還辛苦子孫數典多忘  
祖海有時而枯石有時而腐况乎人  
生彈指陳迹隨仰俯去者不可挽來  
者不可拒周與蝶與胡不物化樂相  
栩萬歲千秋兮誰識松根一坏土

春日遣懷

春風和暢好披襟攬物興懷喜不禁  
麗日紅暄鸚嘴豔輕波綠醮鴨頭深  
登山臨水騷人興醉月迷花處士心  
拈起龜毛三尺拂絲毫無復俗塵侵

春閒

水秀山明地風和日麗時花開頻載酒月上獨吟詩倦鳥棲林靜輕雲出岫遲閒身隨處適清味少人知

困中度歲

舊英租界改爲警區  
四縣封鎖出入檢查

多難光陰速兵戈又歲除時危儀節簡道阻過從疏徇俗無冠服長齋有筍蔬親朋多潦倒吾敢歎虛居

元辰感賦

拜起龍鍾尊俎前屣繇飲罷意愴然傳家乏術辜弓冶濟世無聞媿聚鉛險阻鄉關如越國飛騰歲月若奔川任教門外塵揚海斗室焚香看篆煙

讀史有感

古今成敗付悠悠青史功名每倖投燕市悲歌空擊筑荆州愴賦強登樓江山有盡星霜老天地無私禾黍秋千載風雲全偶爾皋夔不遇亦巢由

自怡

得失胥捐寵不驚放懷天地若忘情黔婁自樂輕猗頓顏子無心羨老彭儘領山川長供養莫辜風月負平生春來曉夢初醒後恰聽黃鸝三兩聲

苦風霾

幽燕無奈是春朝十日寒光九怒飄卻憶江南圖畫裏杏花夾岸弄輕橈

驚蟄

八十衰翁未減衣倚闌吟嘯弄春暉無言生意來天地撲面青蟲習習飛

夢江南

嫩黃柳色曉鶯啼江雨初過百草齊莫怪詩人頻載酒烟籠猶是六朝隄

山家

白雲深處有人家樹繞清溪一徑斜白首不知山外事雞豚自給話桑麻

止園題壁

浮生莫歎不逢辰百折猶存劫後身小沼魚游方得所深林鳥語始知春任教遣鶴千  
年化除卻江山萬事新句借鋤菜灌花多樂事茅簷還我一儒巾

隄上小步

閉戶息塵羈攜筇傍水涯習勞方健飯乘興尙尋詩魚影依橋密鶯聲出院遲數時知  
候轉岸柳半黃絲

止足

消憂惟止足易可出艱難鼯鼠臨河偃鶴鶴占樹安微醺名酒罷半吐好花看會到無  
言處幽人白骨觀

小園閒趣

淵明誰識義熙人自是無懷上古民  
老矣拚無鴻鶴志怡然留得水雲身  
籬籬竹屋開三徑豆粥藜羹敵八珍  
萬事直如風過耳眼前常喜一花新

曠觀

過得一日且一日耐得一年是一年  
世間萬事皆天定何必思量後與前  
荀氏九公聊復爾武侯六出亦徒然  
深觀寒暑推遷理自古從無不散筵

看畫

不病不窮萬事足無思無慮一生閑  
茅齋自有安心法面壁常看畫裏山

憶昔

利名得失苦匆匆閱盡春花幾日紅  
回首閑愁千萬斛直如鳥迹印空中

孟莊寓新闢小農圃

綠陰四合不知鄰半畝桑麻雨露新  
莫道仙源無處覓短垣咫尺隔紅塵

春晝二首

春濃晝永意恹恹一寸光陰一寸金  
午睡乍醒忘早暮晨游乘興計晴陰  
攜笻覓句情先往宴坐觀書趣轉深  
願駐韶華人不老日移花影正天心  
天教晝接荷龍光獨有熙春樂未央  
繡閣捲簾風送暖錦堂高枕午添長  
韶華似水繩難繫日影如梭晷可量  
最是惜花人起早本來無事卻成忙

身世

壯志隨年往，虛名逐水流。心平災自退，身儉富何求。匹馬關山路，長鯨海市樓。于今俱夢破，曾熟一炊不。

憫南洋華僑二首

寶藏從興已百年，因緣先着祖生鞭。巍巍華屋今非昔，難向山邱問一廛。徧地桃花徧地金，生成雨露此中深。王侯富候來天厭，可惜當年算路心。

遊公園山桃始開

西甫遊世三日矣

新晴扶杖啓柴扉，不覺郊原景物非。野外漸知閑地少，眼前時見故人稀。風搖隄柳番番起，日射山花片片飛。領取春光無限意，好攜童冠舞舞歸。

弔陳西甫

總角論交六十年，及今回首更潸然。牛衣從識平生厄，鹿御還欽晚節堅。忻頌琴聲留北海，感隨椿蔭入西川。遺金區處傳清白，猶憶忠言野席前。

輓趙劍秋

把臂京華四十秋，悠悠朝市任沈浮。早登廊廟甘時忤，晚落江湖爲國憂。行水經綸資覆篑，如山簿籍賴紆籌。儘多事業憑沈澁，回首平生涕泗流。

答子貞約同入舊都作伴看花

止菴詩存

三



嵐雲變色海揚塵息壤彈丸尙見春莫問上林花事好市朝能得幾閑人

清明日栽花二首

清明時節客魂迷道路村氓與夏畦小圃何心重花事年年辜負子規啼  
庭荒無意惜芳菲千里家山十載違豔紫天紅易搖落獨憐寸草送春暉

大公園看海棠

首

英租界中街大公園光緒初先君任關道時同稅司德璋所捐辦園中海棠係當日所栽至今年年花最盛

年年喜見海棠新今見花飛又一春最惜年年看花地幾回曾見去年人  
海棠花發逐年新今日花開別有春祇記年年看花地不須更問主花人  
一年花事一番新天地無私總是春燕語鶯啼留不住看花偏是惜花人  
千花百草一時新蜀豔巍然六十春底事年年花下過更無人記種花人

越日再至大公園觀海棠將謝又賦二首

六十年來萬事新甘棠幾樹尙爭春常留餘蔭深遺愛豈祇花光照後人  
百尺棠陰雨露新一年能得幾多春殷勤記得繁枝處尙待來年說與人  
上已未出悶損

萬方多難若為家料峭春寒若未芽欲出清游無伴侶空齋獨坐看飛花

得第三曾孫女嘉頁出

喜聞鷓鴣兩三聲况復充閭又一行四世開先期嶽降比鄰待嫁卜河清竹林露早頻  
添茁蘭葉春遲始吐萌勿笑詒謀惟酒食門楣他日尙崢嶸

癸巳科五十年團拜席上作

霓裳同奏渺雲烟瀕洞風塵五十年天上不無星主酒人間仍有地行仙山河依舊花  
迎客日月常新雪滿顛星紀再週還健在鹿鳴重宴又翩翩

三月二十五日魯卿約一甫雨莊震初實弟同集市樓品茗並攝影爲紀念率賦  
兩世交情六十秋相看鏡裏雪盈頭鄴侯第宅欽堂構晏子楹書媿冶麥幾度滄桑醒  
倦枕一杯芳茗上高樓同遊丰采皆神駿努力勳名溢九州

寄題癸巳鄉舉五十年紀念圖

癸巳恩科至壬午五十年三月二十六日曾叔度值年釀金聚飲稷園牡丹盛  
開汪孟舒繪圖爲紀念熙臥病津門未能赴會謹寄題一律以志盛舉

春夢初醒五十年文壇回首若登仙空餘身世天涯感誰識文章海內傳洛社耆英留  
故事山陰觴詠紀羣賢稷園尊酒花迎笑紅蕊何曾怨白顛

春寒

大地無私總是春餘寒尙中百衰身關懷獨有天涯客撫序偏驚陌上人日嫩重裘三  
度減風遲弱柳一番新村醪可買朝朝醉留待陽和作幸民

自題攝影

髭鬚白盡鬢毛禿飽領風塵容可掬世間憂樂本來空還我平生真面目

詠斧二首

隔山樵斧聽丁丁滿壑松風送遠聲日落長歌歸去晚白雲深處一肩青  
析得薪樗一老翁運斤揮手卻成風歸來弗覺腰間重帶月行歌氣自雄  
登久安新五層樓望遠感賦

知非吾土強登樓王粲依人尙遠遊更上欲窮千里目不知何處是荊州

題一甫入泮試藝稿二首

五十年前奪錦來筆飛墨舞出心裁平生志事關天下不愧希文始秀才  
昇平雲路寸階難泮水珍如鐵網珊一字一珠堪擊節雲笈應作典型看

自嘲老境

耐病衰猶閒無憂樂有餘軟炊躬稼米爛讀世藏書倚戶期歸鳥臨池數放魚夜來燈  
炷小一枕到華胥

閏五月十日

廿五日

歷六月

至德城內及堯渡鎮並紙坑山周村均被燬于兵新舊兩

祠皆焚先是縣政府借祠辦公屢函屬移未果故是有難

二首

禍福循環若有期盈虛消長孰爲之負乘致寇由來事堪歎愚氓總不知

洪楊劫後繼馨香人事天心浩莫量城市為墟原倚伏山林何故有興亡  
初修後新祠先君手建成于光緒初  
年六七十年間水旱頗仍元氣未復  
昔何親于洪  
楊之亂同治

感事

一生不傍訟庭邊八十翻遭票屢傳財本五家公共物酒無百歲不終筵亡羊能補令  
非晚失馬仍還後勝前禍福無門天有眼好將倚伏觀其全

看雲三首

暮年心事在烟巒陟磴攀崖興已闌高閣捲簾醒醉眼閑將雲勢作山看  
家山千里夢中探欲話幽深孰與談恰好雲容能百變層巒疊嶂似江南  
晴空萬里果何之來似從容去若馳舒卷無心誰管得人生自在只如斯

和一老移居靜園元韻二首

由來靜室是祇園住世因緣福有門安樂本因無意得羨君淡漠養天根

憶曾卜築靜宜園繞屋扶疏翠掩門回首林泉懸夢想五年足不踏松根  
名松雲別墅今因亂  
已五年不能往居矣  
余小築在香  
山靜宜園中

病起自歎

天地無情終不老人生斯世貴有道不才下走百無成忝爾所生傷懷抱平生憂患積  
如山坐使百病形枯槁默數餘年迫耄期自慚樗櫟人稱好少壯光陰瞥眼過十年讀

止菴詩存

書恨不早僕僕風塵頽洞中日月逝矣空懷寶文章未足欺盲聾弓冶辜負承祖考慈  
幃垂訓沛仁施三黨孤寒仍潦倒本不計葢上露易晞亦不計門前雪自掃生前燕幕  
等烟消身後鴻泥如電掃民生國計兩無裨且暮蔬粥徒自保及今桑梓不聊生疫癘  
連年加旱潦醫農兩事願終虛憂心清夜常如搗吁嗟乎風前殘燭日崦嵫驪駒在門  
殊草草縱假數年亦何爲一生叢過無由禱太息人間一蠹魚自問何以答蒼昊

小園遣懷二首

秋園花木盛茂老妻病痿經年今得肩輿遊觀喜賦二首  
小園爛熳壯秋容勃勃蓬蓬氣所鍾病足老妻生意在忻占來日快扶筇  
買得春秧待雨栽秋晴穀實百花開從知造化無窮妙萬物生成自在培

讀史有感二首

乘興容易救衰難時勢英雄互控搏得失是非誰管得祇留成敗後人看  
鑄金躍冶願難窮大化無心本至公千古英雄彈指過百年何事不成空

小園遣懷二首

柴門破落不曾開小小園林也曠懷莫恨泥深無客迹且尋徑曲有詩材枯籐引蔓旋  
成架新竹行鞭已破苔牆外紅塵飛不到免教俗慮入胸來  
小園何處可抒懷相對沈吟木不材延目千秋盡壘粉怡情三徑掃莓苔青黃穀報連  
番熟紅紫花迎次第開順物自然隨意足不教冰炭逐心來

息菴七弟病神經二年未得常談昨邀敬之弟與實之九弟及子姪輩聚飲于春暉堂甚爲歡洽承惠二律因步元韻以志嘉會

白頭兄弟倍相親同是天涯淪落人四海兵戈罹浩劫一堂棟蓐尙熙春放懷莫使悲憂極頤壽當令飲食勻杯酒聯歡無量福愁城打破氣常新  
身作醫王心是藥仙方難得此心閑栖神直擬鯤鵬上涉世還參木雁間眼下不憂千尺浪胸中常有萬重山桃源可訪期聯袂待看兒孫濟世艱

重九日雨莊約偕味雲伯屏佩瑜一甫震初實弟市樓登高口占二律

金戈遍地若爲歡尙插茱萸興未闌去歲清游如夢境今朝舊侶盡儒冠三千里外同爲客二十年來不屬官更上一層慚脚力且尋高處望家山

客中重九罄幽歡朋舊追隨尙倚闌堪笑瀝巾虛綠酒卻誇落帽等黃冠糕無故實難題字盤有清齋不仰官俯仰滄桑傷往事且看雲物當江山

止園愛晚亭觀紅葉

清今年新闢小園我雖蒞數葉重陽後居然蕭燭因憶香山紅葉之成惜五年未得觀三首

小院新栽薜荔叢居然燦爛得猩紅五年不躡巖前路引起香山入夢中  
春買新秧倚壁栽秋風吹豔入窗來人生隨地皆成趣贏得秋容笑口開  
愛晚亭前景一奇無花有豔也離披霞烘老眼成孤賞殊勝春風二月時

河東萬家看菊

盼到黃花又一年依然四海漲烽烟雲蒸霞蔚姿仍豔露浥霜侵色益鮮高士襟期多  
汲泊主人情誼久殷拳新妝異態還層出常與秋風結後緣

思鄉

獨立溪頭望南路不分鄉心日暮切萬里送歸雲

壽豐公司觀菊賦贈主人孫俊卿三首

年年匆促別花前今日相逢又一年幾度秋風人易老為珍晚節且留連  
海隅無處不氛埃獨對黃花笑口開莫怪秋容還燦爛胸中原自有春回  
年年常作別花人一度花開一度新十色五光皆俊傑方知百鍊是金身

七十有八自壽四首

勿幸頽齡病體輕燈前顧影更心驚鼓盆早懷莊生遠舉案還延孟媪生荆妻病癯三  
安鼠臂蟲肝何足較藜羹飯向關情官府罷歸本親衰宗寒戚多顛沛誰挽天河為  
洗兵本邑被兵城內外及近郊市十里市鎮已外形骸發浩歌暮年心事本無多墳鏡彰表方揮草味西二兄入唐宗祏摧殘尙補  
蘿原正修復食僅雙弓延歲月籌虛三策幹山河從今野鶴應相似一片閒雲隱碩

年垂八十似嬰孩獨守癡頑養不材屋角有風仍護竹溪頭無雪且尋梅久停棋弈機

心息閒弄琴書醉眼開  
根觸老懷惟一事千年禮樂盡秦灰

漫將朝士數貞元  
白首交遊百不存  
千載詩書輪祖澤  
百年簪紱負君恩  
範圍天地休  
言否草昧雲雷卻  
用屯炳燭光陰如石火  
一經猶欲教諸昆

先妣忌日感痛四首

慈雲失蔭至于今  
國破家傾日景沈  
三十五年憂患過  
幾回揮淚幾酸心

自安體魄到桃源  
形勢空憑術士言  
若道先靈庇游子  
如何事事總驚魂

薄宦輕離遠膝前  
未能終養恨終天  
鄉園南望多豺虎  
不撫松楸又十年  
丁未秋署直

一應連遭大故未能一日侍養倍載

每憶兒時疾未平  
長齋日日誦經聲  
此恩無計涓埃報  
常積青錢買放生  
母長生多病念佛

四十十年今垂八十乃母之期也

有感河北華新紗廠今改公大廠今日東諸茶會為事休所新屋落成

隔溪歲歲有桃開  
贏得清陰遍地栽  
辛苦難忘當日事  
種花人尚看花來

生日諸子羅拜獨歎長孫隻身遠去三年不歸二首

老邁顛危壽敢云  
厭觀世事苦紛紛  
頑孫莫解重闡孝  
海角天涯聞不聞

水源木本義何云  
天性乖違起亂紛  
千里安危縈夢寐  
忍教陌路不相聞

生日謁祖

止菴詩存

七



形骸徒在久中虛扶拜龍鍾禮已疏祖蔭獨憐殘老日萬方多難一身餘

生日家宴感言

輓粟飛芻計不材萬方粒食費疑猜蕪詞漫誦吟箋摩萊彩難令懷抱開失教稚孫千里去乞援疏戚百書來儘多家國關心事芋栗堆盤懶舉杯

十二月十六日大寒節申時初得雪

今年春夏皆未得透雨入冬又無雨雪今日始見微雪

喜見祥雲兆歲豐太平有象九州同老夫一飽真天幸贏得殘年嘯傲中  
十八夜又得微雪

又見空中戲撒鹽天公有意慰閭閻先教大地塵氛淨指日春回雨露霑  
今歲窘甚而乞援者絡繹苦無以應

人生得失有來由知命安天底用求莫怨飄風飛墮瓦不聞驚浪覆虛舟一身淡泊原無患三黨孤寒尚有憂飢溺豈關顏巷事手援天下若為謀

喜雪

十二月十九日午後大雪明年歲朝立春

久旱祥雲玉作堆先春十日喜陽回天心愛育民生福百萬歸農解甲來  
除夕守歲  
壬午

暗換潛消總不知一年容易又星移山河破碎聊尋醉天地蒼茫獨詠詩九折危途憐馬力百迴夢境愴雞啼燈花燦爛爐烟直正是陽回黍谷時  
刻于立春

元旦試筆癸未七十有九是日正立春午正日

一枕邯鄲兩鬢皤平生憂患夢中多子遺幸有非延算術士言余七性命纔全且浩歌

世界屯貞渾忘卻歲朝春首又經過光緒以來三屠蘇飲罷乘陽氣笑看兒童起舞

夜坐

由來夜氣本常新枯坐心虛息自勻殘藥掃除愁境界異書扶助老精神花無濃豔如

高士月有清輝似故人陋巷閉門稀客迹一燈相伴百年身

上元節祀祖後支祠開會議事

宦轍于茲七十春太平版籍尙遺民祖宗靈爽三龕在天地清明萬象新禮樂不隨朝

市改詩書仍望子孫親幽燕從古多名族源遠流長自有真

擇廬見示和東坡元旦立春二首因步原韻

驚心節序正星回五色祥雲拂曉催要信天心端歲首乘時陽氣載春回子正立春卯初見五色雲

風吹柳絮未成寒快雪時晴宇宙寬化日光天人盡仰萬家翹首五雲端未時雪申時不見得

七百年來詩興同東坡彩筆煥神功羨君名士多佳詠如坐堯天舜日中

上元過天后宮前有感二首

新年光景捷飛騰剛換桃符又撲燈市井蕭條今異昔煌煌廟肆冷如冰

噉鴻遍野不勝哀粗糲充飢日幾回滿地燼餘無復問可能乞食耐嗟來

連日春宴傷食病作自警

連日春盤餉友朋豪餐兼味力難勝腹中頓覺生芒角身上居然似炭冰豈是風寒侵  
作祟由來飲食忌多增放翁詩句應知戒下箸還將對敵稱

偕老吟

余以甲申歲完婚今癸未滿六十矣中間幾經兒女之戚衛士言余夫婦  
當以辛巳壽終今竟竭期衰病衰三年余亦多病皆無恙尙爲不幸之幸

二首

六十年前始結褵椿萱並茂福無涯身經無數憂危境贏得殘骸老病痿  
兩人歲百五十七松桂隆冬尙見青冰雪交侵身是患不教方寸負冥冥

病小愈沅叔招遊舊都廠肆卻謝

偏逢新歲病莫遂故都遊咫尺成千里睽違閱五週一身如槁木萬事付虛舟待到花  
開日能陪杯酒不

一炷清晨香效康節體

一炷清晨香虔心禱上蒼普天同歲熟故里莫兵荒族戚家家足兒孫個個長我今雖  
老病聾聵也何妨

病起小園散步

剝啄難逢舊雨來偶攜藤杖出庭階千年往事悲歌起萬里長空病眼開好鳥枝頭皆

宿友閑雲天際盡詩材遠遊無復舟車興且繞蔬畦日幾同

楚卿慎之一甫雨莊震初伯平寶弟及余在永昌西餐公祝佩璵七十壽卽席賦  
詩二首

把臂同游適仲春清時贏得自由身一堂六百齡餘算都是桃花洞裏人  
福祿同珍壽永昌相看白髮快稱觴肴粗酒薄君須醉道是壺中日月長

二月十六日春分小公園山桃初放佩瑜震初同遊四首

歲歲風烟歲歲春同遊又見白頭新七佩瑜今花容寂寞應含笑不是桃源也避秦

衰殘何意入芳叢幾度春風一笑空獨往小園天地別好花無主爲誰紅山後花早

繁華俯仰迹成陳白髮尋芳又幾人今日春風若相識問花誰主更誰賓

幾日輕陰花始開風霾忽作又遲回天公似阻遊人興好事多從磨折來

味西公治行得傅沅叔太史增湘撰墓志金息侯少保梁入清史補傳感賦

廉吏誰言不可爲年豐歲暖尙寒飢禦災捍患堪尸祝士習民生合繭絲召杜大猷留  
世法龔黃遺愛繫人思闡幽賴有鴻儒筆奚啻羊公墮淚碑

午後遊園口占

乘春隨地是吾家午枕初回自煮茶日暖綸巾何處去小公園裏看桃花

讀倦出遊登市樓遠望

止菴詩存

九

目倦拋書且出遊適中寒暖是春秋天光水影高低見野草幽花遠近留一片烟雲任  
舒卷幾行鷗鷺自沈浮晚來尙補西窗課常帶斜陽下小樓

歎老

老邁心情百不如清遊十事九成虛探源莫放淵明棹入市難驅康節車鉛槧久拋書  
有蠹蔬餐頓減食無魚閒身祇合尋春夢欲傍溪山結草廬

惜春

不憂雨溼怯風吹九十春光能幾時忽見樓頭楊柳色落紅滿地又誰知

上巳日遊倪氏園林

旋風吟二首

永和禊事作清遊逸少文名百世留天地有情人易老江山無主水空流將軍雄武存  
魏塚公子遺芳賸故樓舉目不禁今昔感幾行高柳蔭虛舟  
幾行高柳蔭虛舟一片平原帶小樓叱犢短蓑人最樂聽鶯斗酒客消愁茂林非竹還  
棲燕曲水無觴且狎鷗大好園林閒是主永和禊事作清遊

第一公圍海棠六十年前物尙盛開

二首

六十年前事已灰依然蜀豔占花魁天心雨露殷勤護特表甘棠遺愛來

此公圍始自光緒初年

公任津海關時租界百事創造經營

名園舊事首空回獨有花枝歲歲開昔日遊人何處去得閒爲主且重來

清明後降雪二首

忍飢待澤已經年忽降祥霽上已前未必豐穰能預兆且平穀價續炊烟  
三月桃花正落英忽來飛絮舞風輕老農力作知時節卻聽郊原叱犢聲

約一甫子貞佩瑜雨莊伯平震初同遊倪園踏青茶聚

春入林塘分外幽沿溪草色綠如油杯觴昔日成陳迹杖履今朝結勝遊華屋山邱雲  
過眼風塵歲月雪盈頭得閒便主誰為客何處非家且小留

勤儉吟

近日根賣家用不支細審病根由于  
用人多矣指繁故知勤為儉之本

大學功夫重治生經言為疾要躬行方知言儉勤居首家累先從食寡輕

庸庵太保寄示近作感昔知遇率成俚句

抗言國計與民生憶昔從公領土爭筆秃唇焦心自壯點金煉石志何成百年風月春  
申地一代耆英洛社名魯殿巍然欽泰斗敢矜蟲鳥不平鳴鳴憶庚戌辛亥間隨公辦理  
開平交涉已有收回之議

格于編詔辭而為開謀合樂  
公旋去位至今引以為憾

風塵瀕洞際時艱詩卷常留天地間矍鑠精神文潞國徘徊風月白香山北門鎖鑰猶  
堪憶東洛衣冠孰可攀世界滄桑增福澤天教老健且身閑

和庸庵太保酬津友韻二首

千里詩筒速置郵相公風度本休休拋磚引玉方貽笑報李投桃可漫求心似陶潛依

止菴詩存

十

舊宅身如王粲怯登樓越吟正苦情無奈坐井還思隘九州

茫茫大陸困風霜止殺誰思楚伯陽但使捫心憐總總不須搔首問蒼蒼劫灰自古何  
能測復石于今孰敢當詩酒流連吾輩老任教盲說蔡中郎

喜雨  
二月二十九日

小雨新晴絕點埃藤花滿架送香來老夫喜作齋孟備移得青蔬帶露栽  
半年久旱苦氛埃春暮風和細雨來天意惜民重秋稼新秧遍野及時栽

慎之先生猥以拙句為木齋尊兄壽賦詩言謝欽愧交并謹答元韻  
析津騷客盡聞人尤數君家氣象新閉戶著書多歲月填篋協奏四時春

羣書博極號知津勳業文章孰比倫每奉吟牋三浣誦芝蘭白首尚如新  
自廣近日常所聞所見皆亘古所未有之事閱極無聊作  
此自抒懷抱但于無可如何之中得過且過云爾

家付兒孫命委天襟懷何日不脩然夕陽門巷堪羅雀野水烟波看墮鳶架上  
有書聊作伴瓶中無粟且安眠鯤鵬斥鷃皆吾友熟讀南華第一篇

得雨為飢民慶

米珠無計度朝昏歎息斯民飲恨吞已見遺骸曾滿路更聞鬻子竟連村流離四顧偏  
無地呼籲千番倘有門一雨郊原慶霑足天心猶自惜元元

歎世

治亂興亡事不奇千年王霸幾秤棋防空夜夜偷光禁配給朝朝數米炊空配給昔  
殘息苟延胡所底重熙再覩豈無期低回南渡東遷日習見中原盡此難

小園

未恨天涯寄斷蓬小園新闢地三弓閑門羅雀清風至曲院聞鶯暖日烘野草不除全  
物性良苗分植驗天功春花秋月皆生意贏得餘年獻微中

和伯平看花遲暮吟元韻

猶及繁華照眼新羨君原是別花人雖然節序驚遲暮富貴延年品自珍

開到春闌不恨遲餘芳豆綠正當時數雨後環園牡丹已千紅萬紫雖搖落淡泊梨花

合鬪姿

歎息都門六載違春明情緒每依依長房縮地嗟無術遙想朱闌對落暉  
幾回吟興勃然生探得奚囊亦已盈點綴羣芳空繡縵姚黃魏紫費經營

題李子貞三知足齋額二首

知足能令百慮清如公誠不愧虛生原來三寶君家法七十年中祖述行  
福壽康寧世所珍多聞直諒益同人放翁耄老摩便腹還勝淵明乞食貧

烏苾詠

開流錄一帶苾苾此民廣集濕食全活無  
數漢書載王莽時大飢曾有此物乃天惠窮黎也

八風臺起頌維新寶貨當年不救貧畢竟子遺天自主烏苾猶得活飢民



千錢斗米散亡多百倍于今可若何慈愛天心回厄運忍言魍魅喜人過

奸商四錄魍魅行爲

哀時

古云民以食爲天斗米今號百萬錢四海嗷鴻盡瘠口不知何處有卑田

乞婦歎

一食全傾卒歲資今生無復翌朝期手牽兒女肝腸斷更忍嬰孩索乳時

對食歎二首

門前殭臥盡旄倪自媿齋盂僅藿藜舉箸心酸難下咽苦無呼籲上天梯  
紛紛托鉢遍街沿卻歎朱樓尙綺筵虞夏豈無經水旱可思減膳輟珍年

首夏雜興二首

九十春光過若馳綠陰芳草是佳時午窗睡起渾無事一炷爐香自詠詩  
簾陰引架荔盈牆蛺蝶雙雙點草忙天與幽人閑歲月拋書午倦日初長

遣興

映階碧色草萋萋林暖牆頭鳥自啼欲試郊遊慚脚力且攜筇竹過橋西  
老愛門前車馬無扶疏繞屋聽鸚呼停雲賦罷爐香歇閑寫詩筒付小奴

雨後平津道中所見

四月二十五日

漫言人壽俟河清今日驅車自在行西望雲山似相識北瞻魏闕更多情連村不斷青

葱色

秀甚豐

過市猶多語笑聲，獨有道旁新壁壘。龍蛇走陸勢縱橫，船裝折牽連不離

重入止園舊宅

自註：舊事，東舍卒出，今已六。

做廬嘯傲養孱身，一別匆匆六度春。移竹已添三歲本，題詩猶掩十年塵。燕歸幕上危

巢在蝶化燈前作夢新，莫怪門無車馬迹。樂哉天許作閑人。

一踐吾廬兩眼明，殘年猶望再承平。圖書委案依然在松竹成陰乃爾清，擊筑難尋呼

酒伴，酒餘食物吹簫偏是賣錫聲。薄片烟絲雖云故國非喬木，且喜高槐綠滿城。

永康胡同關宅見太平花

聞此花始於乾隆平大金川時得

直到于今號太平，當時勤遠費經營。興朝二百年前事，祇有花枝得盛名。

又見菩提樹花

兩樹猶沿佛國名，看來枝葉盡駢生。花開色相殊平淡，卻有奇香入暮清。據云此花入

入舊都五日即回津車中作

六年涸轍心如癡，五日斜川夢又醒。儘閱市朝徒展畫，不堪身世等浮萍。青山萬疊平

肩列綠野千塍，瞥眼經待得春明。花事好重攜竹杖，遍郊坰。

和一山落齒韻二首

唇齒相依泯怨恩，香山雙落有詩存。新詞祇合吟風弄，舊恨應無切骨吞。舟去誰尋遺

劍迹，幕危難補墮巢痕。從今脆脆成虛幻，變滅浮雲莫問根。

止菴詩存

十二

齒與生俱豈計恩老衰當落理難存從來柔剋剛難久此去鉛含棗可吞海闊濤翻寧  
漱石天空雲過豈遺痕屠門大嚼何嗟及戒殺還須尙味根

賀味雲親家與仲虎同歲重游泮水四首

孝秀傳來真世家羨君韶齔見才華元音正始承衣鉢江左風流紹永嘉公孫瑞安黃

資誠拔  
置崇首

敷歷勳名六十年優游林下若行仙身經幾度滄桑後猶覺金襴在眼前

我生同及中興年角勝文場相後先白首天涯驚舊夢還將往事話燈前前歲庚辰承

揚龍章感  
謝莫名

萬仞官牆化作塵于今幾輩是陳人世間甘苦消塵盡獨有儒酸老更親

訓勉嘉良孫嘉良今年二十四歲北京輔仁大學經濟系畢業今  
領文憑癸未五月二十二日新歷六月廿四日也

人于天地不虛生教養諸端總自成經濟循名原貨殖文憑貴實有神明請纓要立無  
雙志發軔先端第一程念四光陰彈指過巍巍德業在躬行

世界終能見太平立身端的重危行詩書要守重闈訓弓冶還期一技精且漫轉移隨  
世態須持孝友振家聲寒微族戚吾關念勿忘慈祥忝所生

自曠

迎年八十是衰翁齏粥無虞亦自豐已付天機鵬鷄樂不關身世馬牛風蘭芽漸茁餘

生慶鉛槧猶親卒歲功一事尙留遺憾在佳山勝水夢遊中

閱世

閱世浮沈孰與同縱觀物外聘吾衷大千世界微塵裏垂百光陰逆旅中北斗南箕增  
永歎西秦東晉若爲雄老夫不作齏鹽計憂患如山一笑空

詠呂碧城女士二首

千年闡教重迂拘晚近才華便不觚畢竟易安心迹白錯教人說莫須無

邁世英華詠絮風漫游瀛海徧西東何如嶺表萊猗子本分事居名教中順德李萊猗  
女史著讀史

借見女子言行錄且讀子分田贈族  
云其辭本分內事要作名教中人

北京自來水紀念

光緒末慈禧太后奉命京師火災農工商部奏設  
水公司總辦告成迄今四十年始漸發達兼議建  
照創辦自來

讀聞之處  
唱二首

深仁慈聖塵深宮承命胼胝豈有功今日飲和四十載幾人回首更呼嵩  
物理循環本至公雖云人事實天功放翁十年遇水旱老不能耕年始豐

和佩瑜感懷韻二首

鶴唳聲中不計年鴻嗷飛去又驚天蝸廬榻媿陳蕃下燕市鞭欣祖逖先屈指分襟題  
舊集關心把酒夢重圓良朋聚首皆清福品茗談詩豈偶然

心傷板蕩感衰齡同是風中寄水萍我媿浮家新活計君還相國舊門庭燈前顧影盈

止菴詩存

十三

顛白酒後論詩滿眼青相待秋期籬菊下故交寥落數晨星

夢入家山桃源道中

春來花事滿烟鬢遠近高低五色斑一路鶯聲啼不斷輕輿已過數重山

風雪登樓

莽莽乾坤生若浮天寒景短獨登樓梅含雪意香冲鶴松撼風聲氣舞虬放盡山河千里目掃空身世百年憂夜遊秉燭人爭羨正好斜陽尙小留

小園

小園藝事勝農家禾黍盈疇場有瓜讀罷陶詩天欲暮又乘微雨去移花

自然

物理人情本自然窮通事事總關天伊川難必兄齊壽大程五十四程七十五栗里猶傷子弗賢天下無如平路險世間惟有不材全老夫獨得頤生訣熟讀南華內外篇

和佩瑜散步庭前一首

身心安處卽園林不必車塵費遠尋簾外高槐多古意窗前小鳥亦知音興來倚杖看雲起醉後題詩覺露侵何用經營買莊宅清閒一日值千金

止園消夏

薜蘿滿院綠如油鎮日蟬聲得自由雖少山光堪悅性也成曲徑可通幽野花時發偏

遮路斜月初升卻近樓  
陋巷閉門常謝客  
北窗一榻已迎秋

思鄉

歷盡風塵兩鬢皤  
歸來窮巷隱烟蘿  
但餘一事還堪恨  
江上青山夢裏過

紀夢

光緒初兄弟三人同居京師讀書應試如在目前

棠棣花開幾樹紅  
名場少日苦匆匆  
驚回五十年前夢  
猶是青燈黃卷中

聯翩釋褐繼諸昆  
盛世弦歌萃一門  
天地風雲今變色  
茫茫夢境與誰論

戊子大兄中副榜辛卯二兄中舉壬辰大二兄成進士癸巳余中舉及今思之皆成夢境

嘉孫大學四年畢業得法學士文憑

四載星霜一紙書  
居然學士出茅廬  
敢言凡骨金丹換  
三食神仙似蠹魚

自慰

予遺猶是有黎民  
莫歎吾生獨不辰  
黃帝餘裔終古在  
蚩尤遺孽至今新  
蜩蟬否極回天地  
板蕩悲鳴泣鬼神  
指日河清應可俟  
及身還作墜驢人

六月二十六日偕子明泰孫嘉良遊天津馬廠國際俱樂部啜茗觀荷口占

三首

名區市外絕塵埃  
紅白荷花次第開  
幾度滄桑身見在  
偷閒贏得且銜杯

奪主喧賓主更來  
悠悠人事亦天哉  
從今國際難憑藉  
無限新荷向日開

在歐戰以前均得入會同享遊觀

獨樂何如衆樂高鯤鵬斥鷃任遊遨今朝雨霽雲容淨陣陣荷香勝鋪糟

雨後馬廠野遊

垂老身如縲絏中今朝始覺出樊籠幾行遠樹參差見一脈清溪曲折通細徑小橋過  
牧馬斷霞落日送歸鴻天青雨過人增健洗淨塵襟萬慮空

心地

禍福由來倚伏成要將心地放寬平海枯石爛終常在電掣風馳總不傾

觀幻

動多翻愛靜閒久卻思忙離合無須較悲歡總不常空中尋鳥迹水底認天光幻境終  
何在人間夢一場

病中短歌二首

讀書未聞道養生常抱病舉身皆荆棘涉世徒奔波惟有方寸心時時在巖阿算瓢度  
朝夕蓬戶隱薜蘿墳墓近咫尺父老常相過雖無避世術有興卽嘯歌子孫勿關念成  
敗如機梭禮義等弁髦詩書輟吟哦我躬且不閱遑恤我後何尙荷劉伶鍤彭殤孰與  
多

藏書塵滿閣遊山屐在牆童稚嘗百藥及壯猶羸疴命官遭磨蝎十願九不償中歲涉  
世故世運值滄桑暮年百事廢飲食每自戕須臾失兢畏苦痛生胃腸雖云藥石效得

失介毫芒哀哉元氣子母使入膏肓老無嚴師友衾影實在旁浮世本無戀惜此炳燭光

七月五日雨後若木味雲約同人茶敘口占

平防空演習自今日始雨莊伯楚卿諸人因遠阻未到

掩耳不聞失箸雷明窗淨几且銜杯溫涼氣候新秋始道義親朋舊雨來室有芝蘭深契闊途多荆棘重徘徊光陰遲暮應同惜笑口從今日日開

和佩瑜七夕立秋連雨有感二首

入秋得雨息塵揚頓覺炎威斂日陽幾樹蟬聲風送暑一簾桂影月生涼穆重徧野家家慶畚鍤防河處處忙獨有無懷沽上客北窗午枕夢偏長

秋來日景若飛揚誰見揮戈有魯陽未覺天心從暗換偏驚物候得新涼風雲自古原難會牛女于今爲底忙人事無憑多反覆久晴翻愛雨聲長

自幸二首

殘生猶及太平年世界風雲海變田看盡元黃天地血卻留方寸得安然八十年來悔去非營營思慮失天機從今始得安心法褐不寒今糲不飢

秋花

秋來百卉盡離披一霎西風忽掃之造物惡盈人忌滿看花須在半開時

止足吟二首



功名富貴兩悠悠，布褐藜羹到白頭。  
愚弱兒孫勿關念，但安本分勿貪求。  
世間何事在人謀，天地無私任自由。  
十大礙行原不礙，還捫方寸得安不。

題焯兒及孫男女重遊北戴河詩冊二首

同思卅載侍嚴親，雙鑠鞍放海濱。  
今日烟波屬兒輩，好詩還慰臥遊人。  
先已隨侍北

戴河濱太平石時，公年八十一，猶能乘蹇遊海濱。今余才七十九，竟衰頹不能進步，焯兒率諸孫往遊，歸以詩告，且慰且愧。

當年海宇尚清平，遍地金戈已屢驚。  
準擬明年攜舊侶，筆床茶灶一舟輕。  
當時海外無

年直率直魯戰爭不息，故先公詩有龜蛇起陸之句。今日戰方罷，遊魯西人絕迹，不知明年能否重遊，殊勞夢想。

憫老二首

門庭茶蓼本難知，世路荆榛不可思。  
踏地局天終日事，豈能坦蕩到期頤。  
大患原因有此身，親身敝屣又何親。  
槿花半日松千歲，畢竟同為一片塵。

秋園晚眺二首

薛蘆牆橫翠作圍，千花百草正芳菲。  
天教晚景增虛豔，故放紅霞送落暉。  
拋書不覺晝陰移，草滿階前路漸欺。  
倚杖貪看雲百變，畫欄西角立多時。

答友人邀遊二首

形骸無病心無憂，身世真如不繫舟。  
魯殿巍然能幾許，今朝遊得且須遊。  
誰見回戈得日揮，人間萬事與心違。  
光陰秉燭今何幸，莫使來時悔去非。

新重陽日邀友人茶聚

八月初九日白露初十日為新歷九月九日時防空戒嚴四日昨始開席

鶴唳聲中露未霜  
動人天氣是新涼  
莫尋落帽江山會  
且作題糕翰墨場  
桂影初生光漸滿  
菊花待放意先香  
一年容易秋光老  
鷄黍還期再舉觴

和味老防空一首

百鍊金成武器精  
橫空俯視渺堅城  
忍看墮水飛鷺影  
愁聽穿雲唳鶴聲  
執翳螳蝦忘鵲過  
含沙魑魅喜人行  
夜來風雨乾坤暗  
燈火銷沈夢亦驚

自笑

遭逢如屈蠖歲月若馳駒  
草舍平為福蔬餐淡是欣  
眼前無障礙心下有工夫  
自笑真疣物乾坤一腐儒

得第四曾孫女命名啓賢

八月二十二日

喜氣溢嘉辰  
門楣又一新  
占熊原有待  
設悅不嫌煩  
已得萊衣舞  
還令文祿親  
賢名如可副  
世作太平人

題止園齋壁

全讀事變已七年

十年喬木長風煙  
萬里頽波逐逝川  
斗室蝸廬聊復爾  
黃梁黑黍亦欣然  
征鴻掠野驚秋訊  
舊燕尋巢伴午眠  
正喜清齋無一事  
又聞笳鼓隔城傳  
報方聞

花時正好雨和風老不能耕歲始豐畏日苦長受苦短人生百事仰天公

病中作

何事愁天更憫人羸然病臥百憂身關心戎馬生郊藪側耳噉鴻遍水濱世上本無千歲冶山中寧有四時春曠觀今古興亡運一局棋押着着新

楚卿見云題 先慙慎公暨 吳太夫人百齡紀念圖謹依韻奉答

回首椿庭艱鉅日緬懷萱背亂離時興亡國運千秋感先公紀年時有龜天福繼述家

聲百世慈先妣生平常論子孫廟貌莊嚴垂宇宙直隸寧三會圖形烜赫詔來茲在天靈爽當歆祀迎送歌君七字詩

癸未重九日雨莊約同楚卿一甫子貞伯平若木魯卿震初中原六樓茶會即席

賦二首

賦二首

異鄉為客故鄉思白酒黃花又一時城郭已無歸鶴識關河惟有斷鴻知騰空堡壘漫

天過耀日旌旗逐地馳幸得夏朋杯茗會高樓百尺共題詩

千里江山入倚樓高吟聊復遣吾憂紫茱卻病家家慶黃菊飄香處處幽極目長天從

去雁放懷遠水任浮鷗掀髯笑語心先醉無酒無花亦勝遊

書家訓序言畢紙有餘幅因題二絕以抒悲懷

自歎癡頑八十年追維庭訓每心懸于今重展遺篇讀空慕慈顏在眼前

憶違膝下逐萍蹤慈訓丁寧月幾封常記開緘多絮語恩情罔極意盤胸

詠止園紅葉

金風玉露樹全丹今歲鮮于去歲顏天惜幽人娛晚景故教秋圃勝春山  
一年容易又秋風備薛荔牆侵滿院紅恍似香山舊游地千巖錦繡雨烟中

秋葉紅黃相間最愛晚晴尤覺鮮豔

赭葉黃花映碧蘿斜陽影裏豔容多莫嫌好景傷秋晚天使風霜養太和

觀紅葉偶成

萬綠叢中爛縵紅秋容點綴仰天工世間萬事常如此榮悴誰知有主翁

詠牽牛

牽牛花發上松喬疊翠藏紅分外嬌弱質不爭朝日豔卻依餘蔭耐霜凋

詠薛荔二首

千林搖落草萋萋薛荔青紅又一奇不畏霜高曾煨煉卻愁一夜怒風吹

一牆炫爛趁晴霞淺紫深紅美莫加驚醒卅年山寺夢戒台千仞錦屏遮民國初年會  
遊來古寺時

值置九滿山  
紅葉如錦屏

詠盆菊

寂寞三弓徑已荒尙餘盆菊伴秋光門無俗客堪羅雀廬有幽人勝舉觴靜對孤芳宜

暮雨掃空凡豔傲清霜胸中飽領淵明趣吟得新詩字亦香

觀紅葉有感二首

五色斑斕醉眼開春花百態莫相猜從知時至方稱傑居上還須讓後來  
深秋侵曉淨無塵露浥霜勻點點新看到日曛似猩血霞烘晚照更精神

止園散步

小園霜曉曳筇枝天趣全從靜裏知一幅丹青大年畫數聯恬淡放翁詩

先公忌日祭後感言

家國憂危六十年英靈猶痛運難旋先公咸豐辛酉出山民國辛酉亂世絕遺書永付  
兒孫守舊札還將師友傳今年明恩檢點先公遺稿一千八百餘頁結城郭幾回悲  
化鶴松楸千里愴飛鶯馨香此日應來享馨款如聞俎豆前

止園秋末題壁

領略園中趣方知造化功霜漫三徑白日射一窗紅世事原難料人爲固有窮歲寒堪

慰藉松竹伴衰翁

止園瓜架豆棚上覆薜荔紅葉最盛

誰解無花一味紅儘多變態在風中閒來繞壁百回看朝暮陰晴各不同

和伯平見示止園學道二什

薜荔年年茂秋林寄意深綠陰當戶減紅影入簾侵日下披書讀風前伴酒斟幽居忘  
寂寞酬倡有知心止園

用拙存吾道平居尊所聞人生誰主宰世運繫斯文冥漠能相合艱危亦自欣常須奉  
倦倦閉戶有餘勤學道

紅葉今年最盛最久

安然無雨亦無風常在清霜煨煉中看到嫩紅成豔紫始知造化有全功

今年壽豐園菊晚十月初始得邀子貞往觀

重陽過匝月園菊傲霜開冷豔輪叢桂幽香占早梅物情原代謝天意有安排晚景心  
猶壯清遊日幾回

十月初二日子貞正初伯平同觀壽豐園菊富麗比去年更盛主人招待甚殷率

賦絕句以謝盛誼

身遊錦繡萬花叢道似春光實不同濃抹淡妝比西子會心都在寂寥中  
金玉成堆色色嘉環肥燕瘦總堪誇休言老圃秋容淡卻勝春深富貴家  
風日晴和絕點塵花光富麗一番新主人辛苦知多少贏得秋園滿眼春  
美人高士聚同堂相對無言樂未央料得淵明歸隱日東籬無此好幽芳  
年年同約看花人今日晴和天氣新解語名花能戀客似傳園主意諄諄

風霜時節尙尋花獨數芳園第一家絕豔奇姿看百偏令人忘卻夕陽斜  
淡泊凡花卻自奇精神煥發繫人思金相玉質多新豔舞鶴驚鴻有令姿  
百卉凋零萬象秋此花偏向此時留天珍晚景人珍壽黃蕊何曾笑白頭

七十九生日感言二首

昔聞大壘若登仙今日思之已索然遼海幾曾回去鶴津橋仍自聽啼鶻公借隱當  
衰世陶令歸來尙盛年白髮龍鍾何所事置心常在結繩前

已外浮名更外身桃花源裏一遺民雖逢滄海橫流日卻作羲皇向上人歲暮詩書猶  
自課庭閑魚鳥亦相親天教晚景娛松竹且喜疏梅占早春兄纂章昔開門安分荆妻已病痺三年今冬得扶人

答苓泉見示病中紀夢詩

勝境羨君續舊遊樂天形病神無尤廿年大抵如炊許百歲誰能過客留天地爲廬觀  
大化江山可友信浮漚衰殘如我心猶壯神馬尻輪興未休

題止園齋壁

年垂八十媿知津猶是桃源夢裏身靖節自分當去客東坡原是可憐人風雲天外從  
多幻草木庭前總見春五百年間同一瞬江山爲主我爲賓

讀先公年譜感賦

家國興亡六十年田間崛起卒歸田先公咸豐辛酉出山光緒丁未加租民春暉近展

鴻儀影天津寶慶內盧名春暉供奉考此事近國詠雲霧遙瞻馬鬣阡先公葬原籍坑中千載孤忠存

特祀直隸山東安徽江南各一生憂患著遺編先公自著多紀平生憂患雲初世守清

芬澤聰訓從教字字研

季木葬事紀念癸未十月二十六日申時葬故極季木于京西西山公塋與妻念

委蛻于今已六年年大陸警烽烟今朝骸骨歸同穴永世丘原長夜眠老淚未能臨

窆洒癡心猶望後人賢家聲續學知難繼莫忘清明歲掃阡

答友人問疾戲述情狀

暮年歲月付悠悠衰朽形骸不自由齒廣強留常作祟牙敗常作唇焦視食直為仇腫脹

能建不肌膚搔遍情難忍腸胃橫壅氣弗流大便閉結且幸膏肓猶未入如

泉詩思尙絲抽

病起偶吟二首

身如大海一浮漚成壞原來任自由覺痛更無痛痛覺觀空何事不風流

一事當前若不禁時移勢過渺難尋舉頭試看雲舒卷消盡平生得喪心

病中作

病魔如寇盜小疾為前驅細微失戒慎磁莖將難圖平居安淡泊所戒是膏腴冲和常

止菴詩存

十九



在抱病自無根株恃強最可慮平日視若無一旦入膏肓性命祇須臾亦有過患者搏  
蟲施龍屠去疾誠剽悍元氣與之俱二者皆非訓其失蓋等乎中庸為率性養生豈外  
殊不為念所激不為慾所掄四時有佳趣自適見真吾君看廣成子壽享千歲娛試究  
其道妙乃與二典符

楚卿賜和五章融會儒釋闡發真詮至理名言百讀不厭謹拈俚句以志忻佩

一紙飛回筆如椽拋磚引玉喜如顛巴渝鄙俚漸無地重拜陽春白雪篇  
病榻呻吟鬢已凋東塗西抹說無聊邯鄲學步難藏拙堪笑蕪箋尾續貂

答謝友人賜和生日詩

吉語聯翩感不勝德脩學講謝無能身同大海孤舟客心似深山退院僧往事已非忘  
墮甌前修莫繼愧傳燈年年願誦嚶鳴什還祝崗陵壽作朋

先妣忌日自傷丁未年藥至二今癸

悔貪捧檄為娛親忍作人間無母人三十七年何所恃煢煢孤露夢中身

自從萱背痛傷神棠棣花殘更減春先妣後不久二兄下回首堂前嬉戲日忍看竹  
馬一番新今日祭建孫曾羅拜相願

追思慈訓一事未成悲悔無地

多難偏驚歲月馳衰殘病骨已支離天翻地覆鵲聲急日暮途窮馬足疲三黨及今無

善策百年以後有誰思  
慈幃至訓音猶在一  
息尚存更勉之

答友人問近狀

世間萬事馬牛風  
日日從教醉夢中  
僕助筋骸勝拜起  
朋從耳目近盲聾  
膏腴久絕常  
枵腹寒暑難禁易  
迫躬野鶴閑雲隨  
去住放懷聊與此  
心同

冬寒六十歲後所有皮衣全售助賑儘以新布冬不着皮裘已於廿年矣

天寒富室苦龍鍾  
羔酒狐裘更幾重  
輪與茅檐負暄叟  
一身布衲過殘冬

食葷余體弱自少茹葷近因便閉始略食海味干貝淡菜蝦蟇作湯

少小自安淡泊生  
雞豚絕迹厭煎烹  
暮年欲解枯腸厄  
鮮食還頻海錯羹

和樂天勸歡韻

補讀詩書已恨遲  
十年不學悔難追  
夜遊炳燭光陰好  
能得掀髯又幾時

天津河北大悲院叢林復興志賀二首

回憶紅巾四四年  
名藍劫火渺飛煙  
補苴鼓鑄收餘燼  
拯救瘡痍仗佛緣光緒庚子在法

大悲院正殿設增開洋兵入境炮擊毀之次年項城督直百業蕭條我備充斥命余設法乃就其遺餘廣設廠鼓鑄前兩月而事成日備銅元銀元以濟市面民生賴以安

定事機之順殆佛佑也

生公臺上立飢烏  
齋鉢年年若有無  
今慶大悲還寶刹  
佇看檀越輦金珠是時慶僧依

歲餘若干以資生活爾余去位廠亦旋廢多年不運消息今年吳未仲夏住持僧來告有某居士將募金修葺余亦傾囊相助乃未數月後殿告成恭奉大悲菩薩聖像以十

一月十六日開光齊火願或聞明年將修正殿復與叢林計庚子至今已四十四年矣  
數存焉余乃目睹其事不勝欣  
慶受此故實感荷為寺僧

生日思親

久寄幽燕作幸民年年生日倍思親承歡菽水嗟無日空是人間騰長身

楚卿一甫芷升子貞雨莊伯平震初諸公日前為賤辰開公宴情誼優渥今備粗

筵非敢云報謹和俚句聊表謝忱

一陽初動後諸公楚楚行貞元懷舊雨即席慶升平康節辭生會溫公重厚情敢云思  
報德藉此表傾誠

生日上供是日始嘗初嘗

瞻拜華堂莫養親天南邱壠倍傷神今朝供得長生麵難慰當年母難辰  
不見慈親已卅年如聞警欬傍香烟今朝庭院全鋪白似寫餘悲照几筵

生日逢冬至得初雪步伯平韻答賀

降來初雪及生辰天賜祥雲為福民冬至一陽中夜復吟夜丑從今瑞氣滿平津

久困警區頗思江湖之遊

不存恩怨孰悲歡世界由來平等觀門可張羅雙耳靜室無長物一身寬消磨歲月傾  
觴易摹擬江山着筆難何似鷓鴣人迹外深林寄託得心安

冬至日喜初雪

入冬久旱苦多塵瑞雪今朝氣象新葭琯飛灰方似墨梅梢着彩恰如銀  
窗明快映仇書課王潤欣占樂歲因自是天心示仁愛故將靈霽惜斯民

登中原六樓望晴雪日暮始歸

雪晴憑眺百憂空奚止農民慶歲豐大地盡成銀世界遠峰齊作玉屏風  
重裘灑上尋詩友孤笠江邊獨釣翁星月交暉看更好萬家燈火入樓中

第三公園散步觀晴雪

衰翁無事擁書眠雪後來觀淡蕩天枯樹分明銀鎧仗小山起伏玉蜿蜒  
耳傾吠犬迎新旭目送征鴻入斷烟白髮披裘閑獨步爲貪覓句且留連

飯後同人登新華五樓觀雪率成

憑眺高樓雪暗天千家玉樹照瓊筵詩成不作天涯感興到何如世外仙

避地吟井序

余自丁丑年避居津寓止園晝僅一几夜僅一榻庭有雜花室有殘書今忽忽  
七年矣世事日非生計日促幸終日杜門不接人事雖地非桃源而心同粟里  
矣因作避地吟以自慰云

齋居久掩關避地一身閒布被仍酣夢蔬餐亦駐顏眼前無俗物門外即深山  
衰與藥

爲伴清惟鶴可攀何當從此逝嘯傲入烟巖

臘月十四日雪後楚卿邀家庭食堂消寒二集茶會卽席賦和

消寒臨二集努力勸加餐風雪催冬盡家庭樂歲闌茶膏如酒醉木稼當梅看滿室同心侶清言氣似蘭

除夕詠

漫言歷尾有餘思恰是清齋煨磨時祈穀農人竿作炬祭詩才子酒盈卮癡獸賣去原無忌煖熱然來只自知何事晉公偏歎老頻添商陸曉鐘遲

甲申元旦試筆

天容萬里見空青飲罷屠蘇酒半醒正是昇平新氣象依然詩禮舊門庭堆盤酥果童皆樂列俎犧牲祖有靈八十衰翁無所事一爐香篆誦仙經

題松下聽琴圖二首

松下跣趺露滿襟爐香一縷息塵心清風謾謾無凡籟耳畔常聞絃外音萬壑風來萬籟生七絃按指字分明妙香領略渾忘卻聽到無聲勝有聲

眉壽金婚紀詠二首并序

憶自光緒甲申余年二十時貴池劉閣學公長女年十九來歸三月十一日在先公津海關署迎娶其時海宇昇平家門鼎盛今歲重逢甲申余年八十妻

七十九滿六十年夫婦西俗謂之金婚目為家慶而感念時事不禁滄桑之歎  
因戒兒輩閉門謝客于元旦閣家齋心蔬食以迓天庥爰賦此為紀念

日月如過隙兒孫忽滿堂不圖今白髮猶是昔紅妝鏡裏流光速燈前舊話長從今幸  
無恙且暮兩爐香

斗酒稱黃耆荆釵對白頭中多兒女戚五男今存四七老尙米薪憂近林食根百物家  
事輸欹枕失財大半天心入倚樓世界未起庭前雙鵲噪卻已付悠悠

題春暉堂家宴圖余夫婦二人正中坐于四人媳四人曾孫女四人依次進食  
四代同堂恰卅人桃源洞裏夢中身齊眉周甲登耄耋天地長留世外春

題眉壽圖卷人日展讀又題一律

金蛇已過得身安昔有日者言辛巳年余夫婦當壽於今竟無恙猶似紅羊歷劫難今遭世界大戰裙布釵荆

原本分藜羹豆粥有餘歡傳家無復關心事閱歲猶如彈指觀天地有情人不老笑看  
兒輩勸加餐

甲申立春日作正月十二日卯時

歲屬青猴氣象新家家喜作太平民辛盤羅列兒童樂蔬果紛陳父老親大化潛移慶  
盛世陽和默運慶熙春交遊相見還相祝吉語連翩不厭頻

慰老

漫道衰翁感慨深任教霜雪鬢毛侵  
一身只合都無患萬事從來忌有心  
鳥迹印空原不着鴻泥留雪更何尋  
待看水面風來候吹皺波紋月影沈

病足小愈喜賦

兼旬痛蹇實堪憂誰意迎春廢疾瘳  
嘉會祇憑詩卻赴好山方恃夢重遊  
奔騰未似林中鹿浮泛還同海上鷗  
待得身輕投杖去尋梅踏雪到村頭

自怡

一室天地寬百年無媿難縵袍原自適  
藜藿亦加餐家事平爲福身心淡始安  
千秋延目視壘粉等閒觀

讀老子有感

大患原因有此身無爲方始見天真  
放翁拈出癡頑字深得函關句裏神

眉壽金婚親友惠詩謹賦俚語答謝盛誼

已度金蛇時苦厄還知芻狗世磨礱  
妝臺尙見當年月敗屋猶禁徹夜風  
珠露新詩來眼底雲天高誼入胸中  
深情李報應還祝美意延年百歲翁

正月十三日立春后一日爲消寒第六集承芷升約茶聚卽席賦詩謹步元韻

春來大地喜相迎且把茶鐺當酒鐺  
共挹清芬知室靜獨吟秀句覺天驚  
斯文不滅山陰會樂事堪追洛社英  
安福燈期幸在邇踏歌三日慶昇平

甲申八十生辰筵資助賑用賦俚句敬告親友謝卻贈遺

癡頑幸有子遺身世界風雲日日新喘息苟延甌脫地陸沈猶見設孤辰不臨生會堯  
夫志特製寒衣樂圃仁願與親朋要約定儀文刪盡率天真

母難之辰不忍思况今多難此何時蓼莪廢讀終天恨懿戒垂歲百世師胞與顛連無  
手拯親朋惠愛有心知鴻箋鉅製虔修璧嘉貺惟希片藁施

八十生日感言二律

晚景紅霞送落暉天寒晷短倍依依心如遠水從魚躍身似孤雲伴雁飛難隱荒朝何  
有杖傷懷故里敢言歸老耽深巷車聲寂暮色蒼茫獨掩扉

聊將蠶粥度朝昏勳業文章愧莫言介壽無顏稱老耄遺安有訓到兒孫行窩且慕尊  
賢里世澤還延通德門白首若教無愧怍但吟抑戒答天恩

正月十七日焯兒為就營業攜眷南行有感三首

世亂前途盡棘荆茫茫生計費經營十年教養成何事剩得牽裾兩淚傾  
熟讀東坡兄子書人間好事竟誰如爐頭兒女今須別悔弗參軍地種蔬

少日功名祇自期四方于役任奔馳于今繞膝情難捨想見當年別母時天禧兩午餘  
請假赴兩江署省親便備同時吾母虛候而別爾  
請假未幾年丁未母竟棄養不得再見痛哉

紀病十餘次極困倦



加餐博得病沈沈洞瀉連朝苦不禁  
忌飽尤須勿憚剝放翁明訓最堪欽

紀病中夢

畫苦支離夜臥閑夢中猶自戀溪山  
閒撐雨艇衣襟溼遍歷烟巒腰脚頑  
石洞穿來迷後返芒鞋脫去失仍還  
光明天地無塵滓忘却殘身在世間

小病兼旬不出門亦無客至戲作

小疾兼旬可奈何惟將寂寞養天和  
犬無避叱寧投骨雀自馴來不用羅  
甚欲觀心新境少每思過眼故人多  
西窗牖有衡山日獨對爐香發浩歌

二月三日苓泉寓小集和伯平韻

陽和乍轉運回初斗酒相招樂自如  
道義親朋開口笑胸中磊塊已無餘

親友介壽有以鹿鳴重宴相期者詩以謝之

徵倖名場敢算延當年桂影渺雲烟  
不禁身世天涯感安用文章海內傳  
海內傳當時試藝開朝市隱來聊復爾貞元過後亦徒然  
聚奎風雅今誰嗣空見蟾暉六百圓  
癸巳己二十九歲

癸巳

花燭今逢周甲回憶鄉舉已五十年有感

蟾圓六百數當頭屈指光陰逝水流  
獻賦十年遲抱憾調羹三日早承麻  
鹿門正苦山林阻鴻案偏驚歲月道  
記取遺安孫子念詩書世澤若爲謀  
語六世祖蘇公唐咸通建  
貞或名開池州文化今

遺世爽康樂詩書千餘年之  
世澤于今歌詠可勝曉數

### 第三公園看山桃有感

年年遊興為花顛今日花開又一年果是春風真浩厲藩籬撤盡亦欣然四朋錄  
去  
世外桃源無處尋小園閒步亦惜惜看來人事多興廢獨有花容無古今  
老樹新枝又幾重種桃人去已無蹤春風有意留遊客故遣花光分外濃  
又驅康節小車來此地年年日幾回笠影屐聲今見少桃花應祇為儂開

### 三月三日楚卿約同人茗敘即席賦二首

羣賢畢至盡清言一室幽情可共論不必山林脩禊事人間隨處有桃源  
一觴一詠足千秋天地無心任去留莫問世間何歲月放懷依舊晉風流  
三月四日曉遊公園山桃始開春分後七日

新晴草色綠如油雅愛拖筇趁曉遊山外桃花春意滿數枝紅綻露梢頭  
寒風連日漲天塵忽轉輕陰始見春數樹枝頭初破蕊滿園生意一時新  
往日偕偕展滿園今朝花下闕無言天公似遣遊人醉處處春風撲面溫

### 遊第四公園得句二首

四圍花事勝三園幾樹高枝出短垣含蕊丁香多繞徑扶疏綠柳自成村  
昔嫌市井苦囂喧今日花封寂寞門雅稱幽人詩意境日斜覓句到黃昏

三月十一日花燭重諧慶日謁祖後子孫輩蔬食會餐畢攝影爲紀念  
六十年間事都如過去烟紅妝猶在眼白髮已盈顛祖蔭重重茂孫枝節節鮮簪纓雖  
已矣藜藿且欣然

舊英公園看海棠有感

是園成于光緒甲申今已六十年適合余花燭重諧之期

炫爛繁華六十年及今寂寞儘堪憐  
令威回首應含笑猶記香風在目前  
世事天心豈易知滄桑幾度最堪思  
漫誇花好人長壽贏得風前兩鬢絲

小齋茶聚和伯平韻

庭樹春深未著花尋芳遊侶興偏賒  
芝蘭入室同心久品茗論詩閱歲華  
春來萬物各熙熙未盡餘寒花較遲  
好友不妨朝夕見盆窗小景尙遊嬉

小雨初晴芷升伯平楚卿子貞及七弟同遊第四公園海棠丁香盛開二首

草色新晴綠似油幾株紅豔弄春柔  
氣清天朗羣賢集話舊論詩且小留  
共憐蜀豔逞紅妝卻讓瓊枝細細香  
絕妙天成西子美淡敷濃抹費商量

四月五日南隣失火幸未成災

風急星星近草廬熊烈燄兆焚如天教窮巷留遺宇且學淵明還灌蔬

憶江南

事業文章興已捐故鄉山水尙欣然  
江南處處佳風月安得閑身健似仙

浴佛日茶集和芷升韻

滿架藤陰綠已成風和寒煥氣初平七賢雅集謀天趣千劫因緣慶佛生老至只堪真  
率會興來猶得小詩呈一杯香茗甘留舌相對清言倍有情

王紹溥五十壽

壽宇宏開伯玉年千祥雲集到尊前椿萱並茂天增福蘭桂齊芳世繼賢樂事賞心詩  
卷在宦游底續頌聲傳優閒歲月今方半更祝期頤號地仙

題王欣夫抱蜀廬校書圖

寒燈相對一窗幽典籍經年費校讎著作等身垂百世丹黃過手足千秋探源古閣思  
前哲搜祕名山問蹇修目不窺園天獨厚定知異代有名留

四月初立夏後一日同一甫伯平看壽豐孫氏園牡丹歸途口占

清時臨夏首春思徧天涯忘卻烽煙地欣看富貴花比肩皆白髮照眼勝朱霞一覺承  
平夢京華意興賒不見覆園社已七年矣

簡邀楚卿芷升子貞正初惠臨茶敘二首

匆匆花事看飛英幾樹新陰綠已成鼎有灘聲茶浪起廚無市脯餅香清魚浮水面依  
羣影鳥送枝頭求友聲寂寞空齋思晤語呼童掃徑喜相迎

韶華九十夢中過寂寞將如長夏何無酒已拋花事了有茶還喜椀香多文詞老宿思

欣賞道義親朋盼切磋彼此光陰同炳燭莫教門外久張羅

喜長子明泰年五十得第一孫

綠竹生孫第一枝樂天知命復奚疑山留暮景霞烘晚雨喜朝晴日出遲剝復循環原有數綿延似續總堪思料當海宇承平日正是家聲再振時

庶孫入校已成名大孫嘉慶大學畢業得學位冢嗣寧馨今始生否去泰來端有兆承先啓後更多情乾坤再造綱常振滄海橫流砥柱撐他日風雲當際會詩書努力繼家聲

長子明泰年今五十始得子命名嗣良取宗嗣之義詩以紀之

我逾三十初抱子泰丙申生爾今知命始弄璋大蓋之年何所望尙期冢嗣繼書香

五十生兒未覺遲循環世運獨心知料將重睹昇平日正爾詒謀嗣續時

邀友過談

眼底匆匆花事了胸中念念故人多茗香果熟堪留客乞米求薪莫問他貪看無心雲出岫靜觀自在水舒波庭前松竹饒生意相對怡情且嘯歌

觀壽豐園太平花初開

日暖風和有令姿來從上苑得根移太平景物今猶見慨想當年鼎盛時玉潔香清美莫加朱容桃李占年華游人眼福今何似名貴方知出帝家

齊照巖八十壽

鴻才應運自天申兄弟兼圻政績新管領湖山稱節度澄清離署福黎民泮宮重攬斯  
文秀津市優游大隱倫愧我同庚無穀狀岡陵獻頌慶嵩辰

吳怡生八秩壽

惟仁者壽古猶今樂善如公夙所欽德望平生珍拱璧政聲昔日著鳴琴鄉鄰父老懷  
恩久道路嬰兒感惠深愧我同庚無所寄岡陵獻頌且傾心

樂夏孫南行入大學賦此示之二首

鄧公子各一藝名傳家孝謹著賢聲分陰是惜須堅苦大器由來重晚成  
道德文章固有之更兼一藝是鎡基乘時利器須先備莫待時來悔具遲

陳庸庵太保八十八壽

林下清風登耄年齡公真是地行仙放翁休去無菱馬白傅歸來有管弦天許海濱居  
大老人從洛下慕尊賢河山再造餘琴鶴誰記裝輕載石旋

夏至前六日妻課僕種蔬喜夜得雨

要備齋盂莫恨遲從來人事占天幾蔬畦強趁斜陽理恰喜深宵雨及時  
待澤荒園事事遲病妻強自理蔬畦青秧移得僮奴喜夜雨霏微到曉時

自題畫像

余今年八十五在君仲虎自吳  
託友為余畫像賦詩寄贈

滄桑幾度飽曾經八十衰翁迹似萍三萬里天春不老二千年事酒初醒閉門松古欺

頭白遡水葭蒼照眼青妙手高情住泡影常教五岳見真形

自豪

誰解書生意氣高門無車轍長蓬蒿久衰不復干旌夢老至猶親鉛槧勞促促光陰思秉燭悠悠世態學鋪糟小園三畝禾蔬滿讀罷陶詩乘雨薈

題孔少軒遺墨

少從父執仰公名惜困芸窗未識荆今日欣觀遺翰墨喜瞻泰斗慰平生

小暑後五日一甫達有喬梓約同芷升伯平赴馬廠觀荷

塵囂闌耳困坊場結伴郊遊趁早涼弱柳拂橋欣小憩新荷被沼喜微香銜泥燕子雙  
雙落點水蜻蜓箇箇忙偷得浮生閒半日且觀物態答年光

馬場觀荷和伯平韻

賽馬名區遠市場清遊雨霽好風光閑循柳岸迎朝爽小憩荷亭覺夏涼魚躍鳶飛多活潑雲容天影共彷彿舞雩歸詠今如昔老興都忘白日長

小雨獨坐

舊雨殷勤今不來階前浙瀝長莓苔披襟獨倚柴門坐閑看幽禽自往回

明恩雋京宅有感

宅在和平門內西半壁街係內子親手許建一番辛苦付之東流

築室斯千費苦吟口瘡手拮願何深漫期寢夢虛熊虺悔擬楹書飽蠹蟬德裕生前空

灑淚淵明身後不留金百年堂構歸泡影辜負萱幃似續心

夏夜漁翁

露箬霜筠織短篷放歌常在月明中一竿得寄平生快飽領溪山四面風

偶過津門舊邸

余八歲時母到津寓城內府西舊宅今年八月

韶齡曾記此中行歲月堂堂去可驚幾度春風飛絮逐儘多秋月候蟲鳴依稀棠棣隨

層影寂寞椿萱聲七十餘年無限恨邯鄲一夢未炊成

立秋日得雨新涼邀友借家庭食堂茶聚

長颺摧酷暑細雨報新秋興至欣扶策年高怯上樓家庭堪自適聲氣喜相求聊寄平生快茶香露滿甌

和楚卿書齋茶聚韻

君是羲皇以上人放懷言語妙通神新詩吟罷愁如洗掃盡乾坤萬劫塵  
溽暑方交三伏過涼颺乍起一時清始知新歷憐人意預報中秋氣已平  
未看桂影月方中且領茶甌兩腋風九老不虛今夕會夢遊應到廣寒宮

艱食歎

年來米薪甚果百凡食物無一不昂至百倍以上

垂老殘生罹百憂令人心慕赤松遊子房特識推千古避穀仙方底處求  
薪米從來珠桂侔齊民一飽擬公侯揮金似土難為繼點石成金豈自由

止菴詩存



一日生涯百倍增時危物值更飛騰曩編試檢唐時事安史殘年得未曾聞唐史載安史後物價

粿腹吟

蔬食奇貴粥斷炊白麵每斤十數元青蔬每斤八九元香油每斤至四十元

悲哉口腹事憂煎日日針頭勝坐甑粗糲直超梁肉貴萬錢一箸已無緣  
聖賢憂道不憂貧謀食無心道自珍陳蔡絕糧還慍見西山薇蕨幾何人

感時

食物奇貴並非年荒全由感時處處退權所到二首

蒸民乃粒太平時艱食虞廷實有之除卻化居無妙策如何今日背而馳  
民爲邦本食維艱自古興亡在此關益稷昌言存帝典懋遷一語重如山  
昨作艱食歎今日悔之作此自勵

視息偷生亦有涯敢將豪侈鬪年華庭饒花木園成趣饘粥朝昏則已奢  
麥舟未濟希文友施藥難追務觀風二龕晨炊猶得繼也應慙愧百年中

素位吟二首

患難如何富貴觀直緣胸次覺天寬齋心便得無爲法自在能迎古佛歡  
最難因應是當幾自在方知作意非天際晴雲舒復卷庭中落絮住還飛

七夕詠

幾日葑蕀棄若遺婚姻道苦使人悲梨園似解潮流恨猶唱天河腸斷詞家說日曠天河

劇配一

詠琴

流水高山寄意深五絃揮處碧天沈雁聲遠入瀟湘去洗盡人間塵霧心

和一山美人換名馬韻

本事見異聞錄施生簡徒以  
雙妾善四絃換韋生名馬

奈何雕逝失雄姿帳下淒涼一侍兒自古英雄嗟末路美姬名駿盡居奇須知換主皆  
辛苦三五年間去若遺此舉鮑生雖大雅終輸樂天大帶大書時

紀事二首

未曾啓齒意先疏倨傲形容賈有餘忍使揮金謀一乘枉教高蹈是懸車

近日人力車  
奇貴且賤

不可謂故出  
則徒步而已

如何物值忽飛騰坐使飢腸媿飲冰日費萬錢無所食家家愁歎作何曾

根葉飛漲至  
百倍千倍富

望已難久支平  
民直成斯效

七月初九適與子貞擇廬鑑波不期而遇同至楚卿書室小憩去後始知是日為

其夫人誕辰特呈俚句以伸補祝

賓主同將四百春  
寶主五人合  
三百數十歲  
不期而遇盡詩人到門活潑觀魚樂入室莊嚴見佛真  
祇識先生徵大德未知壽母值芳辰今朝願補岡陵頌歲歲康寧氣象新

聽鶯

止菴詩存

二十八

老來萬事不相關  
風月無邊可慰顏  
午夢正酣誰喚覺  
簷前雙鵲語綿蠻  
新九月九日爲夏歷七月二十二  
白露後一日登高無處賦  
此寄興一年容易又重陽  
新歷光陰覺更忙  
相約登高無別意  
盼來新穀早登場  
無菊無酒過重陽  
天意何如人事忙  
強預登高聊望遠  
縱橫萬里盡沙場  
今朝新歷已重陽  
野老偏驚歲月忙  
心欲登高無處去  
詩壇堪作論文場

九月十日芷升約茶聚卽席賦

昨日清愁不可支  
登高未遂負佳時  
今朝歡聚芝蘭室  
果美茶甘合有詩

戲紀昨事九弟約中原六樓登高未覺

幻影傳來度半空  
紛紛警報怖兒童  
老夫不減登高興  
縮地無方一笑中

閉戶

老如炳燭光何事  
爲人忙藥餌從堆案  
圖書任滿床  
侵晨猶拂硯入暮但焚香  
閉戶方知樂閑中日月長

將約同志置郊外薄田爲菟麥計二首

負郭田宜處  
土莊桑麻徧野得深藏  
數間茅屋青天遠  
一椀藜羹白晝長  
隙地鷄豚隨柵長  
豐年芋粟滿園香  
著書訓俗吾何敢  
且錄忠州濟世方  
秋到江天有雁行  
幾人垂老得還鄉  
躬耕本是英雄事  
絕境難求避世方  
陶令長吟歸

龔啟放翁溫飽出農桑慢言陽羨平生願此志坡公未易償

紅葉吟

三多里止園今年紅葉特成  
備開盡成錦堆可爲大觀

秋花落盡已無期恰有鮮妍葉補之遠近高低皆入畫牆頭屋角更相宜  
春去無蹤不可追忽來奇豔更難披一年好景休嫌晚正是秋園燦爛時  
衰老心情不可支秋容晚景更多奇霞烘旭映看無厭朝夕徘徊合有詩  
葉葉迷離不見枝花光獨訝占春遲非招蝶戀蜂狂地恰稱蟲吟鴉噪時

八月八日震初茶集次伯平韻

小雨中秋近初晴景更宜白雲歸碧落黃葉點青墀茶社多閑侶詩壇盡好辭出門忘  
路遠喜赴故人期

答謝煒章賜詩

殘年如炳燭老學慙師承術守歧黃律詩從陶白繩揮毫慙拙劣抒藻羨賢能低首功  
良相歡聲道路騰

國香送黃菊紫鷄冠各二盆

傲岸精神初放菊崢嶸氣象正栽冠秋霜鍊得春風豔魏紫姚黃一例看  
中秋對月用伯平韻

萬里飛空玉作盤清輝斜照碧闌干放懷一寄平生快此景還同海上觀

小公園遇九十二老人自言秦姓潁州府人從馬玉崑軍中多年甲申中秋後二日  
秋風動寥廓南極一星明相遇情難訴殷殷說太平  
意氣尙橫秋平生不解愁曾看河洗甲更見海添籌

自寬

身老生如寄時危夢自驚置心同止水何事不能平

日月如過燒風霜變早寒庭前衰草色猶耐夕陽看

讀楚卿疊和九十二老人詩前後六首命義高超因廣二首答之

世與人俱會天清夜自明乾坤今轉轂終得泰階平

福慧分修短盈虛理可明昔賢詩叟校壽考亦難平宋曾子五十七計二程子七十五

一子五十八朱子七十一竟無一人能及八十五如陸放翁者

雙十節前一日孟莊茶聚楚卿有詩謹步原韻

秋同人共老萬事付蒼蒼愧有三多里曾無八百桑江湖思放棹風雨憶聯牀佳節非

虛度窗前聞桂香

耆英原洛社今到野人莊地蒹葭先白天教菊有香癡頑度世術淡泊養生方孟茗情

偏厚清言樂壽昌

雙十節約同志遊小公園後在子貞家小憩

佳辰且喜得秋晴日暖風和信步行山外閑雲舒復卷途間細石兀還平放懷縱語都忘老隨意尋詩不爲名知足齋中情最重烹茶小憩聽嚶鳴

八月晦日止園茶聚暢觀紅葉因作長句以寄慨

憶昔息影西山陬石如伏虎松如虬夏日炎炎涼似水忽焉露白風颼颼巖前黃蘗條變色千紅萬紫紛錦裯翹首當窗得清玩嘯傲不覺鳴泉流從朝至暮看不厭往往扶杖穿雲游別來寂寞已八載常繞魂夢去無由今朝聊涉止園趣粗具杯茗邀朋儔疏柳殘荷已零落滿目紅葉堆牆頭豁然一寄平生快坐使春花簇簇盈我眸大似長房縮地法彷彿西山眼底收更思八方兵氣消塵淨胸中逸氣橫清秋使我奮身潭柘戒臺頂飽觀錦繡登山樓俗塵掃盡游世外常與親朋相唱酬吁嗟乎人生樂事無止境但得好景長淹留願祝諸君同老健明年江南楓岸弄扁舟

重九霜降後

約同人登公園小土山後在子貞三知足齋茶聚用楚卿止園看紅葉韻

葉韻

重九先期已降霜東籬興趣蒸柴桑園林幽靜山雖小風景依稀徑未荒每對青松懷

野墅余西山有松園  
別墅多古松爲憐紅葉憶江鄉吾鄉多烏柏天留好景原無限知足還師古伯

陽

甲申重九霜降後日同人登高賦詩遣興率成三首

年年風雨過重陽今歲多晴早見霜天意無私人耐老莫嫌白髮愛花黃

幾忘足蹇試登高無酒無花興亦豪除卻吟詩閑事少笑看天外白雲勞

登高能賦漫相誇回首平生一笑譁南市黃花東寺酒誰能歷歷溯京華

故都宣南下

景城東城隆福寺街酒肆林立皆光宣間勝境也

### 邀友觀止園紅葉賦以見意

春去尋芳興已闌一年好景到秋難天教百卉凋零後留待烘霞映日看

纏枝引蔓補疏籬薜荔如花望欲迷正是霜晴風日暖天開圖畫更爭奇

相逢歲晚喜同心飽受風霜雨露深有色無香原淡泊茶甘味永覓知音

### 觀孫宅舊世牆頭紅葉有感

天留晚景更精神萬紫千紅不是春人事風霜經煅煉可能爛熳見天真

### 九月三日楚卿子貞正初來止園觀紅葉留餐暢談而別得句為紀念

春水桃花何處尋秋來紅葉倍驚心天留好景人忘老愛晚亭前寄意深

### 題孝女金龍吉殉祖母事

養生之孝盡人能送死方堪大事稱心痛何如腸斷苦千秋獨有女宗曾

祖母病元卿在邊方輒心痛時人稱為宗會子

相依為命祖孫親純孝天成不顧身今世旌祠無令典他年青史合傳真

分詠止園紅葉各景四首

不是花時不解開牆頭堆錦費疑猜問渠那得紅如許卻受風霜煅煉來甫垣

天公有意作詩材一夜西風急景催繞屋循牆看更好飛紅片片點蒼苔苔徑

秋來豔色勝春明世事盈虛本不平人為山邱歎搖落我憑華屋看崢嶸愛曉亭

天生百物本時行板屋遮來血似猩無數胭脂圖不得卻憑霜露一宵成蓮窟

止園紅葉特盛九月六日具茶果邀七九弟暨子姪輩同觀得句為紀念

莫道秋風動地哀誰知又勝百花開天增畫錦堂前景故遺萊衣四面來今歲余夫婦

值枯湖重帶乃歐園內于大府與弟安而吾得長孫一人大二房得啟字章曾孫女

三人九房曾孫一人因憶余今正元旦辭有從今爭無恙及庭前雙鶴鳴之句為識

重九登電梯升中原五樓茶聚莊脚一甫並升子貞怡平

不須拾級上高樓足底生雲冉冉浮放盡胸前千里目掃空眉上百年憂一盃清茗供

憑眺幾首新詩許唱酬落帽龍山雖爽約題糕九老喜同游是日子貞先約登公園

達觀

等是風簷燭相看又幾年何分遲與早有後和先芻狗生胡惜箕疇福底全晨光霏

似露暮景散如烟去住須臾爾榮枯適偶然不須明日計飽食且安眠

重九朝晴與楚卿同登公園小土山遠眺



萬里無雲稱鶴心同登培塿意惜惜違村烟樹多幽致恰似家山夢裏吟

依韻答和楚卿九日嘗齋二首

龍馬精神意氣高羨公豪興敢題鮓英才樂育推安定奚止胸襟直慕陶  
胸中豪氣與天高命世詩名不負鮓自愧邯鄲初學步感深瓦缶荷甄陶

霜降後四日園中紅葉更盛已十餘日矣勢將搖落賞玩有感二首

碧闌干外繡屏風大似春花寂寞紅吟罷新詩閑散步此身合在畫圖中  
春芳早盛卻先頹何幸秋容續續來飽玩不須悲日暮明年方再見花開

天津河北大悲院重興前往敬香留題寺壁二首

世運承平仗佛慈民康物阜繫人思驚回四十年前夢爐火純青鼓鑄時光緒壬寅寺壁

從來時勢造英雄成住還知出壞空當日北門資鎖鑰轉旋天地一爐中項城在天津

詠殘紅葉

正喜朝曦錦似花匆匆又見夕陽斜一心禱乞西風止留得殘紅襯晚霞

大悲院禮觀音像二首

瞥眼紛紛事若麻須臾變滅總空花豁然得觀大自在身不出家心出家

長轉金輪萬古存大千世界若朝昏衆生自在因緣度佛法原來不二門

立冬前五日同伯平往壽豐觀菊

年年雅有東籬興今日追陪得賞心看竹何曾須問主國主未見拈毫猶喜有知音伯平先有詩  
千株冷豔紛如錦百本新標勝似金今年黃菊較多飽玩欣然忘日暮歸途聞品茗杯深士

林品茗

題荔軒觀察令媛做方女士夢鶴吟草

憶昔同舟忝世姻誰知淑媛是詩人斂才就範非無自承訓趨庭合有因詠絮不徒風  
月舊拈毫偏得露華新一編在手殷勤讀欲起隨園細擬倫

九月十九日一甫雨莊邀登中原五樓看菊會

尚依故事展重陽平步雲梯到上方人爲閒吟來舊雨天留冷豔未飛霜雖非落帽披  
襟爽卻得題糕煑茗香如此清遊須記取一年最好是秋光後三日立

先公忌日家祭感痛癸丑己二

風霜北地九秋高追念先親撫我勞豈特松楸悲冷落故園三徑已蓬蒿故鄉連年兵居悉成灰燼

詠紅葉飛落

不是廬山錦繡谷亦非濟南錦繡川我憶汾陽介壽日千孫萊彩舞堂前

止菴詩存

三十二

立冬後一日賀震初新居茶聚即席賦

喜得鶯遷景不同池亭雖小綠陰籠地疑幽隱真仙境人有清高處士風滿架尊彝知  
族舊堆盤餅餌勝筵豐清言列坐皆耆宿詞雖有楚憂患如山一笑空

立冬後乍寒三日不出門今日赴伯平茶聚喜甚率賦

家家閉戶怯寒侵何處竟然聞足音今日晴和思訪戴山陰乘興好相尋  
幾日冬寒苦莫言儼同臥雪不開門吟肩忽聳來詩社滿室茶香笑語溫

有感

平生不解慕輕肥天與遭逢幸未違顯官終貧殊有味久勞乍息似無依鶴尋竹徑遮  
炎景牛臥桑陰送落暉清白家風留式後子孫常守舊苔磯

生日燈下感懷二首

蕭蕭白髮獨心驚勳業無成誤有名餘粒坐空三黨困做麥捐盡一身輕過情媿讀岡  
陵頌忤俗難消骨鯁聲八十到頭終強項依然黃卷短燈檠  
豈似東坡萬事足尙餘一念惜光陰承家未遂箕裘業礪俗空存枕藉心炊黍燈前無  
幻夢哦詩月下遺音但持業業兢兢志毋使中宵愧影金

擬約友作旬餐會書以徵意二首

同居患難危城裏朝夕相親味正長猶幸鹽醯差可繼經旬一試齏羹香

嚴寒病足苦難行側耳窗前盼鳥嚶冬日南簷方可愛拋書倒屣喜相迎

歲暮感懷四首

豈有金剛不壞身天寒晷短欲誰親樂天幸是知幾早得享林泉二十春  
少年志氣已忘家饘粥於今幸不差雖苦隆冬從病寒茅簷負日樂無涯  
啓後承先守素風心常履薄臨深中雖言所志非溫飽已愧無形習厚豐  
薪桂米珠古未逢那堪垂老歎途窮早知弓冶歸泡影悔不藏身吠吠中

芷升家茶集

是其長子花  
期後二日

羨君仁德里迎祥滿座茶香勝酒香慶祝三多歸燕寢歡聯九老到華堂佳兒佳婦乾  
坤定宜室宜家歲月長今日饗酬成一獻明年湯餅醉千觴

十月六日旬餐第一集喜賦二首

一月得笑纔四五今朝會食快平生七賢畢集娛清晝平淡心懷視菜羹  
暮年猶自見滄桑世事無聞喜若狂淡簡盤蔬忘慢客幸留殘菊伴茶香

旬餐第二集速客詞

十月十六日

心似嬰兒日身如逆旅時門憐殘雪掩窗愛夕陽遲鴻迹驚冬暖雞聲畏午飢夏朋欣  
室邇一笑慰相思

獨有朋來樂尼山道不窮簞瓢今陋巷葵菽古幽風家事平爲福生涯儉亦豐何須憂

鶴唳詩侶尙豪雄

昨午  
空來  
飛

旬餐得句欣承楚卿賜和多首依韻奉答聊以寫懷二首

徘徊得句勉加餐衰老心情怯歲寒不有高人數晨夕恍如孤雁月中看  
且喜盤蔬嘗白傅尙虛杯酒餉柴桑百年贏得詩千首一飯還爭石火光

傷食小瀉自傲

入口能令百病成清心寡欲要躬行災殃多自貪時起禍患常從忽處生天道好還原  
忌滿人生得福祇爲平菜根淡泊猶須剩從此膨臍自矢盟

十月十日喜得微雪

小雪後三日

夏末經秋苦久晴今朝霽霖沛祥雲衰翁忽動尋梅興枯柳橋邊曳杖行  
日日晴暄照小園地爐無炭喜冬溫誰知微雪乘時得又覺年豐瑞滿門  
正賦無衣樂歲終還將瑞雪惠農功須知天意真仁愛多在潛移默運中  
雪中震初邀茶聚未赴詩以謝之二首

小坐荒園逸趣生眼昏偏向竹邊明清甘一味增茶興竹葉燒來雪液烹  
與君同是尋詩侶愧我殊難信步行卻似山陰空訪戴蘭言未接意先傾  
喜雪口占一絕

大地變成銀世界千家幻出玉樓臺衰翁也助羣兒興齊向牆陰堆佛來

憫老

老子存身外莊生論物齊形骸爲蠹朽眷屬等禽栖榮盛從人說憂勞祇自迷知心惟  
几杖相伴夕陽西

雪後小飲二首

雲暗天低未放晴雪簷收滴暮寒生老夫未覺齋孟薄自摘青蔬淡煮羹  
雪雲三日尙沈陰天外飛鴻有遠音歲暮懷人千里思一杯何處覓知心

小園玩雪

洒鹽飛絮不曾停積玉堆銀忽滿庭盡掩蒼蕪成片白昂然松竹獨青青

旬餐第三集致詞十月二十六日

堪笑閒身爲底忙桑榆尙擬醉千場新詩不厭百回讀舊學何妨一再商真率盤孟惟  
淡泊耆英杖履正康祥小園松竹堪留客談塵揮時日影長

旬餐第四集速客吟十一月六日

不學燒丹不坐禪飢餐渴飲百憂捐心空已破浮生夢志定能輕造化權天地無情芻  
幻狗風雲變色紙飛鷲今朝疑入桃源境酒食相要並是仙

旬餐第五集速客吟十一月十六日

一陽初復待探梅逐月柴扉次第開始九寒消知日永後番芳信覺風催忘形莫問孰

賓主乘興何妨時往來會數禮勤仍物薄淡交似水味甘同

十一月二十六日旬餐第六集速客吟

相戒只談風月勿涉賤辰

一月得笑纔四五况茲旬會僅爲三及今不樂何時樂願以俗見增癡愁人生斯世本  
朝露大椿幾見能天參君不見鵬飛道遙九萬里青雲直上方圖南卻令翱翔蓬蒿下  
搶榆控地作斥鷃我今八十無聊賴遭時倖虜坐囚菴風聲鶴唳欲喪胆米珠薪桂寧  
敢貪眼昏罷書不能讀晨星好友難攀談藉此旬餐破岑寂藜羹豆粥樂且耽偶值懸  
弧憶疇昔父憂母難心如憒諸公倘使抒懷抱招呼風月助吟酣切勿區區循鄙俗翻  
效幕燕語呢喃至令掩耳欲嘔吐過情溢譽驚優曇短歌起舞影凌亂欣然捧腹投禪  
龕嗚呼光陰有盡誼無盡况今多難共苦甘至誠相見如骨肉胡不笑談終席情媿媿  
味醞醞邀我直鉤去餌並釣江潭不然教我外身而身存飄然騎牛學老聃斯亦樂之  
至矣夫何取乎聲譽烜赫招搖虎視來耽耽吁心須問情何堪請君勿視斯言等兒戲  
舉杯相顧白髮同鬢髮同鬢髮安得追呼羲和迴馭且停驂使我餐芝服玉囊中妙訣  
共君探

冬月二日先妣忌辰延僧禮懺感賦

已隔慈顏四十年

丁未兼癸丑今十八年矣

今朝營奠淚泫然經聲九衆通幽漠麥飯三杯薦几

筵豈料耄荒兒齒老難忘幼病母心煎空餘清供茶甌滿一滴何曾到九泉

有感

五蘊不空六賊連勞智得百憂煎天心自是有消長人事豈能無變遷自後視今猶  
視昔得先亡後等亡前洞觀宇宙盈虧境一室悲歡俯仰然

十一月二十八日補行旬餐第六集詩以助興

流光又近臘嘉平佛粥春盤日有程岸外柳梢容已動窗前梅藹氣先清論交金石歡  
高會欣賞詩書說善鳴大地陽回期在眼相將載酒聽鶯聲期下月二十二立春詩

十二月六日旬餐第七集速客吟

春暉堂裏戀寒暉風月無邊逸興飛牖透竹聲清韻遠窗移梅影暗香微三冬文史猶  
堪用百世羹牆孰與歸賴有良朋來宴語呼僮治具候荆扉

冬日述懷

老年身世不相關隨地遊觀可解顏倦鳥夕陽歸野樹孤鴻夜雪度關山常懷風月詩  
多逸慣聽金戈夢亦閑一事冬來猶有恨尋梅松竹步行艱諸友不來我亦難往

冬至後小聚得句

今歲初冬凍地乾一陽來復卻消寒冬至後晴暖良朋聚首春先到好詠梅花結古歡

生日自歎二首

父憂母難獨何心一事無成感不禁城郭人民今昔異山邱華屋怨恩深邯鄲已破雲



烟夢京洛難開風月襟  
畫之年無可慶  
春陽未挽去光陰  
流光莫厭去聯翩  
歷歷甘辛在目前  
春水桃花逢古洞  
秋風蓴菜送歸船  
比肩每憶同舟雨  
瞥眼偏驚宿草烟  
天下滔滔誰與易  
何心更數義熙年

題陳一甫雲水萍蹤圖

平生總角喜隨肩  
風雨同舟五十年  
燕翼詒謀天錫嘏  
龍驥健步地行仙  
冰霜節操承先德  
閱經綸越輩賢  
往事尙能天寶說  
披圖遠邁雪鴻篇

卻謝友人頌壽詩

興亡八十載  
志事悉成空  
無限生涯感  
都生美詠中  
何如鉞砭錫  
聞過省清衷  
拜等百朋惠  
交深見古風

薪米奇貴詩以自慰

人事悲歡無古今  
須臾苦樂杳難尋  
招呼風月鏡清夢  
收拾湖山入短吟  
夜坐圍爐仍促膝  
晨炊數米漫榮心  
長安高臥真名士  
門外從教積雪深

臘八日伯平齋中茶集卽席賦

佛粥佳辰瑞靄臨  
寒催春近最關心  
大康後風和日麗情先適  
果嫩茶甘意更深  
息影共看飛鳥倦  
哦詩自愛候蟲吟  
海天萬里鯨波靜  
佇聽歸鴻有好音

十二月十六日旬餐第八集速客吟

五九初臨歲事闌，杯盤粗具可消寒。玩來柳態風初動，聞到梅香雪已殘。撫景自吟千首易，論文相見寸心難。今朝小聚分陰惜，盡日清言結古歡。

詠止園木稼十二月十六日旬  
第八集 三首

朝來濃霧重如烟，玉樹瓊花忽滿前。今後達官何用怕，萬方有慶兆豐年。  
殘冬雨雪卻嫌遲，今日園林樹若絲。莫是天公憐我老，枝枝相伴白鬚髭。  
窗外銀花窗裏梅，一般清影絕塵埃。興高采烈人觴詠，天送詩材好句來。

冬日自怡

家無長物送流光，惟是著筒與藥囊。雖有營求仍淡泊，未能免疾卻平康。時憑黃卷聊遮眼，自種青蔬但裹腸。偶值風和身亦健，探梅訪友品茶香。

十二月二十二日旬餐第九集速客吟是日午正立  
二首

椒酒辛盤在眼前，莫嫌歲月去翩躚。祥光耀日迎中淑，淑氣催春入舊年。天示星躔方赫赫，人遵王道喜平平。黃羊祀灶明朝事，且辦齋盂小酌先。  
今年春去又春回，卻帶昇平氣象來。風動還舒隄畔柳，雪消重釀嶺頭梅。門楣競揭椒花頌，閭里爭傳竹葉杯。今舉屠蘇同預祝，平安吉慶壽康哉。

歎世

世運循環一氣符，獨乖天理詬迂儒。富強誤國從今有，傲倖成功自古無。禮樂已看嘲

敝屣詩書誰復玩真腴何緣得挽蟲沙劫佛說金輪定不誣

俞壽田八十四壽

豈止昌陽可引年由來商嶺有芝田市中大隱成遺老海上僑居作散仙風日婆娑希邵老湖山嘯傲慕逋賢駑駘如我仍追驥春水桃花約放船

汪仲虎八旬開慶

吳會多吟侶金閨一隱倫江山歸德望風月伴閑身耄耋康祥日耆英碩袖人相期春水至把臂問桃津

止菴八十自撰壽聯聯句為高第起科名祇落得朝市虛聲林泉孤詠中興醫生長更何期晚經兵燹於見大同

燭重諧過八旬兒孫晚得尚循循市朝虛譽人爭羨我卻憂危患有身

歲暮感懷

八十年來萬變蠲低回身事獨漚然長空月冷聞征雁遠水風淒看墮鷺斗轉尚添新歲月雲迷難識舊山川歲寒冰雪摧凡卉敢信青松翠柏堅

題杖朝圖甲申冬月余八十五生辰雨莊贈杖朝圖為壽不禁感慙係之

回首雲霄卅載前司農兩度百憂煎餘生風月心隨地老去光陰命屬天薇省當年驚夜漏蓬門今日惜朝烟杖朝故事猶能說三代衣冠已渺然

第九集旬餐即席助興

儼然一日若三秋歲暮懷人序更道心慕陶潛歸故里身希王粲上高樓疏梅殘雪香  
彌遠嫩竹清風色獨幽今日良朋欣小集倚窗嘯傲且消憂

安貧

知命安天自有真聖賢憂道不憂貧平生所學非虛偽到此方能不染塵

養生

老云損又損要訣在躬行心胸休苦惱血氣總和平飲食必淡簡衣服戒輕更持此養生術卽是學無生

立春喜晴

雨莊遊茶  
集卽席賦

春色來幽境晴光慰老心漸離寒瑟縮已脫病侵尋樹映魚藏影花薰鳥弄音興高多  
事樂茗集春聯吟

輓俞壽田

天末懷人寄慨深忽傳噩耗倍驚心甫承月下紅絲引前月爲孫  
女作挽倏夢雲端白馬臨鯉  
簡往還虛祝嘏歲辰公以詩賀  
余亦寄祝公壽鸞箋唱和少知音近年彼此  
和甚勤從今無復江南興宿草荒  
墟不忍憑

立春二日得雪喜作

初春二日飛玉屑四野霑足農民悅詩人弄筆喜欲狂白雪陽春歌一闋萬方軛阮如

砥平一掃檣槍無寸鐵胸中皓氣與天齊白鶴穿雲如許潔鴻飛那復計東西賦留迹  
偶然誰識別會攜茶鼎就烹煎冰液清甘味芬列

小除夕九弟借止園茶集僕役人少諸事簡略賦此道歉並助吟興二首

小集惜忽忽崢嶸歲序終一身兼主僕滿座盡詩翁暖是晴窗借飢將市餅充隨緣萬  
事足喜見九州同

老惜年光速多情慰棟華蘭牋爲日課麥飯是生涯春色盈天地歡聲動室家歲闌猶  
速客雪液好烹茶

除夕遣懷

平生榮悴付諸天濟世徒勞願亦慳杼柚已空三輔澤春炊難繼萬家烟漫天荆棘心  
如癩遍地橈槍眼欲穿未飲屠蘇先意醉佇看鏡聽好音傳

乙酉元旦試筆

百年生世喜逢辰白首扶衰又見春賦匝地塵氛指日靖彌天風月一時新晴光乍轉  
門前水淑氣遍驚牖底人萬里烽烟如電掃扁舟吾欲訪桃津

自幸開歲八十有一

餘齡八十又加強秉燭光陰夜正長家守清寒貧自適身能拜起蹇何妨梁間燕語雜  
孫長爾夏孫牙屋角鳩呼拙婦忙老妻難勞菲隨地行吟隨地樂筆床茶灶答年光

題苓泉傲劍南體詩句冊

放翁身世老江湖逸氣凌雲字字珠如此胸襟如此筆知公詩外有功夫

人日前一朝預慶靈辰小齋茶集即席助興

靈辰先日得晴明海宇欣欣慶太平九老共成真率會小詩宜作短歌行  
窗臨殘雪梅生色枝倚和風鳥換聲猶記來朝煎餅事且將麥飯代傳羹

戲詠市態髮一丈一百五十元

修容一擲中人產剝趾珍於席上資走豎競同勳貴傲揮金莫笑季倫癡

雨水後二日得雪去冬無雪

天心默運劑盈虛冬雖不足春有餘憔悴斯民深水火卻教霖霖惠犁鋤

正月十六日一甫芷升震初同人聚飲伯平齋中二首

風和日麗豔陽天物阜民康大有年膠漆論交詩酒樂此身如在羲皇前  
春臺同上樂何如司馬遺風美有餘不羨擊鮮兼市味但希剪韭得園蔬

正月二十六日驚蟄後四日新歲旬餐第一集速客吟三首

樂天火急勸歡娛要是幽懷得早據飲啄雖云前定在也知先後有乘除  
驚蟄初過百物蘇鶯啼燕語友相呼老人思乘江南興紅杏村邊酒可沽  
春暉無限興騰騰椒酒猶醺又撲燈暖日烘簷來燕雀晴雲際海縱鯤鵬淵明止酒空

止菴詩存

三十八

杯把務觀炊糕小斲蒸樂趣是閒誰得別同參且喜有良朋

旬餐本極簡單忽生還席之舉迹近徵逐殊失本義賦此以求解免二  
徵逐流連樂惡般不如旬日且蔬餐溫公自是無還往會數專勤結古歡  
雲上天需易理探險前飲食又何甘遵時養晦真君子宴樂旬餐一義參

盧木齋先生九十壽

巍然南極一星明魯殿光臨天下平三輔謳歌留宦轍千秋著述飽書楹幾經世界滄  
田改直俟河流海水清當代耆英倘許附仰瞻皎月俯長庚

公晉百齡龍馬精神靈才  
通八十已衰朽不堪矣

乙酉正月二十四日七弟七旬預慶九弟同邀子貞在春暉堂小宴七弟賦詩四  
首卽依韻和其二以志慶辰

小集春暉室怡怡見古風獨迎青眼客來對白頭翁酒美胸襟暢詩高憂患空所期同  
老健常享百年豐

剛逢春暖日正值古稀年棠棣多歡意盤蔬亦宿緣豈徒開笑口還聳作詩肩世泰從  
今始多將吉語傳

贈七弟神經病療養法四首

空花毋復求空果守得中庸自有真要使靈明爲主宰勿將幻境作虛身刻舟覓劍徒  
尋惱蛇影杯弓自造因談笑無心皆樂趣行雲流水是長春

放開眼界一身輕，世事何曾有不平。金玉滿堂皆外物，子孫委蛻屬空名。但能裹腹餘無欠，祇任虛心缺亦盈。萬里海天堪縱鶴，中宵雲淨月孤明。

坦蕩爲君子，誰教戚戚依。探源蠲物欲，端本認天幾。但得胸襟淨，自當賢聖歸。悲憂徒暴棄，長傲且遂非。

心當嚴屋漏，居敬理能窮。念少憂自少，情空苦即空。不聞不睹處，亦保亦臨功。何用求和扁，金丹在寸衷。

二月初六旬餐二集速客吟二首

不嫌簡略褻嘉賓，燕趙遺風尙可循。麥飯豆菹雖淡薄，蕪羹經難且相親。耄老心情媿食珍，菜根咬得可通神。食前方丈非吾願，隨意杯盤樂有真。

二月初三街頭一蹶，賴行人扶起，幸未受傷，賦以自慰。

市門難倚有牆循，偃僂龍鍾孰與親。一蹶那堪童子笑，提攜翻賴路行人。

旬餐以過水麵薄餅餉客賦此道歉

金谷蕪羹隨所遭，萍齏豆粥饜吾曹。不因看畫停寒具，且爲尋詩供冷淘。

春分久陰悶甚春社後一日

小園寂寞影沈沈，社後春分日日陰。不有花光堪寓日，卻來鳥語亦關心。稷壇想見蒼松茂，瓊島懸知綠水深。一別故都今八載，空餘閉戶得長吟。



二月十二日郊遊

小園上已尙無花風緊隄邊草未芽郊外柳黃疑似有春光先到野人家  
有感

夏庖不惜早藏刀儘供珍羞坐客豪醉飽餘星散後有無雞肋迨兒曹  
郊遊

老怯春寒未減衣郊原柳色尙依稀前村應卜香醪熟風動青帘是也非

味西公家事感言

先兄坡後三十餘年子孫伶丁孤苦今得喪產始解其厄三首

政績文章等暮烟獨留清白到黃泉今朝饘粥由天幸孤苦伶丁四十年  
涸鮒諸孤不忍言西江一勺幸今存興亡家國無窮恨誰起英魂與細論  
一輪紅日又朝升祖蔭欽承若履冰勤儉持家終不匱子孫兢業尙繩繩

春陰喜晴二首

又見郊原綠草生連朝風日得晴明老人未敢冬衣減已覺胸中喜氣盈  
春陰日日峭寒生今見青蕪兩眼明自是香風來有信不愁花事不豐盈  
清明前五日公園訪友

十日陰雲一日開奇花又喜見初胎枝頭卻有鶯聲關似喚尋芳舊侶來  
先公春祭在孟莊春暉堂行禮二月十八日

崇祠咫尺若天涯祀事春暉尙有家堪歎豚肩不掩豆非因示儉國多奢或謂在國儲魚元菘菜數事近千古所未有

邀友遊園山麓方園二首

小園風景及時娛綠柳紅桃映碧蕪斗酒雙柑須伴侶枝頭好鳥且相呼  
何處仙蹤不可憑乘春歲歲興飛騰千株紅豔山如故難得漁人是武陵

詠落花

二月春陰久護持一朝風日又離披綠章倘乞寬花厄但恨飄零不恨遲

二月二十三踏青二首

楊柳風和拂面吹家家士女踏青時回思身際承平日閒詠宮人進履詩德幼時薦某踏青履詩

風和日麗是深春草色萋萋綠似茵最愛小園新柳畔青鞋底軟淨無塵

看花有感二首

今年不減去年春溪杏山桃又一新莫道看花人易老年年還作看花人  
半月陰霾兩日晴滿園春色一時生從來絕豔驚人處多在風塵閱後成

庖人散去旬餐廢止僅具杯茗聊以助興

尸祝全空莫代庖杯盤無具缺嘉肴一甌香茗聊清話也合新詩共解嘲

和園中挑開韻寄佩瑜

止園晴暖正花開不待風前羯鼓催小牖通時宜竹隱疏籬補處有桃栽卻忘靜室春  
暉陋常盼幽人舊雨來何日高軒能蒞止新詩吟罷重低徊

馬場脩禊五首

春日尋芳野水濱青蕪綠柳一番新無端忽起天涯感不見桃源洞裏人

三月三日天氣新賦行看戲馬逐芳塵筆床茶灶追年少肯放衰齡負令辰

當年逸少儘風流一序蘭亭萬古留畢竟地因人始重焉知此地不千秋  
崇山峻嶺雖無地雲淡風清別有天吾輩興懷原一致且將觴詠繼前賢  
野外春光可散襟天邊風鶴漫驚心騁懷遊目乘時樂留得風流後視今

感事

三月二日公關小憩忽遭逮捕展轉幸脫而同行者已被虜不少二首

予遺身事總由天世難何嘗異昔年偶語腹非徵信史縱橫緹騎不虛傳  
靈囿翻爲豺虎林須臾不測合驚心擇肥而噬偏耆宿誰似園匡尙鼓琴

悔過吟三月二日作

人生踏斯世跬步皆冰淵況值此衰季陷井遍園田奈何不自審日日事流連雖云胸  
坦蕩含沙射影前一語稍不慎垣屬於耳邊一旦觸罔罟形神遭縛纏在彼雖非怒於  
我則叢怨雖悔其何及自取百憂煎所以聖人訓君子懷刑先老無諍友規吏酷勝師

賢戒我實愛我指摘盡箴詮縵幸獲免反躬自勉旃從此常閉門熟讀抑戒篇禁足若跛躄守口緘金堅臥遊玩丹青跌坐默參玄持此語同輩暮齒宜相憐言行寡尤悔禍福聽諸天

書三月二日事

老歇清閒安樂方小園脩禊玩春光無端嫌起鄭鄉校縵縵虛驚公冶長

公園看海棠

今年始開

年年蜀豔鬪春風今日花遲意不同扶杖徘徊情更切紅顏應笑白頭翁  
止園榆梅盛開

小園朝夕待花開日日東風幾度催忽覺闌邊春意滿濃妝如見美人來

連日看花得句二首

鸞枝初過海棠來遍地春風陣陣催收拾錦囊無限美東阡南陌盡詩材  
丁香幾樹玉成圍恰伴棠花片片飛飽看不愁零落盡年年又見有春暉  
便餐遵改十八日恭候奉答楚卿

爲遲休沐得安車不事珍羞樂有餘侯相常餐思淡簡可師家法是魚蔬

衰老歎

五首

少小多災弱不禁自應遲暮更侵尋老年幸免非常病本分當衰弗動心

本分衰

解除冠履脫身寬伏枕奄奄病骨酸耐到鷄鳴窗欲白又饒一日在人寰眼走  
年垂九十不名珍啜粥茹蔬腹儉貧正苦更衣艱作厄卻憐夜起小旋頻便旋  
遠遊千里聽兒孫定省無疏幾問存最苦糟糠終歲病孑然相對度朝昏病妻  
文豹豐狐早隱身巖居穴處不知春偶追逐隊尋芳侶又值含沙射影人龍潛

詠紫藤花

紅白花飛有紫英千枝簇簇似垂纓庖人收得供朝膳似玉堆盤帶露瑩

三月十八日小集喜雨

春來日日炎飈惡今喜霏微潤澤中邀友歡情聯舊雨隨時真率繼清風脩行早懍危  
言戒習氣還餘得句雄遇境放懷常在平生百事仰天工

因果

陰陽晝夜本生成果熟因緣祇自明欲問百年身後事太虛大化總無情

明天二首

天道明明不可違大都心術是先幾種瓜得豆何曾有莫使來時悔去非  
佛國魔宮本自平寸心得失總分明欲求至郢何須問北轍南轅不可行

小雨初晴郊外遊覽

小雨初晴庭院深百花過盡綠成陰一川活水從魚躍千里無雲稱鶴心物我兩忘聞

亦樂江山無恙古猶今快然自得欣忘老天朗風清值萬金

歎老二首

光陰垂暮日銜山衰朽心情病骨屢施濟未能行就木空留遺憾在人間連年故鄉未歸

濟教

年垂九十媿虛生勳業文章總不成一事更餘桑梓恨墓田千里負歸耕故鄉薄有祭田十年來世

亂世難期不能通問

喜立夏二首 三月二十五日

南郊迎夏喜生成物阜民康見太平蚯蚓久藏今得出居然螻蛄也容鳴

天行火德盛南方日出浮雲見曙光萬里鯨波平似砥行看牧野有鷹揚西歐戰事德

金山會議成立將解決建東

依韻奉和佩嶼喜雨詩

天朗氣清景象開和平消息耳邊來澄清世界消殘劫收拾乾坤仗霸才澤沛一天深  
雨露塵空萬里淨氛埃老農從此安耕作鼓腹含哺亦樂哉

老趣二首

衰疾來無已癡頑興未闌酒從詩裏見山向畫中看弄筆慚鴉滿翻書惜蠹殘放懷扶  
杖出天地不勝寬

止菴詩存

才斂詩情退心危酒興闌一身如露綴萬事等雲看棲鳥聲喧碎花飛舞弄殘無邊風  
月夜更覺小園寬

哀族難

原籍本村前年被兵焚燬寸椽無存去冬又遭匪劫衣履一洗而空苦無法救濟

天教浩劫到寒門廬舍衣履百不堪歎一生謀繼述祇留灰燼付兒孫

書事

三月二日偶遭鄰鄉校之嫌為公治及本友人聞訊

秦刑曾及腹非云齊囿何由陷井聞方雜屠沽思匿迹豈知雞鶴忌成羣實心未識狐  
偃崇厄運難逃玉石焚亂不居今危不入聖言垂戒本殷殷

傷食病中作

一日貪饜十日災膨脝滿腹骨也墮頭如蓬轉身如醉百體乖同百寇來

止園雜詠

小溪流水繞門東此地天教着耄翁春老槐陰遮徑綠秋深荔豔滿牆紅鳥聲迎旭鷺  
殘夢魚影趨波避釣筒斗室備然何所事朋來談笑亂書中

隨安二首

過得今日再明日世間萬事不須謀藜羹可敵八珍美隨遇而安何伎求  
境原幻惑得齊難萬事俱當平等觀羔酒狐裘不覺煖山僧一衲卻忘寒

尊天二首

巍巍天德若爲尊聖道原來不二門但問此心心此理世間五教本同源  
三畏如何天命窺出王游衍不能離青冥直可通呼吸降監如臨念在茲  
焯兒去滬傷足已半年今歸始得見知書此訓之二首

母病如何忍遠行親年喜懼最須明不忘跬步况千里傷足天教謹尙輕  
其進銳者其退速消長盈虛如轉轂從今事事讓三分失馬焉非塞翁福  
味雲書來自傷衰老賦以解之

陶公不諱當去客陸子更稱不應來本分衰原甘同受利名歇盡正悠哉  
壽豐園太平花盛開勝於往年

猶是承平上苑花居然寂寞落民家芳菲特啓遊人興否極今應泰運誇  
移得名花出故宮芳菲不減上林中太平景象非無意特向民間慶壽豐

述懷

生歷遭迴世事艱甘休海澨養衰孱讀書有得徒編絕學道無成似石頑水暖春江魚  
縱躍風高秋樹鳥知還何由放棹江南去覽遍湖邊萬疊山

閉戶經旬無客至聊以自嘲

逝水繁華靜裏拋年光物候費推敲獨居深念宜清坐匿迹銷聲作解嘲露浥新蔬舒  
翠甲雨催嫩竹上青梢小園成趣門羅雀安用文章廣絕交



詠蝴蝶芒種節前  
薔薇或蘭

開到薔薇花事了老人猶自惜芳菲殷勤留得餘春在可愛雙雙蛺蝶飛

止園小集賦以助興燒脚一甫子貞  
雨莊無句不見

相知道義最相親一日三秋况狹旬隨意杯盤仍草具開懷吟嘯任天真薔薇香到花  
應了燕子巢空迹已陳海宇風烟經眼淨朝朝歡聚白頭新

感歎連日薰風  
麥苗盡萎

麥秀將焦日日風何如沛澤轉年豐伊誰得作南薰奏重見吾民解慍功

植樹節

植樹年年喜欲顛佇看被野綠林天何由再見三推禮福惠黎元粒食緣

芒種喜陰

俗云芒種喜聞雷今日陰雲密不開隴畔鳩聲呼正起佇看細雨自東來

慨歎故鄉孝友堂公產亂後全空仍望子姪輩將來興復

一世三十閱生辰復今朝八十春子弟非才難自立孤寒無計恤家貧先人志事歸

泡影昔日經營絕點塵欲繼希文宏義舉遠猷須付後來人

告焯兒養病法接腿骨施手術後須堅臥兩月心閒則神  
靜則身安否則燥擾身不得養矣

一身堅臥寄人間醒裏心寬夢裏閒放下塵勞本無事飢餐渴飲是禪關

一念不生樂未央千年高臥又何妨華山老子傳心法不問仙方問睡方

煩惱

心爲形役久奔波得失情深煩惱魔白傳一官君記起世間自取苦人多

小雨乍晴止園茶集

善菴俞未謝

霏微數點又成晴滿院飛塵得暫清朋輩方來花欲謝且攜茶灶竹間烹  
密雲不雨未終朝且免炎曦避酷敵入坐詩翁茶味永有花無酒也逍遙

擬孝友堂公產善後策書後示子姪

千年舊族素清貧祖德宗功苦種因天福梓桑收善果篤生還盼繼繩人

讀曾文正日記萬事由天命說書後

修身立命在當躬何事還歸冥漠中會得湘鄉淡忘說由來世界本全空

端節後三日楚卿家小酌

每逢佳節覺心酸悵望鄉關道路難金石論交朋漸少芝蘭契合室猶寬喜從蒲筍謀  
真味雅有琴書結古歡老氏貞修能久視滄桑不厭幾回看相繼五氏

憶舊都敝宅別九年矣不禁惘然

一廬紀念爲承先宅先公沼石亭廊具體全半畝行窩希履道數椽獨樂慕尊賢年  
年宿草隨根行處處幽花坼藹鮮堪數十年人事改巍然喬木長風煙開當年小樹今

病起午歸一餐傷食數日

病從口入老生談誨爾諄諄總未諳昨日腹膨生洞瀉百骸苦痛百憂悛乞靈醫藥輕  
微效床第呻吟祇自堪幸得衰臧扶杖起何如下箸一無貪

庸庵少師八十九壽重宴恩榮有詩志感敬和元韻以侑康爵

南極星明拜帝師地天日月本無私紅綾賜餅猶前寵白髮簪花又一時數典班聯承  
岳牧有清一代重宴恩榮顧名道統繼曾思唐會于道前而作期頤甄叟唐宗瑞几  
杖衣冠賜未遲甄權唐貞觀十七年一百三歲

小病初蘇雨後園中散步

小雨初過天氣清飛鳶輒輒弄機聲行人道左驚心慣病叟園中覺眼明修竹迎風閑  
偃仰高槐映日恣縱橫形骸已外遑論物滌盡塵襟萬事輕

哀故鄉

彈指光陰去擲梭希文志願付消磨故鄉浩劫方無已世界危機更奈何每念孤寒思  
拯濟空傷時勢歎蹉跎於今三黨餘墟墓自恨燈前白髮多

病中作二首

生平志願恨難成桑梓瘡痍滿目呈腹有詩書神味永胸離塵俗業緣輕閑花繞砌開  
仍落六女今無新竹迎窗秀且清安分讀書驪車在門何所戀心田留與子孫耕

蕭蕭短髮歎吾衰大化紛紛不自知窗外有蜂攢故紙梁間歸燕補新泥鼠肝蟲臂誰  
爲主石火電光復幾時欲學希文空有願愧無遺澤繫人思

小暑久旱微陰邀友茶集

同是梅天日日陰炎天烈日轉蕭森且看石上霏微潤難得簷前點滴音物阜民康千  
載事和風甘雨百年心老人無復憂時責茗椀詩囊且共尋

生計無源之水涸可立待二首

一火燎原土盡焦身如幕燕苦漂搖點金乏術空餘石刀礪君看日日消  
放翁乞食和陶詩始信前賢慣忍飢吾輩讀書何所得清風準備蓋棺時

遊倪氏園

己無大柳與高槐豈似當年懷抱開稀甲數畦隨地長新荷幾點舊時栽豐碑獨見將  
軍塚曲水遙通戲馬臺白髮蒼頭何處去祇餘狂蝶過溪來

道室偶題

須彌芥子本無差天地壺中納可誇心下不關千載事眼前常有四時花掃開風火重  
重劫夢入華胥處處家空裏從來空裏去聖賢仙佛又何加

六月十一先祖妣忌日祭

猶憶當年十四時遭家不造事多悲椿庭偃蹇歸鄉里先君訖棟鄂呻吟赴冥司年三十

不六起一病

况復重幃萱蔭萎那堪病榻柳姿衰余亦於今白首仍追祭空薦鷄豚不忍思

食啓新公司配給麵燕食有感

司董事得配給麵以燕食於余食之不勝感概

優孟衣冠自古難暮年食事愧加餐綈袍自是故人誼范叔平生豈畏寒

春暉堂茶話二首

高槐叢密碧參天修竹新抽綠映椽不速客來茶話久此身如在結繩前  
昨夜驚雷震耳聾狂飈撼樹襲簾櫳今朝赤日天清朗贏得南簷解愠風

閉門

歷盡危機釋盡憂閉門歲月去悠悠庭前雜卉開仍落天際浮雲過復留一枕書橫聊  
引睡數畦菜長得清遊老人孤寂方為樂安用題詩遍酒樓

遊農村

百畝膏腴歲有秋家家孫子服先疇興朝齒俗圖中美避地秦人洞裏幽日落牛羊被  
原野雨餘鷗鷺滿汀洲太平民物村村見閒過柴門笑語留

雨過倪園觀蓮

一溪美景占芳辰雨過清香細細新最喜暮年如意事愛蓮還是種蓮人此花為余手栽已四年矣

立秋三首

炎天烈日正氛埃迎爽西郊節序催搖落千林蟬噪遠長空萬里雁飛來欲摧殘暑瓜

仍食徐行清風扇可推閑與幽人期舊約安排籬下菊花杯

垂老偏驚歲月道一年容易又迎秋驚回塞上征人夢引起樓中少婦愁不盡關河宜  
過雁無邊風月好乘舟問誰得似農家樂多稼如雲萬井收

秋至令人劇有情梧桐一落最分明形容蒲柳衰先覺身世芭蕉老可驚夜讀有聲聞  
在樹宵碓無月報疏更詩翁頗動湖山興從此扁舟似葉輕

仲穀姪六十壽

同憶韶齡雁序偏於今白首夢重圓欣看賢阮逢周甲儼似同懷享大年世澤已覘能

緒續六世冠十書香尤喜有燈傳已傳備頁孫焉待將共享期頤壽堂列孫曾舞彩筵

有感 八月十日

忽聞三島棄兵忙漫卷詩書喜欲狂賊烽鏑及今新玉帛河山還我舊封疆閭閻安堵  
乾坤定社稷蒙庥日月光世界滄桑同一變從茲四海不波揚

七夕喜雨

欣逢七夕雨滂沱潯暑潛消爽氣多從此甲兵長不用居然壯士挽天河

聞日本息兵感言

弱族衰宗生計難况經九載又兵端欲圖休養身垂暮苦恨時平力已殘

雨霽熱甚 立秋後十日

止菴詩存

四十六

苦雨連宵朝日升休嫌殘暑尙炎蒸八年一夢過三伏盼到秋風喜不勝

時計改同舊制午正于正均  
為十二點

陰陽晝夜本玄機豈待人爲有是非天道惡盈原不爽日中則昃示先幾明正午而  
故作未初故

新時乃爲  
日昃之兆

處暑夜得雨乍涼勸友出遊

今年苦長夏困如身在囚處暑一夜雨颯然涼入秋縱如鳥脫網躍如魚脫鈎衣輕能  
便體食美易過喉何乃有餘適祇緣無過憂意適簪花舞興發採菱謳有情新伴侶無  
數舊朋儔去來各隨意遠近不預謀但尋好山水隨處有車舟千里不辭倦寸步儘堪  
休決除韁鎖累始得快哉遊勸君惜晚景何物不自由從茲任所之天地一沙鷗

新秋乍涼邀友小聚二首

酷暑侵人蹤跡疏嫩涼天氣早秋初故人高會休嫌略請試家園自種蔬  
禮勤會數率天真喜得秋風正可人僻陋蓬廬無市味園蔬場穀一時新

喜晴散步

經旬連夜雨一霽掃塵氛水落魚歸壑天高鶴入雲倚窗風送爽欹枕日斜曛行飯忘  
身倦攜筇亦所欣

驟涼

又是新秋一味涼  
回頭卻笑汗如漿  
世間冰炭無窮境  
只合隨緣作道場

如夢二首

世事都如夢  
吾生固有涯  
再三防意必第一  
忌安排  
春到花爭發  
秋來木漸壞  
靜觀皆自得  
造作故多乖

人生不百歲  
榮悴幾時哉  
順水舟方利  
逆風棹漫催  
身家惟任運  
孫子莫榮懷  
得失平常事  
都關天意來

有感二首

雄兵百萬受降書  
卻在彈丸一擲餘  
畢竟天心歸有道  
不將利器畀頑夫  
西傾大勢儘堪嗟  
何事冥頑最後誇  
一紙降書遲又久  
生靈百萬更無家

仁靜堂茶集

昇平再見樂何如  
道義親朋興有餘  
煮茗焚香忘世故  
掀髯高論到黃初

慶昇平

循環天理本相尋  
霹靂聲中奏凱音  
北極朝廷初建設  
東方寇盜永無侵  
收回疆土軍人血  
整頓河山賢吏心  
正本清源由教化  
百年禮樂入人深

述治道

唐漢忽忽了  
目前商周治  
譜遂無傳  
虞廷征伐兩階舞  
孟子經綸百畝田  
國脈培從錢



穀始民風端自禮刑先古人成績分明在誰取青編與細詮

陽歷重九泰昌里雨莊寓茶

露白葭蒼未隕霜卻驚新歷已重陽艱危世事迂迴久代謝天時節序忙是地驚心仍動魄何年物阜更民康今朝試作題糕會且喜人人泰且昌

平生

平生蹭蹬願多違卻遇天緣脫駭機得失慣留圓處闕行藏幸免俗人譏每從事後虛前料嘗使來時悔去非指日蓋棺方論定神遊天地欲誰歸

藐躬

獨立蒼茫一藐躬前無始今後無終興衰不出盈謙外禍福常存倚伏中只見鴻泥留雪上不聞鳥迹印天空滔滔世變今胡底否泰循環萬古同

自詒

自奉如何祇自知天生付與又何奇布裘粗糲應知足文繡膏粱并是癡進德九思爲準則脩身三省是吾師年衰身逸心無逸百變堅持不動時

震初齋中茶集

八月十一日

三日不見俗塵生一入高齋兩眼明案有尊彝胸次古盤無腥血舌根清江湖性氣論交密風月情懷得句成滿座耆英追洛社放懷同與話昇平

輓楊斐然卽呈煒章先生

久仰芳型未識荆得交棠棣耳鴻名經營貨殖多勞動保衛鄉閭有頌聲天不永年人  
戴德身雖羸瘦氣常清愧將俚語昭泉壤聊慰令原急難情

中秋遇雨有感二首

盼來八載月空圓惆悵浮雲暗滿天今日雲開偏送雨清暉有待又明年  
準擬今年看月明終朝浙瀝畫簷聲蟾光欲吐非容易洗淨塵氛分外明

八月十八夜子時地震二首

驚心幸免墮飛鳶踏地還知勝蹋天造物恐人憚忘卻不教高枕得安眠  
自古傳聞釣六鼇三山屹立尙孤高於今領取盈虧訓毋使山河觸怒濤

秋陰

一月初晴九日陰小園光景更蕭森枝頭落葉黃兼潤砌下荒苔黝復深風月頓消遊  
客興關河偏滯遠人音何時得見秋陽暴萬里無雲豁此心

八月二十三日國軍蒞津歡迎盛況

比戶兼旬盼國軍今朝如堵勢芸芸萬千婦孺呼雷動億兆黎元待澤殷電走朱輪隨  
瑞靄風飄赤幟兆祥氛河山從此聲威壯道左衰翁喜欲翁

寒露節 先公秋祭畢朋來茶集

夏朋契闊復何言霖雨兼旬久掩門蒲柳先衰驚歲月芥菘漸美度朝昏愴懷秋露音  
容遠永慕春暉祀事存今日茶香謀小集餽餘數粒尙甘溫

乙酉重九邀友登高

新事大樓

年年多難強登高今日時平興正豪太傅掩功休折屐仲宣能賦且拈毫天邊寂寞三  
山影海外縱橫萬里濤掃淨風塵堪縱目羣賢畢至好題糕

止園紅葉

乙酉重九後作

剪剪西風百卉凋牆頭薜蘂色偏嬌滿園爛熳紛如錦常伴幽人慰寂寥  
已過重陽烈日烘小園晚景十分紅回思埋沒牆東日常在愁烟苦霧中  
天意偏憐歲暮人秋深誰見再來春千花百草凋零後滿目紅雲又一新  
猩紅絳紫正爛斑朝暮陰晴不等觀午枕初回挨倦眼行吟渾覺是春山  
年光如水去難回不待秋容菊訊催物態頓驚春意滿翩翩雙蝶過牆來  
今朝茶集聚羣賢錦繡題詩在目前太息御溝何處是多情侶和有天緣

一甫約十九日中原六樓茶集

二首

天留晴旭展重陽王粲登樓祇自傷不是登臨能助興且分炳燭夜遊光  
人生何地異羊腸百尺樓高樂未央更上欲窮千里目白雲深處是吾鄉

十月初旬觀壽豐園菊

二首

十月清風有令姿東籬興趣未嫌遲  
衡門自賞凌霜操市井兒童道過時  
栗里猶存喜伴松風霜飽領豔偏濃  
天留晚景人同壽次第看花直到冬

詠殘紅葉二首

錦幃雲屏轉眼空幾番霜訊北窗風  
恰如三月春歸日零落殘花滿地紅  
鴉聲破曉占高枝正是楓林葉落時  
片片殘紅流水去令人渾憶送春詩

卽事

立冬草木未凋

海隅秋盡氣蕭蕭今似江南草未凋  
萬衆齊呼太平樂奈何鷓鴣兆到津橋

十月十四日震初齋中茶集

是時久旱草木未凋

秋晴已久更冬陰庭院依然草木深  
數點栖鴉情默默一畦寒菜綠沈沈  
不增野叟催詩興難副農民待澤心  
天地無情人自樂嘗茶話舊有知音

題齋壁

世緣俗念不相攀身是高僧老坐關  
室本清幽如太古門無剝啄似深山  
午晴茶熟桐陰轉夜靜香殘柝韻閑  
忍度朝昏堪自慰心同鐵石比堅頑

先妣忌日祭釘

未棄癸丑年

已別音容四十年年年身世百憂煎  
荆榛道路征途惡珠桂米薪粒食慳  
桑梓敬恭無復日瘡痍凋做總由天  
鷄豚相對空垂淚悲慨何能達九泉

喜雪朝時交大雪今又

十月猶和氣似春忽然後夜雪一番新金吾不弛森嚴令誰識袁安高臥人時應好令行

出粉四

朝晴庭院白同銀且喜寒窗夜色新天意慈仁重佳節來年玉粒賤如塵

妻病瘳已五年今幸入旬同壽賦此自頌

鴻案居然伴寂寥飄蓬身世正無聊以平為福眉同壽相敬如賓鬢已凋疏影梅開春

盜盜淡烟香永夜迢迢庭前綠竹鏡清供得得孫曾兆庶來年或仍有孫丁之望新

歷迎祥又歲朝後二日為新歷三十五年元旦

十一月十八冬至日春暉堂茶集賦呈助興

冬至陽生春又來一年佳興正相催三茅寺裏尋丹灶仙機七里灘前訪釣台官奉載

酒南湖雙棹去沈州聽鶯北陌浩歌回翻人生行樂君須記茶熟爐溫笑口開

得焯兒信青島紗廠有回復之望感賦

世間何事有人謀失馬方欣得馬憂消長盈虛如轉轂去來逆順若藏鈞雲中出沒孤

飛雁海上浮沈自在鷗萬戶痼痼歸衽席天心默運待箕裘

冬月初四日紹良得男是為第一曾孫大雪後一日有進冬至陽生之象取名啓

晉以志之

大董曾孫始見之同堂五世待期頤自昭明德方言晉三接天庥豈怨遲

安命

安命知天總不疑平生遇事可憐遲文壇九上輪空舉宦轍三遷未及施宗族式微心已碎箕裘未就鬢如絲旁觀謬許箕疇福茹藥含冰祇自知

冬至遣興

冬盡春回已有期老人清興欲何之沿溪問柳宜攜酒繞舍尋梅合詠詩名勝數來程自擬家山歸到夢先馳閒身安得如年少務觀湘湖夜泛時

題莊良孫女祝壽畫幅

山水情懷松柏姿喜看童稚畫中詩齊眉耄董堂前樂四世新逢舞彩時今年八十七歲

信數

廢寢忘餐可奈何行雲流水養天和知幾自在全憑數起箇念頭總是多

歲暮夜坐

久旱風生易常陰日出難那堪雙鬢禿又耐一年寒燈影梅枝瘦窗聲竹葉乾隨緣方遣興清詠到更闌

歲暮病中主足痛不能着地

自是星官有錫磨年年歲暮病中過  
泰來否極亨常少履薄臨深苦更多  
萬姓歡呼調玉燭百年至計息金戈  
簫前梅信頻催臘佇看陽春日轉和

新歲感懷

衰疾來如寇流年去若梭  
惜花吟興減泥酒隱憂多  
倦馬辭鞍鞅飛禽脫網羅  
江湖倘歸去相伴一漁蓑

丙戌元旦口占

世界和平第一年乾坤旋轉福無邊  
湛恩汪洋濺深如海兵氣銷磨感自天  
閭里含哺能鼓腹康衢擊壤更摩肩  
及身得見河清日伏叟橫經喜欲顛

立之七弟七十壽

棣鄂花開白髮新承平版籍有遺民  
弟生于同治四年丁丑千言策對徵名士  
萬首詩存繼古人滄海浮沈鷗世界  
江山嘯傲鶴精神他年聯袂歸鄉飲雁序  
庠門鼎足賓弟

五今已六十有五亦近古稀

除夕病足叟放翁句遣興

八十頭陀不出家平生志願在桑麻  
春光乍轉先梅柳歲事將闌薦果茶  
扶拜漸離愁境界改詩重理舊生涯  
等閒一事還堪笑夢到江南鬢未華

臥病三月第一次出門山桃將放  
二月二十日春分二後三日

病同重見豔陽天偶值風和日正妍莫道傷春人易老山花猶似去年鮮

筋骨酸寒得小蘇徘徊道左尙踟躕名花重見如相笑道是東方老病夫東北接歌

病起又見公園山桃初開感賦四首

年年得見此花開幾輩詩人逐蝶來飛蝶不知何處去詩人獨喜久徘徊去年園中故

曉捕多人今則王處莊  
想矣兼蝶同音備用

詩人獨喜久徘徊每見花開首重回卻憶種花人盡去問花無主為誰開

問花無主為誰開獨有詩人思別裁曾是桃源花事好武陵人得幾番來

武陵人得幾番來五百年間只一回今幸時清身亦健年年得見此花開

久雨初晴小園散步二首

花時二月久沈霾幾樹山桃嫩未開天惜詩人嫌寂寞草青松綠報春來

小園風景度朝昏蝶影鶯聲不出門無酒有詩遣寂寞令人遙憶杏花村

上已前一日重遊小公園去年園中故

去年今日儘堪思正是蜂狂蝶舞時風景不隨人事改重來花徑好尋詩

年光如水盡東馳猶憶驚心動晚時天意憐人閒趣少春來無處莫非詩

病起春暉堂小憩

始信今年筋力殘小園猶自怯春寒生憑豆飯藜羹老居是禪房病室觀有伎有求知



念妄無思無慮覺心寬  
還從斷簡尋師友  
俯仰乾坤契古歡

讀史有感

英雄自古多僥倖  
得失全憑後世看  
濟衆博施堯舜病  
抱殘守闕漢唐安  
千年王霸文章著  
萬里江山弈局觀  
獨有先公年譜在  
一生德業出艱難

楚卿齋中茶話即席賦贈二首

山水情懷百慮空  
芝蘭入室覺心同  
煎來香茗留清話  
常似春風滿座中  
不談興廢卽論文  
常似懸河覺齒芬  
茶灶筆床爲長物  
但看富貴若浮雲

止園今歲花較稀別有幽趣二首

萬綠叢中數點紅  
花光不與昔年同  
欲參小圃清幽趣  
多在晨風夕照中  
葉嫩花稀又一奇  
芳菲原是怕難披  
半開自覺看常好  
免見紛紛落地時  
舊英公園海棠盛開

移來西蜀不知年  
雨潤風和分外妍  
喜見紛紛蜂蝶鬧  
令人卻憶放翁顛  
雨晴止園散步

小雨初晴曙色開  
日光斜照百花臺  
滿園春意誰知覺  
獨有紛紛蛺蝶來  
嘆故鄉善舉無成

散財容易得才難  
萬事無如筋力殘  
辜負萱堂慈訓杳  
常留遺憾對孤寒

泰兒年五十一得第二子于吾爲第六孫命名述良期其善述吾慈善之志也詩以紀之

庭前菘竹又蓀枝老耄仍懷堂構思待爾昇平爲善樂但能述志未爲遲

齋中靜坐二首

寂寂花時閉院門陰綠樹自成村鶯啼晝永人聲絕一縷爐香直到昏  
息盡乾坤萬變心一窗竟日冷沈沈默觀天象人誰測纔露微陽又作陰

小園遣興

息影空園萬化觀絕無煩惱挂眉端深林鳥語攢枝樂小沼魚遊戲藻歡  
雨後藤花盛開聞鶯二首

雨後藤花過水鮮  
枝枝紫玉似珠連  
人聲靜默禽聲樂  
入耳嬌鶯句句圓  
天心若有豐年兆  
久旱甘霖豈偶然  
且喜春畦看菜長  
青蔬綠韭一時全

太平花四首

當年豔說太平花  
神武開邊萬里誇  
今日流傳淪市井  
清香猶似帝王家  
淡白瓊花似玉叢  
枝枝凝豔露迎風  
看來桃李無顏色  
一樣芳菲便不同  
移根邊徼託孤蹤  
三百年來雨露中  
花木猶爲人愛惜  
將軍百戰已無功  
太平景象小園中  
曾顯開疆拓土功  
記取佳名千載勝  
年年常得被春風

叔嫂家太平花既枯又發新枝

幽芳一簇滿園春去歲枯條又發新願與此花年年見此身常作太平人  
今年勝似去年春重見柔條氣象新料得天心能默運看花還是不平人

壽豐園太平花盛開有感

太平名易盛時難等是芳菲不等觀卻憶蒲仙清平調亭前玉笛倚闌干  
滿枝珠玉十分開正似熙朝獻瑞來料得御園供奉日筵前羯鼓幾番催

五月朔得第二會孫取名啓益詩以志之

盈階綠竹正猗猗又見蓀芽秀一枝夏長春生天獨厚知叨祖蔭露潛滋  
五月得孫

佩瑜端午詩來步韻答賀

止園惜別已經年節序榴開又目前雨過菴畦青滿地風清籐蔭綠漫天到門倒屣今  
無日掃徑煎茶昔有緣追憶舊遊勞夢想新詩展讀亦欣然

春暉堂獨坐

獨坐空堂意趣幽朋來何止隔三秋映階蜀菊紅如火透牖湘筠綠似油每憶攜筇尋  
野鹿忽思垂釣伴沙鷗人生何處非羈旅物我相忘自在游

亂後第一次謁

先公祠四月二十七日同陳一甫丁雨

入載烽烟海濛塵蒸嘗久缺幾秋春侵陵偏處還無恙呵護先靈却有神堂陸獨存歐  
脫地稱四圍皆日本軍庫衣冠猶見宰官身太平已兆從今始百世雲初俎豆新

光緒戊寅 先公遺命辦施醫事忽忽七十年此願未償今歲兒子明焯始定章  
成立至德衛生會開辦醫院規模宏遠聊以告慰

桑梓痼癩七十年緬懷遺訓每泫然于今創業堪垂統繼述還期後嗣賢  
前年至德經亂本村全毀一片瓦礫今秋勉修宗祠以供祀事

村舍全墟茂草場每懷風雨慨江鄉牽蘿補屋還無計勉葺宗祠薦豆觴

重修族譜族譜全失以北方村譜為根據得告完成

江南譜牒重名門一炬傷無片紙存代北尚留餘燼在得傳昭穆示諸昆

賀楚卿丁亥重遊泮水二首

從來道德有文章一第青衿姓氏香且喜韶齡春鼎盛還看大耋日舒長夢回冀北功  
名會神往江南翰墨場莫謂天荒吾輩老此身同幸列官牆余庚辰年重遊泮水  
文章道德是吾師一日三秋每見之偶憶遊庠談故事卻從周甲動幽思生平略試淵  
明仕旦夕常吟務觀詩更與希文同志事立身不負秀才時

祖妣忌日告祭

七十年來賸長身椿萱凋謝若為親難忘遺訓躋仁壽救此蟲沙劫後人光緒戊寅先

君恨身無無見醫特謂子孫以施醫藥爲志事忽忽七十年矣今幾見子明  
輝始知幾至德仁壽醫院同思前事如在目前然而世界滄桑已幾易矣

病中自念三首

生本癡頑不足誇慈幃遺訓念無差一生所歷皆餘蔭萬事艱危結果嘉  
生平行歷百憂端戒懼曾無一夕安天倖虛名娛晚景夢中環境更艱難  
閒吟斗室覺天寬身似鳴蛙不屬官薄粥一盃吾事了心原無病更誰安

夜坐

薪珍似桂仍供爨米貴如珠未闕餐更喜心虛禪意進青燈有味照蒲團

止園靜坐二首

齋居罕人事閉戶自成村饒有山林趣而無市井喧藤陰環宇靜視水過畦渾極樂知  
何似先除憂患根

空山多濩落市井盡置塵不若家園內草木亦萋萋風來鳥歡樂雨過花精神卽此無  
爲地胸中常似春

楚卿見示中秋奉懷一首依韻奉和

一年容易又中秋物換星移四序周去歲烽烟爭起伏今朝粒食困供求耆英會上風  
塵老安樂窩中歲月悠世事不聞惟對月兩心同此寄清幽

星期小集步楚卿卽席元韻

乍涼天氣忽驚秋道義親朋每小留詩酒之間爲至樂蔬餐以外更何求任真言語心  
先醉淡泊交情味更悠掃淨塵氛天地別清懷常似月當頭

丙戌重九雨莊約同伯平震初及九弟中原六樓登高望遠卽席賦二首  
衰年重九見精神每憶淵明逸興新百尺高樓千里目抗懷同是義熙人  
難得良朋是異鄉白頭兄弟作重陽呼來濁酒心先醉吟到黃花句亦香風雨初收天  
漠漠川原無盡海茫茫浮雲變滅知何預且共清游萬事忘

詠止園紅葉十一首

不羨春花雨露滋牆頭寂寞幾多時休誇晚景紅如火煨煉風霜祇自知  
孤高冷豔殿羣芳不數黃花伴倚牆有色無香堪自喜免教蝶戀與蜂狂  
誰將秋雨比春風染得如花二月紅最好初晴寒訊早斑斕五色綠陰中  
春去秋來豈有言花凋葉茂更同倫須知天意皆生趣雨露風霜總是恩  
小園風景不多寬萬點猩紅露未乾卻羨今年寒訊晚菊黃猶稱畫圖觀  
江南九月氣初寒兩岸江楓照眼丹今日小園紅似火閑身如坐釣船看  
年年秋老百花殘小院留連興未闌三五親朋謀小集殷勤濃豔勸加餐  
紅雲侵曉射朝曦一片流霞直到昏獨有高槐添異致青陰夾道擁柴門  
故鄉烏白映江楓十里溪山豔不同欲覓牧童來問酒令人還憶杏花風

香山憶昔晚秋居百丈屏山畫不如儘道無方能縮地今朝錦障擁蝸廬  
藤陰密布障霜風猶似春花次第紅造物知人重愛惜故教晚景莫匆匆

丙戌雙十節子貞以魚羹鱸飴約楚卿嘗食頗得鄉村風味賦以志謝三首

知足齋中味道腴羹藜炊黍日相呼試觀方丈筵前客能有山翁此樂無

故人胸次本逍遙一味烹鮮每見招嘗得此中真意味世間何事不寬饒子貞楚卿相約後每月

一次座僅三人食無餘味以風世之一會數萬金者

疏水簞瓢意味深孔顏樂處儘堪尋何曾一飽猶難得下箸何勞擲萬金

詠晚紅葉二首

不是花前羯鼓催霜辰風雨更聞雷天嫌老圃秋容淡萬紫千紅又喚回十月朔風雨交作

紅葉今年落更遲天教不負菊花時閑來尊酒籬邊客愛晚亭前獨詠詩今年十月朔而紅葉

或倚

壽康里見子貞鄰家滿屋紅葉極盛口占一絕

衡門藏得滿園春如火如茶氣象新莫認桃源尋洞口此中疑有避秦人

觀壽豐園菊二首

千枝冷豔一時開玉質金章照眼來老圃秋容原是淡居然富麗又春回

五色斑斕不可思鸞翔鳳翥更生姿天教珍品多遲遇卻在秋園冷淡時今年菊較遲

丁亥新春茶集喜賦

初晴春雪又成陰，書舊相逢喜不禁。擊節筑難追，痛飲無弦琴。尚有遺音曠懷始，恬乾坤大撫序方。驚歲月深，卻笑顏齡餘。長物筆床茶灶，敵千金。

借宿啓新招待所

數椽幽靜寄坊場，魚影鶯聲白日長。春在枝頭人不覺，雜花齊放滿園香。

還北平止園

倉皇出走十年離，隻影歸來路不知。世事但驚今異昔，那思身已耄。期時戊寅歲暮起事倉卒赴

津處去十年矣

道旁柳色二首

今年遇閏覺春遲，二月花開未有期。道左遙看高柳色，含青猶是未黃時。嫩黃舒綠十分清，幾日濃陰忽已成。造物無私原自得，祇應頭白覺心驚。

遊頤和園養雲軒二十年前曾與老妻同宿此屋

二十年前此廢宮，風光猶與昔時同。梁間燕壘依然在，不見雙飛夕照中。

頤和園船遊

吹面猶寒楊柳風，晚花斜照夕陽紅。遊人不覺年光逝，船自西行水自東。

城南公園看山桃

止菴詩存



三月春陰半日晴飯餘信步望花行城南偏覺春光早一片紅雲照眼明  
市飲

猶是當年老酒徒相逢俱是白頭顛十年一覺長安夢誰見街頭有廢壚  
看紅芍藥

苦恨年年花事忽盼來催去怨春風杜鵑啼血能多少洒遍東闌一片紅  
寫入生墳四首

難料兒孫代代賢惟將心事凜冰淵千年勤儉承家法世變縱橫自得全  
人生離合總憑天白首何分孰後先羨爾已登昌運地可容相見太平年  
勳業文章不足珍好將忠故事心君浮華幻影曾在夢醒方知自有真  
垂老方知感慨深百年歲月苦駸駸林間宿鳥無留影天外孤鴻有斷音  
昌運宮開土六尺下細膩光潤可稱中上吉壤

禍有胎兮福有門平生遇合盡君恩今朝得壤還乾淨清白應期世世存  
不慕功名不學仙心安得喪只由天簪纓世胄非吾願華廡無如陋巷賢  
四月十二日癸巳同年聚餐紀事

卻憶登科日今逾五十年青雲曾過眼白雪已垂肩  
鵲詠星仍聚風光月向圓相將幾  
回醉重赴鹿鳴筵定例重宴鹿鳴惟于到朝之前一科行  
之今計自癸巳至辛卯僅舉四年矣

丁亥三月爲亡妻營葬西郊屢過西直門見售太湖石于道左購置止齋庭中形  
容靜穆如相親敬感賦

如賓遽別苦悲思石不能言恍見之寂寞形容仍靜穆尙堪相伴到期頤  
北海看牡丹已殘


念佛

進德功夫要日新如何悠忽昧前因彌陀一句非無據直抵西方認主人

秋園

飯軟茶甘萬事休一身衰老更何求小園留得春光住次第看花直到秋  
示兒最後語

先公篤守程朱學孝友傳家忠厚存門祚興衰原有自願兒詩禮教諸孫  
祖宗積德遠功名我被功名累一生但願子孫還積德閉門耕讀繼家聲



止菴詩外

集

辛  
愷



中 華 民 國 三 十  
七 年 七 月 初 吉  
至 德 周 氏 藏 版

# 止菴詩外集

師古堂課作

春風三首

化日舒長仰歲功，漫誇花信幾番紅。  
萬方草偃懷新意，都在陽和醞釀中。  
舞雩光景最相親，浩浩乾坤孰主賓。  
總是無情芳草色，一同旂動一番新。  
林泉杖履得春多，爲有東風釀太和。  
疊疊遙山皆錦繡，洋洋大塊遍笙歌。  
樓臺燕語輕拋剪，池面龍文細織梭。  
誰取揚仁安石扇，一時薄海止金戈。

春雪三首

千紅萬紫儘繁華，不及祥雲六出花。  
天地無私春有脚，霏霏都遍野人家。  
入蔡奇勳自古難，可能元夜擁雕鞍。  
一聲羌笛關山怨，回首桃花馬上看。  
春回喜氣滿山川，瑞雪先占大有年。  
不盡落梅香似海，無邊新柳絮漫天。  
東臯玉潔催耕犢，南浦蓑寒放釣船。  
何事袁安尙高臥，起看寰宇淨風煙。

晚晴二首

無限夕陽好，人間重晚晴。  
雲開平野闊，風定暮潮生。  
屋角添蛛網，沙頭落雁聲。  
爐香清晝永，閒對小窗明。

雨霽吾廬好，柴門日影斜。  
羊牛同下坂，鵝鴨各知家。  
曳杖迎新月，銜杯送落霞。  
柳邊人

共語樂意話桑麻

巖子陵釣台

一釣清名宇宙垂英雄顯晦繫人思雲台高繪評難定星象飛章事亦奇鴻暝知歸帆  
歷歷鶯啼如夢草離離春風秋月空憑弔惟有灘聲似舊時

公園晚眺時在都門梁遊四  
公園各賦一律

太液春波綠影深瓊華夕照碧陰沈五朝宮禁空搔首萬姓芻蕘趁賞心樓外好山如  
罨畫天涯倦鳥欲歸林低徊不去迎新月歷歷千秋入苦吟北海  
公園

城南清曠喜方羊况是當年藉禮場古柏行欹參偃仰春蕪耕廢半青黃數聲殘角迴  
鴉陣一抹斜陽上雉牆似聽遊人壇畔語昇平猶見萬斯倉城南  
公園

行春覽勝故宮前人影依稀欲暮天百尺銅柯酣雨露九重金闕暗風烟池邊鷺帶殘  
霞落陌上花迎夕照鮮恍憶少時從社祀衣冠猶及中興年中央  
公園

驅車直北出城闌廢苑徘徊楊柳新九陸荒壇悲落日五洲大地喜同春內聚土石  
為五大湖模  
銜枚陣起投林鳥空担村歸趁市人極目郊原無限好何如海宇淨烟塵京北  
公園

農家二首

茅舍長林北柴門小市西深村晨喚犢窮巷午聞雞野菜和烟劇春蕪帶雨犁桃開人  
不識疑是武陵谿

時平多樂歲地僻好歸農宅外依依柳庭前稷稷松柴門風自掩石碓水能舂不稅南陽駕何人識臥龍

黃鶴樓二首

黃鶴何年去磯邊尚有樓江聲流日夜山色自春秋樹隱晴川閣帆歸夏口舟登臨天地窄攄盡古今愁  
高樓勝蹟幾兵戈玉笛橫吹發浩歌欲上青天問仙子江城回首暮雲多

聞鶯二首

寂寞深山裏春來處處鶯花間侵雨澀柳下度風清欹枕驚離夢銜杯弄晚晴幽人倚天籟小句又催成

幽燕三月尙飛沙桃李無言愴歲華窗外一聲鶯夢斷春風忽已遍天涯  
黃金臺

續武成功自古無招賢何取見金夫可憐市駿名空豔七二堅城萬骨枯  
古松

虬枝鬱鬱半青蒼桃李能爭一日芳誰識千年廊廟器此身百鍊出風霜  
蘇武廟

茫茫大漠幾滄桑蘇武祠前草樹荒嚼雪孤臣悲坎壈瓣香故老吊興亡于今白道無



龍節終古青天有雁行回首千年春夢杳空餘畫角對斜陽

山居

青峰深處着柴荆門掩蒼苔萬事輕  
嶺樹吟風寒載酒巖花帶露曉聞鶯  
雨添山色分詩秀雲渡溪聲入夢清  
千載高人老泉石姓名從不到公卿

大沽口觀潮

滄溟東望豁塵襟日日潮生自古今  
白濺濤頭殘雪霽青連天際暮雲陰  
孤臣立馬千年恨遷客浮鷗萬里心  
疊疊沙痕回首處前朝鐵戟幾消沉

夏日閒興

悠悠長夏萬緣空賴有山林着此翁  
數徧新秧牛跡外驚回幽夢鳥聲中  
詩尋竹徑衣痕綠釣引荷池笠影紅  
便上羲皇忘世事北窗一榻領清風

新秋

撩人詩思是秋初涼透衣襟爽有餘  
靜院蟬聲稀綠柳清池雁影落紅葉  
舉杯對月情何限懷扇臨風意已疏  
讀罷黃庭天欲暮好乘微雨理畦蔬

洛陽懷古

中原人往歎風微豐鎬何年啓帝畿  
西閉有緣堪退老北邙可作欲誰歸  
淵源立雪千秋在金谷揚塵萬事非  
獨羨堯夫安樂處子孫猶得守荆扉

送客遊邊

莽莽漲邊塵桃花雪裏春  
羨君投筆客愧我撫髀人  
路遠雕鞍重身孤寶劍親  
離情倚羌笛長伴月華新

送客登泰山

絕頂挹清芬憐君避世紛  
襟痕膚寸雨屨跡盈層雲  
歸鳥情何極扶輪願更殷  
好尋封禪處苔蘚訪碑文

採茶歌二首

山村生計苦少田貧家兒女辛  
且堅平明日出相爭先  
新茶摘得露枝鮮有時冒雨慘  
風烟陟身危磴層崖巔歸來薄暮恆  
抵胼傾筐倒筥不值錢  
誰知賈客一反手利市藏  
鎚百萬千

農家三月忙江南風日好  
村婦摘新茶結伴登山早  
躡蹻陟危崖披枝尋露草  
從來重利客奔走浮梁道  
不見傾筐人忽忽春光老

種竹

勸君莫羨巖前松悠悠千歲身  
難逢勸君莫豔籬邊槿忽忽一  
現華復隱世有美植無如竹  
三年可待四時綠渭川千畝何  
遠哉特移鳳尾就身來東坡先  
生能免俗一日千回看不足我  
胡羨豔獨欣然把酒相對暮雪  
天吁嗟乎時人那識此中意  
傲骨虛心見

吾志

湖山小隱

青山繞舍近依湖老我乾坤一腐儒物外烟霞隨地有塵中車馬到門無百年事業歸鉛槧萬里心期入畫圖最好漁樵閒作伴家家新釀暮相呼

贈僧

禪房幽處喜知音一縷爐香萬籟沈未度松陰尋定磬卻開蘿逕候孤琴塵中歲月忘昏曉劫外山河自古今蓮社宗風幸不遠好攜瓶鉢上東林

老馬

空羣冀北幾人留伯樂虛名一笑酬伏櫪豈甘依路寢識途誰憶蹶長楸百年逐電金鞭折萬里嘶風畫角秋莫羨草深堪試足缺銜猶自惜莊周

謁李文忠祠

沽上猶存異代祠相公勲業本艱危卅年膏澤淪三輔一片丹心泣四夷碩果英雄今古恨子遺父老歲時思鑾輿未返晴難暝孤節峻峻百世師

海光寺訪古

析津梵宇歎空花瀕洞風塵愴帝家那復諸天騰睿藻祗餘落日咽悲笳鐘聲縹緲無歸鶴柳色依稀有暮鴉乘興卻尋方外趣扁舟閑泛衛南窪

客中旅懷

人生逆旅復何之古驛閒坊處處宜  
萬里心期長劍倚百年身世獨燈知  
驚回孤夢簷間雨寫盡豪情壁上詩  
無限青山堪伴老莫嫌白髮寄天涯

中秋口號二首

客裏中秋月倍華不須辛苦怨天涯  
團圓仰見山河影海宇分明共一家  
巖前丹桂正飄香帳下笙歌趁舉觴  
百萬流民鴻遍野嗷嗷含淚月中望

光武廟

中興帝業尙誰看野廟淒淒落日寒  
禮數已無周佾舞威儀猶是漢衣冠  
於今白水追思永自古黃圖繼盛難  
何日中原休逐鹿時清歌薦荔支丹

寒食感事

年年寒食寄天涯况復中原多難時  
動地鶉聲催夢醒迷花蝶影入情癡  
千家麥飯征夫淚百歲杯捲孝子思  
日暮輕烟看靄靄五侯姓氏有誰知

題五老圖步杜祁公原韻

雖陽泉石堪偕隱那用重彈挂壁冠  
萬里鵬搏翻鷄笑九淵龍見卻鮪桓  
賓筵白髮心同壯岱青松歲共寒天壤  
幾人鴻雪在杜公圖畫尙留看

菊

乘興看花遼海行  
九秋風雨重孤征  
尙尋粟里沽醇碧  
莫效湘纍拾落英  
晚節江湖驚歲暮  
幽芳泉石傲霜清  
悠然一笑東籬下  
紅樹青山合有情

燕

茫茫大造欲誰親  
勞燕分飛物候新  
巢幕無驚酣午夢  
穿簾得勢接芳塵  
關心王謝堂前事  
彈指春秋社裏身  
幾見雕梁依舊壘  
尋常猶說六朝人

西湖放棹歌

天下美景莫如湖  
西湖之美天下無  
琉璃萬頃比具區  
樓臺城郭金碧敷  
四圍山色入畫圖  
春風秋月清難摹  
我縱扁舟問蒹蘆  
一葉不繫同鷗鳥  
天光雲影爲前驅  
返觀身自鏡中呼  
嗟哉人生在世苦  
形拘往往局促轅  
下駒洗空百慮見  
真吾推舟行陸胡爲乎

重陽 大逵作

十年孤劍紅塵老  
九日清樽白髮新  
對菊卻懷忘世客  
插茱方覺憶家人  
心營戲馬千秋感  
夢斷啼猿萬里身  
幾緇青鞵吾願足  
不妨海外作遺民

觀魚

領略濠梁趣  
相期汗漫遊  
救枯嫌煦沫  
罷釣惜吞鈎  
鏡裏乾坤大  
天涯歲月道平生  
縱壑意雲水寄悠悠

蓮

心與塵俱淨盈盈一水涯  
碧凝晨露滴紅襯夕陽斜  
魚戲波搖葉鷗馴影傍花  
豈徒君子詠香潔到僧家

春雨

雨添春意到人家楊柳陰  
曲徑斜綠野一犁新叱犢  
清溪八尺趁浮艦采茶歌  
起愁天色賣杏聲喧領歲  
華好伴漁翁蓑笠去試沿  
流水覓桃花

夏日山居卽事

幽居何事得相關斜日柴  
門映斷山一曲薰琴青卷  
外數聲樵唱白雲間前村  
雨驟峰巒失別院風輕草  
木閑金石續成消夏錄吉  
光片雨不須刪

雪晴晚望

山村雪後路行難獨倚柴  
門曳杖看紅日映成銀世  
界白雲封盡碧峰巒千楓  
陣黑鴉聲樂一棹蓑明鷺  
影寒寂寞風簷書好展莫  
將暮景等閑觀

瓜

陶穴綿綿啓帝基於今頃  
刻等兒戲中原豆剖爭雄  
長絕塞刀環失代期零雨  
難忘征士苦清風卻寄故  
侯思平生一片冰心潔避  
世還嫌納履疑

梅花

休嫌花事晚梅卻占春先豔冷心全醉香清骨是仙鋤痕斜月裏笛韻曉風前獨有孤  
山客幽芳對暮年

雪中偶成

不禁尋詩興騎驢雪滿衣梅殘香更遠柳靜絮仍飛絕塞驚鴻杳空山待鶴歸還應高  
士臥寂寞掩柴扉

立春

白首逢春喜莫論天教瑞靄到柴門迎祥吉語東坡帖買困芳醪北海尊萬紫千紅從  
此數柳眠花信始今番願將元氣消寒盡一脈陽和亘古存

毛遂

漫誇濁世獨翩翩小豎成功亦幸然遊士舌當師百萬美人頭謝客三千處囊目笑錐  
空見按劍心驚壁偶全不有李同身却敵虞卿畫策更虛傳

留侯

如何博浪氣輕乘從古英雄不自矜雲雨難忘韓國恨風塵獨幸漢家興赤松一去便  
遺屣黃石三招愧飲冰千載知心惟范蠡五湖烟水舊魚昏

花朝

莫虛花信記年年九十光陰在杏前柳色遙迎挑菜路簫聲驟暖賣錫天日消殘醉春

將半夜喜清吟月正圓莫怪風華忻老健踏青人笑雪盈顛

食箭

齋居市遠罷烹鮮玉片登盤肉食捐聊喜巾孟方外淨卻教芒角腹中便百壺高宴歌  
韓弈千畝清風飽渭川堪笑園丁貪護箭隔籬又報竹行鞭

韓信

莫嫌胯下困風塵自古英雄有屈伸背水旌旗孤注擲登壇壁壘一番新龍興鼎革多名將為盡弓藏得幾人鄭重當年漂母意忍教草芥刼餘身

信陵君

中原十載息兵爭救趙雄圖在定傾幸奪螯弧紓急難獨交屠狗共功名寥寥高誼千金重耿耿孤忠一劍輕天意難回齋志隕恨留讒舌助秦嬴

三月三日

春到重三淑景多年光莫遣等閑過水邊圖畫唐天寶亭畔風流晉永和芳草無情侵繡履嬌鶯有韻入笙歌木蘭舟小宜烟雨且擬攜尊泛綠蘿

魯仲連

口舌全消宇內爭斯人可作慰黃生從來助浪興戎馬幾見懸河洗甲兵一矢書遺孤將泣千金壽卻獨身輕名聞天下還高蹈玉貌翩然海上行



讀書

休言秉燭怨天公，畢竟丹鉛日有功。  
歷歷先型來眼底，津津餘味在胸中。  
青燈帳外欺寒雪，白髮簷前傲晚風。  
老學十年無限恨，枉教窮達誤英雄。

詠鏡

從來明鏡苦塵封，况許斑斕古鏡濃。  
妝罷樓頭誇舞鳳，鑄成江上欲飛龍。  
效忠合著千秋業，獻媚難留六代容。  
方信金仙無住相，圖靈自不愧真宗。

荆軻

入創碧血濺階除，方識田光薦不虛。  
千載秦宮餘瓦礫，百年燕社總邱墟。  
藥囊幸有琴聲會，匕首難言劍術疏。  
終是天心存白帝，筑中鉛朴又何如。

賈誼

賈生才調萬言書，年少乘時願豈虛。  
鵬鳥未除懷抱惡，鬼神無補聖躬疏。  
至今宣室思前席，終古長沙弔謫居。  
太息風雲關運會，馮唐已老更何如。

雷

雲雷自始出艱屯，萬象昭蘇草木春。  
咫尺回天欣雨露，崢嶸平地出風塵。  
驚車乍喜秦宮女，失箸應慚漢室臣。  
世變僅看龍鬪野，會當君子有經綸。

東方朔

小謫人間四十秋，歲星之說轉悠悠。  
瓣香孔子非阿好，觸鹿匈奴有隱憂。  
共信偷桃來夙業，獨因割肉見風流。  
相知恨晚嗟明主，一例前生范蠡舟。

夏夜

披襟寄快海天東，炎夏如秋景不同。  
枕上荷聲先報雨，燈前竹影細生風。  
暑消浩月蒼茫裏，夢入滄波浩淼中。  
散髮行吟忘夜久，聽殘更漏日輪紅。

范蠡

北伐旌旗振國威，弓藏鳥盡悔同歸。  
中原霸業終黃土，上將勳名賸白扉。  
滄海桑田今易姓，湖天烟水早知幾。  
英雄得失尋常事，廊廟山林孰是非。

董仲舒

漢興儒術孰爲傳，獨數江都重魯鄒。  
目禁窺園原後樂，身羈相郡尙先憂。  
匡時帝業惟三策，正誼經生第一流。  
卻笑公孫誇布被，妨賢欺世亦春秋。

穫稻

秋成粒粒出田間，誰識民生稼穡艱。  
盛代君侯還省斂，豐年婦稚總開顏。  
場邊日暖雞聲樂，林下風清犉影閑。  
一幅豳風圖在眼，老懷何日得歸山。

管寧

斯人襟抱海天空，遼左孤芳孰與同。  
千載心情歸去鶴，百年身事寄冥鴻。  
遺金直抵蠟

寒夢割席拚教馬耳風何用弓旌污泉石巖扉應是白雲中

秋日旅行

塵氛洗盡御風行一路溪山照眼明短劍孤燈饒客思白雲紅葉動詩情楓林日墮停車晚樹葉霜高逐蹇輕老氣尙橫秋萬里未應幾展了平生

周瑜

漫言赤壁擅雄名氣壓曹劉國已傾顧曲未回千載誤飲醇誰息四方爭爲貪西蜀終分鼎翻悔東風等沸羹地下若逢王士洽沈沙鐵戟恨難平

虞翻

原戎馬漲紅塵絕學構經尙有人腐草肯貽千載笑青蠅從付百年身遙遙芝醴今在落落磁鍼孰與親絳帳不遺知已恨海隅長養十分春

荀彧

濡須一片傷心地千載孤忠士氣伸勸進獨排儕輩議生香還盃座中春志存漢室侔三傑心吊殷墟號二仁太尉可追終欽恨天教賢嗣表清純

祈雨

中原久歎棘荆橫甘雨休徵兆太平一室焚香通帝座四方洗甲事春耕關心涸鮒窮途語側耳哀鴻徧野聲志士回天空有願可能膏澤被蒼生

叔孫通

綿葛遺風感不勝  
綱常從古重  
兢兢豈徒臣  
節尊儒術要是天心  
屬漢興一代衣冠今  
尚邈百年禮樂更誰徵  
盈廷博士多新策  
北望觚稜涕滿膺

田橫

中原逐鹿本無常  
運會英雄共短長  
五百士寧爭衆寡  
三千年幾弔興亡  
稱王莫倚迷  
螻蟻有客難憑脫  
劍鉞海上空餘名  
島在漁人遙指暮山蒼

詠牛二首

水耕火耨老猶親  
盼到倉箱願已伸  
今日閑身無處着  
好隨函谷度關人

難從物外起田園  
聊幸清時長子孫  
賣劍家家還買犢  
桃林處處是桃源

地名

樂毅

玉碎寧能復瓦存  
英雄遇合本難言  
揮戈易醒堅城夢  
遺珮空歸故國魂  
幸賴兵車光  
宇宙恨辜魚水失  
中原榮枯歷歷千  
年事伯仲猶堪梁父論

蕭何

中原逐鹿苦黎元  
楚漢相持况有年  
誰惜粟芻千里遠  
卻輸刀筆一身先  
圖書早決興  
王計田宅還思後  
嗣賢今日鼓鞳聲未息  
幾人華屋倏雲連

圍碁

得失須臾類轉圍一枰黑白尙班班  
勞生歲月縱橫裏百戰山河指顧間  
燈燼敵殘忘夜永樵柯爛盡喜身閑  
山翁妙訣君知否息竟機心自解顏

孔融

尼山教澤一時新誰識風塵了了身  
北海清名周絕學東都奇節漢孤臣  
丹心合辱山陽友白眼翻驚校尉賓  
堪歎江湖尊酒滿抗懷洙泗又何人

廬山

不復微塵芥此胸好持玉杖訪仙蹤  
是真面目三懸瀑獨拄乾坤五老峰  
金闕迴迎紅日曉草堂深在白雲封  
遠公高躅今誰嗣心折東林夜半鐘

人日

歲朝幾日景逾妍遊徧長安意灑然  
寶馬香車如水市鶯啼燕語早春天  
梅花額上風初信竹葉杯中月半圓  
最好隄邊挑菜路野人相值慶豐年

王粲

不嫌落拓寄荊州名士依人氣尙道  
千里新知曾倒屣四方多難獨登樓  
聯鑣著作非凡子驚座風塵有故侯  
何必待中矜晚遇流聲江漢已千秋

張子布

渡江一鷄出風塵賞識英雄貴有真半壁撐撐三鼎足兩朝珍重百年身治經久矣春  
秋志願命居然社稷臣東郡不名同鶴立始知建國賴文人

華陀

世無良相惜醫才百歲光陰劫未回腸垢湔餘心自潔頭風愈後志應灰遺方楚竟千  
秋秘薄技驚從萬里來願起斯人開壽宇昭蘇黎庶共春台

早春

清遊乘興稱心期正好輕寒薄靄時阡陌乍晴鶯伴語池塘剛暖鴨羣嬉雲深隴內梅  
初藟風軟橋邊柳似絲極目郊原生意滿春光偏讓野人知

譙周

窮經皓首已堪論况篤儒行到子孫九列齊聲知學顯三朝遺蹟喜書存難全社稷心  
尤苦不愧鬚眉像亦尊鼎沸中原同此恨試披仇國誦名言

春日郊外

春郊行樂勝居山不負韶光日日閒逐隊驪騮踈踏踏弄晴鶯燕語關關青圍茅舍苗  
千畝紅映桃潭樹一灣誰識會心成獨往置身沂水舞雩間

臧洪

平生肝膽誼成空漢祚難回逝水東天地無情摧壯士江山有恨著孤忠一州自決揮

戈志五郡誰憐敵血功竟使郡丞同日殞本初終愧不英雄

鶴二首

遼海孤飛萬里天歸來城郭已千年悄然不舞人休笑但是清閒卽得仙  
獨立雞羣歲月深乘軒亦有惜駸駸白雲千載誰知己遙寄孤山處士心

虎

山居寂寞絕紅塵虎過階前印跡新沒石雄風飛將颯聽經殘月老僧鄰豐狐善幻威  
偏儼單豹長生術亦湮歎息暮年談色變忍教苛政苦吾民

金陵懷古

庭花歌舞久成塵柳色城邊歲歲新舊恨江聲流不盡青山曾送六朝人

詠玉

磊落風塵瑚璉期暮年還復白圭詩艱難歷盡堅貞在好向他山訪碩師

端午二首

瞥眼繁華沾水濱龍舟簫鼓逗芳辰於今滄海浮槎客都是當年競渡人  
一節能令百世師汨羅江上有遺祠年年角黍留芳餌誰解憂時愛國思

華山

中原形勝萬方趨太華三峰勢忽奇風雨遙連秦故塞河山近拱漢京畿何緣小睡驚

初醒未卜前生隱已遲數點殘雲歸日暮獨憐武帝弔遺祠

題杜子美書堂

清廟生民擬不虛詩人千載更誰譽能扶社稷推椽筆獨拄乾坤牘草廬赴闕感時三  
接浙閉門憂國幾封疏中原父老吞聲久遺像年年薦野蔬

硯

十載丹鉛孰與親寥寥長物屬詩人臨池滌瀆魚身墨閱世微凹鵠眼新歲晚江湖輕  
載石天涯書劍暗流塵丈夫投筆渾閑事翻羨端溪拱壁珍

狄仁傑

望雲亭畔見遺祠伏虎謳歌治亦奇天下安危宗社計生平陰隲影念知錦袍有字方  
驚寵桃李無言豈爲私要識勳名跬步起思親從上太行時

鸚鵡

天教巧舌付珍禽無限詩情感不禁顧影鸚鵡籠悲羽翼分甘紅豆惜光陰寂寥春夢宮  
中事蕭瑟秋風隴上心休學人間恩怨語迦陵好有伴仙音

函谷關

幾番風雨暗中州欲取丸泥涕莫收百二雄圖紛逐鹿五千仙籙候騎牛山川不爲興  
亡改名勝還因道德留天意入關先長者問秦苛法可除不



宋璟

廣平相業尙如新千載勳名自有真推轂難忘天下士臨軒獨數帝心臣梅花冷豔無  
雙賦鳳閣孤高第一人始信讀書賢宰輔文章氣節本相因

弓

男兒七尺尙豪雄盤馬能開十石弓天道弛張超象外楚才得失在寰中功臣有恨空  
飛鳥志士無心擬射鴻莫忘桑弧懸戶日四方多難敢稱翁

太行山

太行高矗覺天低鬱鬱烟雲望欲迷千里蜿蜒畿輔右萬峰羅列薊門西心驚鞞鼓飛  
狐險目痛鹽車老馬嘶京邑可移山不改愚公物論古來齊

觀潮

瞿塘賈豈似漁翁靜玩濤頭意不窮白盡滄溟橫落日青來天地滿西風難平立馬千  
年恨空負彎弓一世雄疊疊沙痕明眼底人間衰盛古今同

漢江

晴川長閣快登臨一派江流閱古今化國已無游女詠浮天猶見逐臣心湯湯逝水宗  
滄海歷歷長皋帶綠陰夏口夕陽無限好千年淘洗浪痕深

笛

一枝瓊玉出風塵誰識柯亭別有真鶴去樓存音縹緲龍吟水徹調清新梅花易落空  
江夢楊柳難催絕塞春千載桓伊負高潔移舟三弄又何人

韓愈

濡筆淋漓不計年卻從磨蝎晤金仙詩通正直雲山表傲著威靈瘴海邊自古文章憎  
命達于今梵志喜名傳不然風閣鸞臺老嶺外何人識大顛

道觀

歷盡艱危氣已降晚尋道觀樂無雙黃庭課罷身忘世世丹灶春生意滿腔一炷爐香雲  
繚室數聲鉄笛月臨窗欲回億兆浮生夢半夜清鐘好擊撞

闕里

千載斯文孰與歸緬懷闕里有芳徽嬉陳俎豆身先老志到春秋願已違鄆邑衣冠空  
想像魯宮絲竹更依稀杏壇花信鮮猶昔除卻春風萬事非

上元觀燈

通街燈火競熙春節序偏驚白髮人匝地魚龍矯作態漫天星月淨無塵漢家伏臘今  
難廢優孟衣冠古亦新自是海隅金革遠離虞猶見太平民

西湖二首

湖水烟籠城郭低風光最愛買亭西清波點點舟如織芳墅連連路欲迷草綠千年蘇

小墓桃紅十里白公隄古今不少詩人詠輪與春鶯日日啼  
西子湖宜濃淡妝低徊人事小滄桑千年城郭擎樓閣一派波光繞市場岳氏有阡旌  
淑慝錢家無塔弔興亡六橋風月今猶昔且放扁舟送夕陽

渡船

馬嘶波上去匆匆古渡船邊落日紅栝柏慣迎雙槳月蓬萊欣待一帆風中流擊楫天  
爲窄彼岸迴船劫亦空好向荒江問漁父蘆間曾否識英雄

張九齡

伊吕科名道豈侔老臣心事轉悠悠曲江空有忠魂祭蜀道誰先聖主憂獨步鴻文矜  
七歲贖留金鑑鎮千秋他年小友饒煨芋十載綸扉讓鄴侯

春晴

漫道春陰好尋芳卻喜晴池塘明聚鴨阡陌碎唳鶯紅日迎花豔青煙入柳輕時平無  
吠犬綠野有人耕

聞柝

廿載長安事已差柝聲猶是市無譁燈前擊碎心辭國枕畔驚回夢到家小菴泥深和  
吠犬廢墟草滿互鳴蛙年來觸耳多惆悵曉角聽殘更暮笳

紙鷲

大鵬垂翼海天空弱質纔禁五兩風繫帛魂歸蘇武雁援弓心擬弈秋鴻鵠一縷青  
雲上飄泊千絲白雨中閱盡升沈談世事笑人嬉戲效兒童

讀易

天心如見杞人憂倖脫秦灰劫未休漫草太玄無一世尙研皇極有千秋著靈始悟乾  
坤大帶絕方驚歲月道身入羲皇超象外小窗閒坐篆烟浮

樵歌

南山高北山高新織芒屨締結牢天梯石磴蒼苔滑深林虎豹窺人號一身直寄白雲  
裏下看塵世真如水浮生萬事禳肩挑日落崦嵫誰肯已君不見古來豪傑今成灰樵  
柯爛盡幾人回不如收拾青松換酒日千杯

白荷花

白水盟心萬事非素荷相對喜忘幾蝶飛不定香難覓鷺立多時影亦微一點無塵初  
過雨十分如玉趁斜暉淡然獨會凌波意皎潔羞爭百卉菲

筑

勁竹柔絲節自和興來相伴醉顏酡如箏月下殷勤弄似瑟風前哀怨多壯士痛銜燕  
市飲征人悲咽隴雲歌當年漢祖聞高會海內欣看洗甲戈

銀河

風露浩無際銀河夜色淒光侵孤月隱勢壓衆星低架鷓天何迴乘槎路欲迷雄心思洗甲壯士孰攀躋

荷錢

小荷出水鑄青銅撫景方知造化工點去盡情沽濁酒算來幾度買清風天光範就輕萍外波影絲穿弱柳中滿眼欣看魚戲樂羨他新富是漁翁

苔痕

宿雨苔痕徧野堂寄身喜在水雲鄉門前不掃青春老階下常封白日長紋隱幽花滋靜院色連深竹透禪房未嫌印屐尋高士一路徑行百草香

古劍

琴書有伴可消憂一劍身輕與古儔囊敝星霜豪傑老匣鳴風雨鬼神愁千年寶氣浸塵土百丈光芒射斗牛誰見干將曾躡冶不妨彈鋏付悠悠

簾波二首

夜色涼如水簾垂影似波月移花渡鏡風織押拋梭地白知庭靜山青入戶多留香枯坐久喜捲近秋河

烟波何處是簾際憶瀟湘細縷雲生牖清光月滿廊沈沈花弄影漾漾篆留香不作垂槎想幽窗日自長

雁字

秋高作字雁飛臨  
搔首西風感不禁  
幾點依稀鴉潑墨  
一行斜挂宿橫參  
都傳遊子天涯語  
似寫羈臣塞外心  
咄咄書空緣底事  
海鷗閒伴好相尋

秋柳

無情柳是最多情  
容易秋風序又更  
蕭瑟江城驚過雁  
寂寥庭院漫藏鶯  
霜微瘦葉先無色  
雨細疏林卻有聲  
莫歎水邊蒲共老  
岸容舒臘又春生

觀弈

漫譏鴻鵠送悠悠  
老眼旁觀笑弈秋  
彈指縱橫成故迹  
機心黑白見陰謀  
雲烟祇好雙眸合  
天地還應一指收  
爛盡樵柯吾固在  
不妨桑海作枰楸

社酒

一杯濁酒餞餘生  
社事相沿倍有情  
滿座盡歡鄰曲誼  
隔籬呼起太平聲  
民風近古家家醉  
天意無私歲歲成  
堪笑山中忘歷日  
卻從村釀識周正

寇準

澶淵一策世空欽  
枯竹同生恨至今  
南渡衣冠歸氣數  
北門鎖鑰付升沈  
親征縱壯山河色  
孤注難昭日月心  
千載秋風亭句在  
勳名沒後賸清吟

魚羹

暮年詩酒重徘徊，卻憶魚羹笑口開。  
訪舊江邊漁父去，試新廚下小姑來。  
英雄不扣馮驩，神武寧分項羽杯。  
獨羨蒹葭鱸湖畔，好秋風一棹放歌回。

歐陽修

文章合冠宋諸賢，天地菁英至性先。  
忠孝陳情出師外，誰能著表媿瀧阡。

曠雪

晚來寒意入幽思，綠酒紅爐合有詩。  
一片雲舒橫嶺際，幾番風緊撲窗時。  
疏林寂寞鴉棲靜，遠水蒼茫雁下遲。  
佇看祥雲豐歲兆，太平天象老農知。

范仲淹二首

當年西夏一彈丸，剿失戎機撫更難。  
畢竟龍圖呼老子，漫將好水咎歸韓。  
斷壑畫粥本非奇，後樂先憂獨見之。  
地易滄桑天易老，斯民猶說范公隄。

韓琦

兩朝顧命本忘身，捧日擎天夢有因。  
進藥丹心同少主，撒簾赤手見純臣。  
空頭救社會，壬漸利已尚窺拗相真。  
如此孤忠譏跋扈，子孫應悔識丁人。

焦山

中流屹立一烟螺，玉局尋詩短棹過。  
風撼魚龍擎砥柱，月移樓閣躍金波。  
潮聲遠接東溟壯，山色平分北固多。  
我亦暮年思勝踐，茅菴佳處且婆娑。

岳飛

叩馬書生語不刊  
權臣孤將立功難  
十年同澤猶憐憲  
三字埋冤豈服韓  
天地誓心終  
飲恨燕雲垂手竟  
偏安中原莫復知  
關數要使精忠萬世看

司馬光二首

粹德翻教黨首鑄  
安民不忍尚名傳  
忠奸倚伏寧天祚  
國事傷心進少年  
新政紛更痛理財  
蒼生額手相公回  
四朝柱石安危繫  
誰識都無妄語來

文彥博二首

四朝社稷賴純臣  
五十年間將相身  
安石何心摧國脉  
忍忘推轂負斯人  
內侍曾聞叱禁廬  
奈何蜀錦進苞苴  
須知此老光明處  
完策功高且不居

花影

九十春光妙化工  
看花惜影莫怱怱  
簾前掩映昏昏月  
水際橫斜裊裊風  
魂夢已拋紅燭外  
精神猶寄綠杯中  
憑闌獨有欣然處  
一洗人間色相空

王安石

赫赫當年亞聖齊  
侈言新法福羣黎  
青苗若果安天下  
王政何勞說兔雞

荆公大儒也孟子後一人而已當時推重至于後人

巢燕



莫笑新來燕子忙，營巢贏得一春狂。  
梁間弄語簾方靜，花下銜泥壘亦香。  
訪舊何曾擇貧富，乘時原不爲炎涼。  
伊誰可以詒謀遠，孫子年年肯構堂。

蘇軾

玉堂金炬亦兒嬉，漫詡奇才帝后知。  
過寺尙傳留帶處，立朝空憶諫燈時。  
生逢磨蝎詩人例，老寄蠻荒逐客悲。  
豈信文章慚魯直，好將性命問元師。

送春二首

娉紫嫣紅事已非，天高日薄欲無暉。  
獨憐陌路聽鶉語，爲惜巢居看燕飛。  
雲裏去鴻音渺渺，風前癡蝶影依依。  
綠章乞道年年恨，好鑄金戈倩魯揮。  
千紅落後綠陰長，洗盡繁華歇盡狂。  
萬里功名生入塞，百年富貴老還鄉。  
燕舞大廈禁回首，柳折陽關忍斷腸。  
獨有詩情無限好，西樓留得豔斜陽。

無絃琴

詩到無人愛處工，琴無絃趣得毋同。  
神超流水高山外，興寄黃花綠酒中。  
剩有癡情防羨鶴，懶將醉眼送歸鴻。  
陶公妙手吾能假，一曲重回解愠風。

新月

倚仗黃昏後，柴門月色新。  
半鉤斜似玉，一片潔於銀。  
萬古心常闕，千秋迹不陳。  
遙知空世界，自是絕微塵。

荷塘消暑

堪笑塵寰逐熱忙，老年幽興寄荷塘。  
掃空炎手因人煖，領略明心自在香。  
露月光風從所好，流金礫石任何傷。  
倘然一夏清涼境，直擬匡廬古道場。

太白酒樓

一代豪名孰比肩，高樓詩酒重流連。  
招呼風月觴三百，吐納江山象萬千。  
醉眼豈能留白日，狂心直欲上青天。  
憑闌不盡遭逢感，幾闋清平調尙傳。

芙蓉

誰似芙蓉不染塵，秋風容易獨傷神。  
涉江欲采無名士，隔浦相思有美人。  
琴疊玉京雲裏豔，旌搖湖水雨中春。  
漫嗟太液歸來晚，猶伴當年柳色新。

伐冰

寒光那許夏蟲知，記取冲冲歲暮時。  
身臥求魚憐孝少，心憂履虎惜春遲。  
牛羊不畜臣工節，羔韭相將帝業基。  
寄語凌陰好珍守，長安待換樂天詩。

新柳

青青又上柳梢頭，新景偏驚歲月遒。  
隔葉流鶯藏復露，穿林早燕去還留。  
柔絲不結離人恨，嫩色頻添少婦愁。  
最是無情江草畔，烟籠依舊六朝不。

山寺晚鐘

山寺難尋到萬峰蒼然暮色忽清鐘境超香界應千丈聲度幽巖更幾重望去上方疑  
月近聽來何處卻雲封鹿門堪繼龐公隱好覓僧歸細徑蹤

寒蟬

螿蟬遠迹着身安蟬翼脩然尙耐寒吟到金風宜瑟瑟飲來玉露卻溥溥空庭影抱棲  
枝瘦古柳聲催落葉乾主賓莫驚秋易老詩人還愛白頭看

石首魚

誰將治國小鮮觀石首何因挂釣竿世鮮媧皇濡沫少人無仙白作羹難海深鼉戴三  
山重天遠鳧飛萬里寬濠上老夫心似鐵且憑強項倚欄看

首中尙  
有石

漁翁

漁翁幽興有誰知千載心情一釣絲蘆隱舟中埋姓氏挑迷洞口謗歌詩天荒日月披  
裘老歲晚江湖醉帽欹獨怪渭川人未識鬢年翻作帝王師

鷓鴣

插羽佳人昔有聲平安頻接海舟輕吹成豐歲家家樂喚得霜天日日晴側耳尙能千  
里應關心還使一軍驚飛奴喜盼知心簡勝過腰鈴捷足行

烹茶

莫笑山齋長物無也安石鼎味雲腴吟成竹裏樵青句寫入簾櫳白傅圖親候火生魚  
眼活卻憐烟避鶴形孤瓶笙奏處留僧話喜勝春宵酒滿壺

靜趣

老境天教百慮空青衫洗盡舊塵紅身餘俯仰寬閒日心有洪荒太古風雨送簷聲來  
枕上月移花影入杯中焚香掃地煎茶竟道是忙人實不同

微雨

捲幔看新雨霏微景亦奇未妨沽酒路恰好種花時點點簷間漏蕭蕭柳外絲不看鶯  
語溼清潤少人知

曲江

少陵哀怨昔城隅官殿于今已廢區人物尙傳唐進士江山不改漢皇都一川風月歸  
詩酒百代衣冠賸畫圖春水正分蒲柳綠可能乘興泛舟無

村行

掃空車馬遠塵埃村路閒行日幾回遇雨獨尋牛跡去迎風遙識碓聲來賒將濁酒家  
家許數徧新秧處處栽領略閭閻豐樂意竹籬茅舍盡詩材

聽琴

欲取鳴琴舊恨深聽來一曲洗塵襟霜淒月照幽人境流水高山志士心竹露中宵多

古調松風萬壑有遺音寥寥千載逢漁父夢寐相將返故林

蘭亭

逸少平生選勝遊永和遺蹟擅風流江山瞥眼成今古天地何心任去留  
遠矣襟懷容一世偶然觴詠亦千秋斯亭不朽多名士歲歲常供禊事修

校書

儒生事業等閒看獨守遺編歲月寬萬卷縱橫推點畫一燈明滅雜鉛丹  
贏來祕閣新銜易掃盡秋林落葉難隻眼不留毫髮憾忍教秦火惜經殘

鞦韆

移人習俗古今同纜上鞦韆興已雄聲送笙歌千度曲影沈院落百花叢  
光陰迅速三春候壯志銷磨一蹴中漫卷詩書狂更喜是誰寂寞守冬烘

揚州懷古

秋風容易到天涯回首揚州愴歲華珠箔詩人空有夢錦帆帝子已無家  
二分猶見樓頭月十里難尋郭外花人世興亡千古恨至今梅嶺樹棲鴉

耶律楚材

祠墓在順和園

居然遼裔有文人賢母孤兒八尺身萬世尊師承祖訓百年垂統屬儒臣  
江山故土無夷夏祠墓名園孰主賓帝室興亡幾回首尙留遺像古衣巾

磨墨

物理相推墨果珍，休將蹭蹬怨風塵。  
贏來筆底光芒氣，拚到燈前著作身。  
硯石十年名士老，聽香一室古人親。  
平生知白從吾好，磨涅從教世事新。

古鏡

珍傳古鏡重摩挲，卽物捫心發浩歌。  
今月當頭知歲久，春風識面閱人多。  
銷沈塵土形非缺，照破乾坤性未磨。  
一瞬息留千載恨，不教拂拭奈明何。

小孤山

獨峙長江最上游，小姑仙子有高樓。  
天連霄漢風雲壯，地絕川原日夜浮。  
吳楚休爭存砥柱，乾坤大勢重中流。  
蒼茫山色今無恙，回首中興百戰收。

山雲

入山有徑苦難尋，處處雲封隔遠岑。  
樹色迷離巖壑變，鐘聲遙度寺樓深。  
峰開天鑿孤臣節，岫出人描處士心。  
千載高風棲嶺上，那堪緘取贈知音。

鹽

誰知潤下奏奇功，甘苦由來用弗同。  
詩思散空今獨步，霸圖衰海古稱雄。  
賢臣相業梅羹外，寒士家風蠶糞中。  
口腹豈關輕重事，依然淡泊在淵衷。

昭明選樓

頻年逐鹿興戎地寥落誰聞帝子宮一代文章流海內六朝勝蹟贖江東遙遙天祿名  
何在赫赫文淵事已空人往風微今古恨瓣香還問士林中

清談

夷甫清流一世宗闌然談笑騁機鋒龍門且喜雌黃口塵尾寧披狡窟胸嵇阮諸人方  
赫赫蕭劉片土已洶洶百年板蕩知誰責空使懸河語折衝

茅屋二首

隻身天地也稱雄茅屋經綸古孰同海內烽烟高臥老天涯涕淚著詩窮數莖白髮欺  
簷雪一盞青燈透牖風恨失當年計豐鎬三閭管蔡與周公

半間茅屋儘相容八九能吞雲夢胸心遠高人如託鳥時艱處士亦稱龍臨窗白髮三  
千丈入戶青山一萬重堪歎吾曹生世晚草茨不復見黃農

拜石

車馬無聲廢往還此身翻拜石堅頑補天漫禱風雲會仗地甘投巖壑間千載盟思心  
抱璞一生低首向他山米公道是顛狂未贏得英光占卻閑

方孝孺

青史何尊一姓臣丹心十族總成仁日星炳耀綱常節天地孤撐鐵石身建業于今無  
故國果卿而後有斯人雨花臺畔留荒塚除卻江山萬事新

黃觀

千古文章道義根，斯人甲第豈虛論。  
國家忠孝回元氣，天地菁英萃一門。  
鍾阜崔嵬名不朽，秦淮鳴咽恨孤吞。  
故鄉父老能言舊，欲訪荒祠薦醴尊。

桃花源

武陵豈必非人世，春水桃花徧眼前。  
心遠雲山皆異境，地偏雞犬亦登仙。  
谿邊恍惚千重峽，洞外興亡幾百年。  
莫效淵明問漁父，扁舟散髮儘翛然。

胡廣

明史

漫將文穆儼文恭，先後蓬萊最上峰。  
一代功名誇沒馬，千秋氣節惜攀龍。  
經筵有幸皇孫寵，法曲何心帝子供。  
應恨引年無菊飲，稱名終愧漢華容。

楊士奇

自古強藩國弗延，斯人大計燭幾先。  
四朝繼續無疆業，三相齊名最大年。  
天遣孤貞矜母難，帝憐老景慰兒賢。  
于今鼎祚如碁弈，獨撫青編一泫然。

戚繼光

紀效論兵動若神，韜鈴不負讀書身。  
百年澄海無鯨浪，千里籌邊有騎屯。  
自古干城多世族，于今樽俎亦交鄰。  
風雲聚會河山壯，自欠江陵一輩人。

老樹



十仞臨山亦壯哉，莊生社夢近諧談。甘居風月千花後，飽歷星霜萬劫來。天地獨標松柏操，古今同惜棟梁材。婆娑世外饒生意，海上看桑已幾回。

半臂

美人嬌態獨伶俜，半臂新妝不蔽形。倚笛身輕風滿閣，折花影瘦月中庭。吟肩欲聳驚秋近，舞袖偏寒怯酒醒。誰憶憐姬老名士，千秋豔說舊儀刑。

訪友

幽居歲月苦駸駸，有友天涯尙訪尋。馬足關河千里夢，鷄鳴風雨百年心。幾回夜雪山陰棹，一曲陽春漢上琴。自笑山林常閉戶，卻從好鳥覓知音。

冰二首

內熱難教愧影衾，飲冰身世不忘箴。造從夏日嘲癡絕，履到秋霜寄恨深。壘甃終年名士節，玉壺一片故人心。長安倘許新詩換，贏得香山費苦吟。

丈夫壯志比冰清，堅白光中過此生。日出岷山峰有曜，風迴瀚海浪無聲。神通稚子求魚得，天相興王躍馬輕。何日置身三代上，凌陰羔酒見昇平。

黃淳耀

南都獨弗慕羶腥，一第孤忠著典刑。皎矣丹心爭玉潔，蕭然青志伴燈青。至今僧舍傳雙節，終古儒林重六經。浩氣不隨明社盡，誰言舉業負朝廷。

梧宮

漫觀梧樹問當年齊楚雄圖已杳然幾日章華惟片土無邊滄海亦成田興亡有恨輪  
樽俎聚散何常視席筵陳迹不堪回首處空留喬木慘風煙

殘柳

幾日春城柳絮狂衰殘容易怨秋光疏枝雨墜無多綠蠹葉風驚不待黃寥落深宮形  
弔影蕭條孤驛客思鄉伊誰貞幹方松柏歲暮悠然傲雪霜

銅鎮紙

文字精神象外參須知正直物中探方圓難脫書生見輕重寧空紙上談擲去金聲搖  
五嶽摹來鐵畫對三龜何由悟得從心矩出格煙雲醉墨酣

馬嘶

出門一往已情深班馬蕭蕭感不禁波上淒聲憐顧影風前矯首嘅知音驚回驛舍勞  
人夢喚起沙場壯士心伯樂難逢鳴輒斥昌黎舊恨古如今

采石磯

無限興亡感來乘采石風直擎孤月小橫障大江東太白曾高詠開平此戰功金陵天  
險扼閱盡幾英雄

促織

夜夜頻繁促織音，秋來無處不蕭森。  
聽從衰草微風際，覓去空階落月陰。  
恤緯頓驚婦恨盼，盼衣如訴旅人心。  
山家莫怨催寒早，三復幽詩蟋蟀吟。

俠士

是真俠士魏襟期，落落風塵志不移。  
屠狗賣漿埋姓老，思魚彈鋏立功遲。  
百年豪氣千杯盡，萬里輕身一劍知。  
擊筑已無燕市客，于今易水尙寒漪。

冬夜

迢迢深夜峭寒侵，且喜經冬返故林。  
酒綠杯深遺世事，爐紅氈暖老光陰。  
最難枕上天涯夢，不盡燈前歲暮心。  
會得乾坤冰雪意，一窗梅影伴孤吟。

席

青氈莫笑誤儒冠，席上珍無非義干。  
錦簇花間春驟暖，風漪竹下暑猶寒。  
雄圖霸卷河山壯，大幕閒眠天地寬。  
堪歎虛前宜室夜，蒼生不及鬼神看。

倪瓚

平生清潔出人儔，青史名高隱逸收。  
一代圖書歸閤閣，暮年風月屬扁舟。  
零縑奚止千金重，芳躅猶應萬古留。  
最憶獅林幽絕處，金闈何日得重遊。

負暄

嘯傲南榮未厭貧，高人還屬負暄人。  
書生有志茅簷老，天意無私斗室春。  
抵掌尙談千

載事捫心不愧百年身  
窗間野馬憐駒隙  
贏得光明日日新

聞歌

厭聞鼙鼓震中原  
數處夷歌耳不煩  
離唱多愁驚客舍  
夜聲深怨到長門  
英雄城下應垂淚  
商女江頭欲斷魂  
何似漢高還沛日  
殷勤檀板對金尊

越王臺

越王安在獨登臺  
多難心驚白髮催  
勝蹟天留吳國恨  
風塵人惜賈生才  
當軒碧水千帆落  
入戶青山萬馬來  
最是鷓鴣聲喚處  
年年草綠見春回

橄欖

甜酸一果喜新嘗  
酒罷偏餘舌本香  
好共茶甘留客話  
漫容骨鯁惱詩腸  
生涯不厭囊羞澀  
老境方知蔗味長  
盧橘楊梅重品第  
好添食譜饒年光

羊二首

羶行久不到柴扉  
起石仙人示化機  
隴上風霜盤馬逐  
村邊烟雨伴牛歸  
茅山地老松多壽  
莎苑春深草正肥  
願減食錢蠲細項  
齋心洗盡百年非

愛羊存禮各千秋  
九牧從知道不謀身  
世車危腸欲折功名  
竿濫冒堪羞十年海  
遠孤臣節五月江寒  
處士裘善會南華鞭  
後語浮世羝觸漫悠  
悠

勸農二首

我生猶及中興年木鐸巡春喜欲顛布穀音聲桑隰地藉耕時節杏花天艱難王業先  
教稼尊重科名在力田自古治平事溝洫君看神禹亦胼胝

誰念烝民粒食先耕烟耨雨正堪憐殷勤田峻趨千耦鼓舞徧氓願一廬帝儉難忘虞  
稷日天章尙見漢文年書生攬轡寧無策三復豳風七月篇

### 九華山

名山奇似石蓮栽九疊橫江翠作堆雨過爭從雲表出晴空齊向日邊開謫仙得句驚  
天破古佛尋芳特地來四十八巖遊屐徧最高峰頂且銜杯

### 水仙

爲愛冰清百卉芰靈藹可馴佩長鏡久依泉石成孤潔一出風塵便不凡天許梅蘭盟  
骨相人教金玉錫頭銜黃冠終老知無恨處士襟期在壑巖

### 井

春逢野叟話桑麻鑿井還將帝力誇親汲菊泉晨服藥閒尋桐蔭晚澆花美人幽怨牽  
絲虎處士虛聲缺螿蛙最好見磨樵斧處客來都識放翁家

### 初夏

無計留春興未央清和正喜日初長柳陰乍密書窗暗梅子全青酒甕香朝雨分秧千  
畝始夜寒護繭一村忙誰知農月閑人少遊舫城中更價昂

菘

莫笑迂儒愧素餐久諳世味得菘難  
漫將橘綠矜秋末不讓松青傲歲寒  
霜露飽經便酒醉風塵終老覺  
蔬安人生底事腥羶物記取參軍半畝寬

岳陽樓

戎馬關山老白頭多情還上岳陽樓  
聽殘隔浦聲聲笛數盡歸村點點舟  
掃壁已無張守墨憑軒猶有杜公愁  
祇今風月寬閒地誰與斯民共樂憂

垂絲海棠

紅萼絲絲弄春柔別有情風牽嬌作態  
雨纖細無聲抱蕊蜂如墜棲枝燕覺輕  
碧雞堪走馬誰繼陸顛名

燭二首

蠅角鄉園夜課遲半窗燭影雨絲絲  
于今烽火天涯老忍話家山夜雨時  
秋光銀燭對花枝獨坐燒香賦小詩  
喚起少年金馬夢風簷寸晷急書時

曉霧

細雨輕煙景一奇清光偏與曉天宜  
柴門犬吠山全失茅店雞聲路欲迷  
初日微茫無樹影晨風隱約有花枝  
須知豹隱平生志多在紅塵未動時

食菱

飽雨湖菱亦療飢算來食美是秋期故鄉風味堆盤出貧女生涯小甑炊舌有甘留茶  
罷後胸無芒角酒醒時漫誇咀嚼圓如芡磨刺艱難祇自知

長江

南北雄天塹長江萬里流閱空來往客淘盡古今愁春雨桃花岸秋風木葉舟茫茫遊  
子意天地一沙鷗

雁來紅

老圃紅如許秋光雁帶來非花和露染似樹待霜催赤奪雲邊錦黃消塞上埃美人鄉  
思切手摘盼書回

筆筒

與筆相依歲月長一筒古意滿山房虛懷若谷輪囷相守口如瓶翰墨香投竹人誰憐  
晉士插花吾欲贈江郎書生空羨功名老安世平生剩橐囊

早雪二首

早起多幽興霏霏雪滿園門封聞犬吠窗白看鴉翻冷意衾先覺晨光樹轉昏曉風梅  
正坼相對喜忘言

寒到山中早雲停雪意催絮飄無待柳花落獨先梅曉月烏啼去胡天雁帶來最奇紅  
樹裏翻見玉崔嵬

柿

誰解禪關半顆尋由來銜柿亦仙禽味從甘後風霜老顏到丹時歲月深書葉有情栖  
野寺吟箋無意報華林獨憐屋上新枝弱低首東平寸草心

嵩山二首

自從漢武登封後千載空留萬仞山金鏡迴標紅日表玉壺直上白雲間四方覽盡知  
環鎮二室歸來欲閉關何日生申應昌運三呼聲再滿人寰  
萬仞嵩高迥出塵從來仙館好棲真儘多摩詰尋幽處獨少盧鴻講學人引鳳吹笙勞  
夢想暮禽流水自心親許由尙有遺瓢跡千載清風重隱淪

芭蕉

何物春寒與遣愁芭蕉分綠一窗幽故留燭影臨風展喜聽簷聲待雨收鹿徑無心誰  
續夢蜂房有味獨驚秋  
朝川對雪清如畫曾解詩人意興不

周遇吉

天似難興古似今大同宣府獨何心常山而後思甯武空使英雄淚滿襟

春寒

新造江南  
難雲而歸

春寒北地本無奇最惜江南放棹時  
燕怯啣泥風似翦柳疑含絮雪團枝  
開顏賴酒朝朝醉問信看花處處遲  
莫笑龍鍾嫌料峭尙貪湖畔去尋詩



諸葛菜

待時諸葛起南陽一菜猶留萬古芳  
宇宙大名來獻敵平生滋味飽風霜  
拚教六出鹽梅苦存得三分俎  
豆香魚水遭逢今有幾此君每飯不能忘

滕王閣

俯瞰章江日夜流斯樓閱盡古今愁  
卻看帝子遺芳在曾見才人獨步不盼到便風片帆影催來暮雨一簾秋  
東南自昔多名士幾輩題詩最上頭

薔薇

滿架名花月月紅春光且喜四時同  
染香翠錦來番國買笑黃金出漢宮  
喜伴美人迎曉露忍教名士怨秋風  
酡顏未恨全無力鬪雪芳姿亦自雄

著

古訓猶深象箸憂先嘗甘苦爲人謀  
英雄並世驚還失帝業開基借可籌  
小節無拘來御史大載不置出條侯  
笑他豪侈羶腥客日費萬錢得下不

古塔

居今思古發幽情一塔登臨百感生  
歷劫幾磨珠補網千秋誰識雁題名  
興亡歲月憐蕭寺縹緲河山問鄴京  
欲向賀蘭瞻霽羽空留餘恨對孤城

角黍

佳名益智竟如何撫物興懷感慨多綵縷已隨前代去雕盤常伴異鄉過于今風土思  
荆楚終古荒江吊汨羅蒲葦難平千載恨沈沙鐵戟亦銷磨

錢唐江

立馬吳江望滄江日夜流濤分天目雪潮咽海門秋直瀉降胥弩橫通訪載舟錢王堤  
在否思借片帆遊

夾竹桃

徘徊綠竹竟難分花報平安日喜聞開趁輕風無雪壓種來和露也凌雲忘情縹緲逢  
高士拂面香塵識此君彷彿渭川千畝裏武陵紅雨正繽紛

食西瓜

漢家西域啓鴻猷瓜剖猶存惠澤流絕塞地慚牙慧拾長安人喜齒芬留鎮心三伏多  
佳士交口千秋老故侯務觀有懷消肺熱河須食案憶梁州

木鐸

三代于今此物留不禁希古思悠悠閭閻道在春風被金木聲中教澤流帝使道人蘇  
萬姓天將至聖炳千秋何時再振如綸綍喚起斯民盛世遊

暮虹

風雨全收暮景清斷虹偏喜此時生天腰繫得殘霞住澗底翻迎夕照明萬里橋空仙

縹緲一彎弓影雁孤征詩情漫效兒童詠好事人間重晚晴

山藥

堪羨珠崖百歲生山家清供美晨烹豔傳洛下郎君瑞贏得終南博士名西蜀躡鳩貪  
有味東坡糝玉淡宜羹米空莫漫愁朝甑且喜凝酥粥已成

木瓜

芳名瓜小木還柔且喜詩人句裏收繫去風塵難裹腹剖來河漢等虛舟瓊琚有報情  
堪佩桃李無言氣共投歲暮山齋破岑寂香盈書几亦清幽

鵝

翩翩白羽泛清波意態由來寄傲多不有右軍重知己山陰道士等閒過

鹿

喜將鳴鹿玩年華木石生成豈有涯洞古幾人遊聖域門幽何處訪仙家遂從草澤英  
雄老夢入蕉窗道路賒遼海可拓千歲鶴春洪長與共煙霞

春曉

春來又見草萋萋破曉郊遊試馬蹄驅犢有人過陌上聽鶯無夢到遼西藥欄旭射紅  
如抹柳岸烟迷綠未齊最愛小樓新雨霽賣花聲起月痕低

村醪

濁醪自適日巾車閑取村沽野徑斜田父攜來瓶塞草牧童指去杏飛花豐年有樂家  
家醉古俗無猜處處賒最愛茅簷杯共把隔籬呼起語聲譁

中冷泉

莫問吾生固有涯中冷泉已遍桑麻名高自古茶經著味美當時玉屑書欲取銅餅堪  
漱石惜隨鐵戟久沈沙玉泉第一今猶在歎息何年屬帝家

枕

溫公寢警未爲迂一枕由來事業殊鴻室書曾遺學子黃梁夢弗到農夫囊分秋色開  
三徑玉引仙遊入五湖欲取虎頭何處問不侯名將古今無

焚尾春

藥欄攜酒餞芳辰焚尾名花好殿春綃綻獨爭晨入市金圍相待暮來人魂進帝子留  
餘艷色讓宮姬託後身二十四橋堪贈別莫將離恨怨風塵

聞笳

萬里關河感不禁清笳常與淚痕深喚回公主傷春夢驚碎征人出塞心馬上風淒多  
急拍城頭月落有遺音沙場醉臥歌相和莽莽煙塵自古今

枇杷

四時偏歷物猶人雨露風霜萃一身太傅漫吟滙浦月相如卻賦上林春櫛宜並綠亭

亭立杏似初黃顆顆勻最羨江南載酒客楊梅過後又嘗新

藕

不染淤泥不受塵獨來真賞有佳人風花影底疑無地雲水光中好寄身一片頭銜齊  
玉雪滿腔心緒盡絲綸豈知混沌烟波裏菱芡偏霑雨露新

海濱

萬里滄溟萬里風乾坤淘盡幾英雄掀天浴日尋常事都在先生一笑中  
喜對驚濤醉眼開百年何地避塵埃太公雄武伯夷潔盡自蒼茫雲水來  
爐袖崢嶸萬斛舟源源鱗鱗敵琛鏐獨憐蠶市能千變望斷神仙十二樓  
衣香人影夕陽多重譯鞦韆笑語和出沒魚龍貪水戲恨無仙子解凌波

簾鈎

珠簾鈎上倍多情春好揚州十里行靜院無聲來燕息清池有影看魚驚秋河倒卷當  
頭近新月平分照眼明卻憶宮人斜挂處御爐烟裊幾回榮

黃山

五嶽尊雄外江南第一山星分吳越界雲出海天環黃山以環海勝絕頂蛟龍窟山頂有窮崖  
虎豹關近開山中丹砂泉可掬洗耳聽潺湲

丁香

雞舌奇香海國聞移根得地重殷勤蘭闈人解心中結薇省郎生口角芬豈獨臨風爭皎皎從教立雪自零零粉身晚節名逾顯靈苑猶傳濟世勳

白鹿洞

鹿洞宗風不可忘地靈人傑在綱常表坊未緲條規教金玉如聞義利章一代偏安新學館千秋正脈舊書堂廬山面目今無恙誰振斯文繼紫陽

蓼花

行來蓼岸畫橋東天水澄鮮意不同儘有閒鷗依錦簇絕無癡蝶入芳叢綠垂疏柳煙痕外紅映殘荷日影中莫對西風歎搖落江湖伴老是漁翁

孔雀二首

嶺表生成密箐中豈因翠羽慕雕籠倚屏金殿開闔闔始信文章命世雄射屏不掩美人羞翠帚金根亦自愁佛法光明回世界也隨白鶴轉珠喉

秋雲

翹首西風歲易過雲容變態九秋多涼天入夜輕如水淡日初晴薄似羅影落瀟湘宜有月織空霄漢欲無河漫辭出岫師陶令歸雁還思漢武歌

太湖

萬頃清波動遠空別開巨浸大江東乾坤吐納烟濤裏吳越平分島嶼中漉統有人留

戰蹟扁舟何處起英雄洞庭霜後山容好飽看千林橘柚紅

供菊

山家清供喜幽香獨有籬邊野菊黃薦到寒泉開壽宇釀成芳醞入仙鄉奇姿合種朱門裏晚節偏宜繡佛旁稽首高人思粟里好留貞白殿秋光

筆

聲技誰憐趙女工伊州喚起幾英雄神遊玉柱金絲外心醉燈紅酒綠中一曲悲歌驚謝傅千年哀怨憶秦宮何由正月歡無歇日日春生夜夜風

前題有感

素手殷勤夜漏催空房心怯忍歸來拂弦不惜時時誤贏得周郎顧幾回

塞上二首

塞上誰令啓戰場至今哀怨弔秦皇雲邊雁斷腸千折帳下筵清淚萬行天地無情留古月山川有意限遐荒何時得見四夷守策馬關河返故鄉  
華夷天限屬燕雲塞上連屯昔所聞赫赫長城終古在巖巖疆土自中分深閨望斷三春夢列帳雄誇百戰軍秦漢開邊千載恨何如干羽策奇勳

醃菜

御冬旨蓄喜芳鮮鹽甕冰壺自古傳歲共篋瓢貧士樂天留鉢飯老僧緣飽舍地服多

霜露食厭人間有火煙百事艱難根味好更希畫粥慕前賢

牧童

兒童放牧喜芳菲豐草長林帶落暉柳岸擁菱衝雨過秧隄吹笛趁風歸詩人遙問青  
帝社父老閒迎白板扉莫謂飯牛多賢子長歌扣角未應非

虎邱

天教名勝擅東州虎踞何年尙此邱霸業消沈無片土文人題詠有千秋海空獨著亭  
當面臺廢猶傳石點頭卻笑真娘欣託地百花深處一坯留

尋梅

風信頻傳未見梅偏尋處處得詩催心懸香海春無恙興寄孤山日幾回探遠每穿雲  
裏去怕寒偏冒雪中來何須化作身千億一樹相逢笑口開

葡萄酒

葡萄何幸上林栽卻歎邊疆爲酒開漢殿添香王母下唐宮含笑太真來美人帳裏鳴  
箏勸戰士軍前立馬催絕塞功名同草木于今贏得夜光杯

春陰

老懷無那惜春暉幾日輕陰正掩扉病酒卻嫌風料峭養花還待雨霏微杏涵紅潤鶯  
聲澀柳暗青迷燕影歸薄靄未妨遊興在尋芳晨發且添衣



雨花台

諸天法雨不重來，憑弔興亡獨此臺。  
靖難忠魂祠有主，中興戰骨地無灰。  
石頭尚見花千片，塔廢空存礫幾堆。  
舉目江山今似昔，新亭咫尺好銜杯。

白鷗

伊誰精白十分清，雅有閑鷗共此情。  
雪月交暉孤影潔，江湖送老一身輕。  
紅橋畫舫多新侶，碧海青天有舊盟。  
且喜漁翁垂鶴髮，相逢雲水話平生。

琵琶

仙樂如聽有賞音，琵琶聲與淚痕深。  
輕籠花底多幽思，放撥燈前半苦吟。  
出塞淒風公主怨，繞船明月逐臣心。  
豈真千載終胡語，一曲東樓自古今。

送客

故人語重客心驚，一曲離歌腸斷聲。  
柳店酒香還共醉，桃潭波淼漫孤征。  
渭城朝雨殷勤唱，滄浦秋風慘別情。  
但去南山君莫問，白雲無盡慰平生。

露珠

夜氣生成仰化工，珠圓露潤百花紅。  
荷盤歷歷迎初日，桂粟曇曇趁曉風。  
月魄印來光正滿，雨絲穿去色皆空。  
凝香早摘無人會，喜看牟尼入掌中。

納涼二首

心涼隨地意悠哉，偏向湖山醉眼開。  
竹裏披襟忘暑退，荷邊揮扇帶香來。  
閒追野老臨風話，靜領詩材待雨催。  
乘興不知天早暮，有時踏月放歌回。

不染車塵十丈紅，納涼幽事與誰同。  
羞耽綺枕三竿日，飽領綠衣五緡風。  
浴罷行吟斜照裏，酒醒放釣碧波中。  
天留俠骨炎囂外，別是人間清淨翁。

寒山寺二首

地據楓橋側，鐘聲動客思。  
吳中千載勝，方外幾人知。  
遺像僧兼俗，清詞偈似詩。  
寒山今在否，吾欲問豐師。

楓橋寺裏月曾看，依舊鐘聲到夜闌。  
千載文人傳片草，一時勝地著名蘭。  
龕中幻影猶凡俗，石上留題盡話端。  
覲面真仙誰識得，相從雲水訪豐干。

釣魚五首

一竿煙雨髮蒼蒼，回首磻谿日月長。  
八百開基如曉夢，太公應悔起鷹揚。  
雲臺圖像幾英雄，堅坐苔磯獨此翁。  
千載江山無定主，終輸一縷釣絲風。  
蓑笠高人寄意深，空江獨釣豁胸襟。  
直釣去餌緣何事，洗盡平生得失心。  
足重山游路苦賒，市中朝徵逐厭紛譁。  
殘年無復安排處，好共漁翁傍水涯。  
歷盡風波意已仙，分贖並釣亦前緣。  
扁舟不繫知何處，祇在蘆花淺水邊。

萍

萍蹤偶聚且婆娑梗泛光陰等客過飛絮無情辭故柳隨波有意傍新荷浮沈已拌江湖老飄泊還禁雨露多看醮漁扉秋水遠一汀分綠上煙蓑

秋色

莫笑秋雲薄似羅得逢好景且婆娑霜催豔菊黃盈圃雨打殘荷綠醮波村外稼收平野闊樓頭木落遠峰多正須策蹇尋詩去紅樹青山滿眼過

落葉二首

搖落悲秋後千林葉漸疏迎風疑墮鳥點水誤遊魚爐畔供溫酒窗前誨校書天教重晚景紅豔滿階除

木葉無邊落淮南有客過行來幽徑塞望去遠山多亂逐枝頭鵲輕隨檻外波蕭蕭驚旅枕將奈月明何

秋風二首

年光容易又秋深蕭瑟西風動桂林中夜讀書聲過耳一庭落葉客驚心催寒先到關城柳向晚偏聞御苑砧正是菊芳蘭秀日白雲歌裏好披襟

杖策臨風百感生每逢秋至倍多情清催畫角征夫老寒徹書帷志士驚萬里月明無過雁千林霜重不藏鶯江鄉樂事君知否有約蒹鱸酒待傾

星

霜星不覺白盈頭收斂光芒靜斗牛句列宿郎官曾一瞬少微處士卻千秋長空幾點雁橫塞斜照闌干月滿樓自謝故人辭帝座桐江作客儘風流

花瓶二首

花好人長壽銀瓶插亦鮮幽香浮酒盃古色映詩箋凍釋朝曦候妍生夜月前涵春君莫逆一掬且隨緣

愛護銅瓶爲寫生妬花風雨漫無情姿橫玉膽天然趣香浸冰心分外清淨几春涵梅數點明窗韻續月三更東皇巧助詞人興贏得芳名美擷英

大庾嶺二首

東嶠窮高處征人首重回蠻荒從此限瘴癘幾曾開弔影全無雁先春獨有梅甘泉思卓錫何地訪僧能

梅枝開與落寒燠一方殊題驛詩人老征輶逐客孤天低雲罨寺地迴樹規衢南服今雄視安危此真區

薪

薪樗壽樛古猶今散木偏教百感侵折去無情虛假斧爨餘何意續鳴琴燃萁煮豆宗臣淚落葉添槐節婦心燭向松陰訪高士一肩遙望白雲深

金魚

喜見金魚逸興新寄懷常得養天真藏身且作池中物避世還辭席上珍洗硯有時堪  
守墨吞鈎無意漫垂綸化機要識盆山趣風雨龍門憶孟津

游山二首

茫茫塵海寄游蹤獨愛名山豁此胸飽領煙霞幾緜屐消磨歲月一枝筇尋碑每戀崖  
前石問寺時追嶺外鐘太白已遙同好少謝公行迹白雲封

勝遊乘興一身輕老至看山倍有情久入林深忘脚健遠聞泉細覺心清煙巒雨岫朝  
朝變香椀詩囊處處行白髮喜逢千里友快談五岳慰平生

古佛

時方南借西山長  
安寺屋爲善所前

偶尋廢寺作幽栖古佛森嚴眼欲迷跌坐負牆塵漠漠描畫壁墨淒淒燈昏穴鼠隨  
時出供闕臺烏入夜唳無量光明無量壽不禁翹首到天西

春草三首

草色離離歲有常天心予奪費思量幾番野火難燒盡一樣春風各短長  
造化流行總一般春來草綠自閑閑滿腔生意天心見爲愛窗前不忍刪  
寒盡春回草滿墀太和景物自熙熙河邊蕪淺鋪茵地坡上莎長試馬時待女踏來思  
進履與兒鬪去慣輸詩瀛洲有意年年綠問着東風卻不知

春日即事

莫負光陰忽此生一春能幾日  
清明節池塘水暖浮雛鴨  
楊柳風和度曉鶯  
隨處青帘邀客醉  
儘多畫舫載歌行  
看花樂事追康節  
閑挽柴車遍洛城

髮

束髮原非血氣干  
漫言一怒可冲冠  
續來墜緒千鈞重  
解到禁絲百結難  
滿髮風塵欺客况  
垂肩霜雪歎儒酸  
寧知白首心彌壯  
寢鄂英姿尙據鞍

落花

方惜輕寒花較遲  
烏嚙催落又空枝  
乍禁小雨飛無力  
旋倚和風舞有姿  
紅溼新泥添燕壘  
豔飄香餌入魚池  
山翁癡絕留春住  
卻愛家僮未掃時

月夜

卻忘夜久曳枯筇  
皓月當空豁此胸  
滿樹風聲驚塞雁  
臨窗雲影伴秋蛩  
輞川遠見林間火  
太華時聞天外鐘  
乘興清光爭炳燭  
花陰且喜社醅醲

竹杖

漫誇筇杖竹痕斑  
磔硤誰知道路艱  
幾兩清風添足健  
一竿瘦影伴身閒  
芒屨共領雲兼水  
箬笠同參雨裏山  
博望當年開萬里  
寥寥此物得生還

野花二首

攜筇野外欲何之  
寄興尋花別有思  
當路吹香隨地發  
傍巖幽豔少人知  
春光可惜風

塵老天意無私雨露滋回首上林空寂寞東籬贏得傲霜枝  
長安看徧一身輕爲愛奇花野外行樵叟逢來知有處牧童問去本無名山林毓秀幽  
還豔泉石添香遠更清開謝年年人未識孤芳天地自生成

巫峽

卻從巫峽喜穿行慣涉風波險不驚十二峰凌千里遠萬重山送一舟輕魂飛神女朝  
朝夢腸斷啼猿夜夜聲天地何心限西蜀撥開雲雨自清明

晚霞

人間晚遇本難期雨霽明霞景一奇鷲影天垂秋水遠魚鱗雲襯夕陽遲看宜梅嶺初  
晴候坐愛楓林欲暮時莫笑照顏紅似醉風光還稱白鬚髭

楓

最宜楓葉嫩霜天紅似春花特地妍舉酒客留明月下停車人愛晚風前夢回蕭寺鐘  
來遠吟到吳江句得仙記取放翁扶杖處苑寬妙手畫中傳

假山

假作山川聚米看小庭風月倚闌干丸泥忘卻秦關險拳石思通蜀道難千里移來新  
錦障一峰買得舊煙巒閉門不覺攀躋苦着脚方知寸步寬

羽扇

閒拈羽扇思無窮異物堪驚一世雄  
飄擬鶴姿輕視雪動如松籟凜生風  
指揮相業三分定飛書功名入翻終  
千古興亡誰在握放教明月入懷中

初晴

空齋昨夜雨蕭蕭盼到初晴破寂寥  
池面魚游欣驟暖枝頭鶯語乍添嬌  
風微水闊雲猶在日薄林深霧漸消  
且喜路乾堪覓句青鞵乘興過溪橋

豆腐

精華糟粕共芬芳隨事供盤日有常  
威饌儼然同玉版和羹原不讓瓊漿  
飽諳費舍詩書味領略僧堂七箸香  
平淡家風布帛粟此君每飯弗能忘

蛛網

從心規矩任縱橫一縷盤空自在行  
珠綴樓頭知過雨絲牽屋角報新晴  
每嘶郎馬人爭喜卻羨淵魚物有情  
買得落花明五色容身偏愛錦爲城

天台山

欲訪丹邱世莫逢瓊台獨有最高峰  
天留江海居閒地山顯東南第一重  
萬丈標霞迷絕境千年採藥失仙蹤  
國清寺裏豐干在且向殘僧問觀宗

古槐

矯首高槐費苦吟千年存得幾園林  
孤撐岱廟星霜久飽受唐宮雨露深  
搖落望穿貧



婦眼婆娑隱痛老臣心  
古人不見今柯夢  
一枕清風趁午陰

古鼎二首

三代儀型杳莫昭  
摩挲古鼎已家家  
問從輕重周家舊  
鑄始神奸禹室遙  
籀篆幾行精鑄刻  
斑斕五色任磨銷  
尊彝壽世雖同久  
何似圖書有列朝  
古人作鼎意何深  
覆餗詒譏慨至今  
款識難欺名士眼  
重輕易啓世臣心  
品進三代思宗器  
秘洩千年覲故林  
歎息子孫空永寶  
孔家三命有誰欽

酒家

典盡貂裘馬上誇  
英雄落魄酒爲家  
雨遮紅杏村邊遠  
風颺青帘郭外斜  
易水不聞燕市筑  
秦淮猶唱後庭花  
一杯殘日呼愁起  
萬里江山咽暮笳

蛤蜊

東海新添食譜傳  
錫名內史號甘圓  
浮沈身是池中物  
開合光生水底天  
久掩泥沙能煥彩  
一登鼎俎實芳鮮  
隔牆聞賣心偏喜  
吟到橫塘句亦仙

蜂

莫談蜂蠆重咨嗟  
閒伴幽人逸興賒  
世態恨無三尺喙  
生涯喜有四時花  
飽嘗甘苦方成蜜  
歇盡顛狂始放衙  
畫永渴來窺硯水  
更添詩思放翁家

莫愁湖

湖畔詩情望古遙，  
春愁如夢水迢迢。  
空思金粉留千載，  
不怨江山送六朝。  
棋局難消元老恨，  
鶯聲尙學美人嬌。  
綠楊城郭今猶在，  
猶是賸買香醪問畫橈。

玫瑰

錦繡春藏帶露開，  
稱名特地擬瓊瑰。  
新妝豔奪珊瑚珮，  
芳醞光浮瑪瑙杯。  
翡翠凌風仙子過，  
胭脂映日美人來。  
天生玉質知多少，  
乞向階前萬樹栽。

尺

功名得尺付雲烟，  
分寸光陰老更憐。  
拋去金科繩檢外，  
絮來長劍短檠前。  
捫心枉直千秋業，  
放眼縱橫萬里天。  
獨惜量才今古事，  
風塵識拔幾遺賢。

帆影二首

偏愛孤帆影，  
風輕雨霽時。  
粘天歸浦遠，  
依岸夕陽遲。  
鏡裏開圖畫，  
尊前動客思。  
清遊經赤壁，  
卻憶放翁詩。

浮生歲月苦駸駸，  
帆影迢遙感慨深。  
遠浦似懸高士畫，  
中流如見逐臣心。  
斜連雨白波兼湧，  
倒映潮青日欲沈。  
望眼思迎千里客，  
喜來無恙話山林。

蕉

美質天生重古歡，  
莫因庶出等閒觀。  
亭亭玉笋風難折，  
滴滴瓊漿露不乾。  
世味悠長名士老，  
宦情冷落大官寒。  
虎頭漸入皆佳境，  
奚啻汾陽拜賜看。

象

虎豹同驅到遠邊，周公德澤至今傳。  
焚身齒莫知幾晚，作箸杯宜杜漸先。  
耕野尙聞明聖世，立朝曾見太平年。  
性仁得享無疆壽，天地生成豈偶然。

醉翁亭

太守清遊孰與倫，意非在酒樂吾真。  
浮沈天地朝還暮，嘯傲林泉主亦賓。  
風月無邊輪野老，江山有幸屬高人。  
瑯琊名勝今猶昔，除卻殘碑萬事新。

荷梗

天教秋露洗殘紅，閒看荷枯景不同。  
玉立有高萍影外，根深猶寄藕香中。  
招搖風月停詩舫，管領烟波繫釣筒。  
莫歎此身終泛泛，一心且喜萬緣空。

紡車

熙皞遺民不可名家，家惟聽紡車鳴。  
成來一縷驚秋早，轉去孤輪對月明。  
女伴燈前豐歲樂，征夫衣上別離情。  
如今誰挽豳風俗，夜績村村見太平。

待月二首

近水樓臺不可尋，遙遙林下美人心。  
憑欄久盼星光隱，沽酒安排日影沈。  
不寢三更先倚幌，相思千里尙停琴。  
清暉未厭遲遲見，古往今來寄意深。

人間樂事月當頭，東限連山尙小留。  
坐久不知天地迥，望深難遣古今愁。  
百年光景輪

棲枕千里心期入倚樓未必浮雲終作祟舉杯相待思悠悠

種菜

小園半畝一身藏恰有參軍地可商早韭迎春看甲坼晚菘趁雨伴丁忙繞畦拾塊英雄老閉戶攜鋤日月長要識人生須底物滿天霜露得先嘗

畫鷹二首

爭看名畫重鷹鷂摹寫英姿豈偶然懸去干旛知勁翮吟來鐵馬有題箋綿州蹟古千年地遼海神傳萬里天方識武揚深寓意楚公筆底尙餘妍  
何事英雄畫裏收鷹揚自古屬陰謀廣寧妙筆無雙手務觀題詩最上頭點血圖成千里勢風塵寫出一天秋世間尤物宣和本尺幅能令隘九州

石鐘山二首

小山獨障大江東奇響誰知水與風勝蹟常存天險外清遊偏在月明中名傳玉局無雙記師紀湘鄉第一功奚止文人留片石鐘聲曾閱幾英雄

鐘鳴何處小烟鬢界首江湖此一關形自陰陽陶鑄始聲來天地有無間水風相搏山彌壯星月交暉石不頑留得坡仙夜遊記艷經名注欲從刪

羅漢松

難尋羅漢最高峰隨喜來看古寺松有相風姿如伏虎無聲濤勢欲降龍問師何處雲

中去訪道他年徑裏逢  
獨會禪心人不識  
靜聽萬壑入霜鐘

顯微鏡

顯微人事代天工  
一鏡攜來氣自雄  
日月真形收眼底  
山河大勢聚胸中  
管窺蝸角蠻爭觸  
燭照蠅頭叟傲童  
何日得窮千里目  
掃開雲霧見晴空

稻田 二首

水利農田萬世資  
東南稻美繫人思  
芸芸徧野雲千緡  
汨汨平溝雨一犁  
蜀壩已開前古制  
涇渠還作太平基  
羈懷夢入江鄉景  
滿眼青秧畫裏詩

久倦風塵故里回  
田間觀稻幾徘徊  
渾渾白水掀泥起  
點點青秧趁雨栽  
萬頃天連飛鷺去  
千村人約踏車來  
江南豐歲農家樂  
豔說紅蓮笑口開

銀魚

如銀魚族喜形藏  
白石清泉樂未央  
翁釣臨風鬚煥彩  
鷺銜映日羽生光  
躍舟天許興王業  
賜袋人誇學士章  
潛伏彌昭堪作鑑  
休將香餌過濠梁

蛙

一篇秋水寫詩情  
井底終休與海爭  
得意軍容增怒氣  
癡心天語問私聲  
跳梁自恣空千里  
待漏翻翻鷺噪六  
更好伴幽人  
供鼓吹草間那復不平鳴

汾水 二首

汾水當年繞帝宮晉陽兵甲古稱雄懷襄底績居先地利導平原第一功美玉鍾靈傳  
世少醇醪買醉與誰同于今禹甸難回首沮洳空歌采莫風  
神禹胼胝此首功千年王氣水流東于今贏得盲翁在古柳斜陽說令公

山茶

曼陀名卉出天南誰向梅邊竹底探春到枝頭先冷豔夢回舌本尙餘甘漢宮未許風  
流滅岷嶺偏禁雪意酣烈士心情同歲晚好尋三谷結茅菴

馬鞍

莫言馬上貴乘時一種雕鞍有所思萬里風塵孤劍寄半生鞅掌百壺知淒涼撫髀英  
雄老據盼驚心矍鑠姿琴調難傳今古恨名山何處訪鍾期

炊煙

憑高一笑與誰同點點炊煙入望中百歲豐穰斯有象萬家生聚此應雄山村繞樹迎  
朝日漁浦橫舟送晚風最是幽人會心處黃梁未熟莫怱怱

棗

莫嫌世味苦分明取棗遺金且試嬰曼倩奇聞來御苑安期珍食出仙城糕成柳色題  
名夢花落桐陰送別情何日上林重獻果丹心絳質不虛生

蟻陣

勾回蟻陣看兒嬉卻誦人間省事詩鳩喚風聲方逐北鸛鳴雨意決雄雌待將都邑封  
遷後等是侯王夢醒時千載韜鈴青史上腥羶况味祇如斯

青塚

誰繪琵琶馬上妝至今青塚尙流芳天荒地老人何在雪壓風欺土亦香騰有圖形酬  
殿陞永埋環珮鎮疆場年年春草生顏色千載征夫欲斷腸

桐葉

客舍春歸節序道滿庭桐葉怯登樓千聲恨徹唐宮雨一片心驚漢苑秋金井夜飄霜  
信落綺窗晴轉午陰收棗花尙喜長相伴且挽柴車爲小留

鍼

一縷傳來萬法空金鍼普度與誰同穿絲難遣昏昏月投芥相逢習習風稚子敲鈎無  
事樂謫仙磨杵有心雄涪翁倘啓千年秘壽世還先砭灸功

聽雨

好詩偏向雨中成聽到簷間劇有情慣惹閨愁欺倦枕卻撩鄉思間疏更小樓側耳春  
先覺客舍拈毫韻亦清最愛幽人茅屋底銜杯靜對一聲聲

芹

名珍雲夢澤邊尋此物由來重士林鹿野聲中三代制頻宮香裏百年心清同荷芰污

難染臭比蘋蘩味更深歎息千秋勿輕獻漫從口腹覓知音

駱駝

生從漠北本無羈賦性含靈亦自奇虜塞蹄輕趨水草天廚峰美勝牲犧木蘭歸夢飛  
千里郭樹榮名噪一時最惜東風吹血夜舊都來滿又誰知

天目山

鳳舞龍飛第一山東南靈秀此烟鬟池懸峰外乾坤大洞隱雲中日月閑遺屐高人何  
處有采芝仙侶幾時還謝公臥去名千古絕頂吾思挈榼攀

冬青

何物青葱憤忍冬巍然此樹見孤蹤不殊凡卉春前色獨占妍姿歲暮供密葉正陪梅  
影瘦繁枝翻襯竹陰濃霜欺雪壓知無憾松秀猶堪對遠峰

竹榻

斬春名竹古曾傳處士清修榻可穿對几正宜聽雨坐臨窗還得看雲眠移來道暑深  
林地橫去生涼似水天恩怨久空秋夜好倘逢徐孺喜相延

綠陰

陰陰綠樹護幽居一味清涼爽有餘翠袖添寒新雨後碧窗便靜午晴初日斜屋角聲  
喧雀風定橋邊影聚魚卻喜槐柯無俗夢放懷高枕到華胥



醉蟹

名蟹何須十二圖，但期佳釀醉相呼。  
竊來吏部新春甕，夢入文君舊酒壚。  
俠骨持螯猶喜見，真腴獨醒人笑禪。  
中蟲羞比監州世味殊。

黃蝶

小圃欣看一色黃，翩翩飛蝶弄秋光。  
如金點點穿花徑，似繭雙雙過檨牆。  
晚節留香貪伴菊，前生入夢笑炊粳。  
籬邊卻助幽人興，沾得鵝鷓又舉觴。

洞庭湖

關山戎馬幾時休，生似湖天日夜浮。  
吳楚不分雲水界，乾坤同浸古今愁。  
扁舟來往三湘客，叢橘縱橫八月秋。  
賢守難逢才士少，題詩誰上岳陽樓。

鷄冠花

奇花雄視血盈顛，冠冕羣英舞欲僊。  
載月衝寒茅店外，傲霜爭豔竹籬邊。  
黃如春曉鶯衣嫩，紅似秋高鶴頂鮮。  
常伴幽人叢裏立，峨峨翹首獨凌煙。

撲滿

滿多招損儘堪憐，卻喜胸中志益堅。  
守口尙關經世計，積銖方羨起家賢。  
百年富貴輸銅臭，千古英雄愧瓦全。  
翻笑童心虛一擲，儻來聚散等雲烟。

秋池

無限秋光憶故鄉園林勝境在池塘一雙桂棹迎新月四面菱歌送夕陽夜雨巴山還作漲清風洛社又催霜樂天獨洗塵心淨卻置藤床是道場

核桃

蟠桃留核笑人癡佳果稱名卻最宜象外園中雖作梗剝膚存液尙如鉛堆盤喜薦同榛栗繞膝分甘共棗梨芳潤心脾稽本草一般風味老方知

蝸牛

蝸角牛名實不如星精自是別蟲魚崢嶸世界雙蠻觸渾沌乾坤一室廬錦字漫誇天子兆枯形偏效野人居但教風雨藏身固素壁流連樂有餘

釣絲二首

自古名傳幾釣絲蘋汀醉把夕陽時香飄菡萏隨風裊倦立蜻蜓帶露垂渭水千尋維世遠富春一縷繫人思直釣去餌非無意賸縮江山屬與誰

一縷空明水底天烟波嘯傲若登仙季真風月身如繫管領湖山五百年

紙

一紙能令價有聲楮先生號若爲情風清漫喜鶯舞雲白還教雁字成世難司農虛擬幣時危豎子侈談兵洛陽騰貴知何日待寫鴻文頌太平

燈花

花好天教願不違，喜占燈燄是耶非。  
閒敲棋子聲聲落，靜對爐香片片飛。  
冷豔空闈人易老，繁星遠塞客應歸。  
神仙也解尋芳夢，夜夜祥光照九微。

柳絮

弱柳依依未忍看，小庭飛絮又春殘。  
風吹壓酒香仍滿，雨灑霑泥色未乾。  
高下如烟偏作態，飄零似雪不成寒。  
最憐萍逐橫流去，欲共梅花一曲難。

金谷園

石氏芳蹤不可留，澗邊金谷變荒邱。  
落花有意繁華散，啼鳥無心雅韻流。  
敵國富曾堪幾日，墜樓名亦足千秋。  
香塵已杳園何在，憑弔徒深萬古愁。

鱒魚

一美江鄉莫與京，獨憐四月趁潮生。  
登盤風味方思養，上市光陰正賣錫。  
多刺尙添才子恨，小鮮偏愛老臣烹。  
吳淞鱸膾雖同賞，豈待秋風始得名。

曉色

太平景象問庖犧，曉色清明得似之。  
柳態迎風多自在，花姿帶露尙迷離。  
青從麥隴烟消後，紅趁芸窗日上時。  
最好山居晨眺遠，蒼茫獨立自吟詩。

獨鶴

獨往無依亦快哉，凌空一鶴出塵埃。  
縞衣道士橫江過，華表仙人渡海回。  
落落雞羣憐

顧影兢兢驚在愴餘哀待看天際孤雲裏萬里山河任去來

桑葉

十畝桑田葉正肥太平景象是耶非牆頭執斧隨風落陌上盈筐帶露歸  
矯首雞鳴青似染關心蠶老綠應稀遲遲春日今猶昔想見倉庚處處飛

哈密瓜

百戰開邊自古愁瓜名猶喜至今留星霜西域尊天使風味東陵抑故侯  
浮去團團關塞月剖來涼澈漢官秋砂場血染紅如許獨抱丹心萬里遊

五臺山

自從胡虜服祇圍赫赫名山萬古存形勢直疑天地窄威靈翻失帝王尊  
宏開東土無雙剎妙顯西方不二門五嶽風雲今變幻常留此境鎮乾坤

秋葵

老圃繁華事已非秋容葵豔向依依摘從松下含朝露看到籬邊向夕暉  
膏澤四時瓜讓美風光七月菽同肥菊黃共保霜前色晚節飄香百卉稀

深院

涼入簾櫳百慮清沈沈院落有深情鞦韆月落新秋色絲竹風傳靜夜聲  
寂寞宮花通曲徑依稀闌夢繞疏更朱門甲第雖如海茅屋三間樂此生

月餅

新節家薄夜忙一年容易又秋光形分天上團圓影味識宮中不托香丹桂漫誇名  
士畫紅綾猶得大官嘗飛空金鏡驚流序細嚼飴酥樂未央

熨斗

火乘金木若爲情炎上翻教潤下成雅有爐錘供赤手好將衣被到蒼生賦形坎壈回  
春煦操柄縱橫致泰平但使風煙從此靖歡騰挾纊萬家聲

水紋

一水誰教百態生如紋細浪卻縱橫風梭吹縵春無力冰簟鋪成月有情紅映窗光朝  
日麗碧搖簾影夜雲輕橈停潮落漁村晚暹愛清流鏡面平

鄱陽湖

盈浦西連一片秋五湖烟水弄扁舟地結彭蠡乾坤隘溪匯昌江日夜流堪頌中興開  
戰略豈容縱賊破奸謀匡廬峰頂聊東望駭浪浮天點點鷗

立冬

乾坤閉塞獨何爲霜後冰前最可思南畝滌場豐歲樂北郊迎候漢官儀水邊雉入非  
無故天末虹藏合有期豈特不周風信至床隅蟋蟀也知時

柏

一木難將大廈支由來神力有扶持棟梁豈待文章露鸞鳳還經香葉棲霜肅中河貞婦節風高古廟相臣思柯銅根石今誰惜獨仰千秋際會時

虎皮褥

下莞上簟夢熊羆虎帳談兵又一奇苛政無形安衽席經生有味擁皋比灾狐合去君侯位蒙馬還驅敵國師方錦龍鬚同八尺可能大庇士寒時

江雪二首

雪際人蹤絕江空景最奇洲蘆花一色岸柳絮多姿斷雁低垂處孤舟獨釣時最憐千里客帆重棹歸遲

雪境畫難描長江入望遙天低烏鵲起波定白鷗搖色映三城戍寒生萬里橋一簣身了事買棹趁歸潮

食粥

南山誰辦數弓田藜釜方知粥味鮮考父有銘傳達後宛陵得法致神仙雲堂早過香生鉢月殿宵吟玉滿筵憂樂要懷天下志功名原始斷壘年

爆竹

爆竹家家喜氣盈清時樂事掃機槍千花銀合偏無缺一樹珠聯卻有聲燦爛熙春童子戲崢嶸餞歲老人驚年年願祝平安字簫鼓喧騰不夜城

潼關

排闥山奔勢壯哉漢唐門戶若爲開兩朝帝業從茲入千里河聲到此迴太華殘雲飛  
白去中條疏雨送青來驛樓題罷人何在牘有漁樵共舉杯

菖蒲二首

高齋無長物清玩寄萍蹤九節能師竹千尋獨讓松青留韭几淨香透綺窗濃點綴盆  
山上心親處士供

安樂窩前詠新蒲景物幽清芬多繞真淨綠獨迎眸常伴滋苔石還依近柳樓光陰隨  
分好易足復何求

夜坐

斗室端居夜氣深窗前獨坐影沈沈閒看飢鼠風過席靜聽鶯鴉月滿林酒後香消仍  
剪燭花間露溼尙橫琴一龕贏得蒲團穩洗淨平生塵垢襟

歸鴉

日落長空有暮鴉歸來不覺在天涯羣飛點墨還如陣一宿寒林便是家欄外聲呼牛  
背立巢邊影伴雁行斜倚筇閒數添詩思零落枝頭襯晚霞

羅浮山

誰賦羅浮夢裏遊夜遊靈運獨拈毫百嶽近立奇峰壁萬里遙吞大海濤花首風雲臺

昨聚朱明日月洞中高稚川丹竈今猶在欲訪冲虛逸興豪

食芋

西蜀躑躅卒歲糧誰知芋食慶豐穰燔煨候火寒灰底磊落登盤野菽旁一宿僧齋心  
自賞十年相業味先嘗何時雲水岷山去羹羹東坡玉糝香

畫屏

誰識屏風畫意饒倚來寒盡怕春宵相看銀燭秋光冷不負香衾夜氣嬌甲第豪誇金  
寶飾草堂孤詠月雲謠邊鸞花鳥今何在想見征西一幅描

返照

返影深林去似梭魯陽何日有揮戈天憐烏兔流光速人重桑榆晚景多花隱穿簾雙  
燕入楓明迴陣萬鴉過青苔復上空山裏但見門前雀可羅

紫藤花

藤陰小坐愛花開紫色鮮明不染埃斐几筵前清影墜竹根爐畔妙香來低垂曉露欺  
紅藥飛趁斜陽點綠苔莫恨閉門人事少餘芳滿架且銜杯

富春江

浙西圖畫是天開獨羨江流美莫追仙去桐君仍有廟釣空巖子尙留臺無邊綠樹千  
帆隱夾岸青山萬馬來七里灘聲終不改曾驚春夢幾人回



蠶

一物猶堪作帝基，幽風蠶事入笙詩。微軀眠食春光老，滿腹經綸沒世知。口角有聲聞下筆，胸中無染漫悲絲。束身自許尊王業，黼黻心期獻繭時。

搗衣石二首

寒衣欲寄是深更，石不能言最有情。縫憶室中慈母意，採原山上望夫名。半規斜月侵階色，一片清風近苑聲。似訴征夫千點恨，愁心如搗夜分明。

征衣搗徧幾曾休，此石堅頑孰與儔。爲送貞情馳塞外，難留黛色在山頭。驚回月下三更夢，喚起天涯一片愁。別恨年年消不盡，千家聲報漢宮秋。

鐘聲

何處鐘聲驚醉眠，清心常在早霜天。和煙遠墮荒寒外，激石虛飛浩淼邊。細徑僧尋雲隱寺，空江客詠月臨船。浮生祇此生，晨覺莫待人朝飯後憐。

松子

寂寂柴門不掩關，貪看松子亦開顏。長生美佐千年食，採擷高從百仞攀。香引仙心來古寺，聲和詩思落空山。最憐月下垂清影，常伴幽人散步還。

峨眉山

欲問峨眉首重搔，幾人絕頂得遊遨。雲容淡掃雙峰迥，月魄橫描萬仞高。天使莊嚴開

梵宇地鍾靈秀有文豪會看蜀道風煙淨歷井捫參不憚勞

棉花

天教福利九州同此物來從海舶中衣被蒼生源宋代畫圖丹旆補幽風分苗雨足三  
春業挾續雲屯萬世功誰使乾坤開浩劫翻令霹靂助兵戎

香爐

室無長物有餘妍獨對香爐思邈然風定捲簾留細縷日斜欹枕看霏煙新幕周鼎商  
彝式常伴詩囊茗椀邊心賞忽期遊汗漫匡廬峰影落尊前

孤雲二首

掃空一切任沈浮心迹孤雲得似不海濛遙天看白起峰擎特地有青留九霄落落輪  
歸岫千載悠悠入倚樓且喜清風隨變滅從來不慣惹閒愁  
孤雲變態獨奚如一味升沈任卷舒天外合依仙子去嶺頭應伴野人居雁聲遠入隨  
風墮梅影蕭疏帶月勑莫問無心仍出岫直將天地作穹廬

洛水

洛川雄勢至今存熊耳東來萬壑奔遠挹驚濤趨四闕長流王氣聚中原禮隆沈璧天  
家瑞夢寫凌波帝子尊獨有泛舟人望在千年元禮問淵源

蠟梅

不同紅蕊共爭妍別有新妝淡似仙  
寒意冲山催臘盡清容映雪占春先  
飽看冷豔顏欺玉細嚼酸風舌湧泉  
且喜華堂天竹畔歲朝雙供畫圖傳

冬夜

隆冬靜夜四無聞小住蝸廬亦所欣  
花影寒侵簷外月篆香細繞枕邊雲  
夢回衾冷燈餘燄詩就爐溫酒半醺  
待旦欲尋梅市去鴉鳴窗白雪紛紛

太湖石

太湖石透世間稀斂瘦形容或庶幾  
千載生成烟水闊一拳擎出翠雲飛  
牛公品第名園重白叟輕裝罷守歸  
輪入平泉無處問何如伴釣傍苔磯

春晝

春光九十滿庭芳晝永還添詠事忙  
柳岸有陰風乍暖茅齋無客日偏長  
聽鶯載酒朝朝醉結駟看花處處狂  
康節清游忘旦暮小車隨地得徜徉

萱草

人生難挽是慈幃獨見萱叢悔去非  
芳草留情知雨澤黃花吐豔戀春暉  
百年日月思親老千里風塵入夢歸  
未樹北堂餘舊恨忘憂無計更牽衣

長城

萬里雄圖笑祖龍千年曾隔幾邊烽  
于今美女墳猶在想見當年淚滿胸

羊毫筆

且喜剝羊換兔毫，雄封分得管城豪。昌黎不必誇毛穎，饗士家家重少牢。

白兔

明視由來名世雄，不因知白歎飄蓬。藏身銀穴風光裏，匿影冰輪月魄中。守墨豈居毛穎後，揮毫常與管城同。羲之獨有臨池興，換得鵝羣色相空。

繩床

家無長物獨繩床，處士清風味可嘗。甕牖依來寬宇宙，戶樞分得幾星霜。欲維白日情千尺，不負青天夢一場。誰似維摩空洞室，茅齋恰好在中央。

柳隄

柳色青青路欲迷，春來隄上好尋詩。烟籠一抹平于砥，雨浥千條弱似絲。馬跡多情十里處，鶯聲如夢六朝時。臺城不少游人展，休唱陽關送別詞。

剪刀

誰知風力剪刀抽，人代天工孰與侔。二月難消吹面割，千金莫買解心愁。詩情筆似并州快，壯思杯澆易水流。悟得裁成春意妙，萬花錦繡一時收。

白芍藥

最愛深情芍藥枝，白欺紅豔更多姿。露迎旭色還添皎，雪殿春光不恨遲。欄外迎風飛

片羽池邊映水浸凝脂美人持贈心中素一樣香雲拂面吹

山海關

第一關頭俯仰思山形千古限華夷開門迎敵伊誰責三百年來悔已遲

斧三首

王業艱難孰見之承平志士獨憂時欲知八百年基礎熟讀三章破斧詩  
端拱垂裳十二章如何繡黼獨生光萬幾一日資乾斷猶是宵衣取則忙  
一斧從知造化工古今得失繫吾衷攜來樵隴松風裏望去冰輪桂魄中破刃元臣安  
帝室爛柯豎子入仙宮抗懷獨有龜山操假手還思萬世功

紅蜻蜓

別開生趣小園中誰似蜻蜓特地紅望杏晨飛初過雨樓荷午倦不禁風  
猩奴蹲視闌干角鳳子相將錦繡叢卻向玉搔頭上看花時寂寞怨深宮

初晴

閒愛山光過雨看初晴猶見白雲漫煙銷柳染條猶重日射花烘蕊未乾  
屋角蛛絲忙網補牆頭雀語乍聲歡幽人收拾青簑笠好趁溪清下釣竿

夏雷四首

赤日行空暑莫當村村田垆桔槔忙一聲霹靂掀天地贏得勞農趁午涼

片雲頭上爲催詩正是幽人道暑時隱隱隆隆疑近遠拈毫揮灑不會知  
東風堤外鶉鴉啼蓮動漁舟下小溪雲裏一聲波影黑魚兒逐隊過橋西  
樵夫腰斧入雲深浹背頰肩息午陰電掣風馳方送爽山鳴谷應又驚心

晉祠

晉陽兵甲已千年今日園林別有天戎馬尙容甌脫限蛟龍豈藉此中眠一池清水迎  
朝旭萬樹濃陰宿暮烟霸主已無今片土空餘名勝屬前賢

湖景

湖遊美景不勝收老境方親范蠡舟一笛聲吞滄浦月千帆影帶洞庭秋無邊烟雨迷  
歸棹不盡江天入倚樓何日石魚閑嘯傲酒徒歷歷坐巴邱

秋塞

塞上秋高古戰場從來雄武喜開疆雁聲落月砂先白馬影斜陽草正黃千里關河驚  
絕域十年征戍動思鄉將軍金甲知寒早一笛風清引斷腸

看雲二首

庭前倚杖久徘徊一見雲生醉眼開當戶拈毫臨畫本憑闌覓句取詩材百年瞬息隨  
舒卷萬里晴空任去來等是無心閑處看人間何事不悠哉

何事能令笑口開爲看雲氣重低徊行如水上波無定立似山中木不材晴暖烟歸

浦去陰濃帶雨過山來放翁盟意堪怡悅相對忘言亦快哉

秦關二首

當年霸王逞雄圖不信千軍敵一夫畢竟天心歸長者子遺父老爲前驅  
河山百二等閒觀形勢東臨盡膽寒今日寂寥爭戰地征人吹笛月中看

秋菊二首

漫誇春日滿庭芳瞬見秋風草木黃尊重人間珍晚節淡香猶得傲清霜  
疏疏老圃竟何依顧盼羣芳已昨非寄傲東籬還自笑獨懷高士與誰歸

菱角

誰採湖菱樂未央寄身常在水雲鄉堆盤磊落鋒仍露入口模稜味更長短棹浮來清  
露滴長歌送去晚風香貧家不識膏粱貴溪女忻添一歲糧

題柱

清江橋畔歎居諸難蜀雄文譽不虛畢竟梁園無諫草茂陵秋雨又何如

新雁

萬里秋高無片雲動人鄉思最殷殷一聲新雁來天未常使深闌枕上聞

楓岸

閒遊斷岸喜霜前幾樹丹楓色倍鮮移棹貪看秋草外停車坐愛晚林邊吳江衣冷孤

飛鷺蕭寺鐘微夜泊船可似春花紅二月長亭十里着先鞭

鳴爐

莫笑齋居長物空小爐睡鴨伴冬烘喜看露處原無水卻羨風摩尚有銅古鏽斑斑千點在微煙息息一絲通重簾鎮日縈香篆常是幽人嘯傲中

玉壺

莫羨青田白玉卮壺中樂趣更誰知芝蘭含蕾皆芳醞珊瑚瓊橫陳有令姿高士買春三斗後仙人邀月百花時江鄉親友情何極一片冰心夢寐思

初冬二首

歲歲嚴冬弱弗禁初寒且喜意惜惜雁聲甫斷更深過蟲語新從牀下吟岸柳待舒期臘訊嶺梅先放見天心不須荷盡悲搖落殘菊猶欣未雪侵容易秋風意已闌初冬且喜歲仍寬未妨釀酒枝梧老卻好添繪準備寒柳蔭乍稀巢影露楓林將落葉聲乾隔溪尚有清遊興始覺橋霜穩步難

松濤二首

習習風來勢不平卻從松裏覺濤生會當登岱輕輿去洗耳千巖萬壑聲獨對松陰病眼開一聲鷺覺夢中回世間萬事空如洗卻看潮頭立馬來

畫錦堂



永叔文章翰墨香千秋勳業重斯堂從來門第因人盛何怪平泉草木荒  
釣雪

寂寞寒江鳥不聞一翁蓑笠雪紛紛直釣去餌休言釣萬古清愁付與君  
貂裘

一龕坐破幾蒲團布衲深宵及雪殘寄語貂裘早朝客五更待漏不勝寒  
除夕

百年日月捷飛騰除夕翻驚一歲增爆竹聲聲童稚樂老人心事佛前燈  
椒酒

歲朝俗事卻非輕椒酒尊前見太平三代遺風知敬老禮從童稚得天成  
春暖

消盡餘寒喜不勝春風送暖看雲蒸重裘頓減尋芳客破衲猶支在定僧放鴨水深浮  
野艇聽鶯林遠買行滕山翁未覺吟肩聳紅日烘窗釋硯冰

走馬燈二首

一火能令燄上升光陰走馬捷飛騰千回萬轉皆空相寶此長明無盡燈  
行來未覺千山遠看去原徒一紙輕道上儘多名利客不緣中熱曷長征  
佛手

有手能扶日月光，爭傳佛國作資糧。不妨指豎參禪悅，正自心清得妙香。擎玉春花迎露白，拈金秋實帶霜黃。算來藥餌長生品，味美還超橘柚芳。

天津橋二首

方慶昇平已百年，年年春在小車前。洛陽久卜安居樂，何事驚心聞杜鵑。

天下雄都數洛陽，往來車馬此康莊。于今安樂窩何在，祇有鷄聲趁曉霜。蘇軾宣統二年

遷洛陽見天津橋尚有一橋未塌土人言北魏初造時七十二橋通而南有邵氏宗祠即安樂宮遺址祠旁有邵氏子孫十數家皆業農

清明

清明時節淚痕潛，子厚遺書讀赧顏。柳綠桃紅迷野外，隻雞斗酒遍墟間。杜鵑啼去遊人醉，蝴蝶飛來客夢閒。何日崩榛休塞路，年年寒食見家山。

雞舌香

誰數龍涎重，上方算來雞舌有。奇香漢宮奏事郎，官貴要使聲傳字字芳。

麒麟

靈物昭昭擬聖賢，由來瑞應總關天。詩徵周召呈祥日，書見春秋絕筆年。盛世幾曾郊概現，深宮猶喜畫圖傳。昌黎一解情無盡，婦孺還知以德先。

梳風

神禹巍然萬世功，艱難沐櫛雨兼風。卻懷士子名場日，簷下埋頭寸晷中。

銅雀臺

臺臨漳水起盤空突兀原知一世雄人自分香天自厭二喬不必怨東風

梨花

東欄如雪一株新百草千花迹已陳炫爛極時春亦老柳陰常伴白頭人

青衫

休將困頓怨功名一領青衫百慮輕柳汁染來文思進松陰罩去道情生雨中斑點春常好江上琵琶淚已傾留得杭州襟尙在酒痕猶記舊縱橫

豐年

從來民以食爲天治世還期大有年春暖新秧和雨插秋深多稼看雲連盈倉父老歌呼樂拾穗兒童笑語顛報賽村村簫鼓競太平雞犬亦欣然

送酒

客無問字欲誰親獨喜良朋送酒頻題壁尙留黃絹婦叩門時有白衣人赤泥乍坵來新餉綠蟻旋傾接近鄰從此幽居多樂事銜杯不患腹中貧

粟

霜露頻經實自開辛盤珍果喜成堆疊疊秋後連村熟戰戰風前傍社栽新婦清晨捧共薦高人深夜芋同煨淵明歸里方真隱千載芳名首重回

槐夏

爲愛高槐夏日宜  
寒音長蔭繫人思  
清陰滿地秋先到  
炎景漫天午不知  
北牖風光三伏日  
南柯身世一炊時  
長安夾道今猶昔  
月掛雲屯有密枝

盤

熟讀湯銘振振詞  
日新三復繫深思  
豈惟六百年王業  
直紹心傳萬世師

枕戈

千秋大節獨臨難  
欲識艱危入夜看  
夢裏飛關塞黑宵  
深骨徹雪霜寒中天  
回日心猶壯待旦  
橫流淚未乾壯士  
百年家國恨豈圖  
帳下一身安

鳩

天生弱質喜園林  
拂羽桑顛有好音  
綠野逍遙原獨樂  
人間晴雨尙關心

書帶草

窗前生意滿吾廬  
天地菁英萃一儒  
遍地干戈高臥老  
山中草亦味經腴

天河

河行天上歷星躔  
雲漢昭回氣象鮮  
誰挽空中無盡水  
甲兵洗淨過千年

琴匣

清獻當年白鶴攜  
卻偕琴匣入川西  
百年塵積留珍秘  
千里風輕付小奚  
古調不傳常

固鎖詩囊未啓且親題一肩行李遽歸去粟里幽人手自齋

謝公墩

遊展平生萬里行半山幽處偶經營六朝風月原無主留得高人百世名

中元

百年邱壠感秋霜底事浮圖作道場千載北邙山下路幾人鷄黍月中忙

菽豆

采茶食鬱卻非時烹菽居然且療飢三代承平人易足幽風七月最堪思

秋雨

秋來景物最多情一雨郊原分外清遊子眼穿征雁杳老農心切晚禾生低垂葭葦波中影蕭瑟梧桐枕上聲獨有幽人意瀟灑小詩偏向此時成

枯荷

幾日新荷事已非枯枝忽見傍苔磯繞堤綠暗烟仍護照水紅蕩露亦稀殘蓋數莖風習習餘香一縷雨霏霏采蓮艇子知何處賸欲尋芳載藕歸

擊磬二首

滿腹憂時一磬聲悠悠心事欲誰傾過門莫解經經意空得千秋荷蕒名  
萬緣歇盡愛禪房擊磬晨昏上佛香更喜中宵從定起一聲清遠意悠長

肉脯二首

修脯高堂佐酒漿百年膳肉薦蒸嘗盤飧日對心滋戚誰識聞韶味更長  
煑鳳烹龍美食單鸞刀縷切卻登盤誰知細嚼冰壘味月夜高人作等觀

泥二首

式微方詠問歸蹤失足泥途困短笻得志能平天下險還教函谷一九封  
春來塘水恰泥融片片飛花落影中燕子啣歸新雨後堂前故壘又添紅

居庸關二首

建瓴雄勢俯燕京得失頻煩與寇爭輪軌已無天下險于今金翅御風行  
煙塵宣大限雄關車駕頻經萬仞山邊外風流天子恨至今香塚尙班班

菊樽

何事樽前喜欲狂菊花晚景愛秋光興來把盞看金色詠罷銜杯覺齒香几上近浮多  
淺碧籬邊遙映恰深黃會當佳節重陽日痛飲人人祝壽康

秋水

多難三秋出苦吟盈盈一水更情深難忘故國鱸鮮遠不盡長天雁影沈烟樹迷茫遊  
子夢霜葭洄遡故人心扁舟短棹歸何處家在江南黃葉林

詠霜

止菴詩外集

詩思撥人是曉雞感懷霜重板橋西周行甚屢心如疾遠水葭泖望欲迷千里風清無雁過三更月落有烏啼最宜行放秋山客茅店聞吟步小谿

皮冠

以旌一召失虞人飾重皮冠豈顧身孔孟心傳綱紀在千秋青史幾遺民

習射

蓬矢桑弧有令名由來男子不虛生騶虞經首蘋蘩節三代于斯享太平

鼠二首

誰知大患起田間蜡祭迎貓防未然巧竊豪偷原莫制欲投忌器更堪憐  
恆言依社托身安畢竟閑評得失難倚勢縱橫方恣意豈知鴟吻嚇鷓鴣

冬日

錢醉閑吟百不知暉暉冬日更相宜晒翎凍雀依簷久弄影游魚出藻遲野叟負暄農事畢詩人映雪晝陰移一年好景還堪愛正是寒松鬱翠時

茯苓

天地菁英金石堅松根匿影已千年幽人採藥深林下一鑿荒山自得仙

花萼樓

開國會操同室戈居然花萼迓天和他年南內傷懷抱記否樓前風月多

合歡鏡二首

影去形來任自逢歡情合寄百年蹤潛消暗換人誰識還憶當前玉貌容  
色卽是空象外詮無端歡戚起纏綿從來離合皆虛相滅盡癡心便得仙

臘日

魯陽何計可揮戈佛粥春盤屈指過欲放山梅風有信待舒岸柳水無波乍聽賽鼓催  
年近閑看祥雲得瑞多歲暮太平新景象村墟父老且酣歌

胡麻

菽粟今無一飯緣子房避穀占幾先何如劉阮天台去但食瑤華自得仙  
景星

億兆惟星拱北辰也曾景福錫斯民從來邦本天心見盛世卿雲一樣新  
春餅

已消臘雪透春光麥隴風來餅餌香但使公庭無猛虎可教閭里得充腸  
歷下亭

濟南城北小滄溟山色湖光共一亭多少詩人鳴盛世龍舟猶記此曾停  
鵲噪

鳥生非必不平鳴鵲噪如何報曉晴喚起人間癡夢醒不辭樹杪一聲聲



春宵

人生歲月苦驚心分寸時時重惜陰何事春來宵苦短方知一刻值千金

連理木

分形同氣本相連物理人情總自然此木倘教能化石望夫名更足千年

山情

天地忘情奈若何古今無盡此山河雄圖不爲興亡改名勝偏驚感慨多千里奔騰形  
突兀百川縈抱氣中和峰巒處處宜風月輪與漁翁瞥眼過

鴛鴦

誰將鴛鴦比鴛鴦三代詩人怨不傷終是聖明宜福祿還廣君子萬年長

觀舞

千羽兩階朔盛時七旬苗格繫人思于今豔舞盈街市遑恤公庭入俗悲

錦繡

令聞廣譽施于身錦繡文章品孰珍一襲千金空炫美還輸市上做寡人

閏月

見月盈虧節不移廿番風汛且須知民生得閏方成歲始信唐虞定四時

靈芝

松壽千年瑞象成靈芝飛節有仙名九莖共染烟霞出三秀還從岱岳生獨立風前參  
造化無根雲裏吐菁英祥光寶劍分明在天下應期洗甲兵

穀雨

老農待澤是春深布穀聲中雨似金猶記聖明天子事陰晴糧價最關心

膾二首

一味肥甘豈療飢徒貪口腹祇成癡深宮莫識窮簷苦翻命饑民食肉糜  
穀食神明壽且康何須膾炙浼枯腸詩書不厭百回讀人口流芬味更長

桃岸

物外田園寄意深春來一水碧沈沈桃花夾岸今猶昔不辨仙源何處尋

寶髻

無量精光佛頂圓看來寶髻尙翩翩螺旋自是盤空結消盡塵根萬劫緣

故宮

五百年來王氣終年年秋月與春風玄宗故事無人說空見名花寂寞紅

龍

一天風雨看雲從隱現難窺首尾蹤變化神明人莫測卻從老子識真容

滇池

楚軍莊躡始開藩習戰昆明漢帝尊今日滇池偏富庶卻教形勢控中原  
羊毫筆

一毫能拔勝中山意態縱橫出指間鄭重中書託康輿好將潑墨寫煙爨  
喜雨

溽暑蒸人汗似漿鋤禾當午老農忙灑然細雨從東至籬下桑根一味涼  
荷葉粥

雅詠荷杯號碧筒更教綠葉粥如醴色香兼味稱三絕悅口清心六月中  
消夏雜詠

炎炎夏日半陰晴何事能消暑不生論畫嘗茶隨意適浮瓜沈李覺心清午看慵燕依  
濃蔭宵聽私蛙噪短更獨有幽人閒詠罷溪遊偏愛一舟輕  
扇

能消炎暑送清風祇在斯人掌握中秋後棄捐非薄倖行藏原不負初衷  
新涼

殘暑無多日新秋一味涼乍能身自適方覺意差強桂霧晨初見荷風晚更香老人詩  
興發清夢繞江鄉  
落日

日暮村居景孤烟趁落暉風清蟬噪急霞斂雁聲稀樵唱渡頭去漁歌浦外歸幽人興未減手自掩荆扉

天河

雲漢昭回照眼明秋來景象一番清不須架鵲成橋會壯士還期洗甲兵

早秋

新製縑衣未覺寒扇猶在手意先闌一天雲薄涼如洗破曉蟬催暑氣殘

殘暑

一入新秋暑氣平殘荷帶雨尙孤擎蟬吟日暮聲猶壯雁過天高影已清紈扇緩揮知汗少縑衣初換覺身輕幽人夢醒添詩思臥聽私蛙噪五更

中秋玩月

月到中秋分外明浩然風露十分清臨軒不盡天涯感舉酒能生萬古情

牽牛花

秋來百卉已全凋一種凡花色更嬌弱質不嫌生少幹卻依松柏上千霄

菊影

休嫌菊淡尙餘香籬下猶堪傲夕陽清影一枝無限好恰看倒映入杯光

尺

由來玉尺少遺材長短縱橫妙剪裁鄭重善量天下士不勞方寸費嫌猜

登高

盛會年年九日遭攜朋載酒不辭勞心隨雁陣千山滅興寄龍山一世豪隱逸幽人還采菊風流名士漫題糕獨憐佳節思親客插遍茱萸詠事高

柿

橙黃橘綠正堪思別有甘鮮一樹奇最愛山村茅舍外垂垂紅實得霜時

雲峰

雲似山峰不善平漫將春睡報春晴卷舒自在知無意起伏天然覺有情疊障千尋時  
變滅屏風九疊勢縱橫獨憐出岫還多事常使幽人百感生

華清宮

一脈溫泉曲折通高低依勢入離宮貴妃浴後人爭豔千古興亡憑弔中

茶鼓

靈鷲山前第幾峰通通茶鼓暮烟濃西湖不少僧行脚誤急歸心飯後鐘

立雪

卓立師門道義欽不知積雪有寒侵原來屋漏堅貞節履薄臨深一樣心

冰紈

忽覺冰肌玉骨清飄然紈縠一身輕誰知烈日蓬窗下揮汗如珠織得成  
撼笛

長笛聲聲起遠村滿腔心事指中論風流名士知音少一曲山陽欲斷魂  
冬蔬

見說東坡喜種蔬心安題額愛吾廬氣含霜露冬餐美彈鋏誰歌食不魚  
金山

山隨塔影過江流名冠東南第一洲千載文人添詠事東坡玉帶至今留  
冰床

水澤冰堅何所施一床安臥得游嬉臨深無復驚濤險履薄還同下坂馳等是寢興高  
枕候儼然橫截亂絲時何當乘興郵亭去趁雪尋梅任所之

雪夜

尋梅乘興夜深回寂寞空庭雪滿堆燈火鮮明銀世界冰輪輝映玉樓臺雲移清影窗  
前過風送寒聲枕畔來獨有衰翁吟不寐短檠相對且銜杯

走馬燈

走馬章臺寄意深華燈猶伴白頭吟三更簫鼓羣兒興千里關山獨客心短燄風前光  
裊裊一鞭月下影沈沈何由喚醒幽閨夢休問征夫墮地金

春餅

休將春景等閒過好事從來問畢羅上已還宜青艾染元辰端合白羊和花林湯湧留  
香久月殿油蒸得影多最愛曲江聞喜宴紅綾拜賜沐恩波

山桃花二首

年年花事首山桃常趁春風二月朝亭外松前紅欲徧依稀草綠映新苗  
物外桃源無處尋山花猶幸有芳林小園千樹開方盛聊慰幽人避世心

早起二首

一輪紅日照高林起聽窗前好鳥音領得清明平旦氣莫因寒甚戀重衾  
鴉鳴窗白正芳辰起趁晴光早有人村巷晨興供井臼那堪朝市逐車塵

春暖

莫嫌北地得春遲驟暖還驚三月期柳綠桃紅方遍處風和日麗恰當時花香小院憑  
鶯語水活清江有鴨知屈指山陰脩禊日聘懷遊目好尋詩

送春二首

千紅萬紫幾多時鶯逐花飛又一奇日暖風和天正好那堪更賦送春詩  
芳名有意費人猜九十光陰最後開今日送春春不住明年仍殿百花來

聽泉

泉聲不厭聽入耳夜泠泠枕上催詩意尊前伴酒醒  
貪廉無異地豐樂有名亭寄語山中客還將清濁銘

柳絮

三月春風費剪裁庭中飛絮殿花開天機鼓舞人難測聚散無心任去來

稻田

覽遍青秧稻隴遊一犁水滿正驅牛休言多稼田家樂沐雨櫛風直到秋

蛙聲

入夏聲喧百草青忽來蛙噪耳邊經每臨野叟尊前鬧常使幽人枕上聽兩部恰添新  
鼓吹千官不屬舊官廷最宜田舍茅簷底半夜疏更伴酒醒

清談

清言莊雅勝于談談笑曾能月幾回正欲評詩逢客至偶思數節報花開風前月下無  
心遇酒美茶甘有興來王衍諸人多妙諦罔干國事又何哉

雄黃酒

蒲劍門懸百魅驅一杯相屬勝醍醐從來日午原當昃正氣乾坤要力扶

曉色

何處高樓報曉鐘鴉鳴窗白正村春方瞻月落天容淨又見風柔樹影濃一片紅霞迎



日出無邊綠野斷烟封幽人晨起尋詩去閒倚柴扉數亂峰

比目魚

魚目如何可混珠方將味美比莼鱸不嫌隻眼隨蓬梗且喜駢肩逐藻蒲收視境能空  
世界曠觀心欲邈江湖試援並翼雙飛鳥物理原難問有無

蟬聲

蟬噪風前端爲誰最撩旅客動秋思聽來搖曳斜陽裏正是馬嘶人倦時

荷葉二首

又見新荷出水鮮延溪點點似金錢汙泥不染無銅臭卻愛青蓮品是仙  
荷香未吐葉先之碧玉亭亭態自奇最好凌晨清露墜珠圓正是走盤時

殘荷

幾日新荷照眼明秋容乍換最關情香殘無復臨風趣蓋立猶堪送雨聲

冰

履霜冰至最驚心千古詩人寄慨深莫怪長安爭苑賣幽風先已詠凌陰

病馬

世間無伯樂病馬孰知音歲月拳毛聳風霜汗血侵沙場身百戰燕市品千金冀北空  
回首秋高萬廐瘖

聞雷

霹靂飛來百物驚無如掩耳一聲輕英雄喪膽尋常事失箸何曾意氣平

鷓鴣

消息傳來碧落中也曾羽翼著軍功于今霹靂從天降奚止鈴聲響半空

秋熱

幾日西風一味涼忽驚餘熱畏秋陽茅簷晚稼期豐稔正喜田間赤日光

月餅

雅似紅綾景色鮮中秋佳節幾家傳桂花香裏堆盤出相對蟾光箇箇圓

聽雨

霏微點滴十分清細雨初來可解醒最喜讀書微倦後焚香臥聽畫簷聲

帆影

雲影天光一水通布帆無恙喜乘風倒懸日落成全白斜映霞烘得半紅入水波平流  
不去凌虛浦遠逝如空更看挂起清宵月千里長空明鏡中

得勝歌

八年抗戰逐天和嘗膽臥薪夜枕戈白髮將軍心力瘁居然還我舊山河扶持得力盟  
堪恃微倖成功理不頗千載英雄造時勢自來王霸等拋梭君不見七十二戰無不利

忽聞楚歌可奈何天道好還從不爽陰陽消長無愆訛橫空霹靂山爲動掃淨風雲海  
不波漫謂千年誇國祚還將一彈靖天麼滿城赤幟迎朝氣父老歡騰鼓腹歌偃武修  
文開百世勝殘去殺善人多善人多常使乾坤正氣與天摩

嘉陵江

蜀道多名勝嘉陵昔所經建瓴千尺白夾岸四山青氣勢從天降濤聲入畫聽扁舟遊  
客棹隨處爲詩停

東籬採菊

悠然何處見南山獨有東籬意興閑採菊幽人千載事淵明高節孰能攀  
霜降

堅冰馴至惜年光葛屨兢兢爲履霜獨有幽人珍晚景東籬偏愛菊花香  
落花生

墨梅

一物還從落地生春花秋實自分明天工不惜多埋沒美質猶須重晚成  
幾枝冷豔色無雙疏影橫斜映曉窗淡墨生綃開畫本天然一幅對寒缸

乞新茶

喜見山頭露葉鮮採茶歌裏曉鶯天詩人何事添幽致乞得銀毫就竹煎

車螯

風味和羹最美時小江烟雨正晨炊桃花流水鮮肥外別是輪囷又一奇

江亭晚眺

獨上江亭意興豪風聲不絕似江濤捲簾卻寄平生快歸雁斜陽一樣高

殘菊

留得殘花送夕陽秋容疏菊最芬芳  
精金淡後仍擎玉寒露欺來尙傲霜  
處士所珍惟晚節  
高人相伴有餘觴  
籬邊光景雖零落歲暮還應歸枕囊

自行車

日行百里若風馳列子泠然或似之  
兩足生雲多自在豈勞趨步賴扶持

初雪

久旱寒風凜凜催忽如飛絮自天來  
農民待澤心先慰喜見祥雲第一回

雁

千里音書不計程江南塞北動關情  
最憐獨客三更夢忽聽孤明月下聲

費宮人故里

乾坤浩劫等蟲沙何似宮人尙有家  
三百年前事回首寒林落日曠樓鴉

冬青樹

列樹園林勁不凋隆冬雪裏尙抽條最憐繞砌闌干角一帶青青秀滿腰  
家書

一紙家書值萬金太平極樂亂離暗等閒何事分憂喜同是乾坤愛育心  
天鵝

何處天鵝叫帝闈天聰更無言大賢獨守千秋業鹿洞尋來別有源  
春雪

料峭春寒景一奇無香有色雨同滋詩人合動遊山興恰似梅開萬樹時  
早梅

鵲噪簷前第一聲寒梅初放雪新晴安排躡屣尋芳始山杏溪桃後有程  
踏青

青青草色好尋詩竹杖芒鞋任所之沽酒聽鶯宜有伴踏來河畔不嫌遲  
蝴蝶

問渠何事爲春忙繞徑穿花賽爾黃蝴蝶是周周是蝶似醒似夢兩相忘  
春柳

春來最愛雨霏霏柳色初勻草正肥樓畔客吟情脈脈陌頭人見夢依依青搖過燕枝  
還弱黃露藏鶯葉尙稀正是江南好風景清陰常罩杏花飛

蠶

一物輕微滿腹絲經綸天下有誰知詩人詠入豳風裏常繫蒼生卒歲思

太平花

上林一樹太平花神武開邊萬里誇市井移來和露種清香猶似帝王家

蟻鬪

蟻聚誠微物紛紛鬪自誇蝸涎猶據角蜂螫尙爭衙逞勢增塗炭甘心費齒牙何當勤掃蕩一雨淨蟲沙

滌硯

臨罷黃庭何所之閒來滌硯俯清池卻看遊戲魚吐墨且喜鬚眉涅不緇

妙峰山

鍾毓王畿千里壯岩嶢雲漢九天高香辰不減承平盛士女漫山似海濤

楊梅

青杏朱櫻未可方楊梅項里喜新嘗枝頭垂實鮮如荔舌本留甘雋似漿

初夏雜詠

清和首夏日初長贏得詩人詠事忙喜見池塘秧水滿閑迎門巷麥風涼晴烘枝上楊梅熟雨洗庭中梔子香回數一春花事了戲拈俚句入奚囊

古槐

獨有高槐閱歲寒誰遺後嗣子孫安百年喬木風烟古累葉三公屈指看

飲冰

飲冷能教內熱蘇陰陽交戰胡爲乎何如保此雙清操一片冰心在玉壺

蝗

一物羣飛能蔽天關心民食豈徒然休誇循吏捕蝗譜吞食還應盛世傳

湯餅會

誰家湯餅得先嘗會食爭看喜氣揚廚下正稱新婦手堂前增覩乳兒光

絲瓜

齣風七月食瓜時老喜羹香此最宜齒豁不須嗟祝哽天然縷膾軟如絲

蓮鬚

蓮開萬柄露垂鬚侵曉清風面面吹羸得波心蜂蝶鬧暗香惟有釣徒知

竹椅

杖履優游老不支閒來竹椅得相隨花前息倦臨風久松下安禪待月遲隨地夜宜聽  
雨坐有時晴爲看雲移一般清潔涼如水且喜先秋病骨知

自鳴鐘

物不能平或使鳴報來昏晚亦心驚自強不息方成德終日乾乾重力行

秋興

容易光陰又到秋興來美景不勝收安排待雨催詩鉢律擬乘風泛釣舟目送征鴻來  
野思心隨奔鹿作山游新涼贏得身常健到處尋幽爲小留

美人蕉二首

靄靄停雲態寂寥小園風雨正飄蕭美人一覺相思夢旋卷心情葉似蕉  
亭亭玉立美人姿豔吐紅雲故故遲卻怪心情常是卷爲傳衷曲寄相思

祀孔

日月臨臨天廣大凡同血氣盡尊親官牆萬仞還如故俎豆馨香百世新

蟬二首

驛路蟬聲到曉鳴遊人征夢正難成忽驚秋色涼如水入耳西風一味清  
一物從來一羽輕枝頭何事不平鳴吸風飲露知無憾堪歎炎涼畢此生

嫦娥

月照官幃舊恨深碧天如水影沈沈從教靈藥忘圓缺一片孤明夜夜心

芋

蹲踞名產擅西州白髮高僧歲月悠丹詔不停煨芋火衡山石窟亦千秋



錢塘觀潮

誰識鴟夷意氣超秋深入月勢千霄會看白馬濤頭立千載孤忠恨未消

苔痕

終年無客叩柴門不見蒼苔有展痕露溼烟籠成片綠飛花點點映朝曦

碧雲寺

佳城蘭若繫人思六百年來蹟尙遺山水鍾靈仍自在忠奸往事有誰知

又爲魏忠賢生墳志

紅葉二首

不羨春花雨露滋牆頭寂寞幾多時休誇晚景紅如火煨煉風霜祇自知  
孤高冷豔殿羣芳不數黃花伴倚牆有色無香堪自喜免教蝶戀與蜂狂

聽歌

菱舟清唱不勝春慷慨悲歌若有神燕市難逢擊筑客齊廷誰識飯牛人三風恆舞官  
時傲九敘惟功德日新安得廣颺逢盛世萬方側耳頌尊親

白塔

番僧曾襲帝師隆五百年前禮禁中一塔尙留天際白孤高獨映夕陽紅

雷峰夕照

放棹西湖盡日忙  
天空雲淨水生光  
雷峰歸去鐘聲晚  
夕照波心塔影長

故鄉

富貴浮雲別故鄉  
錦衣蹣跚夜偏長  
大風歌裏英雄老  
猛士何心念四方